

Namo tassa bhagavato arahato sammāsambuddhassa

Saddanītippakaraṇaṃ

Dhātumālā

15. Saravaggapañcakantika suddhassaradhātu

Ito paraṃ tu sarato, kakārantādibhedato;
Dhātuyo dhātunipphanna-rūpāni vividhāni ca.

Sāṭṭhakathe piṭakamhi, jinapāṭhe yathābalaṃ;
Nayaṃ upaparikkhitvā, samāsenā kathessa'haṃ.

I gatiyaṃ. Yesaṃ dhātūnaṃ gatiattho, buddhipi tesāṃ attho. Pavattipāpuṇānipi. Tatra gamanaṃ duvidhaṃ kāyagamaṇaṃ ñāṇagamaṇaṃ. Tesu **kāyagamaṇaṃ** nāma iriyāpathagamaṇaṃ, **ñāṇagamaṇaṃ** nāma ñāṇupatti, tasmā payogānurūpena “gacchatī”ti padassa “jānātī”tipi attho bhavati, “pavattatī”tipi attho bhavati, “pāpuṇātī”tipi attho bhavati, iriyāpathagamaṇena gacchatītipi attho bhavati, ñāṇagamaṇena gacchatītipi attho bhavati. Tathā hi “sīghaṃ gacchatī”tiādīsu iriyāpathagamaṇaṃ “gamaṇa”nti vuccati. Sundaraṃ nibbānaṃ gato. “Gatimā”tiādīsu pana ñāṇagamaṇaṃ. Evaṃ sabbesampi gatyatthānaṃ dhātūnaṃ yathāpayogaṃ attho gahetabbo.

Tassimāni rūpāni bhavanti – iti, eti, udeti. Kārite “udāyatī”ti rūpaṃ bhavati. Uṭṭhāpetīti hi attho, dukāro āgamo. Upeti, samupeti, veti, apeti, aveti, anveti, sameti, abhisameti, samayo, abhisamayo, īdī, udi, ekodī, paṇḍito, ito, udīto, upeto, samupeto, anvīto, apeto, sameto, etabbo, paccetabbo, paṭiyamāno, paṭicco, ento, adhippeto, adhippāyo, paccayo, aññānīpi yojetabbāni. “Itā, ita”ntiādīnā yathārahaṃ itthinapūmsakavasena. Paccetuṃ, upetuṃ, samupetuṃ, anvetuṃ, sametuṃ, abhisametuṃ, icca, paṭicca, samecca, abhisamecca, apecca, upecca, paṭimukhaṃ itvā, itvāna, upetvā, upetvāna, upetuna, aññānīpi buddhavacanānurūpato yojetabbāni.

Itīti kriyāsaddo, suttantesu na dissati;
Idamettha na vattabbaṃ, dassanāyeva me ruto.

“Itāyaṃ kodharūpena”, iti pāḷi hi dissati;
Aṅguttaranikāyaṃhi, munināhacca bhāsītā;

Vuttañhetāṃ bhagavatā **aṅguttaranikāye** kodhaṃ nindantena –

“Itāyaṃ kodharūpena, maccuveso guhāsayo;
Taṃ damena samucchinde, paññāvīriyena diṭṭhiyā”ti.

Tatra **itāyanti** iti ayanti chedo. **Itīti** ca gacchati pavattatīti attho. Ayaṃ panettha suttapadattho – yo doso loke “kodho”ti lokiyamahājanena vuccati, nāyaṃ atthato kodhoti vattabbo. Kinti pana vattabbo, eso hi sarīrasaṅkhātaguhāsayo maccurājā eva kodhavasena pamaddanto sattasantāne gacchati vattabbo. Taṃ evarūpaṃ “maccurājā”ti vattabbaṃ bahuno janassa anattakaraṃ kodhaṃ hitakāmo damena paññāya vīriyena diṭṭhiyā ca chindeyyāti.

Etīti imassa pana āgacchati attho. “Etī”ti ettha hi āupasaggo sandhikiccena paṭicchannattā na pākāṭo valāhakāvattarito puṇṇacando viya. Tathā hi ettha ā iti etīti sandhiviggaho bhavati, ākārassa ca ikārena parena saddhiṃyeva ekārādeso. Tasmā “ayaṃ so sārathī eti. Etu vessantaro rājā”tiādīsu “āgacchati, āgacchatū”tiādīnā attho kathetabbo. Byākaraṇasatthehi hi ā iti etīti sandhiviggaho dissati, tasmā ayampi nīti sādhukaṃ manasi kātabbā. Atha vā **itīti** rassavasena vuttaṃ padaṃ gamaṇaṃ bodheti, **etīti** vuddhivasena vuttaṃ pana yathāpayogaṃ āgamaṇādīni. Mattāvasena hi

padāni savisesatthāni bhavanti. Taṃ yathā? Sāsane pabbajito, raṭṭhā pabbājito.
Saññogāsaññogavasenapi, taṃ yathā? Gāmā niggacchati. Yasam̐ poso nigacchati, tasmā ayampi nīti
sādhukaṃ manasi kātabbā. Etthetaṃ vuccati –

I gatiyanti kathitā, dhātu vuddhiṃ gatā yadā;
Tadā āgamanatthassa, vācikaṃ pāyato vasā.

Iriyāpathatthato he-sā niccāgamavācikaṃ;
“Ayaṃ so sārathī eti”, iccādettha nidassanaṃ.

Aniriyāpathatthena, vattane gamanepi ca;
Āgamane ca hotīti, dhīmā lakkheyya taṃ yathā.

“Paṭicca phalameṭi”ti, evamādīsu vattane;
Vuddhipattā ikāravhā, esā dhātu pavattati.

“Atthamentamhi sūriye, vāḷā” iccādīsu pana;
Gate, “etīti itī”ti-ādisvāgamane siyā.

Tathā hi itīti anattāya eti āgacchati itī, upaddavo, iti āgamanattho gahetabbo. Āha ca
suttanipātaṭṭhakathāyaṃ “etīti itī, āgantukānaṃ akusalabhāgīnaṃ byasanahetūnaṃ etaṃ
adhivacana”nti.

Idāni yathārahaṃ nipātākhyātanāmikaparīyāpannānaṃ **itiito** saddānamatthuddhāro vuccate –
tattha **itisaddo** hetuparisamāpanādīpadattha vipariyāya pakāravadhāraṇa
nidassanādiyekatthappabhedo. Tathā hesa “ruppatīti kho bhikkhave tasmā rūpanti vuccati”tiādīsu
hetuatthe dissati. “Tasmātiha me bhikkhave dhammāyādā bhavatha, mā āmisadāyādā. Atthi me
tumhesu anukampā, kinti me sāvakaṃ dhammāyādā bhavēyyuṃ, no āmisadāyādā”tiādīsu
parisamāpane. “Iti vā iti evarūpā visūkadassanā paṭivirato”tiādīsu ādiattho. “Māgaṇḍiyoti tassa
brāhmaṇassa saṅkhā samaññā paññatti vohāro nāmaṃ nāmakammaṃ nāmadheyyaṃ nirutti
byañjanamābhilāpo”tiādīsu padatthavipariyāye. “Iti kho bhikkhave sappatibhayo bālo, appatibhayo
paṇḍito. Saupaddavo bālo, anupaddavo paṇḍito. Saupasaggo bālo, anupasaggo paṇḍito”tiādīsu
pakāro. “Atthi idappaccayā jarāmarāṇanti itī puṭṭhena satā ādanda atthitissa vacanīyaṃ. Kiṃ
paccayā jarāmarāṇanti itī ce vadeyya, jātipaccayā jarāmarāṇanti iccassa vacanīya”ntiādīsu
avadhāraṇe. “Atthīti kho kaccāna ayameko anto, natthīti kho kaccāna ayaṃ dutiyo anto”tiādīsu
nidassane. Nipātavaseneva te payogā gahetabbā. “Itāyaṃ kodharūpenā”ti ettha pana ākhyātavasena
gamane **itisaddo** dissati. Ayamevattho idhādhippeto, nipātattho pana na icchitabbo, viññūnaṃ
atthaggahaṇe kosallupādanattham̐ kevalam̐ atthuddhāravasena āgatoti daṭṭhabbam̐. Itaro pana –

Gatyatthe cimasaddatthe, **itosaddo** pavattati;
Anvito”ti hi gatyatthe, paccattavacanaṃ bhavē.

Imasaddassa atthamhi, nissakkavacanaṃ bhavē;
“Ito sā dakkhiṇā disā”, itīādīsu paḷīsu.

Gatyattho icchito ettha, itarattho na icchito;
Atthuddhāravasā vutto, kosallatthāya viññūnaṃ.

Idha pana **samayasaddassa** atthuddhāraṃ sanibbacanaṃ vattabbampi avatvā upari
ayadhātuvisayeyeva vakkhāma **i e ayadhātu**vasena tidhātumayattā **samayasaddassa**. Tatra **itīti**
ikārānantaratyantapadassa ca “eti, udeti”tiādīnañca **ekārānantaratyantapadānaṃ** aññesañca
evarūpānaṃ padamālā yathārahaṃ yebhuyyena attanopadāni vajjetvā yojetabbā. Īdisesu hi thānesu
dukkaṃ kriyāpadamālā. Yasmā pana imasmiṃ pakaraṇe sukaṃ ca dukkaṃ ca **tyantapadamālā**
jānitabbā, tasmā **bhūvādi**gaṇādīsu aṭṭhasu gaṇesu vihitehi channavutiyā vacanehi sabbasādhāraṇaṃ

asabbasādhāraṇaṅca padamālānayaṃ brūma –

Akārānantaratyanta-padānaṃ pantiyo budho;
Bhavati rundhatādīnaṃ, yoje sabbattha sabbathā.

Iti etī’ ti cetesaṃ, padānaṃ pana pantiyo;
Suddhassarapubbakānaṃ, yoje viññū yathārahaṃ.

Ākārānantaratyanta-padānañcāpi pantiyo;
‘‘Yāti suṇāti asnā-ti’’ iccādīnaṃ yathārahaṃ.

Ivaṇṇānantaratyanta-padānamapi pāḷiyo;
Yoje ‘‘rundhiti rundhīti’’-iccādīnaṃ yathārahaṃ.

Ukārānantaratyanta-sutiiti padassa ca;
Peraṇatthe pavattassa, yoje mālaṃ yathārahaṃ.

Ekārānantaratyanta-padānampi yathārahaṃ;
‘‘Jeti rundheti kāreti, kārāpetī’’ tiādīnaṃ.

Okārānantaratyanta-padānampi padakkame;
‘‘Karoti bhoti hotī’’ ti-ādīnaṃ yuttitovade;

Icevaṃ sattadhā vutto, padamālānayo mayā;
Ito mutto nayo nāma, natthi koci kriyāpade.

‘‘Ādatte kurute pete’’, iccādi nayadassanā;
Yathārahaṃ yuttitoti, vacanaṃ ettha bhāsitaṃ.

Idāni ikārānantaratyantapadassa kamo vuccate – iti, inti. Isi, itha. Imi, ima. Aparipuṇṇo vattamānānayo. Itu, intu. Ihi, itha. Imi, ima. Aparipuṇṇo pañcamīnayo. Ettha ca imesaṃ dvinnam sāsānānurūpabhāvassa imāni sādhakapadāni ‘‘veti, apeti, anvetī’’ ti. Tattha vi iti **veti**. Vigacchatīti attho, **itis**addo hettha gamanaṃ bodheti. Tathā apa iti **apeti**. Apagacchatīti attho. Anu iti **anveti**. Anugacchatīti attho. Garū pana anu eti **anvetīti** vadanti. Taṃ –

‘‘Yathā āraññakaṃ nāgaṃ, dantiṃ anveti hatthinī;
Jessantaṃ giriduggesu, samesu visamesu ca;
Evaṃ taṃ anugacchāmi, putte ādāya pacchato’’ ti.

Imāya pāḷiyā na sameti ‘‘jessantaṃ anvetī’’ ti vacanato ‘‘anugacchāmi’’ ti vacanato ca. Tathā hi **etis**addo yattha ce iriyāpathavācako, tattha āgamaṇe ya joteti, na gamanaṃ, tasmā āgamaṇatthassa ayuttito gamaṇatthassa ca yuttito vi itiādīnā chedo ñeyyo. Etesaṅca **itis**addavasena katachedānaṃ atthibhāvaṃ yuttibhāvaṅca ‘‘itāyaṃ kodharūpenā’’ ti pāḷiyeva sādheti, tasmāyeva ‘‘anu iti, anu inti, anu isi’’ tiādīnā ‘‘anvetī’’ tiādīnaṃ chede labbhamānāyena vuttappakāro vattamānāpañcamīnayo parassapadavasena dassito. Sattamirūpādīni sabbathā appasiddhāni.

Imāni pana bhavissantiyā rūpāni, sittā te lahumessati. Issati, issanti. Issasi, issatha. Issāmi, issāma. Issate, issante. Issase, issavhe. Issaṃ, issāmhe. Asabbadhātukattepi suddhassarattā dhātussa ikārāgamo na labbhati. Paripuṇṇo bhavissantiṇayo.

Atha kālātipattiyā rūpāni bhavanti, issā, issaṃsu. Isse, issatha. Issaṃ, issamhā. Issatha, issisu. Issase, issavhe. Issaṃ, issāmhase. Kālātipattibhāve ca asabbadhātukatte ca santepi suddhassarattā dhātussa akārīkārāgamo na labbhati anekantikattā vā anupapannattā ca akārāgamo na hoti. Dvinnāñhettha suddhassarānaṃ anantarikānaṃ ekatosannipāto anupapatti. Paripuṇṇo kālātipattinayo.

Imasmiṃ pana t̄hāne sāt̄thakathe tepītake buddhavacane sotūnaṃ payogattthesu paramakosallajananatthaṃ “nanu te sutamaṃ brāhmaṇa bhaññamāne, devā na issanti purisaparakkamassā”ti pālito nayamaṃ gahetvā vuttappakārehi bhavissantiyā rūpehi sabbaso samānāni asamānatthāni vattamānikarūpāni ca īsakamaṃ aññamaññaṃ samānāni bhavissantīkālātipattīnaṃ rūpāni ca pakāsayissāma – vattamānāvasena tāva “issati, issanti. Issasi, issathā”ti sabbamaṃ yojetabbaṃ. Attho pana “issaṃ karotī”tiādinā vattabbo. Tasmimyeva atthe bhavissantīvasena “ississati, ississanti. Ississasi, ississathā”ti paripuṇṇamaṃ yojetabbaṃ. Attho pana “issaṃ karissati”tiādinā vattabbo. Kālātipattīvasena pana “ississā, ississamsu. Ississe, ississathā”ti paripuṇṇamaṃ yojetabbaṃ, attho pana “issaṃ akarissā”tiādinā vattabbo. Dhātvantaravasena samsandanāyoyamaṃ.

Idāni ekārānantaratyantapadassa kamo vuccate –

Eti, enti. Esi, etha. Emi, ema.

Etu, entu. Ehi, etha. Emi, ema.

Na ca appatvā dukkhantaṃ, vissāsaṃ eyya paṇḍito;
Nivesanāni māpetvā, vedehassa yasassino;
Yadā te pahiṇissāmi, tadā eyyāsi khattiya.

Eyya, eyyuṃ. Eyyāsi, eyyātha. Eyyāmi, eyyāma. Etha, eraṃ. Etho, eyyāvho. Eyyaṃ, eyyāmhe.

So puriso eyya, te eyyuṃ. Tvaṃ eyyāsi, tumhe eyyātha. Ahaṃ eyyāmi, mayaṃ eyyāma. So puriso etha, te eraṃ. Tvaṃ etho, tumhe eyyāvho. Ahaṃ eyyaṃ, mayaṃ eyyāmhe.

Parokkhāhiyyattanajjatanīrūpāni sabbaso appasiddhāni.

Essati, essanti. Essasi, essatha. Essāmi, essāma. Essate, essante. Essase, essavhe. Essaṃ, essāmhe.

Sammodamānā gacchanti, jālamādāya pakkhino;
Yadā te vivadissanti, tadā ehinti me vasaṃ.

“Abhidosagato idāni ehī”ti vacanadassanato aparānipi bhavissantīrūpāni gahetabbāni.

Ehiti, ehinti. Ehisī, ehitha. Ehimī, ehima. EHITE, ehinte. Ehise, ehivhe. Ehissaṃ, ehissāmhe.

Essā, essaṃsu. Esse, essatha. Essaṃ essāmhā. Essatha, essisu. Essase, essavhe. Essiṃ, essāmhase.

Athāparopi ekārānantaratyantapadakkamo bhavati;
Udetī, udeti; Udesi, udeṭha; Uдеми, udeṃa.

Udetu, udetu. Udehi, udeṭha. Uдеми, udeṃa, udāmase.

Udeyya, udeyyuṃ. Sesamaṃ neyyamaṃ. Udissati, udissanti. Sesamaṃ neyyamaṃ. Udissā, udissaṃsu. Sesamaṃ neyyamaṃ.

Imāni suddhassaradhātūrūpāni.

Kakārantadhātu

Ku sadde ke ca. Koti, kavati, kāyati, evamaṃ kattupadāni bhavanti. Kuyyati, kiyyati, evamaṃ kammaṃpadāni. Kānanaṃ, kabbamaṃ, jātakamaṃ, evamaṃ nāmikapadāni. Kutvā, kutvāna, kavivā, kavivāna,

kāvitvā, kāvitvāna, kāyitum, evaṃ abyayapadāni.

Tatra **kānananti** t̥hitamajjhanhikasamaye kavati saddaṃ karotīti kānanam, vanam. Tathā hi –

“T̥hite majjhanhike kāle, sannisīvesu pakkhisu;
Saṇateva brahāraññaṃ, sā rati paṭibhāti ma”nti

Vuttaṃ. Atha vā kokilamayūrādayo kavanti saddāyanti kūjanti etthāti kānanam. Manoharatāya avassaṃ kuyyati paṇḍitehīti **kabbaṃ. Kāvīyam. Kāveyyam.** Aññatra pana kavīnaṃ idanti **kabbanti** taddhitavasena attho gahetabbo. Keci tu **kābyanti** saddarūpaṃ icchanti, na taṃ pāvacane pamāṇam sakkaṭabhāsābhāvato. Sakkaṭabhāsātōpi hi ācariyā nayaṃ gaṇhanti. Jātaṃ bhūtaṃ atītaṃ bhagavato cariyam, taṃ kīyati kathiyati etenāti **jātakam.** Jātakapāli hi idha “jātaka”nti vuttā. Aññatra pana jātaṃ eva jātakanti gahetabbaṃ. Tathā hi **jātakasaddo** desanāyampi vattati “itivuttakam jātakam abbhutadhamma”ntiādīsu. Jātiyampi vattati “jātakam samodhānesī”tiādīsu.

Pakka nīcagatiyam. Nīcagamanam nāma hīnagamanam hīnappavatti vā. **Nīcasaddo** hi hīnavācako “nīce kule paccājāto”ti ettha viya. Pakkati kriyāpadamettha dissati, na nāmikapadaṃ. Yattha yattha nāmikapadaṃ na dissati, tattha tattha nāmikapadaṃ upaparikkhitvā gahetabbaṃ. Kriyāpadameva hi duddasaṃ, kriyāpade vijjamaṇe nāmikapadaṃ natthīti na vattabbaṃ, tasmā antamaso “pakkanaṃ, takanaṃ” iccevamādīni bhāvavācākāni nāmikapadāni sabbāsu dhātūsu yathārahaṃ labbhantīti daṭṭhabbaṃ.

Taka hasane. Hasanam hāso. Takati.

Taki kicchajīvane. Kicchajīvanam kasirajīvanam. Taṅkati. Ātaṅkati. Ātaṅko. **Ātaṅkoti** kicchajīvitakaro rogo, tathā hi aṭṭhakathācariyā “appābādham appātaṅka”nti imasmiṃ pālīppadese itī atthaṃ samvaṇṇesaṃ “**ābādhoti** visabhāgavedanā vuccati, yā ekadesa uppajjitvā sakalasarīraṃ ayapaṭṭena bandhitvā viya gaṇhāti. **Ātaṅkoti** kicchajīvitakaro rogo. Atha vā yāpetabbarogo ātaṅko, itaro ābādho. Khuddako vā rogo ātaṅko, balavā ābādho. Keci pana ‘ajjhattasamuṭṭhāno ābādho, bahiddhāsamuṭṭhāno ātaṅko’ti vadantī”ti.

Ātaṅko āmayo rogo,
Byādhā’bādho gado rujā;
Akallañceva gelaññaṃ,
Nāmaṃ rogābhīdhānakam.

Suka gatiyam. Sokati, suko, sukī. Tatra **sukoti** suvo. Sokati manāpena gamanena gacchatīti suko. Tassa bhariyā sukī.

Bukka bhassane. Idha **bhassanam** nāma sunakhabhassanam adhippetam “sunakho bhassitvā”ti ettha viya, na “āvāso gocaram bhassa”ntiādīsu viya. Vacanasākhātaṃ bhassanam, bukkati sā.

Dhaka paṭighāte gatiyañca. Paṭighāto paṭihananam. Dhakati.

Caka tittipaṭighātesu. Titti tappanam, **paṭighātam** paṭihananamva. Cakati.

Aka kuṭilagatiyam. Akati. Etā **kuādikā akapariyantā** dhātuyo parassa bhāsāti saddasatthavidū vadanti. Tesam mate etā “ti anti, tu antu” iccādīnamyeva visayo. Pāliyam pana niyamo natthi, tasmā na taṃ idha pamāṇam.

I ajjhayane. Ajjhayanam uccāraṇam sikkhanam vā, ayati, adhīyati, ajjhayati, adhīte, ajjhenam, ajjhāyako. Dibbam adhīyase māyam. Adhīyanti mahārāja, dibbamāyidha paṇḍitā. Ajjhenamariyā pathaviṃ janindā. Tattha **ajjhāyakoti** ajjhayati ajjhāyako, mante parivatteti attho.

U **sadde**. Avati, avanti. Avasi. Ettha ‘yo ātumānaṃ sayameva pāvā’ ti pāli **papubbassa** udhātussa payogoti daṭṭhabbo. **Papubbassa vadadhātussa dakāralopappayogotipi vattuṃ yujjati**.

Vaṅka koṭille. Vaṅkati. Vaṅkaṃ. **Vaṅkasaddo** hi **vakkasaddena** samānattho, **vakkasaddo** ca **vaṅkasaddena**. Tathā hi –

‘Yaṃ nissitā jagatiruhaṃ, svāyaṃ aggim pamuñcati;
Disā bhajatha vakkaṅgā, jātaṃ saraṇato bhaya’nti.

Pāli dissati. Ayaṃ pana **vakkasaddo** sakkatabhāsaṃ patvā **kakārarakārasaññogakkhariko** bhavati, dhātubhāvo panassa porāṇehi na vutto, tasmā kriyāpadaṃ na diṭṭhaṃ. Imassa pana **vaṅkasaddassa** ‘**vaṅka koṭille**’ ti dhātubhāvo vutto, ‘vaṅkatī’ ti kriyāpadaṅca, pāliyaṃ tu ‘vaṅkatī’ ti kriyāpadaṃ na diṭṭhaṃ, tathā bhāvavācako **vaṅkasaddopi**. Vāccaliṅgo pana anekesu ṭhānesu diṭṭho. Tatta **vaṅkatī** kriyāpadaṃ pāliyaṃ avijjamānampi gahetabbameva **nāthatī** kriyāpadamiva. Bhāvavācakassa pana **vaṅkasaddassa** atthitā natthitā ca pāliādīsu punappunaṃ upaparikkhitabbā. Kecettha vadeyyuṃ ‘yadi bhāvavācako **vaṅkasaddo** natthi, kathaṃ ‘aṭṭhavaṅkaṃ maṇiratanāṃ uḷāra’nti ettha samāso’ ti. Ettha pana aṭṭhasu ṭhānesu vaṅkaṃ **aṭṭhavaṅkaṃ**, na aṭṭhavaṅkāni yassāti. Dabbavācako hi **vaṅkasaddo**, na bhāvavācakoti daṭṭhabbaṃ.

Vaṅkaṃ vakkaṅca kuṭilaṃ, jimhaṅca rimhamanuju;
Vaṅkasaddādayo ete, vāccaliṅgā tiliṅgikā.

Atha vā **vaṅkasaddo**yaṃ, ‘vaṅkaghastā’ tiādīsu;
Baḷise giribhede ca, vattate sa pumā tadā.

Ayañhi ‘te’ me janā vaṅkaghastā sayanti. Yathāpi maccho baḷisaṃ, vaṅkaṃ maṃsena chāditaṃ. Vaṅkaghastova ambujo’ tiādīsu baḷise vattati.

Ettha siyā ‘nanu ca bho ‘yathāpi maccho baḷisaṃ, vaṅkaṃ maṃsena chādita’nti ettha **vaṅkasaddo** guṇavācako visesanasado, yena baḷiso visesito, tena vaṅkaṃ kuṭilaṃ baḷisanti attho viññāyati’ ti? Tanna, **vaṅkasadde** avuttepi baḷisasabhāvassa vaṅkattā kuṭilattho pākaṭoti natthi visesanasaddena payojanāṃ. Idaṃ pana ‘baḷisaṃ vaṅka’nti vacanaṃ ‘hatthi nāgo. Saroruhaṃ padumaṃ. Hatthī ca kuṅjaro nāgo’ tiādivacanamiva pariyāyavacanāṃ, tasmā ‘vaṅka’nti padassa ‘kuṭila’nti attho na gahetabbo. Atha vā yathā ‘yathā āraññakaṃ nāgaṃ, dantiṃ anveti hatthinī’ ti ettha **nāgasaddassa dantīsaddassa** ca aññamaññapariyā yavacanattepi **dantinti** manoramadantayuttanti attho saṃvaṇṇito, tathā ‘baḷisaṃ vaṅka’nti imesampi aññamaññaṃ pariyāyavacanattepi **vaṅkanti** kuṭilanti attho vattabbo. Evañhi sati attho sālārājā viya suphullito hoti, desanā ca vilāsappattā, na pana ‘vaṅkaṃ baḷisa’nti saddānaṃ guṇaguṇīvasena samānādhikaraṇabhāvo icchitabbo ‘buddho bhagavā verañjāyaṃ viharati’ tiādīsu ‘buddho bhagavā’ ti imesaṃ viya samānādhikaraṇabhāvassa anicchitabbattā. Na hi īdīsesu ṭhānesu samānādhikaraṇabhāvo porāṇehi anumato.

‘Yattha etādīso sathā, loke appaṭipuggalo;
Tathāgato balappatto, sambuddho parinibbuto’ ti,

‘Buddhaṃ buddhaṃ nikhilavisayaṃ suddhiyā yāva suddhi’nti ca ādīsu pana anumato. Ettha hi ‘etādīso’ ti ca ‘appaṭipuggalo’ ti ca ‘tathāgato’ ti ca ‘balappatto’ ti ca ‘sambuddho’ ti ca ‘parinibbuto’ ti ca imāni ‘sathā’ ti anena padena samānādhikaraṇāni. Tathā ‘buddhaṃ buddha’nti dvinnāṃ padānaṃ pacchimāṃ purimena samānādhikaraṇaṃ bhavati.

Iti ‘yathāpi maccho baḷisaṃ, vaṅkaṃ maṃsena chādita’nti ettha **vaṅkasaddo** baḷisassābhīdhanantaraṃ, na guṇavācako. Evaṃ **vaṅkasaddo** baḷise vattati. ‘Kaṅkaṃ gacchāma pabbataṃ. Dūre vaṅkatapabbato’ tiādīsu pana girivīsesa vattati. Ettha ca ‘vaṅkapabbato’ ti vattabbe sukhuccāraṇatthaṃ niruttinayena majjhe animittaṃ **takārāgamaṃ** katvā ‘vaṅkatapabbato’ ti vuttaṃ.

Atha vā vaṅkoyeva vaṅkatā, yathā devo eva devatā. Yathā ca disā eva disatāti, evaṃ tūpaccayavasena vaṅkatā ca sā pabbato cāti “vaṅkatapabbato”ti vuttaṃ, majjhe rassavasena cetam daṭṭhabbam. Atha vā vaṅkamassa saṅghānamatthīti vaṅkatoti **mantu**atthe **tapaccayo**, yathā pabbamassa atthīti pabbatoti. Evaṃ vaṅkato ca so pabbato cāti vaṅkatapabbato. “Vaṅkapabbato” icceva vā paṇṇatti, pādakkharapāripūriyā pana “dūre vaṅkatapabbato”ti vuttanti daṭṭhabbam.

Loka dassane. Lokati. Loko. Ālokoti aññānīpi rūpāni gaheṭabbāni. **Curādigaṇaṃ** pana patvā imissā “loketi, lokayati, oloketi, olokayati”tiādinā rūpāni bhavanti. **Lokoti** tayo lokā saṅkhāraloko sattaḷoko okāsalokoti. Tatha “eko loko, sabbe sattā āhāraṭṭhitikā”ti āgato saṅkhāro eva loko saṅkhāraloko. Sattā eva loko sattaḷoko. Cakkavāḷasaṅkhāto okāso eva loko okāsaloko, yo “bhājanaloko”tipi vuccati. Tesu saṅkhāro lujjati lokoti. Vuttañhetam bhagavatā “lujjati palujjati kho bhikkhu tasmā lokoti vuccati”ti. Lokiyati ettha puññapāpaṃ tabbipāko cāti satto loko. Lokiyati vicittākārato dissati cakkavāḷasaṅkhāto okāso loko. Yasmā pana **lokasaddo** samūhepi dissati, tasmā lokiyati samudāyavasena paññāpiyatīti loko, samūhoti ayampi attho gaheṭabbo. Atha vā **lokoti** tayo lokā kilesaloko bhavaloko indriyalokoti. Tesam sarūpaṃ **curādigaṇe** kathessāma bahuvidhataṅga. Bahiddhā pana kavīhi “loko tu bhuvane jane”ti ettakameva vuttaṃ.

Siloka saṅghāte. Saṅghāto piṇḍanaṃ. Silokati, siloko, silokamanukassāmi. Akkharapadanīyamito vacanasāṅghāto **siloko**. So pajjanti vuccati, tathā hi “siloko yasassi pajje”ti kavayo vadanti.

Deka dheka saddussāhesu. Saddo ravo, **ussāho** vāyāmo. Dekati. Dhekati.

Reka saki saṅkāyaṃ. Rekati. Saṅkati, tasmim me saṅkate mano. Saṅkā.

Aki lakkhaṇe. Aṅkati, aṅko, sasaṅko.

Maki maṇḍane. Maṇḍanaṃ bhūsaṅgaṃ, maṅkati.

Kata loliye. Lolabhāvo **loliyaṃ** yathā dakkhiyaṃ. Kakati, kāko, kākī. Ettha “kāko, dhaṅko, vāyaso, bali, bhoji, ariṭṭho”ti imāni kākābhīdhānāni.

Kuka vaka ādāne. Kukati, vakati, koko, vako. Ettha **kokoti** araṅgasunakho. **Vakoti** khuddakavanadīpiko, byagghotipi vadanti.

Vaka dittiyaṃ paṭighāte ca. Ditti sobhā, vakati.

Kaki vaki sakka tika ṭika seka gatyatthā. Kaṅkati, vaṅkati, sakkati, nisakkati, parisakkati, osakkati, vadhāya parisakkaṅgaṃ. Bīḷāranisakkamattampi. Tekati, ṭekati, ṭikā sekati. Ettha **ṭikāti** ṭikiyati jāniyati saṃvaṇṇanāya attho etāyati ṭikā. Etā idhātuādikā **sekapariyaṅgā** dhātuyo “**attanobhāsā**”ti saddasatthavidū vadanti. Tesam mate etā “te ante, tam antam”iccādīnaṃyeva visayo, pāvacaṇe pana niyamo natthi.

Hikka abyattasaddo. Abyattasaddo avibhāvitatthasaddo niraṭṭhakaṅgasaddo ca. Hikkati, hikkate. Imaṃ “**ubhayatobhāsā**”ti vadanti. Imaṃ tu pāvacaṇena saṃsandati. Parassattanobhāsānaṅgi dhātūnaṃ “bhavati, bhavate, bādgate, bādhati”tiādinā yebhuyyena dvidhā dvidhā rūpāni sāsane dissanti.

Imāni **kakārantadhātūrūpāni**.

Khakārantadhātu

Khā pakathane khyā ca. **Pakathanaṃ** ācikkhaṅgaṃ desanaṃ vā. Khāti, saṅkhāti. Āpubbatte visadisabhāvena **khātyakkharassa** dvittaṃ, **ākārassa** ca saññogapubbattā rassattaṃ, akkhāti. Akkhāsi

purisuttamo. Akkheyyaṃ te ahaṃ ayye. Dhammo saṅkhāyati. Akkhāyati. Atra pana **ka**kāralopo. Svākhāto bhagavatā dhammo. Saṅkhāto. Akkhāto. Akkhātāro tathāgatā. Saṅkhātā sabbadhammānaṃ vidhuro. Saṅkhā, paṭisaṅkhā. Kriyaṃ ākyāti kathetīti ākhyātaṃ. Keci pana “svākhāto”ti ca “svākhyāto”ti ca “svākhyāto”ti ca padamicchanti. Tattha pacchimāni sakkaṭabhāsāto nayaṃ gahetvā vuttāni, itaraṃ yathāṭṭhitarūpanipphattivasena, ato yathādassitapadāniyeva pasatthatarāni. Tattha **saṅkhā**saddassa atthuddhāro nīyate – **saṅkhā**saddo ñāṇakoṭṭhāsapaññattigaṇānāsu dissati. “Saṅkhāyekaṃ paṭisevatī”tiādīsu hi ñāṇe dissati. “Papañcasaññāsaṅkhā samudācarantī”tiādīsu koṭṭhāse. “Tesaṃ tesaṃ dhammānaṃ saṅkhā samaññā”tiādīsu paññattiyaṃ. “Na sukaraṃ saṅkhātu”ntiādīsu gaṇānāyaṃ. Etthetaṃ vuccati –

“Ñāṇapaññattikoṭṭhāsa-gaṇānāsu padissati;
Saṅkhāsaddoti dīpeyya, dhammadīpassa sāsane”ti.

Khi khaye. Khiyanadhammaṃ khīyati. Sāsanānurūpena sare **ikārassa iyyā**deso, khiyyati. “Khayo, khaṃ” iccapi rūpāni ñeyyāni. Tattha **khayoti** khiyanam khayō. Atha vā khiyanti kilesā etthāti khayō, magganibbānāni. Khayasāṅkhātena maggena pāpuṇiyattā phalampi khayō. **Khanti** tucchaṃ suññaṃ vivittaṃ rittaṃ, **khanti** vā ākāso.

Khi nivāse. Khīyati, khiyyati vā. Sāsanānurūpena **ikārassa iya iyyā**deso daṭṭhabbo. Ayaṃ **divā**digaṇepi pakkhipitabbo. Khaṃ khayam. Abhiramaṇīyam rājakkhayam. Tattha **khīyatīti** nivasati. **Khanti** cakkhādiindriyam cakkhuviññāṇādīnaṃ nivāsaṭṭhena. **Khayanti** nivesanam. **Rājakkhayanti** rañño nivesanam. Atrāyam pāḷi –

“Sace ca ajja dhāresi, kumāraṃ cārudassanam;
Kusena jātakhattiyam, savaṇṇamaṇimekhalam;
Pūjitā ñātisaṅghehi, na gacchasi yamakkhaya”nti.

Tattha **yamakkhayanti** yamanivesanam.

Khu sadde. Khoti khavati.

Khe khādanasattāsu. Khāyati. Undūrā khāyanti. Vikkhāyitakam. Gokhāyitakam. Assirī viya khāyati. Disāpi me na pakkhāyanti. Etthādimhi **kāyatīti** khādāti. Atha vā upaṭṭhāti paññāyati.

Sukha dukkha takriyāyam. **Takriyāti** sukhadukkhānaṃ vedanānaṃ kriyā, sukhanam dukkhananti vuttaṃ hoti. Akammakā ime dhātavo. Sukhati, dukkhati. Sukham, dukkham. Sukhito, dukkhito. Sukham sātāṃ pīṇanam, dukkham vighātaṃ agham kilesō. Tattha **sukhanti** sukhayātīti sukham. Yassuppajjati, taṃ sukhitam karotīti attho. **Dukkanti** dukkhayātīti dukkham. Yassuppajjati, taṃ dukkhitam karotīti attho. Imāni nibbānāni kāritavasena vuttānīti daṭṭhabbam **aṭṭhakathāyam sukhadukkhasaddattham** vadantehi garūhi **sukhayati dukkhayatisaddānaṃ** kammaṭṭhamādāya vivaraṇassa katattā. Tathā hi “sukheti sukhayati, sukhāpeti sukhāpayati, dukkheti dukkhayati, dukkhāpeti dukkhāpayati”ti imāni tesaṃ kāritapadarūpāni, attānaṃ sukheti pīṇetīti ca, sukhayati sukham, dukkhayātīti dukkhanti ca,

“Sace ca kimhici kāle,
Maraṇam me pure siyā;
Putte ca me paputte ca,
Sukhāpeyya mahosadho”ti ca

Pāḷīdidassanato. Saddasatthe pana dhātupāṭhasaṅkhepe ca ime dhātavo **curā**digaṇeyeva vuttā. “Sukhayati dukkhayati”ti ca akāritāni suddhakattupadāni icchitāni. Mayaṃ tu tesaṃ tabbānaṃ suddhakattari ca tāni padarūpāni na icchāma pāḷīādīhi viruddhattā, tasmāyeva te imasmim **bhūvā**digaṇe vuttā. Ayañhi suddhakattuviseyā asmākaṃ ruci “sukhatīti sukhito, dukkhatīti dukkhito”ti.

Nanu ca bho “sukhati dukkhatī”ti kriyāpadāni buddhavacane na dissantīti? Saccam, evam santepi aṭṭhakathānayasena gahetabbatā dissantiyeva nāma. Na hi sabbathā sabbesam dhātūnam rūpāni sāsane loke vā labbhanti, ekaccāni pana labbhanti, ekaccāni na labbhanti. Evam santepi nayavasena labbhantiyeva. “Kappayavho patissatā”ti hi diṭṭhe “caravho bhuñjavho”tiādīnipi nayavasena diṭṭhāniyeva nāma.

Tatra panāyam nayo. **Visuddhimaggā**dīsu hi “ekadvijojanamattampi addhānam gatassa vāyo kuppati, gattāni dukkhatī”ti evam **bhūvādigaṇika**ṃ akammakaṃ suddhakattuvācakaṃ “dukkhatī”ti kriyāpadaṃ dissati. Tasmim diṭṭhiyeva “sukhati, sukhanti. Sukhasi, sukhattha. Sukhāmi, sukhāmā”tiādīni ca “dukkhati, dukkhanti. Dukkhasi, dukkhatthā”tiādīnica diṭṭhāni nāma honti diṭṭhena adiṭṭhassa tādisassa anavajjassa nayassa gahetabbatā, tasmā “sukhatīti sukhito, dukkhatīti dukkhito”ti **bhūvādī**nayo eva gahetabbo, na pana **curādī**nayo. Aparampettha nibbacanaṃ, sukhaṃ sañjātaṃ etassāti **sukhito**, sañjātasukhoti attho. Esa nayo **dukkhitoti** etthāpi. Atha vā sukkena ito pavattoti sukhito. Esa nayo “dukkhito”ti etthāpi. Dullabhāyam nīti sādhuṃ manasi kātabbā.

Mokkha muccane. Akammakoyaṃ dhātu. Mokkhati. Mokkho. Pātimokkho. Kārite “mokkheti, mokkhayati, mokkhāpeti, mokkhāpayati”ti rūpāni. Keci panimaṃ “**mokkha mocane**”ti paṭhitvā **curādīgaṇe** pakkhipanti. Tesam mate “mokkheti, mokkhayati”ti suddhakattupadāni bhavanti. Etāni pāḷiyā aṭṭhakathāya ca virujjhanti. Tathā hi “mokkhanti mārabandhanā. Na me samaṇe mokkhasi. Mahāyaññaṃ yajissāma, evam mokkhāma pāpakā”ti pāḷiyā virujjhanti. “Yo naṃ pāti rakkhati, taṃ mokkheti moceti āpāyikādīhi dukkhehīti **pātimokkho**”ti aṭṭhakathāya ca virujjhanti, tasmā pāḷiyam “mokkhesi mokkhemā”ti ca avatvā “mokkhasi, mokkhāmā”ti suddhakattuvācakaṃ vuttaṃ, tañca kho apādānavisayaṃ katvā. **Aṭṭhakathāyam** pana “mokkheti, moceti”ti hetukattuvācakaṃ vuttaṃ, tampi apādānavisayaṃyeva katvā. Evam imassa dhātuno suddhakattuvisaye akammakabhāvo vidīto, hetukattuvisaye ekakammakabhāvo vidīto **muca paca chidā**dayo viya. **Mokkhadhātu** dvigaṇikoti ce? Na, anekesu sāṭṭhakathesu pāḷippadesesu “mokkheti, mokkhayati”ti suddhakatturūpanam adassanatoti daṭṭhabbam.

Kakkha hasane. Kakkhati.

Okha rākha lākha dākha dhākha sosanālamatthesu. Okhati. Rākhati. Lākhati. Dākhati. Dhākhati.

Sākha byāpane. Sākhati. Sākhā.

Ukha nakha makha rakha lakha rakhi lakhi ikhi rikhi gatyatthā. Ukhati. Nakhati. Makhati. Rakhati. Lakhati. Raṅkhati. Lanṅkhati. Inṅkhati. Riṅkhati.

Rakkha pālāne. Rakkhati. Rakkhā, rakkhaṇam, sīlam rakkhito devadatto, sīlam rakkhitam devadattena, sīlam rakkhako devadatto.

Akkha byattisaṅkhātesu. Akkhati, akkhi, akkham.

Nikkha cumbane. Nikkhati, nikkham.

Nakkha gatiyam. Nakkhati. Nakkhattam. Ettha **nakkhattanti** etto ito cāti visamagatiyā agantvā attano vīthiyāva gamanena nakkhanaṃ gamanaṃ tāyati rakkhatīti nakkhattam. Porāṇā pana “nakkharanti na nassantīti **nakkhattāni**”ti kathayimsu. “Nakkhattam, joti, nirikkham, bham” iccete pariyāyā.

Vekkha vekkane. Vekkhati.

Makkha saṅkhate. Makkhati.

Takkha tapane. Tapanam samvaraṇam. Takkhati.

Sukkha anādare. Sukkhati.

Kakhi vakhi makhi kaṅkhāyam. Satthari kaṅkhati. Vaṅkhati, maṅkhati. “Kaṅkhā kaṅkhāyanā kaṅkhāyitattam vimati vicikicchā dvelhakaṃ dvedhāpatho saṃsayo anekamaṃsagāho āsappanā parisappanā apariyogāhanā thambhitattam cittassa manovilekho” iccete kaṅkhāpariyāyā. Etesu pana –

Vattanti lokavohāre, “kaṅkhā vimati saṃsayo;
Vicikicchā”ti etāni, nāmāniyeva pāyato.

Kakhi iccāyam. Dhanam kaṅkhati, abhikaṅkhati, nābhikaṅkhāmi maraṇam. Abhikaṅkhitam dhanam.

Dakhi dhakhi ghoravāsīte kaṅkhāyañca. Daṅkhati. Dhaṅkhati.

Ukkha secane. Ukkhati.

Kakha hasane. Kakhati.

Jakkha bhakkhaṇe ca. Hasanānukaḍḍhanattham cakāro. Jakkhati.

Likha lekhane. Likhati, sallekhati. Atisallekhatevāyam samaṇo. Lekhā, lekhanam, lekhako, likhitam, sallekhapaṭipatti, etā **dakhiādikā likh**apariyantā “**parassabhāsā**”ti saddasatthavidū vadanti.

Dhukkha dhikkha sandīpanakilesanajīvanesu. Dhukkhati. Dhikkhati. Saddasatthavidū pana “dhukkate dhikkate”ti **attanobhāsam** vadanti. Tathā ito parāni rūpāni.

Rukkha vakkha varaṇe. Varaṇam samvaraṇam. Rukkhati. Vakkhati. Rukkho, vakkho. Ettha ca **vakkhoti** rukkho yeva. Tathā hi “sādūni ramaṇīyāni, santi vakkhā araṇṇajā”ti jātakapāṭho dissati. Imāni pana rukkassa nāmāni –

“Rukkho mahīruho vakkho, pādapo jagatīruho;
Ago nago kujo sākhi, sālo ca viṭapī taru;
Dumo phalī tu phalavā, gaccho tu khuddapādapo”ti.

Kecettha vadeyyum “nanu ca **sālasaddena** sālarukkho yeva vutto, nāñño ‘sālā phandanamāluvā’ti payogadassanato, atha kimattham **sālasaddena** yo koci rukkho vutto”ti? Na sālarukkho yeva **sālasaddena** vutto, atha kho sālarukkhepi vanappatijēṭṭharukkhepi yasmim kasmīñci rukkhepi “sālo”ti vohārassa dassanato aññepi rukkha vuttā. Tathā hi sālarukkhopi “sālo”ti vuccati. Yathāha “seyyathāpi bhikkhave gāmassa vā nigamassa vā avidūre mahantaṃ sālavanam, tañcassa eḷaṇḍehi sañchannaṃ. Antarena yamakasālāna”nti. Vanappatijēṭṭharukkhopi. Yathāha –

“Taveva deva vijjite, tavevuyyānabhūmiyā;
Ujuvaṃsā mahāsālā, nīlobhāsā manoramā”ti.

Yo koci rukkhopi. Yathāha “atha kho taṃ bhikkhave māluvabījam aññatarasmim sālāmūle nipateyyā”ti. Atridaṃ vuccati –

“Sālarukkhe jeṭṭharukkhe,
Yasmim kasmīñci pādape;
Sālo iti ravo sālā,

Sandhāgāre thiyam siyā’ ti.

Sikkha vijjopādāne. Sikkhati. Sikkhā, sikkhanaṃ, sikkhitam sippaṃ, sikkhako, sikkhito, sekkho, asekkho. **Kakāralope** “sekho asekho” ti rūpāni bhavanti. Tattha **sikkhitoti** sañjātasikkho, asikkhīti vā sikkhito, tathā hi kattuppayogo dissati “ahaṃ kho pana susikkhito anavayo sake ācariyake kumbhakārakamme” ti.

Bhikkha yācane. Bhikkhati. Bhikkhu, bhikkhā, bhikkhanaṃ, bhikkhako, bhikkhitam bhojanaṃ. Ettha pana “bhikkhu yati samaṇo muni pabbajito anagāro tapassī tapodhano” iccetāni pariyaavacanāni. Etesu sāsane “bhikkhū” ti upasampanno vuccati. Kadāci pana “bhikkhusataṃ bhojesi, bhikkhusahassaṃ bhojesi” tiādīsu sāmaṇerepiupādāya “bhikkhū” ti vohāro pavattati, tāpasāpi ca **samaṇasaddādīhi** vuccanti, “ahū atītamaddhāne, samaṇo khantidīpano” tiādi ettha nidassanaṃ.

Dakkha vuddhiyaṃ sīghatte ca. Dakkhati, dakkhiṇā, dakkho. Dakkhanti vaddhanti sattā etāya yathādhippetāhi sampattīhi iddhā vuddhā ukkaṃsagatā hontīti **dakkhiṇā**, dātabbavattu. Dakkhati kusalakamme aññasmiṃca kiccākicce adandhatāya sīghaṃ gacchatīti **dakkho**, cheko, yo “kusalo” tipī vuccati.

Dikkha muṇḍiopianayananiyamabbatādesesu. **Dikkhadhātu** muṇḍiye, upanayane, niyame, vate, ādese ca pavattati. Dikkhati. Dikkhito muṇḍo. Ettha siyā – nanu ca bho **sarabhaṅgajātaka** “gandho isīnaṃ ciradikkhitānaṃ, kāyā cuto gacchati mālutenā” ti etasmim padese aṭṭhakathācariyehi “**ciradikkhitānanti** cirapabbajitāna” nti vuttaṃ. Na hi tattha “ciraṃmuṇḍāna” nti vuttaṃ. Evaṃ sante kasmā idha “**dikkhadhātu** muṇḍiye vuttā” ti? Saccam, tattha pana **dikkhitasaddassa** pabbajite vattanato “cirapabbajitāna” nti vuttaṃ, na dhātuatthassa vibhāvanatthaṃ. Ida pana dhātuatthavibhāvanatthaṃ muṇḍiye vuttā. Tāpasā hi muṇḍiyatthavācakena **dikkhitasaddena** vattum yuttā. Tathā hi aṭṭhakathācariyehi **cakkavattisuttatthavaṇṇanāyaṃ** “kesamassuṃ ohāretvā kāsāyāni vatthāni acchādetvā” ti imissā pāḷiyā atthavivarane “tāpasapabbajam pabbajantāpi hi paṭṭhamaṃ kesamassuṃ ohārenti, tato paṭṭhāya parūḷhakese bandhitvā vivaranti, tena vuttaṃ kesamassuṃ ohāretvā” ti evaṃ attho saṃvaṇṇito.

Ikkha dassanaṅkesu. Ikkhati, upekkhati, apekkhati. Upekkhā, apekkhā, paccavekkhaṇā. **Kakāralope** “upekhā, apekhā, upasampadāpekho” ti rūpāni bhavanti.

Dukkha hiṃsāgatīsu. Dakkhati. Dakkhako.

Cikkha cakkha viyattiyam vācāyaṃ. Cikkhati, ācikkhati, abbhācikkhati. Ācikkhako. Cakkhati, cakkhu. Ettha **cakkhūti** cakkhatīti cakkhu, samavisamaṃ abhibyattaṃ vadantaṃ viya hotīti attho. Atha vā “sūpaṃ cakkhati, madhuṃ cakkhati” tiādīsu viya yasmā assādatthopi **cakkhusaddo** bhavati, tasmā “cakkhati viññāṇadhīṭṭhitam rūpaṃ assādentam viya hotī” ti assādatthopi gahetabbo. “Cakkhum kho māgaṇḍiyaṃ rūpārāmaṃ rūparataṃ rūpasammudita” nti hi vuttaṃ. Satipi sotādīnaṃ saddārāmatādibhāve nirūḷhattā nayane eva **cakkhusaddo** pavattati **paṅkajādisaddā** viya padumādīsu.

Cakkha’kkhi nayanam, locanam ditṭhi dassanam;
Pekkhanaṃ acchi pamhaṃ tu, “pakhuma” nti pavuccati.

Etā **rukkhādikā cakkhāpariyantā** “**attanobhāsā**” ti saddasatthavidū vadanti.

Khakārantadhaturūpāni.

Gakārantadhātu

Gu karīsussagge. **Karīsussaggo** vaccakaraṇaṃ. Gavati. **Ge sadde.** Gāyati. Gītaṃ.

Vagga gatiyaṃ. Vaggati. Vaggo, vaggitaṃ. Ettha samudāyavasena vagganaṃ pavattanaṃ **vaggo**. **Vaggitanti** gamaṇaṃ. Tathā hi **nāgapetavatthuṭṭhakathāyaṃ** “yo so majjhe assatārīathena catubbhi yuttena suvaggitena. Amhākaṃ putto ahu majjhimo so, amaccharī dānapatī virocātī”ti imissā pāḷiyā atthaṃ vadantehi “**suvaggitenā**ti sundaragamanenā”ti. Kiñci bhiyyo kriyāpadampi ca diṭṭhaṃ “dhunanti vagganti pavattanti cambare”ti.

Ragi lagi agi vagi magi igi rigi ligi tagi sagi gamane ca. Cakāro gatipekkhako. Raṅgati. Raṅgo. Laṅgati. Laṅgo, laṅgī. Aṅgati, aṅgeti. Aṅgo, samaṅgī, samaṅgitā, aṅgaṃ, aṅgaṇaṃ. Vaṅgati. Vaṅgo. Maṅgati. Maṅgo, upaṅgo, maṅgalaṃ. Iṅgati. Iṅgitaṃ. Riṅgati. Riṅganaṃ. Liṅgati. Liṅganaṃ. Ulliṅgati, ulliṅganaṃ. Taṅgati. Taṅganaṃ. Saṅgati. Saṅganaṃ. Tattha **aṅgati** yesaṃ kesañci vatthūnaṃ avayavo, sarīraṃpi kāraṇaṃpi ca vuccati. **Aṅgaṇanti** katthaci kilesā vuccanti “rāgo aṅgaṇa”ntiādīsu. Rāgādayo hi aṅgati etehi taṃsamaṅgipuggalā nihīnabhāvaṃ gacchantīti “**aṅgaṇāni**”ti vuccanti. Katthaci malaṃ vā paṅko vā “tasseva rajassa vā aṅgaṇassa vā pahānāya vāyamatī”tiādīsu. Añjati makkhetīti hi aṅgaṇaṃ, malādi. Katthaci tathārūpo vivaṭappadeso “cetiyaṅgaṇaṃ, bodhiyaṅgaṇa”ntiādīsu. Añjati tattha ṭhitaṃ atisundaratāya abhīyañjetīti hi aṅgaṇaṃ, vivaṭo bhūmippadeso. Icevaṃ –

Rāgādīsu kilesesu, paṅke kāyamalamhi ca;
Vivaṭe bhūmibhāge ca, “aṅgaṇa”nti ravo gato.

Yugi jugi vajjane. Yuṅgati. Juṅgati.

Ragi saṅkāyaṃ. Raṅgati.

Laga saṅgeca. Ca kāro anantaravuttāpekkhako. Lagati. Ca jato na hoti laganāṃ. Baḷise laggo.

Thagaṃ saṃvaraṇe. Thagati.

Agga kuṭilagatiyaṃ. Aggatīti aggi, kuṭilaṃ gacchatīti attho.

Aggi dhūmasikho joti, jātavedo sikhī gini;
Aggini bhāṇumā tejo, pāvako tivako’nalo.

Hutāsano dhūmaketu, vessānaro ca accimā;
Ghatāsano vāyusakho, dahano kaṇhavattani.

Etā **guādikā** **aggapariyantā** “**parassabhāsā**”ti saddasatthavidū vadanti.

Gā gatiyaṃ. Gāti.

Gu sadde. Gavati.

Gu uggame. **Uggamo** uggamaṇaṃ pākaṭatā. Gavati. Saddasatthavidū panimāsaṃ “gāte gavate”ti **attanobhāsattaṃ** vadanti.

Gakārantadhāturūpāni.

Ghakārantadhātu

Ghā gandhopādāne. Ghāti. Ghānaṃ. Gandhaṃ ghatvā. Atrāyaṃ pāḷi “gandhaṃ ghatvā sati muṭṭhā”ti. Etissā pana **divādigaṇaṃ** pattāya “ghāyati ghāyitvā”ti rūpāni bhavanti.

Ghu abhigamane. **Abhigamaṇaṃ** adhigamaṇaṃ. Ghoti.

Jaggha hasane. Jagghati, sañjagghati. Sañjagghitto mayā saha. Jagghitumpi na sobhati. Jagghitvā.

Taggha pālāne. Tagghati.

Sighi āghāne. Āghānaṃ ghānena gandhānubhavanaṃ. Singhati, upasinghati. Upasinghitvā. Ārā siṅghāmi vārijaṃ. Etā “**parassabhāsā**”ti saddasatthavidū vadanti.

Ghu sadde. Ghoti, ghavati.

Raghi laghi gatyakkhepe. **Gatyakkhepo** gatiyā akkhepo. Raṅghati, laṅghati, ullaṅghati. Laṅghitā, ullaṅghikāpīti, laṅghitvā.

Maghi ketave ca. Cakāro pubbatthāpekkho. Maṅghati.

Rāgha lāgha sāmattiye. Rāghati. Lāghati.

Dāgha āyāse ca. Āyāso kilamanaṃ. Cakāro sāmattiyāpekkhako. Dāghati. Nidāgho.

Silāgha katthane. **Katthanaṃ** pasamsanaṃ. Silāghati. Silāghā. Buddhassa silāghate. Silāghitvā. “**Attanobhāsā**”ti saddasatthavidū vadanti.

Gha kārantadhāturūpāni.

Iti **bhūvādāgaṇe kavaggantadhāturūpāni**

Samattāni.

Cakārantadhātu

Idāni **cavaggantadhāturūpāni** vuccante –

Suca soke. Socati. Soko, socanā, socaṃ, socanto, socantī, socantaṃ kulaṃ, socitvā.

Kuca sadde tāre. **Tārasaddo** accuccasaddo. Kocati. Uccasaddaṃ karotīti attho.

Kuñca koṭilla’ppibhāvesu. Kuñcati. Kuñcikā, kuñcitateso. Kuñcitvā.

Luñca apanayane. Luñcati. Luñcako, luñcituṃ, luñcitvā.

Añcu gatipūjanāsu. Maggaṃ añcati. Buddhaṃ añcati. Uddhaṃ anuggantvā tiriyaṃ añcitoti tiracchāno. Kaṭukañcukatā.

Vañcu cañcu tañcu gatiyaṃ. Vañcati. Cañcati. Tañcati. Mañcati. Santi pādā avañcanā. **Avañcanā**ti vañcituṃ gantuṃ asamattā.

Gucu gaṇecu theyyakaṇe. Thenanaṃ theyyaṃ, corikā. Tassa kriyā **theyyakaṇaṃ**. Gocati. Gaṇecati.

Acca pūjāyaṃ accati. Brahmāsurasuraccito.

Tacca hiṃsāyaṃ. Taccati.

Cacca jacca paribhāsanavajjanesu. Caccati. Jaccati.

Kuca sampaccanakoṭṭillapaṭikkamavilekhanesu. Kucati, saṅkucati. Saṅkoco.

Taca saṃvaraṇe. Saṃvaraṇaṃ rakkhaṇaṃ. Tacati. Taco.

Dica thutiyam. Dicati.

Kuca saṅkocane. Kocati, saṅkocati. Saṅkoco.

Byāca byājikaṇe. Byājikaṇaṃ byājikriyā. Byācati.

Vaca viyattiyam vācāyam. Viyattassa esā viyatti, tissaṃ viyattiyam vācāyam, viyattāyam vācāyanti adhippāyo. Viyattassa hi vadato puggalassa vasena vācā viyattā nāma vuccati. Yathā pana kucchisaddatiracchānagatādisaddo “abyattasaddo”ti vuccati, na evaṃ vacanasāṅkhāto saddo “abyattasaddo”ti vuccati viññātatthattā. “Vatti, vacati, vacanti. Vacasi” iccādīni suddhakattupadāni. “Vāceti, vācenti” iccādīni hetukattupadāni. “Atthābhisamayā dhīro, paṇḍitoti pavuccati. Vuccanti. Santo sappurisā loke, devadhammāti vuccare” iccādīni kammāpadāni. Garū pana vakārassa ukārādesavasena “**uttam uccate uccante**”tiādīni icchanti, tāni sāsane appasiddhāni, sakkaṭabhāsānulomāni. Sāsanasmiñhi rakārāgamavisaye nipubbasseva vacassa vassa ukārādeso siddho “**nirutti, niruttam, nerutta**”nti. Vacanaṃ, vācā, vaco, vacī, vuttam, pavuttam, vuccamānaṃ, adhivacanaṃ, vattabbaṃ, vacanīyam, imāni nāmikapadāni. Vattum, vattave, vatvā, vatvāna, imāni tumantādīni “**parassabhāsā**”ti saddasatthavidū vadanti.

Tattha **vattīti** vadati. Ākhyātapadañhetam. Atthasaṃvaṇṇakehipi “vatti etāyāti vācā”ti nibbacanamudāhaṭam. Saddasatthe ca tādisaṃ ākhyātapadaṃ diṭṭham. Ettha paneke vadanti “vacati, vacantītiādīni kriyāpadarūpāni buddhavacane aṭṭhakathāṭikāsu satthesu ca anāgatattā chaḍḍetabbāni”ti. Tanna, yasmā sāsane “avaca, avaciṃsū”ti suddhakattupadāni ca “vāceti, vācentī”tiādīni hetukattupadāni ca dissanti, tasmā buddhavacanādīsu anāgatānīpi “vacati, vacantī”tiādīni rūpāni gahetabbāni. Vaceyya, vuccatu, vuceyya. Sesam sabbam sabbattha vitthārato gahetabbam.

Parokkhārūpāni vadāma – vaca, vacu. Vace, vacittha. Vacam, vacimha. Vacittha, vacire. Vacittho, vacivho. Vacim, vacimhe.

Hiyyattanīrūpāni vadāma – avacā, avacū. Avaco, avacuttha. Avocam, avacumha. Avacuttha, avacutthum. Avacase, avacuvham. Avacim, avacamhase.

Ajjatanīrūpāni vadāma – avaci, avocum, avaciṃsu. Avoco, avocuttha. Avocim, avocumha. Avocā, avocu. Avacase, avocivam. Avocam, avocimhe.

Bhavissantīrūpāni vadāma – vakkhati, vakkhanti. Vakkhasi, vakkhatha. Vakkhāmi, vakkhāma. Vakkhate, vakkhante. Vakkhase, vakkhavhe. Vakkhassam vakkhamhe.

Imesaṃ pana padānaṃ “kathessati, kathessantī”tiādīnā attho vattabbo. **Vakkha roseti** dhātussa ca “vakkhati, vakkhanti. Vakkhasi”tiādīni vatvā avasāne uttamapurisekavacanaṭṭhāne “vakkhemī”ti vattabbaṃ. Attho panimesam “rosati, rosantī”tiādīnā vattabbo. Ayam **vacavakkhadhātūnaṃ** bhavissantīvattamānāvasena rūpasamsandanānayo. Aparānīpi **vacadhātussa** bhavissantī sahitāni rūpāni bhavanti – vakkhissati, vakkhissanti. Vakkhissasi, vakkhissatha. Vakkhissāmi, vakkhissāma. Vakkhissate, vakkhissante. Vakkhissase, vakkhissavhe. Vakkhissam, vakkhissāmhe.

Atrāyam pāli –

“Abhītakappe caritaṃ, ṭhapaṃyitvā bhavābhavē;
Imaṃhi kappe caritaṃ, pavakkhissaṃ suṇohi me”ti.

Gadratapañhepi “rājā tumhehi saddhiṃ paṭisanthāraṃ katvā gahapati patirūpaṃ āsanaṃ ñatvā nisīdathāti vakkhissatī”ti evamādiatṭhakathāpāṭho dissati, tasmāyeva edisī padamālā racitā. **Vakkha roseti** dhātussapi bhavissantīsaḥitāni rūpāni “vakkhissati, vakkhissantī”tiādīni bhavanti. Attho panimesaṃ “rosissati, rosissantī”tiādīnā vattabbo. Ayaṃ **vacavakkhadhātūnaṃ** bhavissantīvaseneva rūpasamsandanānayo.

Avacissā, vacissā, avacissaṃsu, vacissaṃsu. Sesāṃ sabbaṃ neyyaṃ. Idha pana **vuttasaddassa** atthuddhāraṃ vattabbampi avatvā upariyeva kathessāma ito ativiya vattabbaṭṭhānattā.

Cu cavane. Cavati. Kārite “cāvetī”ti rūpaṃ. Devakāyā cuto. Cutaṃ padumaṃ. Cavituṃ, cavitvā.

Loca dassane. Locati. Locanaṃ.

Seca secane. Secati.

Saca viyattiyaṃ vācāyaṃ. Sacati.

Kaca bandhane. Kacati.

Maca mucī kakkane. Kakkanaṃ sarīre ubbaṭṭanaṃ. Macati. Muñcati. **Maci dhāraṇucchāyapūjanesu.** Dhāraṇaṃ ucchāyo pūjananti tayo atthā. Tattha **ucchāyo** malaharaṇaṃ. Mañcati. Mañco, mañcanaṃ. Mañcati puggalaṃ dhāretīti mañco.

Paca byattikaraṇe. Pacati. Pāko, paripāko, vipāko, pakkāṃ phalaṃ.

Thuca pasāde. Thocati.

Vaca vaci dittiyaṃ. Vacati. Vañcati.

Ruca dittiyaṃ rocane ca. Ditti sobhā. **Rocanaṃ** ruci. Rocati. Verocano. Samaṇassa rocate saccaṃ. Tassa te saggakāmassa, ekattamuparocitaṃ. Ayañca **divādigāṇe** ruciatthaṃ gahetvā “ruccatī”ti rūpaṃ janeti. Tena “gamaṇaṃ mayha ruccatī”ti pāḷi dissati. **Curādigāṇe** pana ruciatthaṃ gahetvā “roceti rocayatī”ti rūpāni janeti. Tena “kiṃ nu jātiṃ na rocesī”tiādikā pāḷiyo dissanti. Tegaṇikoyaṃ dhātu.

Paca saṃpāke. Pacati, pacanti. Saddasatthavidū pana “**attanobhāsā**”ti vadanti.

Añca byayagatiyaṃ. Byayagati vināsagati. Añcati.

Yāca yācanāyaṃ. Brāhmaṇo nāgaṃ maṇiṃ yācati. Nāgo maṇiṃ yācito brāhmaṇena. Te taṃ asse ayācisuṃ. So taṃ rathamayācatha. Devadattaṃ āyācati. Evaṃ suddhakattari rūpāni bhavanti. Brāhmaṇo brāhmaṇena nāgaṃ maṇiṃ yāceti, yācayati, yācāpeti, yācāpayati. Evaṃ hetukattari. Rājā brāhmaṇena dhanāṃ yāciyati, yācayiyati, yācāpiyati, yācāpayiyati. Evaṃ kammani. Yācaṃ, yācanto, yācantī, yācantaṃ kulaṃ. Yācamāno, yācamānā, yācamānaṃ kulaṃ. Yācako, yācanā, yācitabbaṃ, yācituṃ, yācitvāna, yācituna, yāciya, yāciyāna. Evaṃ nāmikapadāni **tumantādīni** ca bhavanti.

Paca pāke. Odanaṃ pacati. “**Ubhayatobhāsā**”ti saddasatthavidū vadanti. Yathā pana sāsane “paṇḍitoti pavuccatī”ti **vacadhātussa** kammani rūpaṃ pasiddhaṃ, na tathā **pacadhātussa**. Evaṃ santepi garū “tayā paccate odano”ti tassa kammani rūpaṃ vadanti. Sāsane pana avisesato “paccate”ti vā “pacatī”ti vā vuttassapi padassa akammakoyeva divādigāṇiko payogo icchitabbo

“devadatto niraye paccati. Yāva pāpaṃ na paccatī”tiādidassanato. Kecettha vadeyyuṃ “sayameva pīyate pānīyantiādi viya **bhūvādi**gaṇapakkhiko kammakattuppayogo esa, tasmā ‘sayamevā’ti padaṃ ajjhāharitvā ‘sayameva devadatto paccatī’tiādinā attho vattabbo”ti tanna, “sayameva pīyate pānīya”nti ettha hi pānīyaṃ manussā pivanti, na pānīyaṃ pānīyaṃ pivati. Manusseheva taṃ pīyate, na sayam. Evaṃ parassa pānakriyaṃ paṭicca kammabhūtopi taṃ sukarapānakriyāvasena sukarattā attanāva sijjhantaṃ viya hotīti “sayameva pīyate pānīya”nti rūlhiyā payogo kato.

“Sayameva kaṭo kariyate”ti etthāpi kaṭaṃ manussā karonti, na kaṭaṃ kaṭo karoti. Manusseheva kaṭo kariyate, na sayam. Evaṃ parassa karaṇakriyaṃ paṭicca kammabhūtopi so sukaṛaṇa kriyāvasena sukarattā attanāva sijjhanto viya hotīti “sayameva kaṭo kariyate”ti rūlhiyā payogo kato.

Ettha yathā **sayam**saddo pānīyaṃ pānīyeneva pīyate, na amhehi. Kaṭo kaṭeneva kariyate, na amhehīti sakammakavisayattā payogānaṃ aññassa kriyāpaṭisedhanasāṅkhātāṃ atthavisesaṃ vadati, na tathā “devadatto niraye paccati, kammaṃ paccatī”tiādīsu tumhehi ajjhāharito **sayam**saddo atthavisesaṃ vadati akammakavisayattā etesaṃ payogānaṃ. Evaṃ “devadatto”tiādikassa paccattavaacanassa akammakattuvācakattā kammaraḥitasuddhakattuvācakattā ca “paccatī”ti idam **divādi**gaṇakarūpanti datṭhabbaṃ. **Pacadhātu** saddasatthe **divādi**gaṇa vutto natthīti ce? Natthi vā atthi vā, kimettha saddasatthaṃ karissati, pāli eva pamāṇaṃ, tasmā mayaṃ lokavohāraṅkusalassa bhagavato pālinayaññeva gahetvā imaṃ **pacadhātuṃ divādi**gaṇepi pakkipissāma. Tathā hi **dhammapālācariya anuruddhācariyā**dīhi abhisāṅkhatā **divādi**gaṇikappayogā dissanti —

Ñāṇayuttavaraṃ tattha, datvā sandhiṃ tihetukaṃ;
Pacchā paccati pākānaṃ, pavatte aṭṭhake duve.

Asāṅkhāraṃ sasāṅkhāra-vipākāni ca paccati

Icevamādayo. Ettha pana tesam idameva pāliyā na sameti. Ye **curādi**gaṇamhi sakammakabhāvena **bhūvādi**gaṇe ca akammakabhāvena pavattassa **bhūdhātusseva bhūvādi**gaṇe pavattassa sakamakassapi sato **divādi**gaṇaṃ patvā akammakabhūtopi **pacadhātussa** sakammakattamicchanti. Etañhi sātṭhakathe teṭṭhake buddhavacane kuto labbhā, tasmā bhagavato pāvācane sotūnaṃ saṃsayasamugghāṭṭhaṃ ettha imaṃ nītiṃ paṭṭhapema —

Vināpi upasaggena, gaṇanānattayogato;
Sakammākammakā honti, dhātū **pacabhidā**dayo.

Puriso odanaṃ pacati. Sa bhūtapacaniṃ paci. Odano paccati. Kammaṃ paccati. Vīhisīsaṃ paccati. Rukkaphalāni paccanti. Nāgo pākāraṃ bhindati. Taḷākapāli bhijjati. Bhijjanadhammaṃ bhijjati. Ettha ca **sayam**saddaṃ ajjhāharitvā “sayameva odano paccatī”tiādinā vuttepi “puriso sayameva pānaṃ hanati. Bhagavā sayameva ñeyyadhammaṃ abujjhī”ti payogesū parassa āṇattisambhūtanakriyāpaṭisedhamiva paropadesasambhūtabujjhanakriyāpaṭisedhanamiva ca aññassa kriyāpaṭisedhanavasena vuttattā yo **sayam**saddavasena kammakattubhāvaparikappo, taṃ na pamāṇaṃ. **Sayam**saddo hi suddhakattuatthepi dissati, na kevalaṃ “sayameva pīyate pānīya”ntiādīsu kammatttheyeva, tasmā sāsānānurūpena attho gahetabbo nayaññūhi.

Vināpi upasaggena, vināpi ca gaṇantaraṃ;
Sakammākammakā honti, atthato **divuā**dayo.

Kāmaguṇehi dibbati. Paccāmitte dibbati. Aññānīpi yojetabbāni.

Gaṇantarañcopasaggaṃ, vināpi atthanānataṃ;
Payogato sakammā ca, akammā ca **gamā**dayo.

Puriso maggaṃ gacchati. Gambhīresupī atthesu ñāṇaṃ gacchati. Dhammaṃ carati. Tattha tattha

carati.

Gaṇantarañcopasaggaṃ, payogañcatthanānataṃ;
Vināpi tividhā honti, **disādī** rūpabhedato.

Pāsādaṃ passati, pāsādaṃ dakkhati pāsādo dissati. Aññānīpi yojetabbāni.

Sabhāvato sakammā tu, **rudadhātā**dayo matā;
Sabhāvato akammā ca, **nandadhātā**dayo matā.

Mataṃ vā amma rodanti, idha nandati pecca nandati.

Upasaggavaseneke, sakammāpi akammakā;
Sambhavanti tathekacce, akammāpi sakammakā.

Ekacce tupasaggehi, sakammā ca sakammakā;
Akammakā akammā ca, esatthopettha dīpito;

Puriso gāmā niggacchati, dhanaṃ adhigacchati, puriso pāṇaṃ abhibhavati, himavatā pabhavanti mahānadiyo. Aññānīpi payogāni yojetabbāni.

Tattha yadi sāsane **pacadhātussa** kammani rūpaṃ siyā, “purisena kammaṃ kariyatī”ti payogo viya “purisena odano paciyatī”ti payogo icchitabbo. Ye pana garū “tayā paccate odano”tiādīni icchanti, te saddasatthanayaṃ nissāya vadanti maññe. Evaṃ santepi upaparikkhitvā yuttāni ce, gahetabbāni. Kārite “puriso purisena purisaṃ vā odanaṃ pāceti, pācayati, pācāpeti, pācāpayati. Purisena puriso odanaṃ pāciyati, pācayiyati, pācāpiyati, pācāpayiyatī”ti rūpāni bhavanti. “Yathā daṇḍena gopālo, gāvaṃ pāceti gocara”ntiādīsu aññopi attho daṭṭhabbo.

Pacaṃ, pacanto, pacantī, pacamāno, pacamānā. Pātabbaṃ, pacitaṃ, pacitabbaṃ, pacanīyaṃ, pacitum, pacitvā. Ettha ca “imassa maṃsañca pātabba”nti payogo udāharaṇaṃ. “Pacati, pacanti. Pacasī”tiādī padakkamo subodho.

Sica gharañe. Secati, seko, “**ubhatobhāsā**”ti vadanti.

Imāni **cakārantadhāturūpāni.**

Chakārantadhātu

Parassabhāsādibhāvaṃ, sabbesaṃ dhātunaṃ ito;
Paraṃ na byākarissaṃ so, sāsane īrito na hi.

Chu chedane. Choti. Chotvāna moḷiṃ varagandhavāsitaṃ. Acchocchuṃvata bho rukkhamaṃ.

Milecha aviyattāyaṃ vācāyaṃ. Milecchati, milakkhu. Paccantimesu janapadesu paccājāto hoti milakkhūsu aviññātāresu.

Vachi icchāyaṃ. Vañchati. Vañchitaṃ dhanamaṃ.

Achi āyāme. Añcati. Dīghamaṃ vā añchanto dīghamaṃ añchāmīti pajānāti.

Huccha koṭille. Hucchati.

Muccha mohamucchāsu. Mucchati. Mucchito visavegena, visaññī samapajjatha. Mucchā, mucchitvā.

Phucha visaraṇe phochati.

Yucha pamāde. Yucchati.

Uchi uñche. Uñcho pariyesanaṃ. Uñchati. Uñchācariyāya īhatha.

Ucha pipāsāyaṃ. Uchati.

Puccha pañhe pucchati. Pucchitā, pucchako, puṭṭho, pucchito, pucchā. Bhikkhu vinayadharaṃ pañhaṃ pucchati. Pucchi, pucchitaṃ. Pucchitvā. Ettha ca pañcavidhā pucchā aditṭhajotanāpucchā diṭṭhasamsandanāpucchā vimaticchedanāpucchā anumatipucchā kathetukamyatāpucchāti. Tāsaṃ nānattaṃ **aṭṭhasālīniyā**ditto gahetabbaṃ.

Viccha gatiyaṃ. Vicchati. Vicchikā.

Vacchu chedane. Vucchati. Vuttā, vuttavā, vuttasiro. **Vakāragatassa akārassa** uttaṃ.

Vuttasaddo kesoharaṇepi dissati “kāpaṭiko māṇavo daharo vuttasiro”tiādīsu. Ettha ca **sirasaddena** siroruhā vuttā yathā **mañcasaddena** mañcaṭṭhā, **cakkhusaddena** ca cakkhunissitaṃ viññāṇaṃ. Ropitepi “yathā sārādikaṃ bījaṃ, khetto vuttaṃ virūhati”tiādīsu. Kathitepi “vuttamidaṃ bhagavatā, vuttamarahatā”tiādīsu. Atridaṃ vuccati –

Vacchuvapavacavasā, vuttasaddo pavattati;
Kesohāre ropite ca, kathite ca yathākkamanti.

Aparo nayo – **vuttasaddo** “no ca kho paṭivutta”ntiādīsu vāpasamīkaraṇe dissati. “Pannalomo paradattavutto”tiādīsu jīvitavuttiyaṃ. “Paṇḍupalāso bandhanā pavutto”tiādīsu apagame. “Gītaṃ pavuttaṃ samīhita”ntiādīsu pāvacanavasena pavattite. Loke pana “vutto pārāyano”tiādīsu ajjhene dissati, atridaṃ vuccati

“Vāpasamīkaraṇe ca, atho jīvitavuttiyaṃ;
Apagame pāvacana-vasena ca pavattite;
Ajjhene cevametesu, **vuttasaddo** padissatī”ti.

Aparopi nayo – **vuttasaddo** saupasaggoca anupasaggo ca vapane vāpasamīkaraṇe kesohāre jīvitavuttiyaṃ pamuttabhāve pāvacanavasena pavattite ajjhene kathaneti evamādīsu dissati. Tathā hesa –

“Gāvo tassa pajāyanti, khetto vuttaṃ virūhati;
Vuttānaṃ phalamasnāti, yo mittānaṃ na dubbhatī”ti

Ādīsu vapane āgato. “No ca kho paṭivutta”ntiādīsu aṭṭhadantakādīhi vāpasamīkaraṇe. “Kāpaṭiko māṇavo daharo vuttasiro”tiādīsu kesoharaṇe. “Pannalomo paradattavutto migabhūtena cetasā viharatī”tiādīsu jīvitavuttiyaṃ. “Seyyathāpi nāma paṇḍupalāso bandhanā pavutto abhabbo haritathāyā”tiādīsu bandhanato pamuttabhāve. “Yesamidaṃ etarahi porāṇaṃ mantapadaṃ gītaṃ pavuttaṃ samīhita”ntiādīsu pāvacanabhāvena pavattite. Loke pana “vutto gaṇo, vutto pārāyano”tiādīsu ajjhene. “Vuttaṃ kho panetaṃ bhagavatā, dhammāyādā me bhikkhave bhavatha, mā āmisadāyādā”tiādīsu kathane. Atridaṃ vuccati –

Vapa vatu vacchuvaca-dhātūnaṃ vasato mato;
Sopasaggo nopasaggo, **vuttasaddo** yathārahaṃ.

Vapane ca vāpasamī-karaṇe muṇḍatāya ca;
Jīvavuttiyaṃ pamuttatthe, vasā pāvacanassa tu;

Pavattite ca ajjhene, kathane cāti lakkhaye;

Taccha tanukaraṇe. Tacchati. Tacchako dāruṃ.

Chakārantadhāturūpāni.

Jakārantadhātu

Jijaye. Jeti. Jayati, parājayati. Dhammaṃ caranto sāmikaṃ parājeti. Dhammaṃ caranto parajjati. Rājānaṃ jayāpesuṃ. Jayāpetvā. Ettha **jayāpesunti** “jayatu bhava”nti āsāvacaṇaṃ vadimsūti attho. Jayanaṃ, jitaṃ, jayo, vijitaṃ, jino, jetā, jeto, jito māro, māraṃ jito, jitavā, jītāvī, vijitāvī, māraji, lokaji, odhijino, anodhijino, jito. Vijito, jetuṃ, vijetuṃ, jitvā, vijitvā. Imassa pana dhātussa **kiyādiganaṃ** pattassa “jināti jinitvā”tyādīni rūpāni bhavanti.

Ji abhibhavane. Jeti. Jino. Pubbe viya rūpāni. Ettha ca “tumhehi ānanda sappurisehi vijitaṃ, pacchimā janatāsālīmaṃsodanaṃ atimaññissati”ti pāli abhibhavanatthasādhakā. Ettha hi **vijitanti** adhibhūtanti attho.

Ju gatiyaṃ. Ettha sīghagati adhippetā. Javati. Javanaṃ, javo, javaṃ, javanto, javanacittaṃ, javanapañño, javanaṃso. Manojavaṃ gacchati yenakāmaṃ.

Jekhaye. Jiyati. Ekārassa **iyādeso.** Sāsanānurūpena “kiṃ maṃ dhanena jiyethā”ti hi pāli dissati. Saddasatthavidū pana “jāyatī”ti rūpaṃ vadanti.

Sajja gatiyaṃ. Sajjati.

Kuju khuju theyyakaṇe. Kojati. Khojati.

Vaja gatiyaṃ. Dhaja dhaji ca. Vajati. Abbajati. Manussattañca abbaje. Vajo, vajanāṃ, pavajanaṃ, pabbajjā, pabbajito, pabbājito.

Sakā raṭṭhā pabbājito, aññaṃ janapadaṃ gato;
Mahantaṃ koṭṭhaṃ kayirātha, duruttānaṃ nidhetave.

Dhajati. Dhajo. Dhañjati. Dhañjanaṃ. Ettha **dhajoti** ketu. **Dhañjananti** gamanaṃ.

Aja khepane ca. Gatiapekkhakoyeva **cakāro.** Ajati. Ajo. Ettha **ajoti** eḷako. Imāni panassa pariāyavacanaṇi “ajo eḷako urabbho avi meṇḍo”ti. Tattha **urabbhoti** eḷako, yo “ajo”tipi vuccati. **Avīti** rattalomo eḷako. **Meṇḍoti** kuṭṭilasiṅgo eḷako. Tathā hi **janakajātake** ajarathato meṇḍarathā visuṃ vuttā. Apica **ajeḷakanti** ajato eḷakassa visuṃ vacanato **eḷakasaddena** meṇḍopi gahetabbo, **mahosadhajātakaṭṭhakathāyañhi** meṇḍeḷakānaṃ nibbisesatā vuttāti.

Ajja sajja ajjane. Ajjanaṃ ajjanakriyā. Ajjati. Sajjati.

Kajja byathane. Byathanaṃ himsā. Kajjati.

Khajja majjane ca. Majjanaṃ suddhi. Byathanāpekkho **cakāro.** Khajjati. Khajjūro.

Khaja manthe. Mantho vilolaṇaṃ. Khajati.

Khaji gativekalle. Kissa bhante ayyo khañjatīti. Ubho khañjā. Khañjanaṃ, khañjituṃ, khañjitvā.

Khaja kampane. Khajati. Ejā. Ettha ca **ejāti** lābhādiṃ paṭicca ejati kampaṭīti ejā,

balavataṇhāyetam nāmaṃ.

Buja vajiranibbese. Vajiranigghoseti keci vidū vadanti. Bojati.

Khija kuji guji abyattasadde. Khijati. Kuñjati. Guñjati.

Laja lāja tajja bhassane. Lajati. Lājati. Tajjati.

Laji dittiyañca. Bhassanāpekkho cakāro. Lañjati. Tatiyo nayalañjako. Lañjeti pakāseti suttatthanti lañjako.

Jaja jaji yuddhe. Yujjhanam **yuddham.** Jajati. Jañjati.

Tuja himsāyam. Tojati.

Tuji balane ca. Balanam balanakriyā. Himsāpekkhako cakāro. Tuñjati.

Gaja kuji muji gajja saddatthā. Gajati. Kuñjati. Muñjati. Gajo gajjati, megho gajjati. Yattha dāso āmajāto, thito thullāni gajjati. Maṇi gajjati. Nāṇagajjanam gajjati. Gajjitum samattho. Gajjitā. Gajjitvā. Tattha **gajoti** hatthī. Hatthissa hi anekāni nāmāni –

Hatthī nāgo gajo dantī, kuñjaro vāraṇo karī;
Mātaṅgo dvirado saṭṭhi-hāyano'nekapo ibho.

Thambho rammo dvipo ceva, hatthinī tu karenukā;
Hatthipoto hatthicchāpo, bhīṅko ca kalabho bhava.

Caja cāge. Cajati. Pariccajati. Cāgo. Pariccāgo. Cajanam. Cajam, cajanto. Cajamāno.

Sanja saṅge. Saṅgo laganam. Sañcati. Satto. Sajanam, satti. Āsatti. Sajitum. Sajitvā.

Īja gatiyam. Ījati.

Bhaji bhajjane. Bhajjanam tāpakaraṇam. Tilāni bhajjati. Purisena bhajjamānāni tilāni.

Eja bheja bhāja ditiyam. **Ditti** sobhā. Ejati. Bhejati. Bhājati.

Tija nisāne, khamāyañca. Nisānam tikkhatākaraṇam. **Khamā** khanti. Tejati. Titikkhati. Tejano. Tejo. Tattha **tejanoti** kaṇḍo saro usu. **Tejoti** sūriyo. Atha vā **tejoti** tejanam usmā uṇhattam tāpo. **Tejoti** vā ānubhāvo pabhāvo.

Sañja parissagge, āliṅgam **parissaggo.** Sañjati.

Khaji dāne, gatiyañca. Khañjati. Khañjanam.

Rāja ditiyam bhāja ca. Rājati. Bhājati. Rājā. Rājini. Vanarāji. Rājivā. Virājivā. Atra viññūnamatthavivarāṇe kosallajananattham silokam racayāma –

Ma'hā'rāja mahārāja, mahārāja mameva'hi;
Ne'tassa iti vatvāna, dve janā kalaham karum.

Ettha ca paṭhamapādassa dutiyapade “me ahi **mahi**”ti chedo “puttā me atthi puttā matthī”ti viya. “Mahi arāja mahārāja”ti ca chedo “yopi ayam yopāya”nti viya. Ettha **arājasaddo**

“atikaramakarācariyā”ti ettha **akarīti** atthavācako **akarasaddo** viya ākhyātaparokkhāvibhattiko datṭhabbo. **Arāja** virocīti attho. Ayam̐ pana gāthāya piṇḍattho “**mahārāja** me ahi arāja, mama eva ahi arāja, na etassa iti vatvā **dve** ahituṇḍikajanā kalahaṃ karimsū”ti.

Ranja rāge. Bhikkhu cīvaram̐ rajati. Satto rūpādīsu rañjati. Rajanam̐. Rajako. Rāgo. Virāgo. Haliddirāgo. Rājā. Rājīnī. Imassa ca **divādigaṇam̐** pattassa “rajjati virajjati”ti rūpāni bhavanti. Tattha **rajananti** rajanavattu. **Rajakoti** rajakāro vatthadhovanako. **Rāgoti** rajjanti sattā tena, sayam̐ vā rañjati, rañjanamattameva vā etanti rāgo, taṇhā. Imāni pana tadabhīdhānāni –

Rāgo lobho tasiṇā ca, taṇhā eja visattikā;
Satti āsatti mucchā ca, lubbhittatāṇca lubbhanā.

Kāmo nikāmanā icchā, nikanti ca niyanti ca;
Vanaṇca vanatho ceva, apekkhā bhavanetti ca.

Anurodho ca sārāgo, saṅgo paṅko ca sibbinī;
Nandīrāgo anunayo, gedho sañjananī tathā;
Janikā paṇidhi ceva, ajjhosānantinekadhā.

Virāgoti maggo nibbānaṇca. **Rājāti** pathavissaro. Ettha dhātudvayavasena nibbacanāni niyyante. Nānāsampattīhi rājati dibbati virocātīti **rājā**. Dānaṇca piyavacanaṇca atthacariyā ca samānattatā cāti imehi catūhi saṅgahavattūhi attani mahājanam̐ rañjetītipi **rājā**. **Rājīnīti** rājabhariyā. Tesam̐ abhīdhānāni vuccante sahbhīdhānantarehi –

Rājā bhūpati devo ca, manujjindo disampati;
Patthivo jagatipālo, bhūbhujō pathavissaro.

Raṭṭhādhipo bhūmipālo, manussindo janādhipo;
Narindo khattiyo ceva, khettassāmi pabhāvako.

Muddhābhisitto rājāti, kathito itaro pana;
Rājaṇṇo khattiyo cāti, vutto khattiyajātiko.

Muddhābhisitto anurājā, uparājāti bhāsito;
Catuddīpī rājarājā, cakkavattīti bhāsito.

Rājīnī uparī devī, mahesī bhūbhujāṅganā;
Khattiyā rājapadumī, khattiyānī ca khattiyī;
Itthāgarantu orodho, uparītipi vuccati.

Bhaja sevāyam̐. Bhajati. Bhajanā. Sambhajanā. Bhatti. Sambhatti. Bhattā.

Yaja devapūjasaṅgatakarāṇadānadhamesu. **Devapūjaggaṇa**ena buddhādīpūjā gahitā. **Saṅgatakarāṇam̐** samodhānakarāṇam̐. Tathā hi **adhimuttattheravattumhi** “yadatthi saṅgataṃ kiñci, bhavo vā yattha labbhatī”ti gāthāyam̐ **saṅgatasaddena** samodhānam̐ vuttam̐. **Dānam̐** pariccāgo. **Dhammo** jhānasīlādī. Etesvatthesu **yajadhātu** vattati. Pupphehi buddham̐ yajati. Devataṃ yajati. Devamanussehi bhagavā yajiyati. Ijjati. Yiṭṭham̐. Yaṇṇo. Yāgo. Dhammayāgo. Yajamāno sake pure. Yiṭṭhum̐, yajitum̐. Puthuyaṇṇam̐ yajitvāna. Soḷasaparikkhāram̐ mahāyaṇṇam̐ kattukāmo.

Majja saṃsuddhiyam̐. Majjati. Bāhiram̐ parimajjati. Bhūmiṃ sammajjati. Majjanam̐. Sammajjanī.

Niñji suddhiyam̐. Niñjati. Paniñjati. Niñjitum̐. Paniñjitum̐. Niñjitvā. Paniñjitvā. Ayam̐ pana pālī “tato tvaṃ moggallāna utṭhāyāsana udakena akkhīni paniñjitvā disā anulokeyyāsī”ti.

Niji abyattasaddo. Niñjati.

Bhaja pāke. Tilāni bhajjati. Bhajjamānā tilāni ca.

Uju ajjave. Ajjavam ujubhāvo. Ojati. Uju.

Saja vissaggaparissajjanabbhukkirānesu. Sajati. Lokyam sajantam udakam.

Ruja bhaṅge. Rujati. Rujā. Rogo. Ettha **rujāti** byādhi rujanatthēna. **Rogoti** rujati bhañjati āngapaccāṅgānīti rogo, byādhiyeva, yo “ātanko”tipi “ābādho”tipi vuccati.

Bhuja koṭille. Āvipubbo aññatthesu ca. Urago bhujati. Ābhujati. Bhikkhu pallaṅkam ābhujati, ūrubaddhāsanaṃ bandhatīti attho. Mahāsamuddo ābhujati, āvaṭṭatīti attho. Keci pana “osakkatī”ti attham vadanti. “Vaṇṇadāna”nti ābhujati, manasi karotīti attho. Mūlāni vibhujatīti **mūlavibhujo**, ratho. Ettha ca **vibhujatīti** chindati. Bhogo. Bhogī. Ābhogo. Ābhujitvā. Ettha ca **bhogoti** bhujayati kuṭīlam kariyatīti bhogo, ahisarīram. **Bhogīti** sappo.

Raji vijjhane. Nāgo dantehi bhūmiṃ rañjati. Ārañjati. Ettha ca “tathāgatarañjitaṃ itipī”ti nettipāli nidassanaṃ. Tassattho “idaṃ sikkhattayasaṅgahitaṃ sāsanaabrahmacariyam tathāgatagandhahatthino mahāvajirāñānasabbaññūtaññānadantehi rañjitaṃ ārañjitaṃ, tebhūmakadhammānaṃ ārañjanatthānantipi vuccatī”ti. **Rañjitanti** hi rañjati vijjhanti etthāti ruñjitaṃ, rañjanatthānaṃ. “Idaṃ nesam padakkanta”ntiādimhi viya etassa saddassa siddhi veditabbā adhikarānatthasambhavato.

Vijī bhayacalanesu. Īkārantoyam dhātu, tenassa saniggahītāgamāni rūpāni na santi. Vejati. Vego. Dhammasamvego. Samvigo vegena palāyi. Nadīvego. Ūmivego, vātavego. Ettha **dhammasamvegoti** sahottappam ṇāṇam. “Vego, javo, rayo”ti ime ekatthā. **Divādigaṇam** pana pattassa “vijjati samvijjati ubbijjati”ti rūpāni bhavanti dvigaṇikattā.

Lajja lajjane. Lajjati. Lajjā. **Lajjāti** hirī. Yā “viriṇānā”tipi vuccati.

Valaji paribhoge. Valañjati.

Kujja adhomukhikarāṇe. Kujjati. Nikujjati. Ukkujjati. Paṭikujjati. Nikujjitaṃ vā ukkujjeyya. Aññissā pātiyā paṭikujjati. Avakujjo nipajjham. Tattha **kujjati nikujjatīti** imāni “carati vicaratī”ti padāni viya samānatthāni, adhomukham karotīti hi attho. **Ukkujjatīti** uparimukham karoti. **Paṭikujjatīti** mukhe mukham ṭhapeti.

Mujja osīdane. Mujjati. Nimujjati. Nimuggo. Ummuggo.

Opuji vilimpane. Gomayena pathaviṃ opuñjati.

Jakārantadhāturūpāni.

Jhakārantadhātu

Jhe cintāyam. Jhāyati, nijjhāyati, upanijjhāyati, ujjhāyati, sajjhāyati. Jhānaṃ, nijjhānaṃ, upanijjhānaṃ, ujjhāyanaṃ, sajjhāyanaṃ. Nijjhanti. Upajjhā, upajjhāyo. Jhāyī, ajjhāyako.

Tattha jhāyananti duvidham jhāyanaṃ sobhanamasobhanañca. Tesu sobhanaṃ “jhāyī tapati brāhmaṇo. Jhāyāmi akutobhavo”tiādīsu daṭṭhabbam. Asobhanaṃ pana “tattha tattha jhāyanto nisīdī. Adhomukho pajjhāyanto nisīdī”tiādīsu daṭṭhabbam. **Jhāyīti** ārammaṇūpanijjhānena vā lakkhaṇūpanijjhānena vā jhāyanasīlo cintanasīlo. Jhāyī jhānavāti attho. **Ajjhāyakoti** idaṃ “na dānime jhāyanti, na dānime jhāyantīti kho vāseṭṭha ajjhāyakā ajjhāyakātveva tatiyam akkharam

upanibbatta’nti evaṃ paṭhamakappikakāle jhānavirahitānaṃ brāhmaṇānaṃ garahavacanaṃ uppannaṃ, idāni pana taṃ ajjhāyatīti **ajjhāyako**, mante parivattetīti iminā atthena pasamsāvacanaṃ katvā voharantīti. Ayaṃ panattho “**adhipubbassa** i ajjhayane”ti dhātussa vasena gahetabbo. Evaṃ **adhipubbassa** idhātussa vasena imassa dhātussa atthaparivattanaṃ bhavati. Yaṃ sandhāya “ajjhāyako mantadharo”ti vuttaṃ.

Jhe dittiyaṃ. Dīpo jhāyati, dārūni jhāyanti. Ettha **jhāyatīti** jalati. **Jhāyanajalanasaddā** hi ekatthā.

Jajjha paribhāsanatajjanesu. Jajjhati.

Ujjha ussagge. Ussaggo chaḍḍanaṃ. Ujjhati. Ujjhitaṃ.

Jhakārantadhāturūpāni.

Ñakārantadhātu

Ñā avabodhane. “Ñāti, ñanti, ñāsi. Ñātu, ñantu. Ñeyya, ñeyyu”ntiādīni yathāpāvacanaṃ gahetabbāni. Ñāti, ñātako, añño, ñattaṃ, ñatti, paññatti, viññatti, saññatti, saññā, saññānaṃ, paññā, paññānaṃ, ñānaṃ, viññānaṃ.

Tattha **ñātīti** jānāti. Puna **ñātīti** bandhu. So hi “ayaṃ amhāka”nti ñātābbaṭṭhena ñātīti. Evaṃ ñātako. **Aññoti** diṭṭhadhammikādayo atthe na ñāti na jānātīti añño, avidvā bāloti attho. **Ñattanti** jānanabhāvo. “Yāvadeva anattāya, ñattaṃ bālassa jāyatī”ti pāli nidassanaṃ. **Saññānti** cihanaṃ. Kārite “ñāpeti saññāpeti viññāpayatī”tiādīni bhavanti. Yasmā pana “aññāti paṭivijjhati. Attatthaṃ vā paratthaṃ vā ñassati. Anaññātaññassāmīndriyaṃ. Ekacce nabbhaññaṃsu, ekacce abbhāññaṃsū”ti pāliyo dissanti, tasmā **ñātīti**ādīni ākhyātikapadāni diṭṭhāniyeva honti nayavasena. Tathā hi **aññātīti** ettha **āiti** upasaggo, so parassakkharassa saññoguccāraṇicchāya rassaṃ katvā niddiṭṭho. **Ñātīti** sāsane ākhyātikapadaṃ diṭṭhaṃ, tasmāyeva “ñāti, ñanti. Ñāsī”tiādīnā padamālākaraṇe nattheva doso.

Ñā māraṇatosananisānesu. Māraṇaṃ jīvitindriyupacchedakaraṇaṃ. **Tosanaṃ** tuṭṭhi. **Nisānaṃ** tikkhatā. Ñatti. Manuññaṃ. Paññatti.

Ettha **ñattīti** māretīti vā tosetīti vā nisetīti vā attho. Ayañca **ñattisaddo** “vatti etāyāti vācā”ti ettha **vattisaddo** viya ākhyātikapadanti daṭṭhabbo. Tathā **ādatteti** ettha vibhattibhūtassa **tesaddassa** viya vibhattibhūtassa **tisaddassa** saññogabhāvo ca dhātuantassarassa rassattañca. **Manuññanti** manaṃ ābhuso ñeti tosetīti manuññaṃ. Ayamatto **manasaddūpapadassa āpubbassimassa ñādhātussa** vasena daṭṭhabbo. **Paññattīti** nānappakārato pavattinivāraṇena akusalānaṃ dhammānaṃ ñatti māraṇaṃ paññatti. Atha vā dhammaṃ suṇantānaṃ dhammadesanāya citte anekavidhena somanassuppādanaṃ. Atikhiṇabuddhīnaṃ anekavidhena ñānatikhiṇakaraṇaṇca paññatti nāma, tathā sotūnaṃ cittatosanena cittanisānena ca paññāpanaṃ paññattīti daṭṭhabbaṃ.

Iti **bhūvādigaṇe cavaggantadhāturūpāni**

Samattāni.

Ṭakārantadhātu

Idāni ṭavaggantadhāturūpāni vuccante –

Soṭu gabbe. Gabbaṃ dabbaṃ. Soṭati.

Yoṭu sambandhe. Yoṭati.

Meṭu mileṭu ummāde. Meṭati. Mileṭati.

Kaṭa vassāvaraṇesu. Kaṭati.

Saṭa paribhāsane. Saṭati.

Laṭa bālye ca. Pabbāpekkhāya cakāro. Laṭati. Lāṭo.

Saṭa rujāvisaraṇagatyāvasānesu. Rujā pīlā. **Visaraṇaṃ** vippharaṇaṃ. **Gatyāvasānaṃ** gatiyā avasānaṃ osānaṃ abhāvakaraṇaṃ, nisīdananti vuttaṃ hoti. Saṭati. Sāṭo vuccati sāṭako.

Vaṭa vedhane. Vaṭati. Vaṭo. Vāṭo.

Khiṭa uttāsane. Kheṭati, ākheṭako, kheṭo, ukkheṭito, samukkheṭito.

Siṭa anādare. Seṭati.

Jaṭa ghaṭa saṅghāte. Jaṭati. Jaṭā, jaṭilo, jaṭī. Antojaṭā bahijaṭā, jaṭāya jaṭitā pajā. Kārite “so imaṃ vijaṭaye jaṭaṃ. Arahattamaggakkhaṇe vijaṭeti nāmā”ti payogo.

Bhaṭa bhattiyam. Bhaṭati. Bhaṭo. Vetanaṃ bhaṭako yathā.

Taṭa ussaye. Ussayo āroho ubbedho. Taṭati. Taṭo, giritāṭo, nadītaṭo, taṭī, taṭaṃ.

Khaṭa kaṃse. Khaṭati. Khaṭo.

Naṭa natiyam. Naṭati. Naṭo, nāṭakaṃ.

Piṭa saddasaṅghātesu. Peṭati. Peṭako, piṭakaṃ. **Piṭakasaddo** “mā piṭakasampadānenā”tiādīsu pariyaṭtiyam dissati. “Atha puriso āgaccheyya kudālapīṭakaṃ ādāyā”tiādīsu yasmim̐ kismiñci bhājane.

Haṭa dittiyaṃ. Haṭati. Hāṭakaṃ, haṭakaṃ. Yam̐ jātarūpaṃ **haṭakanti** vuccati.

Saṭa avayave. Saṭati.

Luṭa viloṭhane. Loṭati.

Ciṭa pesane. Ceṭati. Ceṭako.

Viṭa sadde. Veṭati. Veṭako.

Aṭa paṭa iṭa kiṭa kaṭa gatiyam. Aṭati. Paṭati. Eṭati. Keṭati. Kaṭati. Paṭo icceva nāmikapadaṃ diṭṭhaṃ. Paṭati jīṇṇabhāvaṃ gacchatīti paṭo. **Paṭoti** vatthaṃ. Vatthassa hi anekāni nāmāni –

Paṭo coḷo sātako ca, vāso vasanamaṃsukaṃ;
Dussamacchādanam̐ vatthaṃ, celaṃ vasani ambaram̐.

Muṭa pamaddane. Moṭati.

Cuṭa appībhāve. Coṭati.

Vaṭi vibhājane. Vaṭati. Vaṇṭo.

Ruṭi luṭi theyye. Ruṇṭati. Luṇṭati. Ruṇṭako. Luṇṭako.

Phuṭa visaraṇe phoṭati. Phoṭo.

Ceṭa ceṭāyaṃ. Ceṭati. Ceṭako.

Ghuṭa parivattane. Ghoṭati.

Ruṭa luṭa paṭighāte. Roṭati. Loṭati.

Ghaṭa cetāyaṃ. Ghaṭati. Ghaṭo. **Ghaṭo** vuccati kumbho. Imāni tadabhidhānāni –

Ghaṭo kumbho ghaṭī kumbhī, tuṇḍikiro tu ukkhalī;
Mahantabhājanam cāṭi, atikhuddam kuṭṭam bhava;

Caṭa bhaṭa paribhāsane deṭa ca. Caṭati. Bhaṭati. Deṭati.

Kuṭa koṭille. Kuṭati. Paṭikuṭati.

Puṭa saṃkilesane. Puṭati.

Cuṭa chuṭa kuṭa chedane. Cuṭati. Chuṭati. Kuṭati.

Phuṭa vikasane. Phuṭati.

Muṭa aggisaddapakkhepamaddanesu. Muṭati.

Tuṭa kalahakammani. Tuṭati.

Ghuṭa paṭighāte. Ghuṭati. Ghoṭako.

Ṭakārantadhāturūpāni.

Ṭhakārantadhātu

Ṭhā gatinivattiyaṃ. Gatinivatti uppajjamānassa gamanassupacchedo. Ṭhāti, ṭhanti. Tiṭṭhati. Patiṭṭhāti. Adhiṭṭhāti. Adhiṭṭheti. Saṇṭhāti. Saṇṭhahati. Adhiṭṭhahati. Upaṭṭhahati. Ṭhātu. Tiṭṭhatu. Tiṭṭheyya. Aṭṭha, aṭṭhu. Aṭṭhā, aṭṭhū, aṭṭhāsi, aṭṭhaṃsu. Yāvassa kāyo ṭhassati. Tiṭṭhissati. Upassuti tiṭṭhissatha. Aṭṭhissā, aṭṭhissam̐su. Atiṭṭhissā, atiṭṭhissam̐su. Ṭhātuṃ, upaṭṭhātuṃ. Upaṭṭhahituṃ. Adhiṭṭhātuṃ. Adhiṭṭhahituṃ. Ṭhatvā, adhiṭṭhitvā. Upaṭṭhahitvā, adhiṭṭhahitvā. Ṭhānaṃ, ṭhiti, saṇṭhiti, avaṭṭhiti. Saṇṭhānaṃ, paṭṭhānaṃ. Upaṭṭhāko, ṭhito. Pabbataṭṭho bhūmaṭṭho. Upaṭṭhahaṃ iccādāni.

Tattha **ṭhānasaddo** issariyaṭṭhitikhaṇakāraṇesu dissati. “Kiṃ panāyasmā devānamindo kammaṃ katvā imaṃ ṭhānaṃ patto” tiādāsu hi issariye dissati. “Ṭhānakusalo hoti akkhaṇavedhī” tiādāsu ṭhitiyaṃ. “Ṭhānasopetaṃ tathāgataṃ paṭibhātī” tiādāsu khaṇe. “Ṭhānañca ṭhānaso ṇatvā aṭṭhānañca aṭṭhānaso” tiādāsu kāraṇe. Kāraṇaṅhi yasmā tattha phalaṃ tiṭṭhati tadāyattavuttibhāvena, tasmā **ṭhānanti** vuccati.

Issariye ṭhitiyañca, khaṇasmimpi ca kāraṇe;
Catūsvatthesu etesu, **ṭhānasaddo** pavattatīti.

Ṭhe saddasaṅkātesu. Ṭhīyati.

The veṭhane. Ṭhāyati.

Paṭha viyattiyam vācāyam. Dhammaṃ paṭhati. Pāṭho, nakkhattapāṭhako, so horapāṭhakaṃ pucchi. Sabbapāṭhī bhavissati. Paṭhituṃ, paṭhitave, paṭhitvā, paṭhitvāna, paṭhituna, paṭhiya, paṭhiyāna.

Evamaṃvidhaṃ **tum**paccayantādivibhāgaṃ sabbattha yathārahaṃ vattukāmāpi gantha vitthārabhayena na vadāma. Avuttopi īdiso vibhāgo nayānusārena yathāsambhavaṃ sabbattha yojetabbo. Yattha pana pāṇinidassanādiviseso icchitabbo hoti, tatthevetam dassessāma.

Vaṭha thūliye. Vaṭhati. Vaṭharo. **Vaṭharoti** thūlaghanasarīrasmiṃ vattabbavacanaṃ. Tathā hi **vinayaṭṭhakathāyam** “**vaṭharoti** thūlo, thūlo ca ghanasarīro cāyam bhikkhūti vuttam hoti”ti vuttam.

Maṭha nivāse. Maṭhati. Maṭho.

Kaṭha kicchajīvane. Kaṭhati. Kaṭho.

Raṭha paribhāsane. Raṭhati.

Sāṭha balakkāre. **Balakkāro** nāma attano balena yathājjhāsayaṃ dabbalassa abhibhavanaṃ. Sāṭhati. Sāṭho.

Uṭha ruṭha luṭha upaghāte. Oṭhati. Roṭhati. Loṭhati.

Piṭha hiṃsāsamaṅkilesesu. Peṭhati. Piṭharo.

Saṭha ketave ca. Pubbatthesu cakāro. Saṭhati. Saṭho **saṭhoti** kerāṭiko vuccati.

Suṭha gatipaṭighāte. Gamanapaṭihananaṃ **gatipaṭighāto.** Soṭhati.

Kuṭhi luṭhi ālassiye ca. Cakāro pubbatthe ca. Kuṅṭhati. Kuṅṭho. Luṅṭhati. Luṅṭho.

Suṭhi sosane. Suṅṭhati.

Ruṭhi luṭhi aṭhi gatiyam. Ruṅṭhati. Luṅṭhati. Aṅṭhati.

Veṭha veṭhane. Veṭhati, nibbeṭhati. Veṭhanaṃ, nibbeṭhanaṃ.

Vaṭhi ekacariyāyam. Vaṅṭhati.

Maṭha kuṭhi soke. Maṭhati. Kuṅṭhati.

Eṭha heṭha vibādhāyam. Eṭhati. Heṭhati. Viheṭhati. Viheṭhanaṃ.

Luṭha paṭighāte. Loṭhati.

Paṭha vikhyāne. Paṭhati.

Luṭha samkilese. Loṭhati.

Ṭhakārantadhāturūpāni.

Ḍakārantadhātu

Ḍi vihāyasagatiyaṃ gamanamatte ca. Ḍeti, ḍayati. Ḍemāno. Ucce sakuṇa ḍemāna. Ye maṃ pure paccuḍḍenti.

Ḍi khipanuḍḍanesu. Ḍeti. Uḍḍeti.

Ito bahiddhā pāsaṇḍā, diṭṭhīsu pasīdanti te;
Na tesam dhammaṃ rocemi, na te dhammassa kovidā.

Ettha ca **pāsaṇḍā**ti pāsaṃ ḍentīti pāsaṇḍā, sattānaṃ cittesu diṭṭhipāsaṃ khipantīti attho. Atha vā taṇhāpāsaṃ diṭṭhipāsaṇca ḍenti uḍḍentīti pāsaṇḍā.

Muḍi kaṇḍane. Muṇḍati. Kumāraṃ muṇḍiṃsu. Muṇḍo.

Cuḍḍa hāvakaṇe. Cuḍḍati.

Aḍḍa abhiyoge. Aḍḍati.

Gaḍi vadanekadese. Gaṇḍati. Gaṇḍo.

Huḍi piḍi saṅghāte. Huṇḍati. Piṇḍati. Piṇḍo.

Hiḍi gatiyaṃ. Hiṇḍati, āhiṇḍati.

Kuḍi dāhe. Kuṇḍati. Kuṇḍo.

Vaḍi maḍi veṭhane. Vaṇḍati. Maṇḍati. Maṇḍalaṃ.

Bhaḍi paribhāsane. Bhaṇḍati. Bhaṇḍanaṃ. Bhaṇḍo.

Maḍi majjane. Maṇḍati. Maṇḍanaṃ.

Tuḍi toḷane. Tuṇḍati. Tuṇḍo. Tuṇḍenādāya gaccheyya.

Bhuḍi bharāṇe. Bhuṇḍati.

Caḍi kope. Caṇḍati. Caṇḍo. Caṇḍālo, caṇḍikkaṃ.

Saḍi rujāyaṃ. Saṇḍati. Saṇḍo.

Taḍi tālane. Taṇḍati. Vitaṇḍā.

Paḍi gatiyaṃ. Paṇḍati. Paṇḍā, paṇḍito. Ettha **paṇḍā**ti paññā. Sā hi sukhumesupi atthesu paṇḍati gacchati dukkhādīnaṃ pīlanādīkampi ākāraṃ jānātīti “paṇḍā”ti vuccati. **Paṇḍitoti** paṇḍāya ito gato pavattoti paṇḍito. Atha vā sañjātā paṇḍā etassāti **paṇḍito**. Paṇḍati ñāṇagatiyā gacchatītipi **paṇḍito**. Tathā hi **aṭṭhakathāyaṃ** vuttam “paṇḍantīti **paṇḍitā**. Sandiṭṭhikasamparāyikatthesu ñāṇagatiyā gacchantīti attho”ti.

Gaḍi made. Gaṇḍati.

Khaḍi manthe. Khaṇḍati. Khaṇḍito, khaṇḍo.

Laḍi jivhāmathane. Laḍati. Laḍo.

Dakārantadhāturūpāni.

Ḍakārantadhātu

Vaḍḍha vaḍḍhane. Vaḍḍhati. Sirivaḍḍhako, dhanavaḍḍhako, vaḍḍhito, buḍḍho. Ettha ca vakārassa **bakāro**, akārassa **cukāro**.

Kaḍḍha ākaḍḍhane. Kaḍḍhati, ākaḍḍhati, nikaḍḍhati. Akāmā parikaḍḍhanti, ulūkaññeva vāyasā.

Imāni **ḍhakārantadhāturūpāni**.

Ṇakārantadhātu

Aṇa raṇa vaṇa bhaṇa maṇa kaṇa sadde. Aṇati. Aṇako brāhmaṇo. Raṇati. Raṇaṃ. Vaṇati. Vāṇako. Bhaṇati. Bhāṇako. Maṇati. Maṇiko. Kaṇati. Kāṇo. Tattha **brāhmaṇoti** brahmaṇaṃ aṇatīti brāhmaṇo, mante sajjhāyatīti attho. Akkharacintakā pana “brahmuno apaccamaṃ **brāhmaṇo**”ti vadanti. Ariyā pana bāhitapāpattā **brāhmaṇoti**.

Brāhmaṇo sottiyo vip̐po, bhovādī brahmabandhu ca;
Brahmasūnu dvijo brahmā, kamalāsanasūnu ca;

Raṇasaddo “saraṇā dhammā araṇā dhammā”tiādīsu kilesesu vattati. Kilesā hi raṇanti kandanti etehīti **raṇāti** vuccanti.

“Dhanuggaho asadiso, rājaputto mahabbalo;
Sabbāmitte raṇaṃ katvā, saṃyamamaṃ ajjhupāgamī”ti

Ettha yuddhe vattati. **Raṇaṃ katvāti** hi yuddhaṃ katvāti attho. “Tiṇaṅca kaṭṭhaṅca raṇaṃ karontā, dhāvīṃsu te aṭṭhadīsā samantato”ti ettha cuṇṇavicuṇṇakaraṇe vattati. **Raṇaṃ karontāti** hi cuṇṇavicuṇṇaṃ karontāti attho. Evaṃ atthavivaraṇampi saddasaṅkhātamatthaṃ antoyeva katvā adhippāyatthavasena kataṃ, na dhātunānatthavasenāti daṭṭhabbaṃ. Atha vā dhātūnamatthātisayayogopi bhavati, tena evaṃ atthavivaraṇaṃ katantipi daṭṭhabbaṃ.

Bhaṇa bhaṇane. Parittaṃ bhaṇati, vacanaṃ bhaṇati. Dīghabhāṇako, piyabhāṇī, bhāṇavāro. Ettha bhāṇavāroti –

“Aṭṭhakkharā ekapadaṃ, ekā gāthā catuppadaṃ;
Gāthā cekāmato gantho, gantho bāttiṃsatakkharo;

Bāttiṃsakkharaganthānaṃ, paññāsaṃ dvisataṃ pana;
Bhāṇavāro mato eko, svaṭṭhakkharasahassako”ti.

Evaṃ aṭṭhakkharasahassaparimāṇo pāṭho vuccati.

Oṇaṃ apanayane. Oṇati.

Soṇa vaṇṇagatīsu. Soṇati, soṇo.

Soṇa siloṇa saṅghāte. Soṇati. Siloṇati.

Ghiṇi ghuṇi ghaṇi gahaṇe. Ghiṇṇati. Ghuṇṇati. Ghaṇṇati.

Ghuṇa ghuṇṇa gamane. Ghoṇati. Ghuṇṇati.

Paṇa byavahāre, thutiyañca. Paṇati vāṇijo, vohāraṃ karoti iccattho. Saddho buddhaṃ paṇati, thomayati iccattho, āpaṇaṃ, sāpaṇo gāmo.

Gaṇa raṇa gatiyaṃ. Gaṇati. Raṇati.

Caṇa saṇa dāne. Caṇati. Saṇati.

Phaṇa gatiyaṃ. Phaṇati. Phaṇaṃ.

Veṇu ñāṇacintānisāmanesu. Veṇati.

Pīṇa pīṇane. Pīṇanaṃ paripuṇṇatā. Pīṇati. Pīṇo divā na bhuñjati, pīṇorakkhaṃsabāhu.

Miṇa hiṃsāyaṃ. Miṇati.

Duṇa gatiyañca. Hiṃsāpekkhako cakāro. Duṇati.

Saṇa abyattasadda. Saṇati. Saṇateva brahmāraññaṃ. **Saṇatevāti** nadati viya.

Tuṇa koṭille. Toṇati.

Puṇa nipuṇe. Puṇati, nipuṇati. Nipuṇadhammo. Ettha ca **nipuṇasaṇhasukhumasaddā** vevacanasaddā **kusalachekadakkhasaddā** viyāti daṭṭhabbaṃ.

Muṇa paṭiññāṇe. Muṇati.

Kuṇa saddopakaraṇe. Koṇati.

Cuṇa chedane. Coṇati.

Maṇa cāge. Veraṃ maṇatīti **veramaṇi.**

Phuṇa vikiraṇe vidhunane ca. Phuṇati. Aṅgārakāsuṃ apare phuṇanti.

Imāni **ṇakār**antadhāturūpāni.

Iti **bhūvādi**gaṇe **ṭavagga**ntadhāturūpāni

Samattāni.

Takārantadhātu

Atha **ṭavagga**ntadhāturūpāni vuccante –

Te pālāne. Pālanaṃ rakkhaṇaṃ. Tāyati. Tāṇaṃ, gottaṃ, nakkhattaṃ. Aghassa tātā. Kicchēnādhigatā bhogā, te tāto vidhami dhammaṃ. Tattha **gottanti** gaṃ tāyatīti gottaṃ. “Gotamo kassapo”ti hi ādinā pavattamānaṃ gaṃ vacanaṃ buddhiñca tāyati ekaṃsikavisayatāya rakkhatīti gottaṃ. Yathā hi buddhi ārammaṇabhūtena atthēna vinā na vattati, tathā abhidhānaṃ abhidheyabhūtena, tasmā so gottasaṅkhāto attho tāni tāyati rakkhatīti vuccati. Ko pana sotī? Aññakulaparamparāsādhāraṇaṃ tassa kulassa ādipurisasammuditaṃ taṃkulapariyāpannasādhāraṇaṃ sāmāññarūpaṃ.

Nakkhattanti visamagatiyā agantvā attano vīthiyāva gamanena nakkhanaṃ gamanaṃ tīyati rakkhatīti nakkhattaṃ, taṃ pana assayujādivasena sattavīsatividhaṃ hoti. Tathā hi assayujo bharaṇī kattikā rohaṇī migasiro addā punabbasu phusso assaliso māgho pubbaphagguṇī uttaraphagguṇī hattho cittaṃ svāti visākhā anurādhā jeṭṭhā mūlaṃ pubbāsālhaṃ uttarāsālhaṃ sāvaṇaṃ dhanasiṭṭhā satabhisattaṃ pubbabhaddapadaṃ uttarabhaddapadaṃ revatī cāti **sattavīsati nakkhattāni**. Tāni pana attano gamanaṭṭhānaṃ īsakampi na vijahanti kiñci sīghaṃ kiñci dandhaṃ, kadāci sīghaṃ, kadāci dandhaṃ, etto ito cāti evaṃ visamagatiyā agantvā yantacacce paṭipāṭiyā yojitāni viya samappamaṇagatiyā attano vīthiyāva gacchantāni maṇḍalākārena sineruṃ parivattanti. Evaṃ imāni nakkhanaṃ gamanaṃ tīyanti rakkhatīti nakkhattānīti vuccanti. Porāṇā pana **kharadhātuvasena** “nakkharanti na nassantīti **nakkhattāni**”ti āvocaṃ, “nakkhattaṃ joti rikkhaṃ taṃ” iccetāni nakkhattatāraṇānaṃ nāmāni. “Uḷu tārā tārakā”ti imāni pana sabbāsampi tāraṇānaṃ sādharmaṇānāmāni. **Osadhīti** pana tāraṇānānaṃ nāmānaṃ.

Citi saññāṇe. Saññāṇaṃ cihanaṃ lakkhaṇakaraṇaṃ. Cetati. Cihanaṃ karotīti attho. Īkāraṇavāsena vuttattā asmā dhātuto **saki sañkāyanti** dhātuto viya niggahītāgamo na hoti. Esa nayo aññesupi īdisesu ṭhānesu.

Pata gatiyaṃ. Patati. Papatati papātaṃ, papateyyahaṃ. Pāpattaṃ nirayaṃ bhusaṃ. **Ahaṃsaddena** yojetabbaṃ, pāpattaṃ papatitosmīti attho. Pāpattha nirayaṃ bhusaṃ, sokumāroti yojetabbaṃ, pāpattha papatitoti attho. Parokkhāpadañhiettaṃ dvayaṃ. “Pāvadaṃ pāvada”tiādīsu viya upasaggapadassa dīghabhāvo, tato **aṃsaddassa ttaṃādeso**, **asaddassa ca tthādeso** bhavati. Acinteyyo hi pāḷinayo.

Ata sātaccagamane. Sātaccagamanaṃ nirantaragamanaṃ. Atati. Yasmā pana **atadhātu** sātaccagamanaṭṭhāvācīkā, tasmā bhavābhavaṃ dhāvanto jātijarābyādhimaraṇādibhedhaṃ anekavihitaṃ saṃsāradukkaṃ atati satataṃ gacchati pāpuṇāti adhigacchatīti attātipi nibbācanamicchitabbaṃ. Atthantaravasena pana “āhito ahaṃmāno etthāti attā, attabhāvo”ti ca “sukhadukkaṃ adati anubhavatīti attā”ti ca “attamanoti pītisomanassena gahitamano”ti ca attho daṭṭhabbo, yathā yathā yathā yathā attho labbhati, tathā tathā tathā tathā atthassa gahetabbatoti.

Cuta āsecane kharāṇe ca. Cotati.

Ati bandhane. Antati. Antaṃ. Antiyatibandhiyati antaguṇenāti **antaṃ**. Idha **anta** saddassa atthuddhāro vuccate “antaṃ antaguṇaṃ udariya”nti ettha dvattiṃsākāraṇatogadhaṃ kuṇapantaṃ antaṃ nāma. “Kāyabandhanassa anto jīrati. Haritantaṃ vā”ti ettha antimamariyādanto anto nāma. “Antamidaṃ bhikkhave jīvikāna”nti ettha lāmakanto. “Sakkāyo eko anto”ti ettha koṭṭhāsanto. “Esevanto dukkhassa sappaccayasāṅkhayā”ti ettha koṭṭanto. Icevaṃ –

Kuṇapantaṃ antimañca, mariyādo ca lāmakamaṃ;
Koṭṭhāso koṭṭi’me attho, antasaddena bhāsītā.

Kita nivāse rogāpanayane ca. Ketati. Sāketamaṃ na gamaṃ, niketo, niketaṃ pāvīsi. Āmodamāno gacchati sanniketaṃ. Tikicchati, cikicchati, cikicchā, cikicchako. Tattha **sāketanti** sāyaṃ gahitavasanaṭṭhānattā sāketamaṃ, **yamaṃsaddalopo**.

Yata patiyatane. Patiyatanaṃ vāyāmakaraṇaṃ. Yatati. Yati, yatavā, payatanaṃ, āyatanaṃ, lokāyatanaṃ. Ettha **āyatanaṃ** āyatanato āyatanaṃ, cakkhurūpādīni. Etāni hi taṃdvārārammaṇacittacetasikā dhammā sena sena anubhavanādikiccena āyatanti utṭhahanti ghaṭanti vāyamaṃti etesūti “āyatanāni”ti vuccanti. Ettha pana **nītanudhātūnaṃ** vasenapī āyatanasaddattho vattabbo siyā, so uttari āvibhavissati.

Āyatanasaddo nivāsaṭṭhāne ākare samosaraṇaṭṭhāne sañjātidesse kāraṇe ca. Tathā hi “loke issarāyatanaṃ vāsudevāyatana”ntiādīsu nivāsaṭṭhāne **āyatanasaddo** vattati. “Suvaṇṇāyatanaṃ rajatāyatana”ntiādīsu ākare. Sāsane pana “manorame āyatane, sevanti naṃ vihaṅgamā”tiādīsu

samosaraṇaṭṭhāne. “Dakkhiṇāpatho gunnaṃ āyatana”ntiādīsu sañjātidese. “Tatra tatreva sakkhibhabbatam pāpuṇāti sati satīāyatane”tiādīsu kāraṇe vattatīti veditabbo. So ca nānāpavattinimittavasena gahetabbo.

Nivāse ākāre ceva, jātidese ca kāraṇe;
Samosaraṇaṭṭhāne ca, **āyatanaravo** gato.

Lokāyatam nāma “sabbaṃ ucchiṭṭhaṃ, sabbaṃ nucchiṭṭhaṃ. Seto kāko, kāḷo bako iminā ca iminā ca kāraṇenā”ti evamādiniratthakakāraṇapaṭisaṃyuttaṃ tiṭṭhiyasatthaṃ, yaṃ loke “vitaṇḍasattha”nti vuccati, yañca sandhāya bodhisatto asamadhuro vidhurapaṇḍito “na seve lokāyatikaṃ, netam paññāya vaḍḍhana”nti āha. Āyatiṃ hitaṃ tena loko na yatati na iṭṭhīti lokāyatam, kintaṃ? Vitaṇḍasatthaṃ. Tañhi ganthaṃ nissāya sattā puññakriyāya cittampi na uppādentī. Aññatthāpi hi evaṃ vuttaṃ “**lokāyatasippanti** ‘kāko seto, aṭṭhīnaṃ setattā, balākā rattā, lohitaṃ rattattā”ti evamādinayappavattaṃ paralokanibbānānaṃ paṭisedhakaṃ vitaṇḍasatthasippa”nti.

Yuta juta bhāsane. Bhāsanaṃ udīraṇaṃ. Yotati. Jotati.

Jutadittiyaṃ. Jotati, vijjotati. Juti, joti. Kārite “joteti, jotayitvāna saddhamma”nti payogā. Etha ca **jutīti** āloko siri vā. **Jotīti** patāpo. Atha vā **jotīti** candādīni. Vuttampi ceta **sirimāvīmāna vatthuaṭṭhakathāyaṃ** “jotīti candimasūriyanakkhattatārakānaṃ sādharmaṇāma”nti. Atha vā “joti jotiparāyaṇo”ti vacanato yo koci jotati khattiyakulādīsu jātattā ca rūpasobhāyuttattā ca, so “jotī”ti vuccati.

Sita vaṇṇo. Sitadhātu setavaṇṇe vattati. Kiñcāpettha vaṇṇasāmaññaṃ vuttaṃ, tathāpi idha nīlapītādīsu setavaṇṇoyeva gahetabbo payogadassanavasena. Setati. Setam vatthaṃ. Vāccaliṅgattā pana **setasaddo** tiliṅgo gahetabbo.

Setam sitam suci sukkaṃ, paṇḍaram dhavalampi ca;
Akaṇham goramodātam, setanāmāni honti hi.

Vatu vattane. Vattati, pavattati, saṃvattati, anuvattati, parivattati. Pavattaṃ.

Kilota addabhāve. Addabhāvo tintabhāvo. Kilotati, pakilotati, temetīti attho. Kārite pakiloteti, pakilotayati. Uṇhodakasmim pakilotayitvā, temetvāti attho.

Vata yācane. Vatati.

Kita ṇāṇe. Ketati. Ketanaṃ, ketako, saṅketo.

Kati suttajanane. Suttaṃ kantati.

Kati chedane. Maṃsaṃ kantati, vikantati, ayokanto. Sallakanto mahāvīro. Mā no ajja vikantiṃsu, rañño sūdā mahānase.

Catī himsāgandhesu. Īkārantattā imasmā niggahītāgamo na hoti. Catati.

Takārantadhāturūpāni.

Thakārantadhātu

Thā gatinivattiyaṃ. Thāti. Avatthā, vavatthānaṃ, vavatthitaṃ, vanatho. “Chetvā vanaṃ vanathañcā”ti etha hi mahantā rukkhā vanaṃ nāma, khuddakā pana tasmim vane ṭhitattā vanatho nāma vuccanti.

Thu thutiyaṃ. Thavati, abhitthavati. Thavanā, abhitthavanā, thuti, abhitthuti.

Yadi hi rūpinī siyā, paññā me vasumatī na sameyya;
Anomadassissa bhagavato, phalametaṃ ñāṇathavanāya.

Tehi thutippasattho so, yenidaṃ thavitaṃ ñāṇaṃ, buddhaseṭṭho ca thomito. Tatra **thavanāti** pasamsanā. Pasamsāya hi anekāni nāmāni.

Thavanā ca pasamsā ca, silāghā vaṇṇanā thuti;
Panuti thomanā vaṇṇo, katthanā guṇakittanaṃ;

The saddasaṅghātesu. Thīyati, patitthīyati. Thī. Atrimā pāliyo – abhisajjati kuppati byāpajjati patitthīyati, kopaṇca dosaṇca appaccayaṇca pātukaroti. Thiyo naṃ paribhāsimsūti. Tatra “thīyati patitthīyati” timāni **ekārassiyā**desavasena sambhūtāni. Thīyati saṅghātaṃ gacchati gabbho etissāti **thī**. Ācariyā pana **itthī**saddasseva evaṃ nibbanaṃ vadanti, na **thī**saddassa.

Gabbho thīyati etissā, iti **thī** iti no ruci;
Gabbho thīyati etissā, iti **itthī**ti ācariyā.

Tesaṃ sudukkarovāde, “itthī”ti padasambhavo;
Ayaṃ vinicchayo patto, nicchayaṃ bho suṇātha me.

Thīsaddena samānattho, **itthī**saddo yato tato;
Thīsadde labbhamānattham, **itthī**saddamhi ropiya.

Appānaṃ bahutā ñāye, gahite sati yujjati;
Tathā hi “dve duve, taṇhā, tasiṇā”ti nidassanaṃ.

Atha vā pana “itthī”ti-idaṃ vaṇṇāgamādito;
Niruttilakkhaṇenāpi, sijjhatīti pakāsaye.

Ichhatīti nare itthī, icchāpetīti vā pana;
Idaṃ nibbanaṇcāpi ñeyyaṃ nibbanaṇatthinā.

Atrimāni itthīnamabhidhānāni –

Itthī thī vanitā nārī, abalā bhīru sundarī;
Kantā sīmaninī mātu-gāmo piyā ca kāmīni.

Ramaṇī pamadā dayitā, lalanā mahilā`ṅganā;
Tāsaṃyeva ca nāmāni, avatthāto imānīpi.

Gorī ca dārikā kaññā, kumārī ca kumārikā;
Yuvatī taruṇī māṇa-vikā therī mahallikā.

Tathā hi aṭṭhavassikā **gorī**tipi **dārikā**tipi vuccati. Dasavassikā **kaññā**ti vuccati. Anibbiddhā vā yobbanitthī kaññāti vuccati. Dvādasavassikā **kumārī**tipi vuccati **kumārikā**tipi. Atho jaraṃ appattā **yuvatī**tipi **taruṇī**tipi **māṇavikā**tipi vuccati. Jaraṃ pattā pana **therī**tipi **mahallikā**tipi vuccati. Purisesupī ayaṃ nayo yathārahaṃ vedītabbo.

Kiñcāpettha evaṃ niyamo vutto, tathāpi katthaci aniyamavasenapi vohāro pavattati. Tathā hi “rājā kumāramādāya, rājavuttī ca dārika”nti ca “acchā kaṇhājinaṃ kaññā”nti ca imāsaṃ dvinnaṃ pālīnaṃ vasena yā itthī **dārikā**saddena vattabbā, sā **kaññā**saddenapi vattabbā jātā. Yāpi ca **kaññā**saddena vattabbā, sāpi **dārikā**saddena vattabbā jātā. Tathā “rājā kumāramādāya, rājavuttī ca

dārika’’nti ca “kumāriye upaseniye, niccaṃ nigaḷamaṇḍite’’ti ca imāsaṃ pana pālīnaṃ vasena yā itthī **dārikā**sadena vattabbā, sā **kumārikā**saddenapi vattabbā jātā. Yā ca pana **kumārī**saddena vattabbā, sāpi **dārikā**saddena vattabbā jātā. Apicettha “rājakaññā rucā nāmā’’ti ca “tato maddimpi nhāpesuṃ, sivikaññā samāgatā’’ti ca imāsaṃ dvinnaṃ pālīnaṃ dassanato yā anibbiddhā vā hotu nibbiddhā vā, yāva jaraṃ na pāpuṇāti, tāva sā kaññāyeva nāmātipi veditabbaṃ.

Kecettha vadeyyuṃ – yaṃ tumhehi “aṭṭhavassikā gorītipi dārikātipi vuccatī’’ti vuttaṃ, etasmiṃ pana vacane “yadāhaṃ dārako homi, jātiyā aṭṭhavassiko’’ti vacanato aṭṭhavasso dārako hotu, “tathaddasakumāraṃ so, ramamānaṃ sake pure’’ti pālīyaṃ pana puttadārehi saṃvaddho vessantaramahārājā kathaṃ “kumāro’’ti vattuṃ yujjissati dvādasavassātikkantattā? Yujjateva bhagavato icchāvasena. Bhagavā hi dhammissarattā vohārakusalatāya ca yaṃ yaṃ veneyyanānurūpaṃ desanaṃ desetum icchati, taṃ taṃ deseti eva, tasmā bhagavatā tassa mātāpitūnaṃ atthitaṃ sandhāya kumāraparihārena vaddhitattaṃca evaṃ desanā katā. Tathā hi āyasmā kumārakassapo kumāraparihārena vaddhitattā mahallakopi samāno kumārakassapotveva vohariyati. “Na vāyaṃ kumārako mattamaññāsī’’ti ettha pana sirasmiṃ palitesu jātesupi āyasmantaṃ ānandaṃ āyasmā mahākassapo tasmim̃ there adhimattavissāso hutvā komāravādena ovadanto **kumārakoti** avocāti gahetabbaṃ. **Udānaṭṭhakathāyaṃ** pana “sattā jātadivasato paṭṭhāya yāva pañcadasavassaṃ, tāva **kumārakā**, **bālā**ti ca vuccanti, tato paraṃ vīsativassāni **yuvāno**’’ti vuttaṃ.

Mantha mattha viloḷane. Manthati. Manthañca madhupiṇḍikañca ādāya. Abhimatthati dummedhaṃ vajiraṃvamhamayaṃ maṇiṃ. Sineruṃ matthaṃ katvā.

Kuthi puthi luthi himsāsaṃkilesesu. Kunthati. Kuntho, kunthakipillikaṃ. Disvāna patitaṃ sāmaṃ, puttakaṃ paṃsukunthitaṃ. Punthati. Lunthati.

Nātha yācanopatāpissariyāsīsāsu. **Nāthadhātu** yācane upatāpe issariye āsīsane cāti catūsvatthesu vattati. Tenāhu porāṇā “**nāthatī**ti nātho, veneyyānaṃ hitasukhaṃ āsīsati pattheti, parasantānagataṃ vā kilesabyasanaṃ upatāpeti, “sādhu bhikkhave bhikkhu kālena kālaṃ attasampattiṃ paccavekkheyā’tiādīnā taṃ taṃ hitapaṭipattiṃ yācatīti attho, paramena cittissariyena samannāgato sabbasatte vā guṇehi īsati abhibhavatīti paramissaro bhagavā ‘nātho’ti vuccatīti nāthatīti nātho’’ti. Saddasatthavidū pana tesu catūsu atthesu **nātha nādha** iti dhātudvayaṃ paṭṭhanti. **Attanobhāsattā** pana tassa “nāthate nādhatē’’ti rūpāni bhavanti.

Ettha siyā “yadi yācanatthena nāthatīti nātho, evaṃ sante yo koci yācako daliddo, so eva nātho siyā. Yo pana ayācako samiddho, so na nāthati na yācatīti anātho siyā’’ti? Na, **nāthasaddo** hi yācanatthādīsu pavattamāno lokasaṅketavasena uttamapurisesu nirūḷho, bhagavā ca uttamesu sātisaṃyaṃ uttamo, tena taṃ taṃ hitapaṭipattiṃ yācatīti **nāthasaddasattho** vutto. **Anāthasaddo** pana ittarajanesu nirūḷho, so ca kho “na nāthoti anātho. Natthi nātho etassāti vā anātho’’ti dabbapaṭisedhavasena, na pana “na nāthati na yācatīti anātho’’ti dhātuatthapaṭisedhavasena. Yo hi aññassa saraṇaṃ gati patiṭṭhā hoti, so nātho, yo ca aññassa saraṇaṃ gati patiṭṭhā na hoti, nāpi attano añño saraṇaṃ gati patiṭṭhā hoti, so anāthoti vuccati saṅketavasena. Tathā hi “saṅketavacanaṃ saccaṃ, lokasammutikāraṇa’’nti vuttaṃ. Imassa panatthassa āvibhāvatthaṃ imasmiṃ thāne “lokanātho tuvaṃ eko, saraṇaṃ sabbapāṇina’’nti ca “anāthānaṃ bhavaṃ nātho’’ti ca –

“Evāhaṃ cintayitvāna, nekakoṭisataṃ dhanam;
Nāthānāthānaṃ datvāna, himavantamupāgami’’nti ca

Pālīyo nidassanāni bhavanti. Yasmā pana sāsane ca loke ca yācako “nātho’’ti na vuccati, ayācako ca “anātho’’ti. Lokassa pana saraṇaṃ “nātho’’ti vuccati. Yassa saraṇaṃ na vijjati, so “anātho’’ti vuccati, tathā samiddho “nātho’’ti vuccati, asamiddho “anātho’’ti. Tasmā paññavatā sabbesu thānesu dhātuatthamattena lokasamaññaṃ anāthāvitvā yathānurūpaṃ attho gahetabbo. Ayañca nīti sādhukaṃ manasi kātābā.

Vithu yācane. Vethati.

Satha seṭhille. Sathati. Sathalo hi paribbājo, bhiiyo ākirate rajam. Siṭhilotipi pāḷi dissati. Tadā **ṭhikāro** muddhajo gahetabbo.

Kathi koṭille. Kanthati.

Kattha silāghāyam. Katthati, vikatthati. Katthanā, vikatthanā. Tattha **katthattīti** pasamsati. **Vikatthattīti** virūpaṃ katthati abhūtavatthudīpanato. Ettha ca “bahumpi so vikattheyya, aññaṃ janapadaṃ gato”ti ca “idhekacco katthī hoti vikatthī, so katthati ‘ahamasmi sīlasampannoti vā vattasampannoti vā vikatthattī’ti” ca ādayo payogā.

Byatha dukkhabhayacalanesu. Byathati. Bhantā byathitamānasā. Tato kumārābyathitā, sutvā luddassa bhāsitaṃ. Itthetaṃ dvayaṃ calañceva byathañca.

Sutha kutha katha hiṃsāyam. Sothati. Kothati. Kathati.

Patha gatiyam. Pathati. Patho. **Pathoti** maggo. So duvidho mahājanena padasā paṭipajjitabbo pakatimaggo ca paṇḍitehinibbānatthikehi paṭipajjitabbo paṭipadāsankhāto ariyamaggo cāti. Tattha pakatimaggo uppannakiccākiecehi janehi pathiyati gacchiyattīti patho, paṭipadā pana amatamahāpuraṃ gantukāmehi kulaputtehi saddhāpātheyyam gahetvā pathiyati paṭipajjiyattīti patho. Atha vā pātheti kārakaṃ puggalaṃ gameti nibbānaṃ sampāpetīti vā patho, paṭipadāyeva. Maggābhiddhānaṃ **curādigaṇe** **magga**dhātukathanaṭṭhāne kathessāma.

Katha nippāke. Kathati.

Matha vilothane. Mathati.

Potha pariyāyanabhāve. Pothati. Pothako. Pothettīti ayaṃ **curādigaṇe**pi vattati. Tena “samantā anupariyeyyūṃ, nipphentā catuddisā”ti payogo dissati.

Gottha vaṃse. Gotthati. Gotthulo, gotthu.

Puthu vitthāre. Pothati. Puthavī.

Thakārantadhāturūpāni.

Dakārantadhātu

Dā dāne. Āpubbo gahaṇe. Saddho dānaṃ dadāti deti, sīlaṃ ādadāti ādeti. Imāni suddhakattupadāni taddīpakattā. Saddho assaddhaṃ dānaṃ dāpeti, sīlaṃ ādāpeti, samādāpeti. Ye dhammamevādapayanti santo. Imāni kārītapadāni hetukattupadānīti ca vuccanti taddīpakattā. Saddhena dānaṃ dīyati, sīlaṃ ādīyati, samādīyati, imāni kammaṃpadāni taddīpakattā. Ayañca **dā dāneti** dhātu sāsānānurūpasativasena **divādigaṇaṃ** patvā **supanakriyaṃ** vadanto “dāyati niddāyati niddā”ti sanāmapadāni suddhakattupadāni janayati. **Dānamavakhaṇḍanañca** vadanto “dīyati dānaṃ dātta”nti sanāmapadāni suddhakattupadāni janayati. **Suddhiṃ** vadanto “dāyati vedāyati vodāna”nti sanāmapadāni suddhakattupadāni janayati, imasmiṃ pana **bhūvādigaṇe dānaṃ** vadanto āpubbavasena **gahaṇaṇca** vadanto “dadāti deti ādadāti ādeti dānaṃ ādāna”nti sanāmapadāni suddhakattupadāni janayati. Tathā kucchitagamaṃ vadanto “dāti suddāti suddo suddī”ti sanāmapadāni suddhakattupadāni janayattīti ayaṃ viseso daṭṭhabbo. Yathā cettha, evamaññatrāpi yathāsambhavaṃ viseso upaparikkhitabbo nayaññūhi.

Idānissa nāmapadāni **tumantādīni** brūma. “Dānaṃ, deyyaṃ, dātābbaṃ, brahmadeyyaṃ, dīnaṃ, dāyako, dāyikā, dakkhiṇā” iccādīni, “dātuṃ, padātuṃ, dātave, padātave, datvā, datvāna, dadātuna, daditvā, daditvāna, dadiya, dajjā, dadiyāna, ādātuṃ, ādāya, ādiya” iccādīni ca yojetabbāni.

Tattha **dānanti** dātabbaṃ, dadanti etenāti atthe na deyyadhammo dānacetanā ca vuccati. Kasmā pana tattha **dinnasaddo**yeva kathiyati, na **dattasaddo**ti? Akathane kāraṇamatthi. “Dānaṃ dinna”ntiādīsu hi **dinnasadda**ṭṭhāne **dattasaddo** na dissati, tasmā na kathiyati.

Guṇabhūto **dattasaddo**, na diṭṭho jinabhāsīte;
“Manasā dānaṃ mayā dinnam”, iti **dinnapadam** viya.

“Devadatto yaññadatto, datto” iti ca ādiko;
Paṇṇattivacane diṭṭho, samāsabyāsato pana.

Tasmā “devadatto”tiādīsu “devena dinno”ti samāsaṃ katvā paṇṇattivacanattā **dinnasaddassa dattā**deso kātabbo sāsānānurūpena. Upari hi “dinnassa datto kvaci paṇṇattiya”nti lakkaṇaṃ passissatha. Ayameva hi sāsane nīti avilaṅghanīyā. Idaṃ panettha vavatthānaṃ –

Sakkaṭe **dattasaddo**va, **dinnasaddo** na dissati;
Byāsamhi **dinnasaddo**va, **dattasaddo** na pāḷiyam.

“Manasā dānaṃ mayā dinnam, dānaṃ dinno”tiādīsu;
“Dhammadinnā mahāmāyā”, iccādīsu ca pāḷīsu.

Iti byāsasamāsānaṃ, vasā dvedhā pavattati;
Dinnasaddoti dīpeyya, na so sakkaṭabhāsīte.

Guṇabhūto **dattasaddo**, asamāsamhi kevalo;
Na dissati munimate, **dinnasaddo**va kevalo.

Teneva **dinnasaddassa**, **dattā**deso kato mayā;
“Dattaṃ sirappadāna”nti, kavayo pana abravuṃ.

Ediso pāḷiyam natthi, nayo tasmā na so varo;
“Datto”ti bhūridattassa, saññā paṇṇattiyam gatā.

“Brahmadatto buddhadatto, datto” iti hi sāsane;
Paṇṇattiyam **dattasaddo**, asamāsasamāsiko.

“Paradattabhojana”nti, evamādīsu pāḷīsu;
Samāse guṇabhūtoyam, **dattasaddo** patiṭṭhito.

“Manasā dānaṃ mayā dinnam, dānaṃ dinno”tiādīsu;
Guṇabhūto **dinnasaddo**, asamāsamhi dissati.

“Dinnādāyī dhammadinnā”, iccevamādīsu pana;
Samāse guṇapaṇṇatti-bhāvenesa padissati.

Koci pana saddasatthavidū garu evaṃ saddaracanamakāsi –

“Yassaṅkurehi jimutambujaloditehi,
Vāteritehi patitehi suṇehi tehi.

Jenantacīvaramasobhatha brahmadattaṃ,
Vandāmi taṃ caladalaṃ varabodhirukkha”nti.

Ettha ca **brahmadattanti** idaṃ sakkaṭabhāsāto nayaṃ gahetvā vuttaṃ, na pāḷito. Pāḷinayañhipatvā “brahmadattiya”nti vā “brahmadinna”nti vā “devadattiya”nti vā “devadinnā”nti vā rūpena

bhavitabbaṃ. Tathā hi “bodhisatto ca maddī ca sammodamānā sakkadattiye assame vasiṃsū”ti pāḷinayānurūpo aṭṭhakathāpāṭho dissati. Tasmā etthevaṃ vadāma –

“**Dattasaddassa** ṭhānamhi, “dattiya”nti ravo gato;
Devadattiyapatto ca, assamo sakkadattiyo”ti.

Ayaṃ nīti sādhukaṃ manasi kātabbā. Atra pana paripuṇṇāparipuṇṇavasena yathārahaṃ padakkamo bhavati.

Dadāti, dadanti. Dadāsi, dadātha. Dadāmi, dadāma. Dadātu, dadantu. Dadāhi, dadātha. Dadāmi, dadāma, dadāmase. Dadeyya, dade, dajjā. Dajjā sappuriso dānaṃ. Dadeyyuṃ, dajjuṃ. Pitā mātā ca te dajjuṃ. Dadeyyāsi, dajjāsi, dajjesi iccapi. Dajjāsi abhayaṃ mama. Mātaraṃ kena dosena, dajjāsi dakarakkhino. Sīlavantesu dajjesi, dānaṃ maddi yathārahaṃ. Dadeyyātha, dajjātha. Dadeyyāmi, dajjāmi, dadeyyāma, dajjāma. Dadetha, daderaṃ. Dadetho, dadeyyāvho, dajjāvho. Dadeyyaṃ, dajjaṃ. Neva dajjaṃ mahosadhaṃ. Dadeyyāme, dajjāme. Ayamasmākaṃ khanti. Garūnaṃ pana khanti aññathā bhavati. Tathā hi –

Garū “dajjati dajjanti”, itiādīnayaena tu;
Aṭṭhannampi vibhattīnaṃ, vasenāhu padakkamaṃ.

Pāḷiṃ upaparikkhitvā, tañce yujjati gaṇhatha;
Na hi sabbappakārena, pāḷiyo paṭibhanti no.

Tattha asmākaṃ khantiyā “dajjā dajja”ntiādīni **yyakārasahiteyeva** sattamiyā padarūpe sijjhanti. “Dajjā sappuriso dāna”nti ettha hi “dajjā idaṃ “dadeyyā”ti padarūpaṃ patiṭṭhapetvā **yyakāre** pare saralopaṃ katvā tato tiṇṇaṃ byañjanānaṃ saṃyogañca tīsusaññogabyañjanesu dvīnaṃ sarūpānamekassa lopañca dyakārasaññogassa ca **jakāradvayaṃ** katvā tato dīghavasenuccāritabbattā animittaṃ dīghabhāvaṃ katvā nipphajjati. Evaṃ sāsanassānurūpo vaṇṇasandhi bhavati. Duvidho hi sandhi padasandhi vaṇṇasandhīti. Tesu yattha padacchedo labbhati, so padasandhi. Yathā? Tatrāyaṃ. Yattha pana na labbhati, so vaṇṇasandhi. Yathā? Atrajo. Yathā ca sugato, yathā ca paddhāni. Evaṃ duvidhesu sandhīsu “dajjā”ti ayaṃ vaṇṇasandhi eva.

Aparopi rūpanayo bhavati **tvāpaccayantavasena** –

“Ayaṃ so indako yakkho, dajjā dānaṃ parittakaṃ;
Atirocati amhehi, cando tāragaṇe yathā”ti

Dassanato. Ettha hi **dajjāti** datvāti attho. Idaṃ pana **datvāsaddena** samānatthaṃ “dadiyya” iti padarūpaṃ patiṭṭhapetvā **yyakāre** pare saralopaṃ katvā saññogesu sarūpalopañca tato dyakārasaññogassa **jjakāradvayaṃ** dīghattañca katvā nipphajjati.

Athāparopi rūpanayo bhavati kammani **yapaccayavasena**. Tathā hi “petānaṃ dakkhiṇaṃ dajjā”ti ca “dakkhiṇā dajjā”ti ca dve pāṭhā dissanti. Tattha pacchimassa **dajjāti** dātabbāti attho kammani **yapaccayavasena**. Idha pana **dādhātuto** **yapaccayaṃ** katvā dhātussa dvittañca pubbassa rassattañca tato **yakāre** pare saralopaṃ saññogabhāvañca **jjakāradvayañca** itthilingattā **āpaccayādiñca** katvā “dajjā”ti nipphajjati. Evaṃ “dajjā dadeyyā”ti ca “dajjā dadiyya datvā”ti ca “dajjā dātabbā”ti ca etāni paccekāṃ pariyaṃvacanāni bhavanti. “Dajjuṃ. Dajjāsi, dajjātha. Dajjāmi, dajjāma. Dajjāvho, dajja”nti etānipi “dadeyyuṃ dadeyyāsi”tiādīnā padarūpāni patiṭṭhapetvā **yyakāre** pare saralopaṃ saññogesu sarūpalopaṃ **dyakārasamaññogassa** **jjakāradvayañca** katvā nipphajjanti. Etesu **dajjāsīti** yaṃ rūpaṃ tassāvayavassa **ākārassa ekāraṃ** katvā aparampi “dajjesi”ti rūpaṃ bhavatīti daṭṭhabbaṃ. Esa nayo aññatrāpi yathāsambhavaṃ yojetabbo.

Acinteyyānubhāvassa hi sammāsambuddhassa pāḷinayo acinteyyoyeva hoti, gambhīro

dukkhogāḷho, na yena kenaci lakkhaṇena sādhetabbo, yathātanti viraciteheva lakkhaṇehi sādhetabbo. Tathā hi “khattiyā titthiyā cetiyāni”tiādīsu **yakāre** pare saralopo bhavati, tena “athetthekasataṃ khatyā. Evampi titthiyā puthuso vadanti. Ārāmarukkhacetyāni”ti payogā dissanti. Tathā “sākacchati taccha”nti etthāpi “saha kathayati”tivā “saṃkathayati”ti vā “tathya”nti ca padarūpaṃ patiṭṭhapetvā **sahasaddassa hakāralopaṃ, saṃsadde** ca niggahītalopaṃ katvā **sakāragatassa sarassa dīghaṃ katvā yakāre** pare saralopaṃ katvā tato **thyakārasaññogassa cchayugaṃ katvā** visabhāgasaññoge eko ekassa sabhāgattamāpajjati. Tena “sākacchati taccha”nti rūpāni sijjhanti. Tathā hi “aññamaññaṃ sākacchiṃsu. Kālena dhammasākacchā. Bhūtaṃ tacchaṃ. Yathātathiyāṃ viditvāpi dhammaṃ, sammā so loke paribbajeyyā”ti savikapāni payogāni dissanti. “Najjā”tiādīsupi “nadiyā”tiādīni padarūpāni patiṭṭhapetvā vaṇṇasandhivasena **yakāre** pare lopavidhi labbhatīyeva. Vividho hi sāsanaṇukūlo rūpanipphādanupāyo, upari ca etesaṃ sādhanatthaṃ “saralopo yamanarādīsū”tiādīni lakkhaṇāni bhavissanti. Tattha –

“Dajjā dajju”ntiādīni, sattamīnaṃ vasena me;
Vuttāni yogirājassa, sāsanaṭṭhaṃ mahesino.

Atridaṃ vattabbaṃ, kiñcāpi aṭṭhakathācariyehi “mātaraṃ tena dosena, dajjāhaṃ dakarakkhino”ti ettha **dajjanti** padassa “dammi”ti vattamānāvasena vivaraṇaṃ kataṃ, tathāpi sattamīpayogoyeva. Ācariyā hi “sattamīpayogo aya”nti jānantāpi “kadāci aññe parikkappatthampi gaṇḥeyyu”nti āsaṅkāya evaṃ vivaraṇamakāṃsu. Tathā kiñcāpi tehi “anāparādhakammantaṃ, na dajjaṃ dakarakkhino”ti ettha **na dajjanti** padassa “nāhaṃ dakarakkhassa dassāmī”ti bhavissantīvasena vivaraṇaṃ kataṃ, tathāpi sattamīpayogoyeva, anāgataṃ pana paṭicca vattabattatthā evaṃ vivaraṇaṃ kataṃ. “Neva dajjaṃ mahosadha”nti ettha pana “na tveva dadeyya”nti sattamīpayogavaseneva vivaraṇaṃ katanti. Evaṃ dajjaṃpadassa vinicchayo veditabbo.

Idāni parokkhādivasena padakkamo kathiyati. “Dada, dadū. Dadū”ti ca idaṃ “nārado iti nāmena, kassapo iti maṃ vidū”tiādīsū **vidūsaddena** samaṃ. Dade, dadittha, dadaṃ, dadimha. Dadittha, dadire. Dadittho, dadivho.

Ettha ca **daditthoti** idaṃ “sañjagghittho mayā saha. Mā kisittho mayā vinā. Mā naṃ kalale akkamittho”tiādīsū “sañjagghittho”tiādīhi samaṃ. Iminā nayena sabbattha labbhamānavasena sadisatā upaparikkhitabbā. Dadaṃ, dadimhe. Parokkhāsahibharūpāni.

Adadā, adadū. Adade, adadattha. Adadaṃ, adadamha. Adadattha, adadatthum. Adadase, adadavhaṃ. Adadiṃ adadamhase. Iti anakārapubbampi rūpaṃ gahetabbaṃ “yesaṃ no na dadamhase”ti dassanato. Hiyyattanīsaḥitarūpāni.

Adadī, adaduṃ, adadiṃsu. Adado, adadittha. Adadiṃ, adadimhā. Adadā, adadū. Adadase, adadivhaṃ. Adadaṃ, adadimhe. Ajjatanīsaḥitarūpāni.

“Dadissati, dadissanti” iccādi sabbhaṃ neyyaṃ. Bhavissantīsaḥitarūpāni.

“Adadisā, dadissā, adadissaṃsu, dadissaṃsu” iccādi ca sabbhaṃ neyyaṃ. Kālātipattisaḥitarūpāni.

Aparānīpi vattamānādisaḥitarūpāni bhavanti. Deti, denti. Desi, detha. Demi, dammi, dema, damma. Detu, dentu. Dehi, detha. Demi, dammi, dema, damma. Attanopadāni appasiddhāni. Sattamīnayo ca parokkhānayo ca appasiddho. Hiyyuttanīnayo pana ajjatanīnayo ca koci koci pasiddho pāliyaṃ āgatattā, sakkā ca “adā, adū, ado, ada”ntiādīnā yojetum. Tathā hi nayo dissati. Adā dānaṃ purindado. Varañceme ado sakka. Brāhmaṇānaṃ adāṃ gajaṃ. Adāsime. Adāṃsu te mamokāsaṃ. Adāsiṃ brāhmaṇe tadāti. “Dassati, dassanti” iccādi sabbhaṃ neyyaṃ. “Adassā, dassā, adassaṃsu, dassaṃsu, dassiṃsu” iccādi ca sabbhaṃ neyyaṃ.

Tathā ādadāti, ādadanti. Ādadāsi, ādadātha. Ādadāmi, ādadāma. **Kaccāyanamate** “ādatte”ti

attanopadaṃ vuttaṃ. Evaṃ ‘ādadātu, ādadeyya’ iccādi sabbaṃ neyyaṃ. Ādetu ādeyya iccādi yathārahaṃ yojetabbaṃ. Evameva ca ‘dāpeti, ādāpeti’ tiādīnipi yathārahaṃ yojetabbāni.

Dākucchite gamane. Dāti. Suddāti. Suddo, suddī. Tattha **suddoti** suddātīti suddo, parapoṭhanādiluddācārakammunā dārūkammādikhuddācārakammunā ca lahuṃ lahuṃ kucchitaṃ gacchatīti attho. Tathā hi **su** iti sīghatthe nipāto, **dā** iti garahattho dhātu kucchitagativācakatā. Suddassa bhariyā **suddī**.

Du gatiyaṃ. Davati. Dumo. Ettha ca davati gacchati mūlakkhandhasākhāviṭapapattapallavapupphaphalehi vuddhiṃ virūlhiṃ vepullaṃ pāpuṇātīti **dumo**.

Desodhane. Sodhanaṃ pariyodāpanaṃ. Dāyati. Dāyanaṃ. Yathā gāyati, gāyanaṃ. Dāyituṃ, dāyitvā, dhātāvayavassekārassa **āyā**deso. ‘Dātuṃ, datvā’ iccapī rūpāni.

Tatra **dātunti** sodhetuṃ. **Datvāti** sodhetvāti attho gahetabbo. Tathā hi ‘bālo abyatto nappaṭibalo anuyuñjīyamāno anuyogaṃ dātu’nti ettha **dātunti** padassa sodhetunti attho. Keci ‘dānattha’nti atthaṃ vadanti, taṃ na yuttaṃ. Na hi yo parehi anuyuñjīyati, so anuyogaṃ deti nāmāti. Tasmā ‘ācariyassa anuyogaṃ datvā bārāṇasiṃ paccāgacchī’ tiādīsipi **anuyogaṃ datvāti** anuyogaṃ sodhetvāti atthoyeva gahetabbo. Tathā hi pubbācariyehi ‘anuyogadāpanattha’nti etasmiṃ padese esoyevattho vibhāvito. Kathaṃ? **Anuyogadāpanatthanti** anuyogaṃ sodhāpetuṃ. Vimaddakkhamañhi sīhanādaṃ nadanto atthato anuyogaṃ sodheti nāma, anuyuñjanto ca naṃ sodhāpeti nāmāti. Idampi ca tehi vuttaṃ. **Dātunti** sodhetuṃ. Keci ‘dānattha’nti atthaṃ vadanti, taṃ na yuttaṃ. Na hi yo sīhanādaṃ nadati, so eva tattha anuyogaṃ detīti. Samantapaṭṭhānamahāpakaraṇa saṃvaṇṇanāyampi pubbācariyehi ‘**dānaṃ datvāti** taṃ cetanaṃ pariyodāpetvā’ ti sodhanattho vutto. Dullabhā ayaṃ nīti sādhukaṃ citte ṭhapetabbā.

De pālāne. Dīyati. Dānaṃ, uddānaṃ dāyituṃ, dāyitvā. Tattha **dānanti** duggatito dāyati rakkhatīti dānaṃ, dānacetaṇā. **Uddānanti** vuttassa atthassa vakkhamānassa vā vippakiṇṇabhāvena nassituṃ adatvā uddhaṃ dānaṃ rakkhaṇaṃ uddānaṃ, saṅgahavacananti attho. Atha vā **uddānanti** pacchuddānādikaṃ uddānaṃ.

Khāda bhakkhane. Khādāti. Khādikā, khādanaṃ, aññamaññakhādikā. Pubbaphalakhādikā, khajjaṃ, khādanīyaṃ, khandhā.

Tattha **khajjanti** pūvo. **Khādanīyanti** pūvaphalāphalādi. ‘Khādanīyaṃ vā bhojanīyaṃ vā’ ti visuṃ bhojanīyassa vacanato khādanaṃ nāma khajjassa vā khādanīyassa vā bhakkhanaṃ. Apica hiṃsāpi ‘khādana’nti vuccati. Jātijarābyādhidukkhādīhi khajjantīti **khandhā**, rūpavedanāsaññāsankhāravīññāṇāni. ‘Cīvarāni nassantipi ḍayhantipi undūrehipi khajjantī’ ti ettha viya **khajjanti** saddo kammaṭtho.

Bada theriye. Thirabhāvo **theriyaṃ**, yathā dakkhiyaṃ. Badati. Badarī, badaraṃ. Atridaṃ vuccati –

Kakkandhu badarī kolī, kolaṃ kulavamiccapi;
Tenilaṃ badarañcāti, nāmaṃ rukkhassa koliyāti.

Khada dhitihimsāsu ca. Theriyāpekkhāya cakāro. Khadati. Khadiro.

Gada viyattiyaṃ vācāyaṃ. Gadati. Āgadanāṃ, tatho āgado etassāti tathāgato. Suṭṭhu gadatīti sugado.

Rada vilekhane. Radati. Radano, rado, dāṭhārado. Atra **radanoti** danto.

Nada abyattasatthe. Sīho nadati, paṇadati. Nādo, nadī. Pabbatesu vanādīsū nadatīti **nadī**. **Nada**

i iti dhātudvayavasena pana “nadantī gacchatīti **nadī**”tipi nibbacanam vadanti.

Kecettha vadeyyum yā panesā “nada abyattasadde”ti dhātu tumhehi vuttā, sā kiṃniccamabyattasaddeyeva vattati, udāhu katthaci viyattiyampi vācāyaṃ vattatī”ti? Niccamabyattasaddeyeva vattatīti. Yajjevam “sīho nadatī”tiādīsu tiracchānagatādisaddabhāvena avibhāvitatthātāya **nadasaddo** abyattasaddo hotu, “sīho viya ayam puriso nadatī”tiādīsu pana manussabhāsāpi abyattasaddo siyāti? Tanna viyattāpi samānā manussabhāsā sīho viyāti evaṃ samupekkhāvasena **sīhapadattassāpekkhanato nadasaddena** niddisiyati, na purisāpekkhanavasena. Yathā hi valāhakūpamāvasena kathitaṃ, “kathaṅca puggalo gajjitā ca vassitā ca hotī”ti pāliyaṃ gajjanam vassanaṅca puggale alabbhamānampi valāhakassa gajjanavassanasadisatāya bhāsanakaraṅakriyāyūpalabbhanato vattabbameva hoti, evameva nibbhayabhāvena sīhanādasadisīyā vācāya niccharaṇato sīho viya nadatīti avibhāvitatthavanta **nadasaddena** manussabhāsāpi niddisitabbā hoti.

Ettha ca ambaphalūpamādayopi āharitvā dassetabbā. Na hi pakkāmakatādīni puggalesu vijjanti, atha kho ambaphalādīsu eva vijjanti, evaṃ santepi bhagavatā aññenākārena sadisattam vibhāvetum ambaphalūpamādayo vuttā, evameva **nadasaddo** abyattasaddabhāvena tiracchānagatasaddādīsu eva vattabbopi atthantaravibhāvanattham “sīho viya nadatī”tiādīsu manussabhāsāyampi rūlhiyā vutto, na sabhāvato. Tathā hi sabhāvato **nadasaddenapi vassitasaddādīhipi** manussabhāsā niddisitabbā na hotīti. Yadi evaṃ –

“Suvijānam siṅgālānam, sakuṇānaṅca vassitam;
Manussavassitam rāja, dubbijānataram tato”ti

Ettha kasmā **vassitasaddena** manussabhāsā niddisiyatīti? Saccam manussabhāsāpi **vassitasaddena** niddiṭṭhā dissati, evaṃ santepi sā “suvijānam siṅgālānam, sakuṇānaṅca vassita”nti **vassitasaddavasena** payogassa vacanato tadanurūpaṃ niddisitam arahatīti mantvā **vassitasaddasadi** niddiṭṭhā. Na hi “manusso vassatī”tiādīnā visum payogā dissanti, “sakuṇo vassati, kūjatī”tiādīnā pana payogā dissanti, tasmā “saṅgāmaṃ otarivāna, sīhanādam nadi kuso”tiādīsu viya yathārahaṃ attho gahetabbo. Evaṃ **nadadhātu** sabhāvato abyattasaddeyeva hoti, na viyattiyam vācāyanti daṭṭhabbam.

Adda gatiyam yācane ca. Addati.

Nadda gadda sadde. Naddati. Gaddati.

Tadda hiṃsāyam. Taddati.

Kadda kucchite sadde. Kaddati. Kaddamo.

Khadda daṃsane. Daṃsanamiha dantasukatakattikā kriyā abhidhīyate. Sabhāvattā dhātuyā sādhanappayogasamavāyī. Khaddati.

Adi bandhane. Andati. Andu. **Andusaddopanettha** itthiliṅgo gahetabbo pāliyaṃ itthiliṅgappayogadassanato “seyyathāpi vāsetṭha ayam aciravatī nadī pūrā udakassa samatittikā kākapeyyā, atha puriso āgaccheyya pārattiko pāragavesī pāragāmī paraṃ taritukāmo, so orimatīre dalhāya anduyā pacchābāham gāḷhabandhanabandho”ti. Tatra **andūti** yaṃ kiṅci bandhanam vā. “Yathā andughare puriso”ti hi vuttam. Bandhanaviseso vā, “andubandhanādīni chinditvā palāyimsū”ti hi vuttam. Apica andanaṭṭhena bandhanaṭṭhena andu viyātipi **andu**, paṅca kāmagaṇā. Vuttañhetam bhagavatā “ime kho vāsetṭha paṅca kāmagaṇā ariyassa vinaye andūtipi bandhanantipi vuccanti”ti. Niggahītāgamavasenāyaṃ dhātu vuttā. Katthaci pana vigataniggahītāgamopi hoti, tam yathā? “Avijjā bhikkhave pubbaṅgamā akusalānam dhammānam samāpattiyā anvadeva ahirika”nti pāli. Ettha anuandati anubandhatīti anvadi. Anvadi eva **anvadevāti** kitaviggaho sandhiviggaho ca veditabbo. Tathā hi **aṭṭhakathāyam** “**anvadevāti** anubandhamānamevā”ti vuttam, tam

avijjamahirikaṃ anubandhamānameva hotīti attho.

Idi paramissariye indati. Indanaṃ, indo.

Ettha **indoti** adhipatibhūto yo koci. So hi indati paresu issariyaṃ pāpuṇātīti **indoti** vuccati. Apica **indoti** sakko. Sakkassa hi anekāni nāmāni –

Sakko purindado indo, vatrabhū pākasāsano;
Sahassanetto maghavā, devarājā sujampati.

Sahassakkho dasasata-locano vajirāvudho;
Hūtapati mahindo ca, kosiyo devakuñjaro.

Surādhipo suranātho, vāsavo tidivādhibhū;
Jambāri ceva vajira-hattho asurasāsano;
Gandharājā devindo, surindo asurābhibhūti.

Evam anekāni nāmāni. Ekopi hi attho anekasaddappavattinimittatāya anekanāmo. Tenāha bhagavā –

Sakko mahāli devānamindo pubbe manussabhūto samāno magho nāma māṇavo ahoṣi, tasmā “maghavā”ti vuccati. Sakko mahāli devānamindo pubbe manussabhūto samāno pure dānaṃ adāsi, tasmā “purindado”ti vuccati. Sakko mahāli devānamindo pubbe manussabhūto samāno sakkaccaṃ dānaṃ adāsi, tasmā “sakko”ti vuccati. Sakko mahāli devānamindo pubbe manussabhūto samāno āvāsaṃ adāsi, tasmā “vāsavo”ti vuccati. Sakko mahāli devānamindo sahasaṃ atthānaṃ muhuttana cinteti, tasmā “sahassakkho”ti vuccati. Sakkassa mahāli devānamindassa sujā nāma asurakaññā pajāpati, tasmā “sujampati”ti vuccati. Sakko mahāli devānamindo devānaṃ tāvatimsānaṃ issariyādhipaccaṃ rajjaṃ kāreti, tasmā “devānamindo”ti vuccatīti.

Evamekassāpi atthassa anekāni saddappavattinimittāni dissanti.

Tathā hi yena pavattinimittena tāvatimsādhipatimhi **indasaddo** pavatto, na tena tattha **sakkādisaddā** pavattā, atha kho aññena. Tathā yena sammādiṭṭhiyaṃ **paññāsaddo** pavatto, na tena tattha **vijjādisaddā**. Yena sampayuttadhammānaṃ pubbaṅgamabhāvena uppannadhammasmiṃ **cittasaddo** pavatto, na tena tattha **viññāṇādisaddā**. Na hi vinā kenaci pavattinimittena saddo pavattatīti. Ekopi attho sammutyattho ca paramattho ca anekasaddappavattinimittatāya anekanāmoti daṭṭhabbaṃ.

Ettha siyā “nāmānīti vadatha, kiṃ nāmaṃ nāmā”ti. Vuccate – īdise ṭhāne atthesu saddappavattinimittaṃ “nāma”nti gahitaṃ, yaṃ “liṅga”ntipi vuccati. Tathā hi “nāma”nti ca “liṅga”nti ca saddopi vuccati, “aññaṃ sobhanaṃ nāmaṃ pariyesissāmi. Liṅgaṃ nippajjate”tiādīsu viya. Asabhāvadhammabhūtaṃ nāmapaññattisaṅkhātāṃ atthesu saddappavattinimittampi vuccati “nāmagottaṃ na jīrati. Sataliṅgo”tiādīsu viya. Iti **nāmasaddenapi liṅgasaddenapi** saddappavattinimittassa kathanāṃ daṭṭhabbaṃ. Saddappavattinimittāṃca nāma lokasaṅketasiddho taṃtaṃvacanattaniyato sāmāññākāravisesoti gahetabbaṃ. So evambhūtoyeva sāmāññākāraviseso nāma paññattīti pubbācariyā vadanti. So hi tasmim tasmim atthe saddaṃ nāmeti tassa tassa atthassa nāmasaññaṃ karotīti **nāmaṃ**, pakārehi ñāpanato **paññatti** ca. Saviññattivikārassa pana saddassa sammutiparamatthasaccānaṃ pakārehi ñāpanato paññattibhāve vattabbeva natthi. Saddasseva hi ekantena paññattibhāvo icchitabbo “niruttiṭṭhisambhidā parittārammaṇā”ti ca “niruttiṭṭhisambhidā paccuppannārammaṇā”ti ca “niruttiṭṭhisambhidā bahiddhārammaṇā”ti ca pālīdassanato. Idha pana saddappavattinimittādhikāratā nāmavasena attho pakāsito. Evam anekavidhassa sāmāññākāravisesoti pubbācariyehi gahitassa nāmapaññattisaṅkhātassa saddappavattinimittassa vasena ekopi ñeyyattho anekaliṅgoti gahetabbo.

Tenāha āyasmā suhemanto pabhinnapaṭisambhido –

“Sataliṅgassa atthassa, satalakkhaṇadhārino;
Ekaṅgadassī dummedho, satadassīva paṇḍito”ti.

Evam sabbābhidhānesupi iminā nayena yathārahaṃ attho vibhāvetabbo nayaññūhi.

Vidi avayave. Vindati. Yadi abhidhānamatthi, “vindo”ti dissati. Yathā kaṇḍati. Kaṇḍo.

Khidi avayaveti candaviduno vadanti. Tesam mate “khindatī”ti rūpaṃ.

Nidi kucchāyaṃ. Kucchāsaddo garahattho. Nindati. Nindā.

Porānametaṃ atula, netam ajjatanāmiva;
Nindanti tuṅhimāsīnam, nindanti bahubhāṇīnam;
Mītabhāṇīmpi nindanti, natthi loke anindito.

Avaṇṇo aguṇo nindā, garahā ayasopi ca;
Asiloko akitti ca, asilāghā ca atthutī.

Nanda samiddhiyaṃ. Akammikā dhātu. Nandati puttehi puttimā. Nandāya nuna maraṇena. Nandasi sirivāhana. Nandanam vanaṃ. **Abhisaddayoḃe panāyaṃ sakammakopi. Abhinandanti** āgataṃ nābhinandanti maraṇaṃ.

Sirīva rūpiniṃ disvā, nanditaṃ āsi taṃ kulaṃ;
Tena nandāti me nāmaṃ, sundaraṃ pavaraṃ ahu.

Rammaṃ veḷuvanaṃ yena, na diṭṭhaṃ sugatālayaṃ;
Na tena nandanaṃ diṭṭhaṃ, iti maññe mahesayaṃ.

Yena veḷuvanaṃ diṭṭhaṃ, naranandanandananaṃ;
Sudiṭṭhaṃ nandanaṃ tena, amarindasunandananaṃ.

Cadi hilādane dittiyañca. Hilādanaṃ sukhanam. **Ditti** sobhā. Candati. Candano, cando.

Ettha ca candanassapi anekāni nāmāni – candanaṃ, gandhasāro, malayajo, suvaṇṇacandanaṃ, haricandanaṃ, rattacandanaṃ, gosītacandanaṃ. Candayati hilādayati sītaguṇasamaṅgītāya sattānaṃ paliḷāhaṃ vūpasamentaṃ sukhaṃ uppādetīti **candanaṃ. Candoti** somo, sopi candayati hilādayati sītaguṇasampattiyā attano pabhāya sattānaṃ pariḷāhaṃ vūpasamento sukhaṃ uppādetīti **candoti** vuccati. Atha vā candati dībbati siriyā virocātīti **cando. Āgamaṭṭhakathāsu** pana “chandaṃ janetīti **cando**”ti vuttaṃ. Tassāpi anekāni nāmāni –

Cando nakkhattarājā ca, indu somo nisākaro;
Candimā mā nisānātho, osadhī so nisāpati.

Uḷurājā sasaṅko ca, himaraṃsi sasīpi ca;
Dvijarājā sasadhāro, tārāpati himaṃsu ca.

Kumudabandhavo ceva, migaṅko ca kalānidhi;
Sudhaṃ sudhi dhūpi yūpa-rasmi ceva khamākaro;
Nakkhatteso ca rajanī-karo subbhaṃsu eva ca.

Tadi cetāyaṃ. Tandati. Tandī.

Kadi kaladi avhāne rodane ca. Kandati, pakkandati. Pakkandum, kandanto, kalandako.

Kalidi paridevane. Kalindati.

Khoda paṭighāte. Khodati.

Khanda gatisosanesu. Khandati. Khando. **Khando** nāma eko devo, yo “kumāro sattidharo”’ti ca vuccati.

Khudi āpavane. Khundati.

Sidi sītiye. Sītiyaṃ sītibhāvo. Sindati. Sosindo, sotatto.

Vanda abhivādanathutīsu. Vandati, abhivandati. Abhivandanā, vandanaṃ, vandako.

Ettha pana **vandatīti** padassa namassati thometi vāti attho. Tathā hi **suttantaṭṭikākāro** “**vandeti** vandāmi thomemi vā”’ti āha.

Bhadi kallāne sokhiye ca. Kallānaṃ kalyāṇaṃ, **sokhiyaṃ** sukhino bhāvo, sukhamiccevattho. Bhandati. Bhandako, bhaddo, bhadro.

Madi thutimodamadasupanagatīsu. Mandati. Mando.

Ettha pana **mandoti** aññāṇīpi bāladārakopi vuccati. Tattha aññāṇī mandati aññāṇabhāvena appasaṃsitabbampi puggalaṃ thometīti **mando**. Mandati amoditabbaṭṭhānēpi modatīti **mando**. Mandati dānasīlādīpuññakriyāsu pamajjatīti **mando**. Mandati attano ca paresaṇca hitāhitaṃ acintento khādanīyabhojanīyādīhi attano kāyaṃ sañjātaṃmedaṃ kurumāno supatīti **mando**. Mandati ayuttaṃ paresaṃ kriyaṃ diṭṭhānugatiāpajjanena gacchati gaṇhātīti **mando**. Atha vā mandati punappunaṃ paṭisandhiggahaṇavasena gabbhaṃ gacchatīti **mando**. Vuttañhi bhagavatā “punappunaṃ gabbhamupeti mando”’ti. Bāladārako pana mandati yuttāyuttamajānanto uttānaseyyaṃparivattanaseyyaṃ vā supatīti **mando**. Tathā hi –

“Nonītasukhumālaṃ maṃ, jātapallavakomalaṃ;
Mandaṃ uttānasayaṇaṃ, piśācabhayatajjitā.

Pādamūle mahesissa, sāyesuṃ dīnamānasā;
Idaṃ dadāma te nātha, saraṇaṃ hohi nāyakā”’ti

Vuttaṃ, iti uttānasayanato paṭṭhāya yāva mandadasakaṃ, tāva “mando”’ti “dārako”’ti daṭṭhabbo. Appatthavācakopi pana **mandasaddo** hoti, so pāṭipadikattā idha nādhippeto, atha vā mandati appabhāvena gacchati pavattatīti nipphannaṃpāṭipadikavasenaṃ gahetabbo.

Muda hāse. Hasanaṃ **hāso** tuṭṭhi. Modati, pamodati. Sammodati. Sammodako. Sammodamānā gacchanti muditā. Mudā.

Hada karīssagge. Karīssaggo nāma karīssassa ossajjanaṃ vissajjanaṃ. Hadati. Uhadati. Hadano.

Ettha ca “yesaṃ no santhate dārakā uhadantipi ummihantipī”’ti ayaṃ pāḷi nidassanaṃ, tatra **uhadantipīti** vaccampi karonti. **Ummihantipīti** passāvampi karonti. Pacchimapadassattho **miha secaneti** dhātuvasena daṭṭhabbo. Ayaṃ pana **curādigaṇepi** vattati dvigaṇikattā. Imasmiñhi ṭhāne “mutteti ohadeti cā”’ti **carīyāpiṭakapāḷippadeso** nidassanaṃ. Tattha **muttetīti** passāvaṃ karoti. **Ohadetīti** karīsaṃ vissajjeti.

Uda mode kīlāyañca. Udati. Udānaṃ. Udaggo.

Tattha **udānanti** kenaṭṭhena udānaṃ? Udānanaṭṭhena. Kimidaṃ udānanaṃ nāma? Pībhivegasamuṭṭhāpito udāhāro. Yathā hi yaṃ telādi minitabbavatthu mānaṃgahetuṃ na sakkoti, vissanditvā gacchati, taṃ “avaseko”ti vuccati. Yañca jalaṃ taḷākaṃ gahetuṃ na sakkoti, ajjhottharivā gacchati, taṃ “ogho”ti vuccati, evameva yaṃ pītivegasamuṭṭhāpitaṃ vitakkavipphāraṃ hadayaṃ sandhāretuṃ na sakkoti, so adhiko hutvā anto asaṅṭhahitvā vacīdvārena nikkhamanto paṭiggāhakanirapekkho udāhāraviseso “udāna”nti vuccati. **Udaggoti** sañjātasomanasso.

Kuda khuda guda kīlāyameva. Kodati. Khodati. Godati.

Sūda paggharaṇe. Sūdāti. Suttaṃ. Sūdo. Rañño sūdā mahānase.

Ettha ca suttanti sūdāti dhenu viya khīraṃ atthe paggharāpetīti **suttaṃ**, tepiṭakaṃ buddhavacanaṃ. Sakammikadhātuttā pana “paggharāpetī”ti kāritavasena attho kathetuṃ labbhati. Tathā hi “karotī”ti padassa “nippādetī”ti attho kathetuṃ labbhati. **Sūdoti** bhattakāro. Yo “ālāriko, odaniko, sūpakāro, rasako”ti ca vuccati. **Sūdāti** “evañcevañca kate khādanīyaṃ vā bhojanīyaṃ vā sugandhaṃ manāpaṃ surasañca bhavissatī”ti randhanakriyāya sukusalatāya rasaṃ paggharāpeti abhinibbatetīti **sūdo**.

Rahada abyattasadde. Rahadati. Rahado.

Hilādi sukhe ca. Cakāro pubbatthāpekkhako. Hilādāti. Hilādanaṃ, hilādo, mettāsahāyakatasattamahāhilādo.

Sadda kucchite sadde. Saddati.

Mida snehe. Sneho nāma vasāsañkhāto sneho pītisnehoti duvidho. Idha pana vasāsañkhāto sneho adhippeto, medati medo.

Ettha ca **medatīti** medasahito bhavati ayaṃ purisoti attho. **Medo** nāma thūlassa sakalasarīraṃ pharivā kisassa jaṅghamaṃsādīni nissāya ṭhito patthinnasineho, so vaṇṇena haliddivaṇṇo hoti. Kārite “medeti medayati”ti rūpāni. Tathā hi “te imaṃ kāyaṃ balaṃ gāhenti nāma brūhenti nāma medenti nāmā”ti pāḷi dissati. Tattha **medentīti** sañjātamedāṃ karontīti attho. Imissā pana dhātuyā **divādi**gaṇaṃ pattāya pītisinehatthe “mejjati”ti suddhakatturūpaṃ bhavati. **Curādi**gaṇaṃ pana pattāya “medeti medayati”ti suddhakatturūpāni bhavantīti daṭṭhabbaṃ.

Sida mocane. Sidati. Sedo.

Sanda pasavane. Pasavanaṃ sandanaṃ avicchedappavatti. Sandati udakaṃ. Mahanto puññābhisando.

Ettha ca **puññābhisandoti** puññappavāho, puññanadītipi vattuṃ yujjati.

Madda maddane. Maddabhi, pamaddati. Mārasenappamaddano. Kaṇṭakaṃ maddati.

Kadi velambe. Vilambabhāvo **velambo.** Kandati.

Kada avhāne rodane ca. Kadati.

Khadi ujjhane. Chandati.

Sada sādane. Sadati. Assādo.

Sīda visaraṇagatyāvasānesu. Visaraṇaṃ vippharaṇaṃ. **Gatyāvasānaṃ** gamanassa avasānaṃ osānaṃ abhāvakaṇaṃ, nisīdananti attho. Sīdati, lābūni sīdanti. Saṃsīdati, osīdati, pasīdati, vippasīdati. Pasādo. Pasanno. Vippasanno. Pasādako. Pasādito. Pāsādo. Osīdāpako. Kusīto. Āsīno. Nisīno. Nisīnako. Sannisīvesu pakkhisu. Nisīdanaṃ, nisīnaṃ. Nisījjā. Gonisādo, upanisā. Sīdeti. Sīdayati. Sīdāpeti. Sīdāpayati. Pasādeti. Nisīdituṃ. Nisīdāpetuṃ, nisādetuṃ, nisīdāpeti, nisīdāpetvā. Uccaṅge maṃ nisādetvā, pitā atthānusāsati. Nisīditvātipi pāṭho. Nisīditvā. Nisīditvāna. Nisīdituna. Nisīdiya. Nisīdiyāna. Saṃsīditvā. Avāsīditvā. Osīditvā.

Tattha **kusīto** vīriyēnādhigantabbassa atthassa alābhato kucchitenākārena sīdatīti kusīto. Atha vā sayampi kucchitenākārena sīdati aññepi sīdāpeti taṃ nissāya aññesaṃ sīdanassa sambhavatoti **kusīto**. Tathā hi vuttaṃ –

“Parittaṃ kaṭṭhamārūyha, yathā sīde mahaṇṇave;
Evaṃ kusītamāgamma, sādhaṃjīvīpi sīdatī”ti;

Kusīto cettha **dassa tattaṃ** “sugato”ti ettha viya “satasmīti hoti”ti ettha viya ca. Tathā hi sīdatīti satam, aniccasetam adhivacanaṃ. Iminā ucchedadiṭṭhi vuttā. **Sata**iti cettha avibhattiko niddeso. **Sannisīvesūti** pariṣsamavinodanattaṃ sabbaso nisīdantesu, viṣsamamānesūti attho, **ḍakārassa vakāraṃ** katvā niddeso. **Nisīdananti** nisīdanakriyā. Mañcapīṭhādikaṃ vā āsanaṃ. Tañhi nisīdanti etthāti **nisīdananti** vuccati. **Nisīnanti** nisīdanakriyā eva. Ettha pana “gate ṭhite nisīne sutte jāgarite bhāsīte tuṅhībhāve sampajānakārī hoti. Mātugāmena saddhiṃ raho maññe tayā nisīnanti kukkucāṃ upadahaṭṭīādīsū cassa payogo vedītabbo. Ettha hi gamanaṃ gabhaṃ, ṭhānaṃ ṭhitaṃ, nisīdanaṃ nisīnaṃ, supanaṃ suttaṃ, jāgaraṇaṃ jāgaritaṃ, bhāsanaṃ bhāsītanti vuccati. **Nisījjāti** nisīdanā. **Gonisādoti** gonisājjanā. **Upanisāti** upanisīdati phalaṃ etthāti upanisā, kāraṇaṃ. **Nisādetunti** nisīdāpetuṃ. **Nisādetvāti** nisīdāpetvā.

Bhāve napuṃsako ñeyyo, **nisīnanti** ravo pana;
Vāccalīṅgo tīlīṅgo so, gatādīsūpyayaṃ nayo.

Cada yācane. Yācanaṃ ajjhesanaṃ. Cadati.

Mida meda medhāhimsāsu. Midati. Medati.

Nida neda kucchāsannikarisesu. Kucchā garahā. **Sannikarisaṃ** vohāraviseso. Nidati. Nedati.

Bundi nisāne. Nisānaṃ tejanaṃ tikkhatā. Bundati. Bondi.

Ettha ca **bondīti** sarīraṃ. Tañhi bundāni tikkhāni piṣuṇapharusavācādīni vā paññāvīriyādīni vā ettha santīti **bondīti** vuccati, saññogaparattepi **ukārassokārādeso**, pāpakalyāṇajanavasenesa attho daṭṭhabbo. **Bondisaddassa** sarīravācakatā pana –

“Nāhaṃ puna na ca puna, na cāpi apunappunaṃ;
Hatthibondiṃ pavekkhāmi, tathā hi bhayatajjito”tiādīsū

Daṭṭhabbā. Imānissa nāmāni –

Kāyo dehaṃ sarīrañca, vāpu bimbañca viggahaṃ;
Bondi gattaṃ tanu ceva, attabhāvo tathūpadhi;
Samussayoti cetāni, dehanāmāni honti hi.

Vada viyattiyam vācāyam. Vadati, vajjati. Vadeti, ovadati, ovadeti, paṭivadati. Abhivadati, anuvadati, upavadati, apavadati. Nivadati. Aññānīpi yojetabbāni. Tattha “vajjantu bhonto amma”nti pālīdassanato **vajjati**ti padaṃ vuttaṃ. Keci pana garū “vajjeti”ti rūpaṃ icchanti, taṃ upaparikkhitvā yuttañce gahetabbaṃ, “upāsako bhikkhuṃ vadeti. Tena yogena janakāyaṃ, ovadeti mahāmuni”ti ca

dassanato **vadeti ovadetī** ca vuttaṃ. Sabbānetāni suddhakattupadāni.

Ovādeti, vādayati, vādāpeti, vādāpayati. Vajjento, vajjayanto, imāni hetukattupadāni.

Kamme “vadiyati, ovadiyati, vajjiyati. Vadiyamāno, vajjamāno, ovadiyamāno, ovajjamāno na karoti sāsanam” iccādāni bhavanti. “Vādo, ovādo, paṭivādo, pavādo, abhivādanam, anuvādo, upavādo, apavādo, vivādo, nivādanam, vajjam, vadanam” iccevamādāni nāmikapadāni yojetabbāni.

“Vaditum, vaditvā, vivaditvā” iccevamādāni ca **tumantādāni** padāni.

Tattha **vādoti** kathā. Vaditabbaṃ vattabbanti **vajjam**, kiṃ taṃ? Vacanam. Etena saccavajjena, samaṅginī sāmikena homīti ettha hi vacanam “vajja”nti vuccati. Vadanti etenāti **vadanam**, mukhaṃ. Mukhassa hi imāni nāmāni –

Vadanam lapanam tuṅḍam, mukha massaṅca ānanam;
Sūkarādimukhaṃ tuṅḍa-miti ñeyyam visesato.

Tatra **vadatī** pitā puttam vadati. Apica **vadatī** bherī vadati, nādam muñcatīti attho. Esa nayo **vajjatī** etthāpi.

Tatrāyam padamālā, vadati, vadanti. Vadasi, vadatha. Vadāmi, vadāma. Vadate, vadante. Vadase, vadavhe. Vade, vadamhe.

Vadatu, vadantu. Vadāhi, vada, vadatha. Vadāmi, vadāma. Vadatam, vadantam. Vadassu, vadavho. Vade, vadāmase.

Vajjati, vajjanti. Vajjasi, vajjatha. Vajjāmi, vajjāma. Vajjate, vajjante. Vajjase, vajjavhe. Vajje, vajjamhe.

Vajjatu, vajjantu. Vajjāhi, vajja, vajjatha. Vajjāmi, vajjāma. Vajjatam, vajjantam. Vajjassu, vajjavho. Vajje, vajjāmhase. Imā dve padamālā **vadadhātussa vajjā**desavasena vuttāti daṭṭhabbam. Atrāyam sukhumatthavinicchayo, “mānussakā ca dibbā ca, tūriyā vajjanti tāvade”ti pāḷi. Ettha **vajjantī** idaṃ suddhakattupadam taddīpakattā. Kiṃ viya?

“Udīrayantu saṅkhapaṇavā, vadantu ekapokkharā;
Nadantu bheī sannaddhā, vaggū vadantu dundubhī”ti

Ettha “udīrayantu vadantu”ādāni viya. Tathā hi **aṭṭhakathāyam** “**vajjantī** vajjimsūti atītavacane vattamānavacanam veditabba”nti suddhakattuvaseṇa vivaraṇam kataṃ, tasmā īdisesu ṭhānesu **vadadhātussa vajjā**deso daṭṭhabbo.

“Saṅkhā ca paṇavā ceva, athopi diṇḍimā bahū;
Antalikkhamhi vajjanti, disvānaccherakam nabhe”ti

Ettha pana **vajjantī** hetukattupadam taddīpakattā. Taṅca kho vaṇṇasandhivisayattā **vādayantī** kāritapadarūpena siddham. Tathā hi “vādayantī”ti padarūpaṃ paṭiṭṭhapetvā **yakāre** pare saralopo kato, **dyakārasaṅnogassa jjakāradvayam** pubbakharassa rassattaṅca bhavati. Tenāha **aṭṭhakathāyam** “**vajjantī** vādayantī”ti hetukattuvaseṇa vivaraṇam. Tathā hi “devatā nabhe accherakam bhagavato yamakapāṭihāriyam disvā antalikkhe etāni saṅkhapaṇavādāni tūriyāni vādayantī”ti hetukattuvaseṇa attho gahetabbo bhavati, tasmā īdisesu ṭhānesu **vadassa vajjā**deso na bhavati.

Kecettha vadeyyum “antalikkhamhi vajjanti, disvānaccherakam nabhe”ti etthāpi “vajjantī”ti padaṃ suddhakattupadameva, na hetukattupadam “**vajjantī** vādayantī”ti vivaraṇe katepi, tathā hi

“ye kecime diṭṭhiparibbasānā, “idameva sacca’nti vivādayantī”ti ca “evampi viggayha vivādayantī”ti ca evamādīsu **vadantipadēna samānattham** “vādayantī”ti padañca sāsane diṭṭha’nti? Tanna, “disvā”ti dassanakriyāvacaṇato. Na hi saṅkhapaṇāvādīnaṃ pāṭihāriyādīdassanaṃ upapajjati dassanacittassa abhāvatoti. Saccaṃ, tathāpi –

“Rādante dārake disvā, ubbidhā vipulā dumā;
Sayamevonamitvāna, upagacchanti dārake”ti

Ettha viya upacaritattā upapajjateva dassanavacaṇaṃ. Tasmā “vajjantīti vādayantī”ti vivaraṇaṃ suddhakattavasena katanti? Tanna, heṭṭhā –

“Saṅgītiyo ca vattanti, ambare anilañjase;
Cammaṇaddhāni vādentī, disvānaccherakaṃ nabhe”ti

Iminnā gāthāya “**vādentīti vādayanti devatā**”ti sapāṭhasesassa atthavivaraṇassa hetukattavasena katattā. Athāpi vadeyyuṃ “saṅkhā ca paṇavā ceva, athopi diṇḍimā bahū”ti paccattavacaṇavasena vuttattā **vajjantīti** padaṃ kammavācakaṇapaṇaṃ”nti ce? Tampi na, kammavasena vivaraṇassa akatattā, kattavasena pana katattāti niṭṭhamettha gantabbam.

Ayamettha vinicchayo veditabbo. Dvigaṇiko **vadadhātu bhūvādigaṇiko** ca **curādigaṇiko** ca. So hi **bhūvādigaṇe** vattanto “vadati vajjati”ti suddhakatturūpāni janetvā “vādeti, vādayati, vādāpeti, vādāpayati”ti cattāri hetukatturūpāni janeti, **curādigaṇe** pana “vādeti, vādayati”ti suddhakatturūpāni janetvā “vādāpeti, vādāpayati”ti ca dve hetukatturūpāni janeti, tasmā sāsane “vādentī vādayantī”ti suddhakattupadāni dissanti. “Vadeyya, vadeyyuṃ” iccādi sabbam neyyam. “Vajjeyya, vajjeyyuṃ” iccādi ca sabbam neyyam **vajjādesavasena**.

Atha vā vadeyya, vadeyyuṃ, vajjuṃ. Pitā mātā ca te dajjunti padamiva. Ettha ca “vajjuṃ vā te na vā vajjuṃ, natthi nāsāya rūhanā”ti pāḷi nidassanaṃ. Vadeyyuṃ vāna vadeyyuṃvāti attho. Vadeyyāsi, vajjāsi, vajjesi iccapi. Vutto vajjāsi vandanaṃ. Vajjesi kho tvaṃ vāmuraṃ. Vadeyyātha, vajjātha. Ammaṃ arogaṃ vajjātha. Vadeyyāmi, vajjāmi, vadeyyāma, vajjāma. Vadetha, vaderam. Vadetho, vadeyyāvho, vajjāvho. Vadeyyaṃ, vajjaṃ, vadeyyāmhe, vajjāmhe. Pubbe viya idhāpi **yakāre** pare saralopo daṭṭhabbo. Aññānīpi upaparikkhitvā gahetabbāni.

Idāni parokkhādirūpāni kathayāma. Vada, pāvada, yathā babhuva. **Dakāralope** “pāva” itipi rūpaṃ bhavati, “paṭīpaṃ vadehi bhaddante”ti ettha “paṭīpa”nti padaṃ viya. Tathā hi “yo ātumānaṃ sayameva pāvā” itī pāḷi dissati. Ettha pasaddo upasaggo dīghaṃ katvā vutto “pāvadati pāvacaṇa”ntiādīsu viya, **pāvāti** ca idaṃ atītavacaṇaṃ, **aṭṭhakathāyaṃ** pana atītavacaṇaṃ idanti jānantopi garu vattamānavacaṇavasena “pāvāti vadati”ti vivaraṇamakāsi idisesu ṭhānesu kālāvīpallāsavasena atthassa vattabbattā.

Āyasmāpi ca **sāriputto niddese** “yo ātumānaṃ sayameva pāvā”ti padaṃ nikkhipitvā **ātumā** vuccati attā, **sayameva pāvāti** sayameva attānaṃ pāvadati, “ahamasmi sīlasampanno”ti vā “vatasampanno”ti vāti vattamānavacaṇena attham niddisi. Atha vā **pāvāti** idaṃ na kevalaṃ **vadadhātuvaseneva** nipphannaṃ, atha kho **udhātuvasenapi**. Tathā hi idaṃ **papubbassa usadde** itī dhātussa payoge **ukārassa okārādesam** katvā tato parokkhābhūte **akāre** pare **okārassa āvādesam** tato ca sandhikcaṃ katvā sijjhati, tasmā **udhātussa vadadhātuyā samānatthattā tannipphannarūpassa** ca **vadadhātuyā nipphannarūpena samānarūpatā** “sayameva attānaṃ pāvadati”ti **vadadhātuvasena** niddisīti daṭṭhabbam.

Idāni vicchinnā padamālā ghaṭṭiyati. Vada, vaduṃ. Vade, vadittha, vadaṃ, vadimha. Vadittha, vadire. Vadittho, vadivho. Vadim, vadimhe. Pāvada, pāva iccapi. Pāvadu. Pāvade, pāvadittha. Pāvadaṃ, pāvadimha. Pāvadittha, pāvadire. Pāvadittho, pāvadivho. Pāvadim, pāvadimhe. Tathā “vajja, vajju” iccādinī parokkhārūpāni.

“Avadā, avadū. Avajjā, avajjū” iccādīni hiyyattanīrūpāni.

“Avadi, vadi, avaduṃ, vaduṃ, avadiṃsu, vadiṃsu. Avajji, vajji” iccādīni ajjatanīrūpāni.

“Vadissati, vadissanti. Vajjissati, vajjissanti” iccādīni bhavissantīrūpāni.

“Avadissā, vadissā, avajjissā, vajjissā” iccādīni kālātipattirūpāni. Sesāni sabbānīpi yathāsambhavaṃ vitthāretabbāni. Yā panettha **vadadhātu** viyattiyam vācāyam vuttā, sā katthaci “vadantaṃ ekapokkharā. Bherivādako” tiādīsu abyattasaddepi vattati upacaritavasenāti datṭhabbamaṃ.

Vida nāṇe. Nāṇam jānanaṃ. Vidati. Vedo. Vidū. Kārite “vedeti. Vedayati. Sayam abhiññā sacchikatvā pavedeti. Vedayanti ca te tuṭṭhiṃ, devā mānusakā ubho” ti payogā. Tattha **pavedetīti** bodheti nāpeti pakāseti. **Vedoti** vidati sukhumampi kāraṇam ājānātīti vedo, paññāyetaṃ nāmaṃ. “Vedehamunī” ti ettha hi nāṇam **vedoti** vuccati. **Vedoti** vā vedaganthassapi nāmaṃ vidanti jānanti etena uccāritamattena tadādhāraṃ puggalaṃ “brāhmaṇo aya” nti, vidanti vā etena brāhmaṇā attanā kattabbakiccanti **vedo**. So pana iruvedayajurvedasāmavedavasena tividho. Āthabbaṇavedaṃ pana paṇītajjhāsayaṃ na sikkhanti parūpaghātasahitattā. Tasmā **pāliyam** “tiṇṇam vedānam pāragū” ti vuttam. Eteyeva “chando, manto, sutī” ti ca vuccanti.

Paññāyam tuṭṭhiyam vede, **vedasaddo** pavattati;
Pāvakepi ca so diṭṭho, jātasaddapurecaro;

Pacchānuge **jātasadde**, sati tuṭṭhajanepi ca;
“Vedagū sabbadhamme” ti etthāpi viditesu ca.

Vidūti paṇḍitamanusso. So hi yathāsabhāvato kammañca phalañca kusalādibhede ca dhamme vidatīti “vidū” ti vuccati.

Ruda assuvimocane, sakammikavasanimissā attho gahetabbo. Rodati, rudati iccapi. Ruṇṇam. Ruditaṃ. Rodanaṃ. Rodanto. Rodamāno. Rodantī. Rodamānā. Rudamukhā. Rudam. Rudanto.

Tattha **rodatīti** kiṃ rodati? Mataṃ puttaṃ vā bhātaraṃ vā rodati. Tatrāyam pāli “nāham bhante etaṃ rodāmi, yaṃ maṃ bhante bhagavā evamāha”. Ayaṃ panettha attho – “yaṃ maṃ bhante bhagavā evamāha, ahaṃ etaṃ bhagavato byākaraṇam na parodāmi na paridevāmi na anutthunāmī” ti evaṃ sakammikavasena attho veditabbo, na assumuñcanamattena.

‘Mataṃ vā amma rodanti, yo vā jīvaṃ na dissati;
Jīvantaṃ amma passanti, kasmā maṃ amma rodasī’ ti

Ayañcettha payogo” ti idam **atṭhakathā** vacanaṃ. Idam pana **ṭikā** vacanaṃ – “yathā sakammakā dhātusaddā atthavisesavasena akammakā honti ‘vibuddho puriso vibuddho kamalasaṇḍo’ ti, evaṃ atthavisesavasena akammakāpi sakammakā hontīti dassetuṃ ‘na paridevāmi na anutthunāmī’ ti āha. **Anutthunasaddo** sakammakavasena payujjati ‘purāṇāni anutthuna’ ntiādīsu. **Ayañcettha payogoti** iminā gāthāya anutthunanaṃ rudanaṃ adhippetanti dasseti” ti.

Dalidda duggatiyam. Dukkhasa gati patiṭṭhāti **duggatīti** ayaṃ attho “apāyam duggatiṃvinipātaṃ nirayaṃ upapajjati” tiādīsu yujjati, idha pana idam attham aggahetvā añño attho gahetabbo. Katham **duggatīti**? Dukkheṇa kicchena gati gamanaṃ annapānādīlābho duggatīti. Daliddati. Daliddo, daliddī, dāliddiyam. Tattha **daliddatīti** sabbaṃ icchicchitam paraṃ yācitvā eva dukkheṇa adhigacchati, na ayācitvāti attho. **Duliddoti** duggatamanusso. **Daliddīti** duggatā nārī. Daliddassa bhāvo **dāliddiyam**. Ettha ca sabbameva “daliddatī” ti lokikappayogadassanato “daliddatī” ti kriyāpadaṃ vibhāvitam. Sāsane pana tam kriyāpadaṃ na āgataṃ, “daliddo daliddī” ti nāmapadāniyeva āgatāni. Anāgatampi tam “nāthati” ti padamiva sāsanaṇulomattā gahetabbameva. Garū pana kaccāyanamatavasena **dala duggatimhīti** duggativācakadaladhātuto **iddapaccayam** katvā

“daliddo”ti nāmapadam dassesum.

Tuda byathane. Tudati, vitudati. Kammani “tujjati, vitujjamāno, vedanābhibhunno”ti rūpāni.

Tudanti vācāhi janā asaññatā,
Sarehi saṅgāmagataṃva kuñjaraṃ;
Sutvāna vākyam pharusam udīritam,
Adhivāsaye bhikkhu aduṭṭhacitto;

Nuda perañe. Perañam cuṅṅikaraṇam pisaṇam, nudati, panudati. Panudanaṃ.

Vidi lābhe. Vindati. Uṭṭhātā vindate dhaṇam. Govindo.

Khadi parighāte. Parighātam samantato hananaṃ. Khandati.

Dakārantadhāturūpāni.

Dhakārantadhātu

Dhā dhāraṇe. Dadhāti, vidadhāti. Yaṃ paṇḍito nipuṇam saṃvidheti. Nidhiṃ nidheti. Nidhi nāma nidhīyati. Tāva sunihito santo. Yato nidhiṃ parihari. Nidahati. Kuhiṃ deva nidahāmi. Paridahati. Yo vattaṃ paridahissati. Dhassati. Paridhassati. Bāloti paraṃ padahati. Sakyā kho ambaṭṭha rājānaṃ ukkākaṃ pitāmahaṃ dahanti. Saddahati tathāgatassa bodhiṃ. Saddhā, saddahanā, saddhātabbaṃ, saddahitabbaṃ, saddhāyiko, paccayiko. Saddheyyavacasā upāsikā. Saddahituṃ, saddahitvā. Visesādhānaṃ. Sotāvadhānaṃ. Sotaṃ odahati. Ohitasoto. Sotaṃ odahitvā. Maccudheyyam, māradheyyam, nāmadheyyam, dhātu, dhātā, vidhātā. Vidhi. Abhidhānaṃ, abhidheyyam, nidhānavatī vācā, ādhānagāhī, sandhi. Aññānīpi yojetabbāni.

Vipubbo **dhā karotyatthe, abhipubbo tu bhāsane;**
Nyāsampaṃpubbo yathāyogaṃ, **nyāsāropanasandhisu.**

Imasmā pana **dhādhātuto** pubbassa **api** iccupasaggassa **akāro** kvaci niccaṃ lopaṃ pappoti, kvaci niccaṃ lopaṃ na pappoti. Atra lopo vuccate, dvāraṃ pidahati, dvāraṃ pidahanto, pidahituṃ, pidahitvā, evaṃ **akāralopo** bhavati. Dvāraṃ apidahitvā, evaṃ **akāralopo** na bhavati. Ettha hi **akāro api**upasaggassa avayavo na hoti. Kinti ce? Paṭisedhatthavācako nipātoyeva, upasaggāvayavo pana adassanaṃ gato, ayaṃ niccālopo. Evaṃ **dhādhātuto** pubbassa **api** iccupasaggassa **akāro** kvaci niccaṃ lopaṃ pappoti, kvaci niccaṃ lopaṃ na pappoti. Idaṃ acchariyaṃ idaṃ abbhutaṃ. Yatra hi nāma bhagavato pāvācane evarūpapopi nayo sandissati viññūnaṃ hadayavimhāpanakaro, yo ekasmiṃyeva dhātumhi ekasmiṃyeva upasagge ekasmiṃyevatthe kvaci lopālopavasena vibhajituṃ labbhati. Idāni mayaṃ sotūnaṃ paramakosallajananatthaṃ tadubhayampi ākāraṃ ekajjhaṃ karontā tadākāravatiṃ jinavarapāḷiṃ ānayāma –

“Gaṅgaṃ me pidahissanti, na taṃ sakkomi brāhmaṇa;
Apidhetuṃ mahāsindhuṃ, taṃ kathaṃ so bhavissati;
Na te sakkomi akkhātuṃ, atthaṃ dhammañca pucchito.

Cittatthasādhaniṃ etaṃ, gāthaṃ **sambhavajātaka;**
Paññāsambhavamicchanto, kare citte sumedhaso”ti.

Dhu gatitheriyesu. Gati gamaṇam, **theriyaṃ** thirabhāvo. Dhavati. Dhuvaṃ.

Ettha ca **dhuvanti** thiraṃ. “Nicco dhuvo sassato avipariṇāmadhammo”tiādīsu viya, tasmā **dhuvanti** thiraṃ kiñci dhammajātaṃ. Atha vā **dhuvanti** idaṃ gatitheriyatthavasena nibbānasseva adhivacanaṃ bhavitumarahati. Tañhi jātijarābyādhimaraṇasokādito muccitukāmehi dhavitabbaṃ

gantabbanti **dhuvam**, uppādavayābhāvena vā nīccasabhāvattā dhavati thiram sassatam bhavatīti **dhuvam**. Yañhi sandhāya bhagavatā “dhuvañca vo bhikkhave desessāmi dhuvagāminiñca paṭipada”nti vuttam. **Dhuvassaddo** “vacanam dhuvassata”nti ettha thire vattati. “Dhuvañca bhikkhave desessāmi”ti ettha nibbāne. “Dhuvam buddho bhavissasi”ti ettha pana ekamse nipātapadabhāvena vattatīti daṭṭhabbam.

Dhū vidhūnane. Ūkārassa ūvattam. Dhūvati. Dhūvitā, dhūvitabbam. Rassatte “dhuto, dhutavā” iccapi rūpāni bhavanti.

Dhe pāne. Dhayati, dhīyati. Dhena.

Ettha ca **dhenūti** dhayati pivati ito khīram potakoti dhenu, “godhenu, assadhenu, migadhenū”ti **dhenusaddo** sāmāññasena sapatikāsu tiracchānagatitthīsu vattati, evam santepi yebhuyyena gāviyam vattati. Tathā hi “satta dhenusate datvā”ti pālī dissati.

Sidhu gatiyam sedhati, nisedhati, paṭisedhati. Siddho, pasiddho, nisiddho, paṭisiddho, paṭisedhito, paṭisedhako, paṭisedho, paṭisedhitum, paṭisedhitvā. Idha acinteyyabalattā upasaggānam tamyoge **sidhudhātussa** nānappakārā atthā sambhavanti, aññesampi evameva.

Sidhu satthe maṅgalye ca. Sattham sāsanam, **maṅgalyam** pāpavināsanam vuddhikāraṇam vā. Sedhati. Siddho, pasiddho, pasiddhi.

Dadha dhāraṇe. Janassa tuṭṭhim dadhateti **dadhi**. Dhakārassa **hakāratte** “dahatī”ti rūpam. Ayam itthī imam itthim ayyikam dahati. Ime purisā imam purisam pitāmham dahanti. Cittam samādahātabbam. Samādham cittam.

Edha vuddhiyam lābhe ca. Edhati. Edho, sukhedhito. Gambhīre gādhamedhati.

Ettha ca **edhoti** edhati. Vaḍḍhati etena pāvakoti edho. Indanam, upādānam. **Sukhedhitoti** sukkena edhito, sukhasamvaḍḍhitoti attho. **Gādhamedhatīti** gādham patiṭṭhitam edhati labhati.

Baddha samharise. Samhariso vinibaddhakriyā. Baddhati, vinibaddhati. Vinibaddhā.

Gādha patiṭṭhānissayagandhesu. Gādhati. Gādham kattā. Gambhīrato agādham.

Bādha vilōḷane bādhati, vibādhati. Ābādho. Ābādhati cittam vilōḷetīti **ābādho**.

Nādha yācanādīsu. Nādhati. Nādhanam.

Bandha bandhane bandhati. Bandhanako, bandho, bandhāpito, paṭibandho, bandhanam, bandho, sambandhanam, sambandho, pabandho, bandhu.

Tattha **bandhananti** bandhanti satte etenāti bandhanam, sañkhalikādi. “Ayam amhākam vaṃso”ti sambandhitabbaṭṭhena **bandhu, theragāthāsamvaṇṇanāyam** pana “pemabandhanena bandhū”ti vuttam.

Dadhi asīghacāre. Asīghacāro asīghappavatti. Dandhati. Dandho, dandhapañño. Yo dandhakāle tarati, taraṇīye ca dandhati.

Vaddha vaddhane. Vaddhati. Vaddhi, vuddhi, vaddho, vuddho, jātivuddho, guṇavuddho, vayovuddho.

Ye vuddhamapacāyanti, narā dhammassa kovidā;
Diṭṭheva dhamme pāsamsā, samparāye ca suggatiṃ.

Sadhu saddakucchiyaṃ. Sadhati.

Piḷadhi alaṅkāre. Piḷandhati. Piḷandhanaṃ.

Piḷandhanamalāṅkāro, maṇḍanañca vibhūsaṇaṃ;
Pasādhanañcābharaṇaṃ, pariyāyā ime matā.

Medha hiṃsāyaṃ saṅgame ca. Medhati. Medhā, medhāvī. Atra **medhāti** asani viya siluccaye kilese medhati hiṃsatīti medhā. Medhati vā siriyā silādīhi ca sappurisadhammehi saha gacchati na ekikā hutvā tiṭṭhatīti **medhā**, paññāyetaṃ nāmaṃ. Tathā hi –

“Paññā hi seṭṭhā kusalā vadanti,
Nakkhattarājāriva tārakānaṃ;
Sīlaṃ sirī cāpi satañca dhammo,
Anvāyikā paññavato bhavanti’”ti

Vuttaṃ. **Medhāvīti** dhammōjapaññāya ca samannāgato puggalo.

Sadhu madhu unde. Sadhati. Madhati. Madhu.

Budha bodhane. Bodhati. Buddho. Abhisambuddhāno. Sambuddhaṃ. Asambuddhaṃ. Bodhi. **Divādigane**pi ayaṃ dissati. Tatrahi “bujjhatī”ti rūpaṃ, idha pana “bodhatī”ti rūpaṃ. “Yo nindaṃ apabodhatī”ti pāḷi dissati. Kārite pana “bodheti” iccādīni.

Yudha sampahāre. Yodhati. Yodho. Yodhetha māraṃ paññāvudhena. Yuddhaṃ. Caraṇāyudho, caraṇāvudho vā. Āvudhaṃ. **Divādigane**panassa “yujjhatī”ti rūpaṃ.

Dīdhi dīttivedhanesu. Dīdhati. Dīdhiti. Ettha ca **dīdhitīti** rasmi. Anekāni hi rasmināmāni.

Rasmi ābhā pabhā raṃsi, ditti bhā ruci dīdhiti;
Marīci juti bhāṇva’su, mayūkho kiraṇo karo;
Nāgadhāmo ca āloko, iccete rasmivācakā.

Cakārantarūpāni.

Nakārantadhātu

Nī naye. Neti, nayati, vineti. Vineyya hadaye daraṃ. Āneti. Ānayati. Netā. Vinetā. Nāyako. Neyyo. Veneyyo. Venayiko. Vinīto puriso. Nīyamāne pisācena, kinnu tāta udikkhati. Nīyanto. Nettaṃ. Netti. Bhavanetti samūhatā. Nettiko. Udakañhi nayanti nettikā. Nettā. Nette ujum gate sati. Nayo. Vinayo. Āyatanam. Netum. Vinetum. Netvā. Vinetvā iccādīni.

Tattha **nettanti** samavisamaṃ dassentaṃ attabhāvaṃ netīti nettaṃ, cakkhu. **Nettīti** nenti etāya satteti netti, rajju. **Bhavanettīti** bhavarajju, taṇhāyetaṃ nāmaṃ. Tāya hi sattā goṇā viya gīvāya bandhitvā taṃ taṃ bhavaṃ niyyanti, tasmā bhavanettīti vuccati. **Nettikāti** kassakā. **Nettāti** gavajeṭṭhako yūthapati. **Nayoti** nayanam gamanam nayo, pāḷigati. Atha vā tattha tattha netabboti **nayo**, sadisabhāvena netabbākāro. Nīyatīti **nayo**, tathattanayādi. Nīyati etenāti **nayo**, antadvayavivajjanayādi.

Tathā hi chabbidho nayo tathattanayo pattinayo desanāyayo antadvayavivajjananayo acinteyyanayo adhippāyanayoti. Tesu **tathattanayo** antadvayavivajjananayena nīyati, **pattinayo** acinteyyanayena, **desanāyayo** adhippāyanayena nīyati. Etthādīmihi tividho nayo kammaśādhana nīyatīti “nayo”ti vuccati, pacchimo pana tividho nayo karaṇasādhana nīyati etena tathattādinayattayamīti “nayo”ti vuccati. Imasmiṃ atthe papañciyamāne ganthavitthāro siyāti

vitthāro na dassito.

Aparopi catubbidho nayo ekattanayo nānattanayo abyāpāranayo evaṃdhammatānayo.

Vineta satte ettha, etenāti vā **vinayo**. Kāyavācānaṃ vinayanatopi vinayo. **Āyatananti** anamatagge saṃsāre pavattaṃ atīva āyataṃ saṃsāradukkhāṃ yāva na nivattati, tāva nayateva pavattatevāti āyatanāṃ.

Ayaṃ panettha atthuddhāro. “Āyatananti assānaṃ kambojo āyatanāṃ, gunnaṃ dakkhiṇāpatho āyatana”nti ettha sañjātiṭṭhānaṃ āyaanaṃ nāma. “Manorame āyatane, sevanti naṃ vihaṅgamā.

Chāyaṃ chāyatthino yanti, phalattaṃ phalabhajino”ti ettha samosaraṇaṭṭhānaṃ. “Pañcimāni bhikkhave vimuttāyatanāni”ti ettha kāraṇaṃ. Aññepi pana payogā **yata patiyataneti** ettha pakāsītā.

Nī pāpane. Neti, nayati. Nayanāṃ.

Nu thutiyāṃ. Noti, navati. Nuto.

Thana pana dhana sadde. Thanati. Panati. Dhanati.

Kana dittikantīsu. Kanati. Kaññā. Kanakāṃ.

Ettha ca yobbanibhāve ṭhitattā rūpavilāsenā kanati dippati virocātīti **kaññā**. Atha vā kaniyati kāmīyabhi abhipatthiyati purisehītipi **kaññā**, yobbanitthī. **Kanakanti** kanati, kanīyatīti vā **kanakāṃ**, suvaṇṇaṃ. Suvaṇṇassa hi anekāni nāmāni.

Suvaṇṇaṃ kanakāṃ hemaṃ, kañcanaṃ haṭakampi ca;
Jātarūpaṃ tapanīyaṃ, vaṇṇaṃ tabbhedakā pana;
Jambunadaṃ siṅgikañca, cāmikaranti bhāsītā.

Vana sana sambhattiyāṃ. Vanati. Vanaṃ. Sanati.

Tattha vananti. Taṃ sambhajanti mayūrakokilādayo sattāti **vanāṃ**, araññaṃ. Vanati sambhajati saṃkilesapuggalanti **vanāṃ**, taṇhā.

Mana abbhāse. Manati. Mano.

Māna vīmaṃsāyaṃ, vīmaṃsati. Vīmaṃsā.

Jana suna sadde. Janati. Sunati.

Ettha ca “kasmā te eko bhujō janati, eko te na janatī bhujō”ti pāli nidassanaṃ. Tattha **janatīti** sunati saddaṃ karoti.

Khanu avadāraṇe khanati. Sukhaṃ. Dukkhaṃ. Khato āvāṭo.

Tattha **sukhanti** suṭṭhu dukkhaṃ khanatīti sukhaṃ. Duṭṭhu khanati kāyikacetāsikasukhanti **dukkhaṃ**. Aññaṃaṇṇapaṭipakkhā hi ete dhammā. Dvidhā cittaṃ khanatīti vā **dukkhaṃ**. **Curādigaṇavasena** pana “sukhayatīti sukhaṃ, dukkhayatīti dukkha”nti nibbacaṇāni gahetabbāni. Samāsapaavasena “sukaraṃ khamassāti **sukhaṃ**, dukkaraṃ khamassāti **dukkha**”nti nibbacaṇāni pivividhā hi saddānaṃ byuppatti pavatti nimittañca.

Dāna avakhaṇḍane. Dānati. Apadānaṃ.

Sāna tejane. Tejanaṃ nisānaṃ. Sānati.

Hana hiṃsāgatīsu. Ettha pana **hiṃsā**vacanena pharusāya vācāya pīḷanañca daṇḍādīhi paharaṇaṇca gahitaṃ, tasmā **hana hiṃsāpaharaṇagatīsūti** attho gahetabbo. Tathā hi “rājāno coraṃ gahetvā haneyyumaṃ vā bandheyyumaṃ vā”ti. Pāṭhassa atthaṃ saṃvaṇṇentehi “**haneyyunti** potheyyūñceva chindeyyūñcā”ti vuttaṃ. Ettha ca chedanamaṃ nāma hatthapādādichedanamaṃ vā sīsacchedavasena māraṇamaṃ vā. **Hanassa vadhādeso ghātādeso** ca bhavati, hanti hanati, hananti. Hanasi, hanatha. Sesamaṃ sabbaṃ neyyamaṃ.

Himsādayo cattāro atthā labbhanti. “Hanti hatthehi pādehi”ti ettha pana **hantīti** paharatīti attho. “Kuddho hi pitaraṃ hanti. Vikkosamānā tībāhi, hanti nesamaṃ varam varam”nti. Ettha **hantīti** mārentīti attho. “Vadhati, vadheti, ghātehi” iccapī rūpāni bhavanti. Tattha “vadhati na rodati, āpatti dukkaṭassa. Attānaṃ vadhivā vadhivā rodati”tiādīsū vadho paharaṇamaṃ. Pāṇamaṃ vadheti. Pāṇavadho. “Esa vadho khaṇḍahālassa. Satte ghātehi”ti ca ādīsū vadho māraṇamaṃ.

“Upāhanaṃ, vadhū”ti ca ettha **hanavadhasaddatthogamaṃ**. “Purisaṃ hanati. Sītaṃ uṇhaṃ paṭihanati” iccādīni kattupadāni. Devadatto yaññadattena haññati. Tato vātātape ghore, sañjāte paṭihaññati. Paccattavacanassekārattaṃ, yathā “vanappagumbe”ti. Vihārenāti padaṃ sambandhitabbaṃ, iccādīni kammaṃ padāni. Hantā. Hato. Vadhako. Vadhū. Āghāto. Upaghāto. Ghātako. Paṭigho. Saṅgho. Byaggho. Sakuṇagghi. Hantuṃ, hanituṃ, hantvā, hanitvā. Vajjhētā, vadhivā iccādīni sanāmikāni tumantādīpadāni.

Tattha **upāhananti** taṃ taṃ thānaṃ upahananti upagacchanti tato ca āhananti āgacchanti etenāti upāhanaṃ. **Vadhūti** kilesavasena sunakhampi upagamanasīlāti vadhū, sabbāsaṃ itthīnaṃ sādharmaṇametamaṃ. Atha vā **vadhūti** suṇisā. Tathā hi “tena hi vadhu yadā utunī ahosi, pupphaṃ te uppannaṃ, atha me āroceyyāsī”ti ettha vadhūti suṇisā vuccati. Sā pana “ayaṃ no puttassa bhariyā”ti sassusasurehi adhigantabbā jānitabbāti **vadhūti** vuccati. Gatyatthānaṃ katthaci buddhiyatthakathanato ayamattho labbhateva. “Suṇhā, suṇisā, vadhū” iccete pariyāyā. **Saṅghoti** bhikkhusamūho. Samaggaṃ kammaṃ samupagacchatīti saṅgho, suṭṭhu vā kilese hanti tena tena maggāsīnā māretītipi saṅgho, puthujjanāriyavasena vuttānetāni. Vividhe satte āhanati bhūso ghātehi **byaggho**. So eva “viyaggho, vaggho”ti ca vuccati. Aparampi puṇḍarīkoti tassa nāmaṃ. Dubbale sakuṇe hantīti **sakuṇagghi**, seno, ayaṃ pana **hanadhātu divādigāṇe** “paṭihaññati”ti akammakamaṃ kattupadaṃ janeti. Tathā hi “buddhassa bhagavato vohāro lokiye sote paṭihaññati”tiādīkā pāḷiyō dissanti.

Ana pāṇane. Pāṇanaṃ sasaṇamaṃ. Anati. Ānaṃ, pānaṃ. “Tattha ānanti assāso. Pānanti passāso. Etesu **assāsoti** bahi nikkhamaṇavāto. **Passāsoti** anto pavisaṇavāto”ti **vinayaṭṭhakathāyaṃ** vuttaṃ, **suttantaṭṭhakathāsu** pana uppaṭipāṭiyā āgataṃ. Tattha yasmā sabbesampi gabbhaseyyakānaṃ mātukucchito nikkhamaṇakāle paṭhamaṃ abbhantaravāto bahi nikkhamati, pacchā bhāhiraṇavāto sukhumamaṃ rajaṃ gahetvā abbhantaraṃ pavisaṇto tāluṃ āhacca nibbāyati, tasmā **vinayaṭṭhakathāyaṃ** “assāsoti bahi nikkhamaṇavāto, passāsoti anto pavisaṇavāto”ti vuttaṃ. Etesu dvīsū navesu vinayanayena anto uṭṭhitasasaṇamaṃ **assāso**, bahi uṭṭhitasasaṇamaṃ **passāso**. Suttantaṇayena pana bahi uṭṭhahitvāpi anto sasaṇato **assāso**. Anto uṭṭhahitvāpi bahi sasaṇato **passāso**. Ayameva ca nayo “assāsādīmajjhāpariyosānaṃ satiyā anugacchato ajjhattaṃ vikkhepagatena cittaṇa kāyopi cittaṃpi sāraddhā ca honti iñjitā ca phanditā cā”ti, “passāsādīmajjhāpariyosānaṃ satiyā anugacchato bahiddhā vikkhepagatena cittaṇa kāyopi cittaṃpi sāraddhā ca honti iñjitā ca phanditā cā”ti imāya **pāḷiyā** sametīti veditabbaṃ.

Dhana dhaññe. Dhananaṃ **dhaññaṃ**, siripuññaṇānaṃ sampadāti attho. Dhātuattho hi yebhuyyena bhāvasasena kathiyati ṭhapetvā **vakkarukkhataceti** evamādippabhedamaṃ. Yathā bhāvatthe vattamānena **yapaccayena** saddhiṃ **nakārassa** **yyakāraṃ** katvā thenamaṃ **theyyanti** vuccati, evamidha **yapaccayena** saddhiṃ **nakārassa** **ññakāraṃ** katvā dhananaṃ **dhaññaṇti** vuccati. Dhanino vā bhāvo **dhaññaṃ**, tasmīṃ dhaññe. Dhanti, dhanati. Dhanitaṃ. Dhaññaṃ. Yasmā pana **dhañña**saddena siripuññaṇānaṃ sampadā gahitā, tasmā “dhaññaṇānaṃ lakkhaṇasampannaṃ puttamaṃ vijāyī”tiādīsū **dhañña**saddena siripaññaṇānaṃ gahetabbā puññaṇaṃ visumaṃ vacanato.

“Nadato parisāyante, vāditabbapahārino;
Ye te dakkhanti vadanam, dhaññā te narapuṅgava.

Dīghaṅgulī tambanakhe, subhe āyatapaṅhike;
Ye pāde paṇamissanti, tepi dhaññā guṇandhara.

Madhurāni pahaṭṭhāni, dosagghāni hitāni ca;
Yetevākyāni sossanti, tepi dhaññānaruttamā”ti

Evamādīsu pana **dhaññas**addena puññasampadā gahetabbā, puññasampadāya vā saddhiṃ siripaññāsampadāpi gahetabbā. Idamettha nibbacaṇam “dhaññaṃ siripuññaapaññāsampadā etesaṃ atthīti **dhaññā**”ti. “Dhaññaṃ maṅgalasammata”nti ettha tu “uttamaratanaṃ ida”nti dhanāyitabbaṃ saddhāyitabbanti **dhaññaṃ**, sirisampannaṃ puññasampannaṃ paññāsampannantipi attho yujjati. “Dhaññaṃ dhanam rajataṃ jātarūpa”nti ca ādīsu “natthi dhaññasamaṃ dhana”nti vacanato dhanāyitabbanti **dhaññaṃ**, kiṃ taṃ? Pubbaṇṇam. Apica osadhivisesopi **dhaññanti** vuccati. **Dhanas**addassa ca pana samāsavasena “adhano, niddhano”ti ca natthi dhanam etassāti atthena daliddapuggalo vuccati. “Nidhanaṃ yātī”tiettha tu kampanatthavācakassa **dhūdhātussa** vasena vināso **nidhananti** vuccatīti.

Muna gatiyaṃ. Munati.

Cine maññanāyaṃ. Aluttantoyaṃ dhātu, yathā gile, yathā ca mile. Cināyati, ocināyati. “Sabbo taṃ jano ocināyatū”ti idamettha pāḷi nidassanaṃ. **Ocināyatati** avamaññatūti.

Iti **bhūvādigaṇe tavaggantadhāturūpāni**

Samattāni.

Pakārantadhātu

Idāni **pavaggantadhāturūpāni** vuccante –

Pā pāne. Pānaṃ pivanaṃ. “Pāti, pānti. Pātu, pāntu” iccādi yathārahaṃ yojetabbaṃ.

Khippaṃ gīvaṃ pasārehi, na te dassāmi jīvitaṃ;
Ayañhite mayā rūḷho, saro pāssati lohitanti.

Atra hi **pāssatīti** pivissati. “Pāssati, pāssanti. Pāssasi, pāssatha. Pāssāmi, pāssāma” iccādinā, “apassā, apassaṃsu” iccādinā ca nayena sesaṃ sabbaṃ yojetabbaṃ nayaññūhi. Ko hi samattho sabbāni buddhavacanasāgare vicitrāni vipakīṇṇarūpantararatanāni uddharitvā dassetuṃ, tasmā sabbāsūpi dhātūsu saṅkhepena gahaṇūpāyamattameva dassitaṃ. Pivati, pivanti. Pivaṃ, pivanto, pivamāno, pivaṃ bhāgirasodakaṃ. Kārite kumāraṃ khīraṃ pāyeti. Muhuttaṃ taṅhāsamaṃ, khīraṃ tvaṃ pāyito mayā. Kamme piyati, pītaṃ. **Tumādīsu** “pātuṃ, pivituṃ, pitvā, pivitvā, pāyetvā” iccādinī yojetabbāni. Aññesūpi thānesu pālinayānurūpena saddarūpāni evameva yojetabbāni.

Pā rakkaṇe. Pāti. Nipāti. Pitā, gopo.

Pā pūraṇe. Pāti, vippāti. Vippo.

Vippoti brāhmaṇo. So hi vippeti pūreti viṣiṭṭhena veduccāraṇādinā attano brāhmaṇakammena lokassa ajjhāsayaṃ attano ca hadaye vedānti **vippoti** vuccati. “Jāto vippakule aha”nti ettha hi brāhmaṇo “vippo”ti vuccati. Tassa kulaṃ **vippakulanti**.

Pū pavane. Pavati. Putto, puññaṃ. Ettha **puttoti** attano kulaṃ pavati sodhetīti putto.
Kiyādigaṇaṃ pana patvā “punātī”ti vattabbaṃ.

Putto'trajo suto sūnu,
Tanujo tanayo'raso;
Puttanattādayo cātha,
Apaccanti pavuccare.

Itthilingamhi vattabbe, puttīti atrajāti ca;
Vattabbaṃ sesatthānesu, yathārahamudīraye;
Pāliyañhi atrajāti, itthī puttī kathiyati;

Ettha pana –

“Tato dve sattarattassa, vedehassatrajā piyā;
Rājakaññā rucā nāma, dhātimātaramabravī”ti

Ayaṃ pāḷi nidassanaṃ. “Puttī, dhītā, duhitā, attajā”ti iccete pariyāyā. Evaṃ atrajāti itthivācakassa itthilingassa dassanato **sutasaddādīs**upī itthilinganayo labbhamānālabbhamānavasena upaparikkhitabbo. Tathā hi loke “vesso, suddo, naro, kiṃpuriso” iccādīnaṃ yugaḷabhāvena “vessī, suddī, nārī, kiṃpurisī”tiādīni itthivācakāni līngāni dissanti. “Puriso pumā” iccādīnaṃ pana yugaḷabhāvena itthivācakāni itthilingāni na dissanti. **Puññanti** ettha pana attano kāraṃ pavati sodhetīti puññaṃ. **Kiyādigaṇaṃ** pana patvā punātīti **puññanti** vattabbaṃ.

Añño atthopi vattabbo, nirutilakkhaṇassito;
Tasmā nibbanaṃ ñeyyaṃ, janapūjādito idha.

Paraṃ pujjabhavaṃ janetīti **puññaṃ**. Sadā pūjitaṃ vā janetīti **puññaṃ**. Janāṃ attakāraṃ punātīti **puññaṃ**. Asesaṃ apuññaṃ punātīti **puññaṃ**.

Kalyāṇaṃ kusalaṃ puññaṃ, subhamicceva niddise;
Kammaṃ kusalassādhi-vacanaṃ vacane paṭu.

Pe gatiyaṃ. Peti, penti. Pesi, petha. Idha bhikkhave ekacco assakhaḷuṅko pehīti vutto viddho samāno codito sārathinā pacchato paṭisakkati, piṭṭhito rathaṃ paṭivatteti. Ummaggaṃ gaṇhāti, ubbaṭumaṃ rathaṃ karoti.

Pe vuddhiyaṃ payati. Pāyo, apāyo. Ettha **apāyoti** natthi pāyo vuddhi etthāti apāyo.
Ayadhātuvasenapi attho netabbo, ayato vuddhito, sukhato vā apētoti **apāyo**,
nirayatiracchānayanipettivisayaasurakāyā.

Pe sosane. Pāyati, payati vā. Nipako. Ettha **nipako** nipayati visoseti paṭipakkhaṃ, tato vā attānaṃ nipāti rakkhatīti nipako, sampajāno.

Gupa rakkhaṇe. Gopati. Gopako.

Nagaraṃ yathā paccantaṃ, guttaṃ sāntarabāhiraṃ.

Evaṃ gopetha attānaṃ, khaṇo ve mā upaccagā.

Gopethāti gopeyya rakkheyya.

Vapa santāne. Vapati.

Sapa samavāye. Sapati.

Cupa mandagatiyaṃ. Copati.

Tupa hiṃsāyaṃ. Topati. Tuppati.

Gupa gopanajigucchanesu. Gopati, jigucchati. Jigucchaṃ, jigucchamāno. Jegucchī. Jigucchitvā iccādīni.

Kapu hiṃsātakkalagandhesu. Kappati. Kappūro.

Kapu sāmattiye. Idamaṃ amhākaṃ kappati. Netamaṃ amhesu kappati.

Kapa karuṇāyaṃ. Kapati. Kapaṇo, kāpaññaṃ. Tattha **kapatīti** karuṇāyati, **kāpaññanti** kapaṇabhāvo.

Sapa akkose. Sapati. Sapattho, abhisapattho, abhisapito, sapanako.

Vapa bījanikkhepe. Bījaṃ vapati. Vāpako. Vāpitaṃ dhaññaṃ. Vuttaṃ bījaṃ purisena. Bījaṃ vappati. Vappamaṅgalaṃ.

Supa sayane. Supati. Sukhaṃ supanti munayo, ye itthīsu na bajjhare. Sutto puriso, supanaṃ, suttaṃ.

Khipa perañe. **Perañamaṃ** cuṇṇikaraṇaṃ pisaṇaṃ. Khepati. Khepako.

Khipa abyattasaddo. Khipati. Khipitasaddo. Yadā ca dhammaṃ desento, khipi lokagganāyako.

Khipa chaddāno. Khipati, ukkhipati, vikkhipati, avakhipati, saṃkhipati. Khittaṃ, ukkhittaṃ, pakkhittaṃ, vikkhittaṃ iccādīni.

Opa niṭṭhubhane. **Niṭṭhubhanaṃ** kheḷapātanaṃ. Opati. Osadhaṃ saṅkharitvā mukhe kheḷamaṃ opi.

Lipi upalepe. Lepati. Littamaṃ paramena tejasā.

Khipi gatiyaṃ. Khimpatī.

Ḍipa khepe. Ḍepati.

Nidapi nidampane. **Nidampanaṃ** nāma sassarukkhādīsu vīhisīsaṃ vā varakasīsaṃ vā acchinditvā khuddakasākhamaṃ vā abhaññitvā yathāñhitameva hatthena gahetvā ākaḍḍhitvā bījamattasseva vā paṇṇamattasseva vā gahaṇaṃ. Puriso vīhisīsaṃ nidampati, rukkhapattaṃ nidampati. Nidampako, nidampitaṃ, nidampitumaṃ, nidampitvā.

Tapa dittiyaṃ. **Ditti** virocanaṃ. Divā tapatiādicco.

Tapa ubbege. **Ubbego** utrāso bhīrutā. Tapati, uttapati. Ottappaṃ, ottappiyaṃ dhanamaṃ.

Tapa dhūpa santāpe. Tapati. Tapodhanaṃ, ātāpo. Ātāpī. Ātapaṃ. Dhūpati, sandhūpano, kamme tāpiyati. Dhūpiyati. Bhāve tāpanamaṃ, tāpo, paritāpo, santāpo. Dhūpanamaṃ.

Pakārantadhāturūpāni.

Phakārantadhātu

Puppha vikaṣane. Akammako cāyaṃ sakammako ca. Pupphati. Pupphaṃ, pupphanam, pupphito, pupphituṃ, pupphitvā. Pupphanti pupphino dumā. Thalajā dakajā pupphā, sabbe pupphanti tāvade. Mañjūsako nāma rukkho yattakāni uduke vā thale vā pupphāni, sabbāni pupphati.

Tupha hiṃsāyaṃ. Tophati.

Dapha daphi vappa gatiyaṃ. Daphati. Damphati. Vapphati.

Dipha kathanayuddhanindāhiṃsādānesu. Dephati. Depho.

Tapha tittiyaṃ. Titti tappanam, taphati.

Dupha upakkilese. Upakkilissanam **upakkileso.** Dophati.

Gupha ganthe. Gantho ganthikaraṇam. Gophati.

Phakārantadhāturūpāni.

Bakārantadhātu

Bhabba hiṃsāyaṃ. Bhabbati. Bhabbo.

Pabba vabba mabba kabba khabba gabba sabba cabba gatiyaṃ. Pabbati. Vabbati. Mabbati. Kabbati. Khabbati. Gabbati. Sabbati. Cabbati.

Abba sabba hiṃsāyaṇca. Gatyāpekkhāya cakāro. Abbati. Sabbati.

Kubi acchādane. Kubbati.

Lubi tubi addane. Lumbati. Tumbati. Lumbinīvanam. Udukatumbo. Athopi dve ca tumbāni.

Cubi vadanasaṃyoge. Puttam muddhani cumbati. Mukhe cumbati. Ettha siyā “yadi vadanasaṃyoge **cubidhātu** vattati, katham **ambudharabinducumbitakūṭoti** ettha avadane aviññāṇake pabbatakūṭe ambudharabindūnam cumbanam vutta”nti? Saccaṃ, taṃ pana cumbanākārasadisenākārena sambhavaṃ cetasi ṭhapetvā vuttam, yathā adassanasambhavepi dassanasadisenākārena sambhūtattā “rodante dārake disvā, ubbidhā vipulā dumā”ti acakkhukānampi rukkhanam dassanam vuttam, evamidhāpi cumbanākārasadisenākārena sambhūtattā avadanānampi ambudharabindūnam cumbanam vuttam. Sabhāvato pana aviññāṇakānam dassanacumbanādīni ca natthi, saviññāṇakānaṃyeva tāni hontīti. Ayaṃ nayo **kamu padavikkhepeti**ādīsupi netabbo.

Ubbi tubbi thubbi dubbi dhubbi hiṃsatthā. Ubbati. Tubbati. Thubbati. Dubbati. Dubbā. Dhubbati. Ettha **dubbāti** dabbatiṇam, yaṃ “tiriya nāma tiṇajātī”ti pāliyaṃ āgataṃ. Ettha ca **dubbāti** itthilingam, **dabbanti** napuṃsakalinganti daṭṭhabbam.

Mubbi bandhane. Mubbati.

Kubbi uggame. Kubbati.

Pubba pabba sabba pūraṇe. Pubbati. Pabbati. Sabbati. Etta siyā “nanu bho **pubbasabbasaddā** sabbanāmāni, kasmā panete dhātucintāyaṃ gahitā”ti? Vuccate – sabbanāmesu ca **tumantādivirahitesu** ca nipātesu upasagesu ca dhātucintā nāma natthi, imāni pana sabbanāmāni na

honti. Kevalaṃ sutisāmaññaena sabbanāmāni viya upaṭṭhahanti, tena te tabbhāvamuttattā dhātucintāyaṃ pubbācariyehi gahitā “pubbati sabbatī”ti payogadassanatoti. Yadi evaṃ kasmā buddhavacane etāni rūpāni na santīti? Anāgamanabhāvena na santi, na avijjamānabhāvena. Kiñcāpi buddhavacanesu etāni rūpāni na santi, tathāpi porāṇehi anumatā purāṇabhāsāti gahetabbāni, yathā “nāthatīti nātho”ti ettha “nāthatī”ti rūpaṃ buddhavacane avijjamānampi gahetabbaṃ hoti, evaṃ imānipi. Tasmā vohāresu viññūnaṃ kosallatthāya sāsane avijjamānāpi sāsānānurūpā lokikappayogā gahetabbāti “pubbati sabbatī”ti rūpāni gahitāni. Esa nayo aññesupi ṭhānesu veditabbo.

Camba adane. Cambati.

Kabba khabba gabba dabbe. Dabbo ahañkāro. Kabbati. Khabbati. Gabbati.

Abi dabi sadde. Ambati. Ambā, ambu. Dambati.

Labi avasaṃsane. Avasaṃsanaṃ avalambanaṃ. Lambati, vilambati, byālamabati. Nīce co’lambate sūriyo. Ālambati. Ālambanaṃ, tadālamabanaṃ, tadālamabanaṃ, tadālamabanaṃ vā. Lābu. Alābu vā, akāro hi tabbhāve.

Bakārantadhāturūpāni.

Bhakārantadhātu

Bhā dittiyaṃ. Cando bhāti, pañhā maṃ paṭibhāti. Ratti vibhāti. Bhāṇu, paṭibhānaṃ. Vibhātā ratti.

Bhī bhaye. Bhāyati. Bhayaṃ, bhayānako, bhīmo, bhīmaseno, bhīru, bhīruko, bhīrukajātiko. Kārite “bhāyati, bhāyati, bhāyāpeti, bhāyāpayatī”ti rūpāni.

Sabhu sambhu hiṃsāyaṃ. Sabhati. Sambhati.

Sumbha bhāsane ca. Cakāro hiṃsāpekkhako. Sumbhati. Sumbho. Kusumbho.

Ettha **sumbhoti** āvāṭo. “Sumbhaṃ nikkhanāhī”ti idamettha nidassanaṃ. **Kusumbhoti** khuddakaāvāṭo, “pabbatakandarapadarasākhāparipūrā kusumbhe paripūrentī”ti idamettha nidassanaṃ.

Abbha vabbha mabbha gatiyaṃ. Abbhati. Abbho. Vabbhati. Mabbhati.

Ettha **abbhoti** meggho. So hi abbhati anekasatapaṭalo hutvā gacchatīti “abbho”ti vuccati. “Vijjumaṇī satakkakū”ti vuttaṃ. **Satakkakūti** ca anekasatapaṭalo. Ettha ca **abbhasaddo** tiliṅgiko daṭṭhabbo. Tathā hi ayaṃ “abbhuṭṭhitova sa yāti, sa gacchaṃ na nivattatī”ti ettha pulliṅgo. “Abbhā, mahikā, dhūmo, rajo, rāhū”ti ettha itthiliṅgo. “Abbhāni candamaṇḍalaṃ chādenti”ti ettha napuṃsakaliṅgo.

Imāni pana megghassa nāmāni –

Meggho valāhako laṅghi, jīmūto ambudo ghano;
Dhārādharo ambudharo, pajjunno himagabbhako.

Yabha methune. Mithunassa janadvayassa idaṃ kammaṃ **methūnaṃ**, tasmim̐ methune **yabhadhātu** vattati. Yabhati. Yābhassaṃ.

Ettha ca “methuna”nti esā sabbhivācā, lajjāsampannehi puggalehi vattabbabhāsābhāvato. Tathā hi “methuno dhammo na paṭisevitabbo”ti ca “na me rājā sakhā hoti, na rājā hoti methuno”ti

ca sobhane vācāvisaye ayaṃ bhāsā āgatā. “Yabhatī”’tiādikā pana bhāsā “sikharāṇī”’tiādikā bhāsā viya asambhivācā. Na hi hirottappasampanno lokiyajanopi īdisiṃ vācaṃ bhāsati. Evaṃ santēpi adhimattukkaṃsagatahirottappopi bhagavā mahākaruṇāya sañcoditahadayo lokānukampāya parisamajjhe abhāsī. Aho tathāgatassa mahākaruṇāti.

Imāni pana methunadhammassa nāmāni –

Samvesanaṃ niddhuvanaṃ, methunaṃ sūrataṃ rataṃ;
Byathayo gāmadhammo ca, yābhassaṃ mohanaṃ rati.

Asaddhammo ca vasala-dhammo mīlhasukhampi ca;
Dvayaṃdvayasamāpatti, dvando gammo’dakantiko.

Sibha vibha katthane. Sibhati. Vibhati.

Debha abhi dabhi sadde. Debhati. Ambhati. Ambho. Dambhati.

Ettha ca **ambho** vuccati udakaṃ. Tañhi nijjīvampi samānaṃ oghakālādīsu vissandamānaṃ ambhati saddaṃ karotīti **ambhoti** vuccati.

Imānissa nāmāni –

Pānīyaṃ udakaṃ toyāṃ, jalaṃ pāto ca ambu ca;
Dakaṃ kaṃ salilaṃ vāri, āpo ambho papampi ca.

Nīrañca kepukaṃ pāni, amataṃ elameva ca,
Āponāmāni etāni, āgatāni tato tato.

Ettha ca “vālaggesu ca kepuke. Pivitañca tesāṃ bhusāṃ hoti pānī”’tiādayo payogā dassetabbā.

Thabhi khabhi paṭibaddhe thambhati, vitthambhati. Khambhati, vikkhambhati. Thambho. Thaddho, upatthambho. Upatthambhinī. Vikkhambho. Vikkhambhitakilesa.

Jabha jabhi gattavināme. Jabhati. Jambhati, vijambhati. Vijambhanaṃ, vijambhitā. Vijambhanto, vijambhamāno, vijambhito.

Sabbha kathane. Sabbhati.

Vabbha bhojane. Vabbhati.

Gabbha dhāraṇe. Gabbhati. Gabbho.

Ettha **gabbhoti** mātukucchipi vuccati kucchigataputtopi. Tathā hi “yamekarattiṃ paṭhamaṃ, gabbhe vasati māṇavo”’ti ettha mātukucchi “gabbho”’ti vuccati. “Gabbho me deva patiṭṭhito. Gabbho ca patito chamā”’ti ca ettha pana kucchigataputto. Apica **gabbhoti** āvāsaviseso. “Gabbhaṃ pavitṭho”’tiādīsu hi ovarako “gabbho”’ti vuccati.

Rabha rābhasse. Āpubbo **rabha himsākaraṇavāyamanesu.** **Rābhassaṃ** rābhasabhāvo. Taṃsamaṅgino pana pāḷiyaṃ “caṇḍā ruddhā rabhasā”’ti evaṃ āgatā.

Tattha **rabhasāti** karaṇuttariyā. Rabhati, ārabhati, samārabhati, ārambhati. Rabhaso. Ārambho. Samārambho, ārabhanto. Samārabhanto. Āraddhaṃ me vīriyaṃ. Sārambhaṃ. Anārambhaṃ. Sārambho te na vijjati. Pakāraṇārambho. Vīriyārambho. Ārabhituṃ. Ārabhitvā. Ārabba.

Ettha **vīriyārambhoti** vīriyasaṅkhāto ārambho. **Ārambhasaddo** kamme āpattiyam kriyāya vīriye hiṃsāya vikopaneti anekesu atthesu āgato.

“Yaṃ kiñci dukkham sambhobhi, sabbam ārambhapaccayā;
Ārambhānam nirodhena, natthi dukkhassa sambhavo”ti

Ettha hi kammaṃ ārambhoti āgataṃ. “Ārambhāti ca vippaṭṭisārī ca hotī”ti ettha āpatti. “Mahāyaññā mahārambhā, na te honti mahapphallā”ti ettha yūpussāpanādikriyā. “Ārambhatha nikkamatha, yuñjatha buddhasāsane”ti ettha vīriyam. “Samaṇaṃ gotamaṃ uddissa pāṇaṃ ārambhanti”ti ettha hiṃsā. “Bījagāmahūtagāmasamārambhā paṭivirato hotī”ti ettha chedanabhañjanādikaṃ vikopanaṃ. Icevaṃ –

Kamme āpattiyāñceva, vīriye hiṃsākriyāsu ca;
Vikopane ca **ārambha**-saddo hotīti niddise;

Labha lābhe. Labhati, labbhati. Lābho, laddham, alattha, alatthum.

Subha dittiyaṃ. Sobhati. Sobhā, sobhanaṃ, sobhito.

Khubha sañcalane. Khobhati, saṅkhobhati. Hatthināge padinnamhi, khubbhittha nagaraṃ tadā. Khobhā, saṅkhobho.

Nabha tubha hiṃsāyaṃ. Nabhati. Tubhati.

Sambha vissāse. Sambhati. Sambhatti, sambhatto.

Lubha vimohane. Lobhati, palobhati. Thullakumārīpalobhanaṃ. Kārite pana “lobheti, palobheti, palobhetvā”ti rūpāni bhavanti. **Divādigaṇaṃ** pana patvā giddhiyatthe “lubbhāti”ti rūpaṃ bhavati.

Dabhi ganthane. Dambhati. Dambhanaṃ.

Rubhi nivāraṇe. Rumbhati, sannirumbhati. Sannirumbho, sannirumbhitvā.

Ubha ubbha umbha pūraṇe. Ubhati. Ubbhati. Umbhati. Ubhanā. Ubbhanā. Umbhanā. Obho. Keṭubhaṃ. Ubbhaṃ. Kumbho. Kumbhī. Kārite “obheti. Ubbheti. Umbheti”ti rūpāni bhavanti.

Tattha **keṭubhanti** kriyākappavikappo kavīnaṃ upakāriyasattham. Idaṃ panettha nibbacanaṃ kiṭeti gameti kriyādivibhāgaṃ, taṃ vā anavasesapariyādānato keṭento gamento obheti pūretīti keṭutaṃ **kiṭaubhadhātuvasena**. Ubbhati ubbheti pūretīti **ubbhaṃ**, pūraṇanti attho. **Cariyāpiṭakepi** hi īdisī saddagati dissati, taṃ yathā? “Mahādānaṃ pavattesi, accubbhaṃ sāgarūpama”nti. Tattha ca **accubbhanti** ativiya yācakānaṃ ajjhāsayaṃ pūraṇaṃ. **Akkhumbhantipi** pāṭho. **Kumbhoti** kaṃ vuccati udakaṃ, tena ubbhetabboti kumbho, so eva itthilingavasena kumbhī. Ettha ca “kumbhī dhovati onato”ti payogo.

Kumbhasaddo ghaṭe hatthi-siropiṇḍe dasambaṇe;
Pavattatīti viññeyyo, viññunā nayadassinā.

Bhakārantadhāturūpāni.

Makārantadhātu

Mā māne sadde ca. Māti. Mātā. Ettha **mātāti** janikā vā cūlamātā vā mahāmātā vā.

Mū bandhane. Mavati. **Kiyādigaṇassa** panassa “munātī”ti rūpaṃ.

Me paṭidānaādānesu. Meti, mayati. Medhā.

Ettha **medhāti** paññā. Sā hi sukhumampi atthaṃ dhammañca khippameva meti ca dhāreti cāti medhāti vuccati. Ettha pana **metī**ti gaṇhāti. Tathā hi **aṭṭhasālīniyaṃ** vuttaṃ “asani viya siluccaye kilese medhati hiṃsatīti medhā, khippaṃ gahaṇadhāraṇaṭṭhena vā medhā”ti. Saṅgamatthavācakassa pana **medhadhātussa** vasena medhati sīlasamādhīdīhi saddhammehi siriya ca saṅgacchatīti **medhāti** attho gahetabbo. Etthetaṃ vuccati –

“Dvidhātuyekadhātuyā, dviratthavatiyāpi ca;
Medhāsaddassa nipphattiṃ, jaññā sugatasāsane”ti.

Omā sāmatthiye. Sāmatthiyaṃ samatthabhāvo. Aluttantoyaṃ dhātu, omāti, omanti.

Atrāyaṃ pāḷi “omāti bhante bhagavā iddhiyā manomayena kāyena brahmalokaṃ upasaṅkamitu”nti. Tattha **omātī**ti pahoti sakkoti.

Timu addabhāve. Addabhāvo tintabhāvo. Temati. Tinto, temiyo. Temitukāmā temiṃsu.

Ettha **temiyoti** evaṃnāmako kāsirañño putto bodhisatto. So hi rañño ceva mahājanassa ca hadayaṃ temento addabhāvaṃ pāpento sītalabhāvaṃ janento jātoti “temiyo”ti vuccati.

Nitami kilamane. Nitammati. Hadayaṃ dayhate nitammāmi.

Camu chamu japu jhamu umu jimu adane. Camati. Camū. **Camū**ti senā. Chamati. Jamati. Jhamati. Umati. Jemati.

Kamu padavikkhepe. Padavikkhepo padasā gamaṇaṃ. Idaṃ pana vohārasīsamattaṃ vacanaṃ, tasmā “nāssa kāye aggi vā visaṃ vā satthaṃ vā kamati”tiādīsu apadavikkhepatthopi gahetabbo. Kamati. Caṅkamati, atikkamati. Abhikkamati. Paṭikkamati. Pakkamati. Parakkamati. Vikkamati. Nikkamati. Saṅkamati. Saṅkamaṇaṃ. Saṅkanti. Kamaṇaṃ. Caṅkamaṇaṃ. Atikkamo. Abhikkamo. Paṭikkamo. Pakkamo. Vikkamo. Nikkamo. Atikkanto puriso. Abhikkantā ratti. Nikkhamati. Abhinikkhamati. Kārite nikkhāmeti. Aññāniyo yojetabbāni. Yasmā paṇāyaṃ dhātu **curādigaṇaṃ** patvā icchākaṇṭi yatthesu vattati, tasmā tepi atthe upasaggavisesite katvā idha **abhikkantasaddassa** atthuddhāraṃ vattabbampi avatvā upari **curādigaṇeyeva** kathessāma.

Yamu uparame. Uparamo viramaṇaṃ. Yamabhi. Yamo. “Pare ca na vijānanti, mayamettha yamāmasa”ti idamettha nidassanaṃ. Tattha **yamāmaseti** uparamāma, nassāma, marāmāti attho.

Nama bahutte sadde. Bahutto saddo nāma uggatasaddo. Namati.

Ama dama hamma mima chama gatimhi. Amati. Damati. Hammati. Mīmati. Chamati. Chamā.

Chamāti pathavī. **Chamāsaddo** itthiliṅgo daṭṭhabbo, “na chamāyaṃ nisīditvā āsane nisinnassa agilānassa dhammaṃ desessāmīti sikkhā karaṇīyā”ti ca “chamāyaṃ parivattāmi vāricarova ghamme”ti ca payogadassanato. So ca kho sattahi aṭṭhahi vā vibhattīhi dvīsu ca vacanesu yojetabbo. Chamanti gacchanti etthāti chamā.

Dhama saddaggaṃ yogesū. Dhamadhātu sadde ca mukhavātena saddhiṃ aggaṃyoge ca vattati. Tattha paṭhamatthe “saṅkhaṃ dhamati. Saṅkhadhamako. Bheriṃ dhamati. Bheridhamako. Dhame dhame nātidhame”ti payogo. Dutiyatthe “aggaṃ dhamati. Samuṭṭhāpeti attānaṃ, aṇuṃ aggaṃva sandhama”nti payogo.

Bhāma kodhe. Bhāmati.

Namu namane. Namati. Namō. Nataṃ, namanāṃ. Nati. Namaṃ. Namamāno. Namanto. Namīto. Nāmaṃ. Nāmitaṃ. Namitumaṃ. Natvā, natvāna. Namitvā, namitvāna, namituna. Kārite “nāmeti, nāmayati. Nāmetvā. Nāmayitvā”ti rūpāni bhavanti. Tatra hi “namati namitvā”ti evaṃpakārāni padāni namanatthe vandanāyañca daṭṭhabbāni, “namo natvā”ti evaṃpakārāni pana vandanāyameva. Atrāyamupalakkhaṇamattā payogaranā –

Rukkho phalī phalabhāragarutāya namitvāna bhijjati;
Vuddho jarājjaratāya namati namitvā gacchati;
Saddho buddhaṃ namati namitvā gacchati;
Namo buddhassa satthāraṃ natvāna agamāsīti;

Ettha **namoti** padaṃ nipātesupi labbhati. Tena hi paccattopayogavacanāni abhinnarūpāni dissanti “devarāja namo tyatthu. Namō katvā mahesino”ti. Upasaggehipi ayaṃ yojetabbā “paṇamati, paṇāmo, uṇṇamati, uṇṇati” iccādinā.

Khamu sahane. Khamati. Khanti. Khamo, khamaṃ, evaṃ bhāve. Kattari pana “khantā. Khamitā. Khamo hoti sītassapī uṇṇassapī”ti payogā.

Sama adassane. Samati, vūpasamati aggi.

Yama parivesane. Yamati. Yamo. Yamarājā.

Sama sadde. Samati.

Sama thama velambe. Samati. Thamati.

Vāyama ihāyaṃ. Vāyamati. Vāyāmo.

Gamu gatiyaṃ. Gacchati. Gamako. Gato. Gati. Gamaṃ. Kārite “gameti, gamayati, gacchāpetī”tiādīni bhavanti.

Ramu kilāyaṃ. Ramati. Viramati. Paṭiviramati. Uparamati. Ārati. Virati. Paṭivirati. Uparati. Veramaṇi. Viramaṇaṃ. Rati. Ramaṇaṃ. Rato. Ārato virato paṭivirato. Uparato, uparamo. Ārāmo.

Vamu uggiraṇe. Vamati. Vamathu. Vammiko.

Dhīratthu taṃ viṣaṃ vantaṃ, yamaṃ jīvitakāraṇā;
Vantaṃ paccāvamissāmi, mataṃ me jīvitā varaṃ.

Tattha **vammikoti** vamatīti, vantakoti, vantussayoti, vantasinehasambandhoti vammiko. So hi ahinakulaundūragharagoḷikādayo nānappakāre pāṇake vamatīti vammiko. Upacikāhi vantakoti vammiko. Upacikāhi vamtivā mukhatuṇḍakena ukkhittapaṃsucunṇena kaṭippamāṇenapi porisappamāṇenapi ussitoti vammiko. Upacikāhi vantakheḷasinehena ābaddhatāya sattasattāhaṃ deve vassantepi na viṃpakirayati, nidāghepi tato paṃsumuṭṭhiṃ gahetvā tasmimṃ muṭṭhinā pīḷiyamāne sinehova nikkhamati, evaṃ vantasinehasambandhoti vammiko.

Ettha pana “bhagavā, himavā”tiādīni padāni na kevalaṃ **vantupaccayavaseneva** nipphādetabbāni, atha kho **vamudhātuvasenapi** nipphādetabbāni, tenāha **visuddhimaggakārako** “yasmā pana tīsu bhavesu taṇhāsankhātāṃ gamanamanena vantaṃ, tasmā “bhavesu vantaḡamano”ti vattabbe **bhavasaddato bhakāraṃ, gamanasaddato gakāraṃ, vantasaddato vakāraṇca dīghaṃ katvā ādāya bhagavāti** vuccati, yathā loke ‘mehassa khassa māḷā’ti vattabbe mekhālā”ti vadatā niruttinayena saddasiddhi dassitā.

Ettha, siyā “visamamidaṃ nidassanaṃ, yena ‘mehanassa khassa mālā’ ti ettha **mekārakhakārālākārānaṃ** kamato gahaṇaṃ dissati, “bhavesu vantaḡamaṇo’ ti ettha pana **bhakāravakāragakārānaṃ** kamato gahaṇaṃ na dissati” ti? Saccamaṃ, idha pana “aggāhito, vijjācaraṇasampanno” tiādīsu viya guṇasaddassa paranipātavasena “bhavesu gamaṇavanto” ti vattabbeṇi evamaṇatvā saddasatthe yebhuyyena guṇasaddānaṃ pubbanipātabhassa icchitattā saddasatthavidūnaṃ kesaṇca viññūnaṃ maṇaṃ tosetuṃ “bhagavā” ti pade akkharakkamaṃ anaṇekkhitvā atthamattanidassanavasena “āhitagḡi, sampannaṇvijjācaraṇo” tiādīni viya pubbanipātavasena “bhavesu vantaḡamaṇo” ti vuttaṃ. Īdisasmiñhi ṡhāṇe “āhitagḡi” ti vā “aggāhito” ti vā “chinnahattho” ti vā “hatthacchinno” ti vā padesu yathā tathā ṡhitesuṇi atthassa ayutti nāma natthi aññaṃaññaṃ samānatthattā tesamaṃ saddānaṃ.

Vedajāto tiādīsu pana ṡhāṇesu atthevāti daṡṡhabbaṃ. Evaṃ visuddhimagḡe “bhagavā” ti padassa **vamudhātuvasenaṇi** nipphatti dassitā, **taṡṡikāyampi** ca dassitā “bhage vaṃṡi bhagavā. Bhāḡe vaṃṡi bhagavā” ti. Nibbaṇaṃ pana evamaṃ veditabbaṃ – bhagaṇaṅkhātaṃ sirimaṃ issariyaṃ yasaṇca vami ugḡiri khelaṇiṇḡaṃ viya anaṇekkho chaḡḡayīti **bhagavā**. Atha vā bhāni nāma nakkhattāni, tehi samaṃ ḡacchanti pavattantīti bhagā, sineruyugandharauttarakuruhimavaṇtādibhājanalokā, visesasannissayasobhākappaṡṡhiyabhāvato. Tepi bhagavā vami tannivāsisaṡṡāvāsasamatikkamaṇato tappaṡibaddhachandarāḡappahāṇena pajahīti **bhagavā**.

Cakkavattisiriṃ yasmā, yasaṃ issariyaṃ sukhaṃ;
Pahāsi lokacittaṇca, sugato bhagavā tato.

Tathā khandhāyatanadhātādibhede dhammaḡoṡṡhāse sabbamaṃ papaṇca sabbamaṃ yogaṃ sabbamaṃ ganthaṃ sabbamaṃ saṃyojanaṃ samucchinditvā amataṃ dhātuṃ samadhigacchanto vami ugḡiri anaṇekkho chaḡḡayi na paccāvaṃṡi **bhagavā**. Atha vā sabbepi kusalākusale sāvaḡjāṇavaḡje hīṇappaṇīte kaṇhasukkasappaṡibhāḡe dhamme ariyaṃagḡaṇāṇamaḡhena vami ugḡiri anaṇekkho pariccaḡi pajahīti **bhagavā**.

Khandhāyatanadhātādī, dhammabhedaṃ mahesiṇā;
Kaṇhasukkā yato vaṇtā, tatopi bhagavā mato.

Jātaḡṡṡhakathāyaṃ pana **himavāti** padassa **vamudhātuvasenaṇi** nipphatti dassitā. Tathā hi **sambhavaḡjātaḡṡṡhakathāyaṃ** “**himavāti** himaṇātasamaḡe himayuttoti himavā. Gimhakāle himamaṃ vaṃṡi himavā” ti vuttaṃ. Evaṃ jātaḡṡṡhakathāyaṃ “**himavā**” ti padassa **vamudhātuvasenaṇi** nipphatti dassitā, ayaṃ nayo īdisesu ṡhāṇesuṇi netabbo. “Guṇavāḡaṇavā” tiādīsu pana na netabbo. Yaḡi naḡeyya, “ḡuṇavā ḡaṇavā” ti padānaṃ “niḡḡuṇo pariḡiṇaḡuṇo” ti evamaḡiattho bhavaḡya, tasmā ayaṃ nayo sabbatthapi na netabbo. Ettha siyā “yaḡi “bhagavā” tiādīpadānaṃ **vamudhātuvasenaṇi** nipphatti hoti, kathaṃ “bhagavanto, bhagavanta” ntiādīni siḡḡhanti” ti? Yathā “bhagavā” ti padaṃ niruttinaḡena siḡḡhati, tathā tāṇiṇi teneva siḡḡhanti. Acinteyyo hi niruttinaḡo kevalamaṃ atthayuttipaṡibandhamattova, atthayuttiyaṃ sati nipphādetumaṃsakkuṇeyyaṇiṇi rūṇāni aneneva siḡḡhanti. Ettha ca yaṃ niruttillakkaṇaṃ āharitvā dassetabbaṃ siyā, taṃ upari rūṇanippādanādhikāre udāharaṇehi saddhiṃ pakāṇessāma.

Idha sāramate munirāḡamate,
Paramamaṃ ṇaṡutaṃ sujano piḡayaṃ;
Vipulathadharaṃ dhaninītimimaṃ,
Satataṃ bhajataṃ matisuddhakaṃ.

Iti naḡaṇḡe sāṡṡhakathe piṡakattaye byappaṡhagatīsu viññūnaṃ

Kosallatthāya kate saddaṇīṡṡpakaraṇe

Saravagḡapaṇcaḡantiko nāma dhātuḡibhāḡo

Pannarasamo paricchedo.

16. Bhūvādigaṇikapariccheda

Ito paraṃ avaggantā, missakā ceva dhātuyo;
Vakkhāmi dhātubhedādi-kusalassa matānugā.

Yakārantadhātu

Yā gatipāpuṇesu. Yāti, yanti. Yātu, yantu. Yeyya, yeyyuṃ, anupariyeyyuṃ. Yathāsambhavaṃ padamālā yojetabbā. Yanto puriso. Yantī itthī. Yantaṃ kulaṃ. Yānaṃ, upayānaṃ, uyyānaṃ iccādīni. **Divādigaṇika**ssa panassa “yāyati, yāyantī”tiādīni rūpāni bhavanti.

Tatra **yānanti**ādīsu yanti etenāti yānaṃ, rathasakaṭādi. Upayanti etena issarassa vā piyamanāpassa vā santikaṃ gacchantīti **upayānaṃ**, paṇṇākāraṃ. “Upayānāni me dajjuṃ, rājaputta tayi gate”ti ettha hi paṇṇākārāni “upayānāni”ti vuccanti. Sampannadassanīyapupphaphalādītāya uddhaṃ oloketā yanti gacchanti etthāti **uyyānaṃ**.

Byā ummīsane. Byāti, byanti. Byāsi, byātha. Byāmi, byāma. Yathāsambhavaṃ padamālā yojetabbā. Tatra paṇāyaṃ pāli “yāva byāti nimmīsati, tatrāpi rasatibbayo”ti. Tattha **yāva byātīti** yāva ummīsati, purāṇabhāsā esā, ayañhi yasmiṃ kāle bodhisatto cūlabodhiparibbājako ahosi, tasmīṃ kāle manussānaṃ vohāro.

Yu missane gatiyañca. Yoti, yavati. Āyu, yoni.

Tattha “āyū”ti āsaddo upasaggo. Āyavanti missībhavanti sattā etenāti **āyu**. Atha vā āyavanti āgacchanti pavattanti tasmīṃ sati arūpadhammāti **āyu**. Tathā hi **aṭṭhasālīniyaṃ** vuttaṃ “āyavanaṭṭhena āyu. Tasmīñhi sati arūpadhammā āyavanti āgacchanti pavattanti, tasmā **āyūti** vuccatī”ti. “Āyu, jīvitam, pāṇo” iccete pariyāyā lokavohāravasena. Abhidhammasena pana “ṭhiti yapaṇā yāpaṇā jīvitindriyaṃ” iccetepi teheva saddhiṃ pariyāyā. **Yonīti** aṇḍajādīnaṃ aṇḍajādīhi saddhiṃ yāya missībhāvo hoti, sā yoni. Idaṃ panettha nibbānaṃ “yavanti ettha sattā ekajātisamanvayena aññamaññaṃ missakā hontīti **yonī**” iti. Ettha ca **yonisaddassa** atthuddhāro nīyate. **Yonīti** khandhakoṭṭhāsassapi kāraṇassapi passāvamaggassapi nāmaṃ. “Catasso nāgayoniyo. Catasso supañṇayoniyo”ti ettha hi khandhakoṭṭhāso yoni nāma. “Yoni hesā bhūmija phalassa adhigamāyā”ti ettha kāraṇaṃ. “Na cāhaṃ brāhmaṇaṃ brūmi, yonijaṃ mattisambhava”nti ettha passāvamaggo. Etthetaṃ vuccati –

Khandhānañcāpi koṭṭhāse, muttamagge ca kāraṇe;
Imesu tīsu atthesu, **yonisaddo** pavattati.

Bye saṃvaraṇe. Byāyati.

Bye pavattiyaṃ. Byeti sahabyo.

Ettha **sahabyoti** saha byeti saha pavattatīti sahabyo, sahāyo, ekabhavūpago vā. Tathā hi “tāvatiṃsānaṃ devānaṃ sahabyataṃ upapanno”tiādīsu ekabhavūpago “sahabyo”ti vuccati.

Haya gatiyaṃ. Hayati. Hayo. **Hayoti** asso. So hi hayati sīghaṃ gacchatīti hayoti vuccati. Imāni panassa nāmāni –

Asso turaṅgo turago, vājī vāho hayopi ca;
Tabbheda sindhavo ceva, gojo assataropi ca.

Kāraṇākāraṇaṅṅū tu, ājānīyo hayuttamo;
Ghotako tu khaḷunkasso, vaḷavoti ca vuccati;
Assapoto kisoroti, khaḷunkotipi vuccati;

Hariya gatigelaṅṅesu. Hariyati.

Aya vaya paya maya taya caya raya gatiyaṃ. Ayati. Vayati. Payati. Mayati. Tayati. Cayati. Rayati. Ayo, samayo, vayo, payo, rayo. **Mayatayacayadhātūnaṃ** nāmikapadāni upaparikkhitabbāni.

Tattha **ayoti** kālaloḥaṃ, ayati nānākammārakiccesu upayogaṃ gacchatīti ayo. **Vayoti** paṭhamavayādiyukoṭṭhāso, vayati parihāniṃ gacchatīti vayo. **Payoti** khīrassapī udakassapī nāmaṃ, payati janena pātabbabhāvaṃ gacchatīti payo. **Rayoti** vego, yo “javo”tipi vuccati, tasmā rayanaṃ javanaṃ rayo. Ettha **samayasaddassa** atthuddhāro vuccate aha nibbacanena. **Samayasaddo** –

Samavāye khaṇe kāle, samaye hetudīṭṭhisu;
Paṭilābhe pahāne ca, paṭivedhe ca dissati.

Tathā hi “appeva nāma svepi upasaṅkameyyāma kālaṅca samayaṅca upādāyā”ti evamādīsu samavāyo attho. “Ekova kho bhikkhave khaṇo ca samayo ca brahmacariyavāsāyā”tiādīsu khaṇo. “Uṇhasamayo pariḷhasamayo”tiādīsu kālo. “Mahāsamayo pavanasmī”ntiādīsu samūho. “Samayopi kho te bhaddāli appaṭividdho ahoṣī”tiādīsu hetu. “Tena samayena uggāhamāno paribbājako samaṇamuṇḍikāputto samayappavādake tindukācīre ekasālake mallikāya ārāme paṭivasatī”tiādīsu diṭṭhi.

“Diṭṭhe dhamme ca yo attho, yo cattho samparāyiko;
Atthābhisamayā dhīro, paṇḍitoti pavuccatī”ti

Ādīsu paṭilābho. “Sammā mānābhisamayā antamakāsi dukkhassā”tiādīsu pahānaṃ. “Dukkhassa pīḷanaṭṭho saṅkhataṭṭho santāpaṭṭho abhisamayaṭṭho”tiādīsu paṭivedho. Ettha ca upasaggānaṃ jotakamattatā tassa tassa atthassa vācako **samayasaddo** evāti **samayasaddassa** atthuddhārepi saupasaggo **abhisamayasaddo** vutto.

Tattha sahaṅkārikāraṇatāya sannijjhaṃ sameti samaveṭīti **samayo**, samavāyo. Sameti samāgacchati maggabrahmacariyaṃ ettha tadādhārapuggaloti **samayo**, khaṇo. Samenti ettha, etena vā saṅgacchanti dhammā sahaṅjātadhammehi uppādādīhi vāti **samayo**, kālo. Dhammappavattimattatāya atthato abhūtopi hi kālo dhammappavattiyā adhikaraṇaṃ karaṇaṃ viya ca parikkappanāmasiddhena rūpena vohariyatīti. Samaṃ, saha vā avayavānaṃ ayanāṃ pavatti avatṭhānanti **samayo**, samūho, yathā “samudāyo”ti. Avayavasahāvattṭhānameva hi samūho. Paccayantarasaṃgame eti phalaṃ etasmā uppajjati pavattati cāti **samayo**, hetu, yathā “samudāyo”ti. Sameti saṃyojanabhāvato sambandhā eti attano visaye pavattati, daḷhaggahaṇabhāvato vā saṃyuttā ayanti pavattanti sattā yathābhinivesaṃ etenāti **samayo**, diṭṭhi. Diṭṭhisamyojanena hi sattā ativiya bajjhanti. Samiti saṅgati samodhānanti **samayo**, paṭilābho. Samassa nirodhassa yānaṃ, sammā vā yānaṃ apagamo appavattīti **samayo**, pahānaṃ. Nāṇena abhimukhaṃ sammā etabbo adhigantabboti **samayo**, dhammānaṃ aviparīto sabhāvo, abhimukhabhāvena sammā eti gacchati bujjhatīti **samayo**. Yathābhūtasabhāvāvabodho. Evaṃ tasmīṃ tasmīṃ atthe **samayasaddassa** pavatti veditabbā.

Nanu ca atthamattaṃ pati saddā abhinivisanti na ekena saddena aneke atthā abhidhīyantīti? Saccametaṃ saddavisesse apekkhite. Saddavisesse hi apekkhamāne ekena saddena anekattābhidhānaṃ na sambhavati. Na hi yo kālattho **samayasaddo**, soyeva samūhādiatthaṃ vadati. Ettha pana tesam tesam atthānaṃ **samaya** saddavacanīyatā sāmāññamupādāya anekattatā **samayasaddassa** vuttā. Evaṃ sabbattha atthuddhāre adhippāyo veditabbo.

Ito yāto ayato ca, nipphattim samudīraye;

Viññū **samayasaddassa**, samavāyādivācino.

Ito yāto ayato ca, samānatthehi dhātuhi;
Evaṃ samānarūpāni, bhavantīti ca īraye.

Naya rakkhaṇe ca. Cakāro gatipekkhako. Nayati. Nayo. **Nayoti** nayanam gamananti nayo, pālīgati. Nayanti vā rakkhanti atthaṃ etenāti **nayo**, tathattanayādi.

Daya dānagatihimsādānarakkhāsu. Dayati. Dayā.

Dayāti mettāpi vuccati karuṇāpi. “Dayāpanno”ti ettha hi mettā “dayā”ti, mettacittataṃ āpannoti hi attho. “Adayāpanno”ti ettha pana karuṇā “dayā”ti vuccati. Nikkaruṇataṃ āpannoti hi attho. Evaṃ **dayāsaddassa** mettākaruṇāsu pavatti veditabbā. Tathā hi **abhidhammaṭṭikāyaṃ** vuttam “**dayāsaddo** yattha yattha pavattati, tattha tattha adhippāyavasena yojetabbo. **Dayāsaddo** hi anurakkhaṇatthaṃ antonītam katvā pavattamāno mettāya ca karuṇāya ca pavattati”ti.

Vacanattho panettha evaṃ veditabbo – dayati dadāti sattānam abhayaṃ etāyāti **dayā**. Dayati gacchati vibhāgaṃ akatvā pāpakalyāṇajanesu samaṃ vattati, sītena samaṃ pharantaṃ rajomalañca pavāhentaṃ udakamivātipi **dayā**, mettā. Dayati vā himsati kāruṇikaṃ yāva yathādhippetaṃ parassa hitanipphattim na pāpuṇāti, tāvāti **dayā**. Dayati anuggaṇhāti pāpajanampi sajjano etāyātipi **dayā**. Dayati attano sukhampi pahāya khedaṃ gaṇhāti sajjano etāyāti **dayā**. Dayanti gaṇhanti etāya mahābodhisattā buddhabhāvāya abhinīhāra karaṇakāle hatthagatampi arahattaphalaṃ chaḍḍetvā saṃsārasāgarato satte samuddharitukāmā anassāsakaraṃ atibhayaṇakaṃ mahantaṃ saṃsāradukkhaṃ, pacchimabhava ca saha amatadhātupaṭilābhena anekaguṇasamalankataṃ sabbaññutaññāṇācātipi **dayā**, karuṇā. Karuṇāmūlakā hi sabbe buddhaguṇā.

Aparo nayo – dayanti anurakkhanti satte etāya, sayam vā anudayati, anudayamattameva vā etanti **dayā**, mettā ceva karuṇā ca. Kiñci payogamettha kathayāma “seyyathāpi gahapati gijjho vā kaṅko vā kulalo vā maṃsapesim ādāya dayeyya. Puttesu maddī dayesi, sassuyā sasuramhi ca. Dayitabbo rathesabha”. Tattha **dayeyyāti** uppatitvā gaccheyya, gatyatthavasenetam daṭṭhabbam. **Dayesīti** mettacittam kareyyāsī. **Dayitabboti** piyāyitabbo. Ubhayampetaṃ vivaraṇam rakkhaṇatthaṃ antogadham katvā adhippāyatthavasena katanti veditabbam.

Ūyī tantasantāne. Ūyati. Ūto, ūtavā.

Pūyī visaraṇe duggandhe ca. Pūyati. Pūto, pūtavā. Pūtimacchaṃ kusaggena, yo naro upanayhati.

Kanuyī sadde. Kanuyati. Kanuto, kanutavā.

Khamāya vidhūnane. Khamāyati. Khamāto, khamātavā.

Phāyi pāyi vuddhiyam. Phāyati. Phīto, phatavā.

Tattha **tatavantupaccayā**, yakāralopo, dhātvantassa sarassa ikārādeso ca daṭṭhabbo. Esa nayo “pūto pūtavā”tiādīsipi yathāsambhavaṃ daṭṭhabbo. Pāyati. Pāyo. Apāyo. Ettha ca natthi pāyo vuddhi etthāti **apāyo**. Atha vā pana ayato sukhatō apētoti **apāyotipi** nibbacaṇīyam. **Apāyoti** ca nirayo tiracchānayoṇi pettivisayo asurakāyoti cattāro apāyā.

Tāyu santānapālanesu. Tāyati. Tāyanam. **Divādigāṇe** pana **tā pālaneti** dhātuṃ passatha, tassa “tāyati tāṇa”nti rūpāni. Ubhayesaṃ kriyāpadaṃ samaṃ. **Akārayakārapaccayamatteneva** nānattam, nāmikapadāni pana visadisāni “tāyanam, tāṇa”nti.

Cāyu pūjanisāmanesu. Pūjā pūjanā. **Nisāmanam** olokanaṃ savanañca vuccati. “Ingha maddi

nisāmehi. Nisāmayatha sādhave’’ti ca ādīsu hi olokanasavanāni **nisāmanasaddena** vuttāni. Apica ñāṇena upaparikkhaṇampi nisāmanamevāti gahetabbaṃ. Cāyati, apacāyati. Anagāre pabbajite, apace brahmacāriye. Ye vuddhamapacāyanti. Apacitiṃ dasseti. Niccaṃ vuddhāpacāyino.

Yakārantadhāturūpāni.

Rakārantadhātu

Rā ādāne. Rāti.

Ri santāne. Reti. Reṇu. **Reṇūti** rajo.

Ru gatiyaṃ rosane ca. Ravati, viravati.

Ru sadde. Roti, ravati. Ravo, uparavo. Rutamanuññaṃ ruciyā ca piṭṭhi. **Rutanti** ravanaṃ rutaṃ, saddo.

Re sadde. Rāyati. Rā. Ratti. Ettha ca **rāti** saddo. **Rattīti** nisāsaṅkhāto sattānaṃ saddassa vūpasamakālo. Rā tiyyati ucchijjati etthāti **ratti**.

Brū viyattiyaṃ vācāyaṃ. Api hantvā hato brūti.

Bravīti, brunti. Brūsi, brūtha. Brūmi, brūma. Brūte, bruvante. Brūse, bruvhe. Bruve, brumhe.

Brūtu, bruvitu, bruvantu. Brūhi, brūtha. Brūmi, brūma. Brūtaṃ, bruvantaṃ.

Ettha ca **ambatṭhasutte** ‘‘puna bhavaṃ gotamo bruvitū’’ti pāḷidassanato ‘‘bruvitū’’ti vuttaṃ. Evaṃ sabbatthāpi upaparikkhitvā nayo gahetabbo.

Bruveyya, bruve, bruveyyaṃ. Bruveyyāsi, bruveyyātha. Bruveyyāmi, bruveyyāma. Bruvetha, bruveraṃ. Bruvetho, bruveyyāvho. Bruveyyaṃ. Bruveyyāmhe.

Pabrūti. Anubrūti. Pabrūtu, anubrūtu. Pabruveyya, anubruveyya. Evaṃ sabbattha **paanu**upasaggehipi yathāsambhavaṃ padamālā yojetabbā.

Āha, āhu. Brave, bravittha, bravire. Bravittho, bravivho. Braviṃ, bravimhe. Parokkhāvasena vuttāni.

Abravā, abravū. Abravo, abravattha. Abravaṃ, abravamhā. Abravattha, abravatthum. Abravase, abravhaṃ. Abraviṃ, abravimhase. Hiyyattanīvasena vuttāni.

Abravi, abravum. Abravo, abravittha. Abraviṃ, abravimhā. Abravā, abravū. Abravase, abravivhaṃ. Abravaṃ, abravimhe. Ajjatanīvasena vuttāni.

Bruvissati, bruvissanti. Abravissā, abravissamsu. Sesam sabbam netabbaṃ. Kammaṃ padam appasiddham. Sace pana siyā, ‘‘brūyatī’’ti siyā ‘‘luyati, lūyatī’’ti padāni viya.

Jīra brūhane. Brūhanaṃ vaḍḍhanaṃ. Jīrati. Jīraṃ. Jīramāno. Jīraṇaṃ. Appassutāyaṃ puriso, balibaddova jīrati.

Pūra pūraṇe. Pūrati. Pūratova mahodadhi. Sabbe pūrentu saṅkappā. Pūritum, pūritvā, pūraṃ, pūritaṃ. Puṇṇaṃ, paripuṇṇaṃ. Sampuṇṇaṃ, pūraṇaṃ. Pūraṇo kassapo. Kārite ‘‘pāramiyo pūreti, pūrayati, pūrāpeti, pūrāpayati. Pūretvā, pūrayitvā, pūrāpetvā, pūrāpayitvā, paripūretvā’’ iccādīni bhavanti.

Ghora gatipaṭighāte. Gatipaṭighātaṃ gatipaṭihananaṃ. Ghorati.

Dhora gaticāuriye. Gaticāuriyaṃ gatichekabhāvo. Dhoreti.

Sara gatiyaṃ. Sarati, visarati, ussarati. Ussāraṇā. Saro. Saṃsāro iccādīni. Tattha **saroti** rahado. **Saṃsāro**ti vaṭṭaṃ, yo “bhavo”tipi vuccati.

Cara caraṇe. Carati, vicarati, anucarati, sañcarati.

Cara gatibhakkhanesu. Carati, vicarati, anucarati, sañcarati, paṭicarati. Cariyā. Caritā. Cāro. Vicāro. Anuvicāro. Upavicāro. Caraṇaṃ. Cāraako. Ocarako. Brahmacariyaṃ iccādīni.

Tattha **caratī**ti gacchati, bhakkhati vā. Tathā hi **caranti** padassa gacchanto khādanto cāti atthaṃ vadanti garū. **Paṭicaratī**ti paṭicchādeti. **Cāra**koti taṃpavesitānaṃ sattānaṃ sukhaṃ carati bhakkhatīti cāraako, rodho. **Ocarako**ti adhocārī. **Brahmacariya**nti dānampi veyyāvaccampi sikkhāpadaṃ brahmavihāropi dhammadesanāpi methunaviratipi sadārasantosopi uposathopi ariyamaggopi sakalaṃ sāsanaṃ ajjhāsayaopi vuccati.

Kinte vataṃ kiṃ pana brahmacariyaṃ,
Kissa suciṇṇassa ayaṃ vipāko;
Iddhijutibalavīriyūpapatti,
Idaṅca te nāga mahāvīmānaṃ.

Ahaṅca bhariyā ca manussaloke,
Saddhā ubho dānapatī ahumhā;
Opānabhūtaṃ me gharaṃ tadāsi,
Santappitā samaṇabrāhmaṇā ca.

Taṃ me vataṃ taṃ pana brahmacariyaṃ,
Tassa suciṇṇassa ayaṃ vipāko;
Iddhijutibalavīriyūpapatti,
Idaṅca me dhīra mahāvīmāna’nti

Imasmiṅhi **puṇṇakajātaka** dānaṃ “brahmacariya”nti vuttaṃ.

“Kena pāṇi kāmadaḍo, kena pāṇi madhussavo;
Kena te brahmacariyena, puṇṇaṃ pāṇimhi ijjhati.

Tena pāṇi kāmadaḍo, tena pāṇi madhussavo;
Tena me brahmacariyena, puṇṇaṃ pāṇimhi ijjhatī”ti

Imasmiṃ **aṅkurapetavatthumhi** veyyāvaccamaṃ “brahmacariya”nti vuttaṃ. “Idaṃ kho taṃ bhikkhave tittiriyaṃ nāma brahmacariyaṃ ahoṣī”ti imasmiṃ **tittirajātaka** sikkhāpadaṃ “brahmacariya”nti vuttaṃ. “Taṃ kho pana pañcasikha brahmacariyaṃ neva nibbidāya na virāgāya...pe... yāvadeva brahmalokūpapattiyā”ti imasmiṃ **mahāgovindasutte** brahmavihārā “brahmacariya”nti vuttā. “Ekasmiṃ brahmacariyaṃ, sahaṃ maccuhāyino”ti ettha dhammadesanā “brahmacariya”nti vuttā. “Pare abrahmacārī bhavissanti, mayamettha brahmacārino bhavissāmā”ti **sallekhasutte** methunavirati “brahmacariya”nti vuttā.

Mayaṅca bhariyā nātikkamāma,
Amhe ca bhariyā nātikkamanti;
Aññatra tāha brahmacariyaṃ carāma;
Tasmā hi amhaṃ daharā na mīyare”ti

Mahādhammapālajātake sadārasantoso ‘brahmacariya’nti vutto.

Hīnena brahmacariyena, khattiye upapajjati;
Majjhimena ca devesu, uttamaena visujjhatī’ti

Evam **nimijāt**ake avītikkamavasena kato uposatho ‘brahmacariya’nti vutto. ‘Idam kho pana pañcasikha brahmacariyam ekantanibbidāya virāgāya...pe... ayameva ariyo aṭṭhaṅgiko maggo’ti **mahāgovindasuttasmi**yeva ariyamaggo ‘brahmacariya’nti vutto. ‘Tayidam brahmacariyam iddhañceva phītañca vitthārikam bāhujaññaṃ puthubhūtam yāvadeva manussehi suppakāsita’nti **pāsādikasutte** sikkhattayasāṅgaham sakalam sāsanam ‘brahmacariya’nti vuttam.

‘Api ataramānānam, phalāsāva samijjhati;
Vipakkabrahmacariyosmi, evam jānāhi gāmaṇī’ti

Ettha ajjhāsayo ‘brahmacariya’nti vutto. Icevam –

Dānam veyyāvaṭṭiyañca, sikkhā brahmavihārakā;
Dhammakkhānam methunātā-virati ca uposatho.

Sadāresu ca santoso, ariyamaggo ca sāsanam;
Ajjhāsayo cime **brahma-cariyasaddena** vuccare.

Hura koṭille. Hurati.

Sara saddopatāpesu. Sarati. Saro, saraṇam.

Ettha ca **saroti** saddopi vuccati usupi. **Saraṇanti** sarati upatāpeti hiṃsati saraṇagātānam teneva saraṇagamanena bhayam santāpam dukkham duggatiṃ parikilesaṅcāti saraṇam, buddhādiratanattayam. Atha vā saddhā pasannā manussā ‘amhākam saraṇamida’nti saranti cintenti, tam tattha ca vācam niccharanti gacchanti cātipi **saraṇam**.

Sara cintāyam. Sarati, susarati iccapī payogo. Appakkharānañhi bahubhāvo aññathābhāvo ca hoti, yathā ‘dve, duve, taṇhā tasiṇā, pamham, pakhuma’nti. Anussarati, paṭissarati. Saranti etāya sattā, sayam vā sarati, saraṇamattameva vā etanti **sati**. Anussati, paṭissati. Saratīti sato. Punappunam saratīti **paṭissato**.

Dvara saṃvaraṇe. Saṃvaraṇam rakkhaṇā. Dvarati. Dvāram.

Dvisaddūpapadaaradhātuvasenapi idam rūpam sijjhati. Tatrimāni nibbacanāni – dvaranti saṃvaranti rakkhanti etenāti **dvāram**, atha vā dve kavāṭā aranti gacchanti pavattanti etthātipi **dvāranti**. Gehadvārampi kāyadvārādīnīpi upāyopi dvāranti vuccati. Pāḷiyam tu ‘dvāram dvārā’ti ca itthinapumsakavasena **dvārasaddo** vutto. Tathā hi ‘dvārampi surakkhitam hotī’ti ca ‘dvārāpesā’ti ca tassa dviliṅgatā vuttā.

Gara ghara secane. Garati. Gharati. Gharam.

Dhūra hucchane. Hucchana koṭillam. Dhūrati.

Tara plavanasaraṇesu. Tarati. Taraṇam. Tittham. Tiṇṇo. Uttiṇṇo. Otiṇṇo iccādīni. Tattha **taraṇam** vuccati nāvā, tarati udakapiṭṭhe plavatī, taranti uttaranti vā nadim etenāti atthana.

Nāvā plavo taram poto, taraṇam uttaram tathā;
Jalayānanti etāni, nāvānāmāni honti tu.

Tara sambhame. Sambhamo anavaṭṭhānam. Tarati. Tarito. Turaṅgo.

Ettha ca “so māsakhettaṃ tarito avāsari”nti pāli nidassanaṃ. Tattha **taritoti** turito sambhamanto. **Avāsarinti** upagacchiṃ upavisim vā.

Jara roge. Ettha jararogoyeva “**rogo**”ti adhippeto payogavasena. **Jarasaddassa** hi jararoge pavattaniyamanatthaṃ “roge”ti vuttaṃ. Tena añño rogo idha **rogasaddena** na vuccati. Jarati. Jaro. Sajjaro. Pajjararogo. Jarena pīlitā manussā. Yattha tu ayaṃ vayohānivācako, tattha payoge “jīrati, jarā”ti cassa rūpāni bhavanti.

Dara bhaye. Darati. Darī. “Bīlāsayā darīsaya”ti nidassanaṃ. Tattha **darīti** bhāyitabbaṭṭhena darī.

Dara ādarānādaresu. Darati, ādarati, anādarati. Ādaro, anādaro.

Ettha ca **daratīti** daraṃ karotīti ca anādaraṃ karotīti ca attho. Yathā hi **ārakāsaddo** dūrāsannavācako, tathāyampi **daradhātu** ādarānādaravācako daṭṭhabbo. **Darasaddo** ca kāyadarathe cittadarathe kilesadarathe ca vattati. Ayañhi –

Ādittam vata maṃ santaṃ, ghatasittamva pāvakaṃ;
Vārinā viya osiñci, sabbam nibbāpaye dara”nti

Ettha kāyadarathe cittadarathe ca vattati. “Vītaddaro vītasoko vītasallo, sayam abhiññāya abhāsi buddho”ti ettha pana kilesadarathe vattati. **Vītaddaroti** hi aggamaggena sabbakilesānaṃ samucchinnatā vigatakilesadarathoti attho.

Nara nayane. Narati. Naro, nārī.

Ettha **naroti** puriso. So hi narati netīti naro. Yathā paṭhamapakatibhūto satto datarāya pakatiyā seṭṭhaṭṭhena puri uccāṭṭhāne seti pavattatīti purisoti vuccati, evaṃ nayanaṭṭhena naroti vuccati. Puttabhātubhūtopi hi puggalo mātujeṭṭhabhaginīnaṃ netuṭṭhāne tiṭṭhati, pageva itaro itarāsaṃ. **Nārīti** narena yogato, narassāyanti vā nārī. Aparampettha **narasaddassa** nibbanaṃ, nariyati sakena kammena niyyatīti **naro**, satto manusso vā. “Kammena niyyateo loko”ti hi vuttaṃ. Tattha **narasaddassa** tāva purisavacane “narā ca atha nārīyo”ti nidassanaṃ. Sattamanussavacane pana “buddho ayaṃ edisako naruttamo. Āmoditā naramarū”ti ca nidassanaṃ, tasmā “naroti puriso, naroti satto, naroti manusso”ti tattha tattha yathāsambhavaṃ attho samvaṇṇetabbo.

Hara haraṇe. Haraṇaṃ pavattanaṃ. Harati. Sāvattthiyaṃ viharati. Vihāsi. Vihamsu. Viharissati. Appamatto vihissati. Voharati. Saṃvoharati. sabbo harati vā. Rūpiyasamvohāro, rūpiyasabbohāro vā. Pāṭihāriyaṃ. Pītipāmojjahāro. Vihāro. Vohāro. Abhihāro. Cittaṃ abhinīharati. Sāsane viharāṃ, viharanto, viharamāno. Vihātabbaṃ, viharitum. Viharitvā. Aññānīpi yojetabbāni.

Tattha **pāṭihāriyanti** samāhite citte vigatūpakkilese katakiccena pacchā haritabbaṃ pavattetabbanti pāṭihāriyaṃ. **Paṭīti** hi ayaṃ saddo “pacchā”ti etassa atthaṃ bodheti “tasmim paṭipaviṭṭhamhi, añño āgañchi brāhmaṇo”tiādīsu viya. **Vihāroti** ṭhānanisajjādinā viharanti etthāti vihāro, bhikkhūnaṃ āvāso. Viharaṇaṃ vā vihāro, viharāṇakriyā. **Vohāroti** byavahāropi paṇṇattipi vacanampi cetanāpi. Tattha

Yo hi koci manussesu, vohāraṃ upajīvati;
Evaṃ vāseṭṭha jānāti, vāñijo so nabrāhmaṇo”ti.

Ayaṃ **byavahāravohāro** nāma. “Saṅkhā samaññā paññatti vohāro”ti ayaṃ **paṇṇattivohāro** nāma. Tathā tathā voharanti parāmasantīti ayaṃ **vacanavohāro** nāma. “Aṭṭha ariyavohārā, aṭṭha anariyavohārā”ti ayaṃ **cetanāvohāro** nāma. Icevaṃ –

Byavahāre vacane ca, paṇṇatticetanāsu ca;

Vohārasaddo catūsu, imesvatthesu dissati.

Hara apanayane. Apanayanam nīharaṇam. Dosam harati. Nīharati. Nīhāro, pariharati. Parihāro. Rajoharaṇam. Sabbadosaharo dhammo. Bhagavato ca sāsanassa ca paṭipakkhe titthiye haratīti **pāṭihāriyam**. Mattāvaṇṇabhedenettha “pāṭiheram pāṭihīram pāṭihāriya”nti tīṇi padarūpāni, bhavanti.

Hara ādāne. Adinnaṃ harati. Harissati. Hāhiti iccapa. “Kharājinaṃ para suñca, khārikājañca hāhiti”ti idamettha nidassanaṃ. Āharati, avaharati, saṃharati, apaharati, upaharati, paharati, sampaharati, samāharati. Manoharo pāsādo. Parassaharaṇam. Āhāro, avahāro, saṃhāro, upahāro, sampahāro, samāhāro. Hariyyati, āhariyyati. Āhariyyanti. Āhaṭam, haritum, āharitum, āharitvā, āharitvāna. Aññānīpi yojetabbāni.

Dhara dharāṇe. Dharaṇam vijjamānatā. Dharati. Dharate satthusāsanam.

Dhara aviddhamasane. Nibbānam niccam dharati.

Khara khaye. Kharati. Kharāṇam. Nakkharanti na khiyyantīti **akkharāni**. Nakkharanti na nassantīti **nakkhattānīti** porāṇā.

Jāgaraniddakkhaye jāgarati. Jāgaro, jāgaraṇam, jāgaram. Dīghā jāgarato ratti. Jāgaramāno. Ayañca dhātu **tanādigaṇam** patvā “jāgaroti, paṭijāgaroti”ti rūpāni janeti.

Īra vacane gatikampanesu ca. Īrati. Īritam. Eritam. Samīraṇo. Jinerito dhammo. Kuppanti vātassapi eritassa.

Tattha **samīraṇoti** vāto. So hi samīrati vāyati, samīreti ca rukkhasākhāpaṇṇādīni suṭṭhu kampetīti “samīraṇo”ti vuccati.

Hare lajjāyam. Aluttantoyamekāranto dhātu, **gile pītikkhayeti** dhātu viya. Harāyati. Harāyanaṃ. Aṭṭiyāmi harāyāmi.

Ettha **harāyatīti** lajjati, hirim karotīti attho.

Para pālanapūraṇesu. “Parati, paramo”timassa rūpāni, **nara nayaneti** dhātussa “narati naro”ti rūpāni viya.

Tattha **paratīti** pāleti, pūrati vā. Suddhakattuvasenidaṃ padaṃ vuttam. Hetukattuvasena hi “pāreti pārayatī”tiādīni rūpāni bhavanti. **Paramoti** pālako pūrako vā. Ettha ca “pāramī”ti padaṃ etassatthassa sādhamam. Tathā hi **pāramīti** parati, pāreti cāti paramo, dānādīnam guṇānam pālako pūrako ca mahābodhisatto. Paramassa idaṃ, paramassa vā bhāvo, kammaṃ vā pāramī, dānādīkriyā. Garūhi pana “pūretīti paramo, dānādīnam guṇānam pūrako pālako cā”ti vuttam, tam vīmaṃsitabam.

Vara varaṇe. Varati. Vāraṇo, varuṇo.

Gira niggiraṇo. Niggiraṇam paggharaṇam. Girati, giri.

Ettha **girīti** pabbatā, yo ‘selo’tiādīhi anekehi nāmehi kathiyati. So hi sandhisāṅkhātehi pabbehi citattā pabbamassa atthīti pabbato. Himavamanādivasena jalassa sārabhūtānam bhesajjādivatthūnañca giraṇato **girīti** vuccati.

Imāni panassa nāmāni –

Pabbato acalo selo, nago giri mahīdharo;

Addi siluccayo cāti, giripaṇṇattiyo imā.

Sura issariyadittisu. Surati. Suro, asuro.

Tatra **saroti** surati īsati devissariyaṃ pāpuṇāti virocāti cāti suro. Sundarā rā vācā assāti vā **suro**, devo. Devābhidhānāni **divādigane** pakāsessāma. **Asuroti** devo viya na surati na īsati na virocāti cāti asuro. Surānaṃ vā paṭipakkho mittapaṭipakkhā amittā viyāti **asuro**, dānavo, yo “pubbadevo”tipi vuccati. Tathā hi **kumbhajātake** vuttaṃ –

“Yaṃ ve pivitvā pubbadevā pamattā,
Tidivā cutā sassatiyā samāyā;
Taṃ tādisaṃ majjamimaṃ niratthaṃ,
Jānaṃ mahārāja kathaṃ piveyyā”ti.

Sagāthāvaggasaṃvaṇṇanāyaṃ pana “na suraṃ pivimha, na suraṃ pivimhā”ti āhaṃsu, tato paṭṭhāya asurā nāma jātā”ti vuttaṃ.

Imāni tadabhidhānāni –

Asuro pubbadevo ca, dānavo devatāri tu;
Nāmāni asurānanti, imāni niddise vidū.

Pāko iti tu yaṃ nāmaṃ, ekassa asurassa tu;
Paṇṇatītipi ekacce, garavo pana abravuṃ.

Kura sadde akkose ca. Kurati. Kuraro, kurarī. Kummo, kummī.

Khura chedane vilekhane ca. Khurati. Khuro.

Mura saṃveṭhane. Murati. Muro, moro.

Ghura abhimatta saddesu. Ghurati. Ghorō.

Pura aggagamane. Aggagamaṇaṃ nāma padhānagamaṇaṃ, paṭhamameva gamaṇaṃ vā. Purati. Puraṃ, purī. Avāpurati. Avāpuretaṃ amatassa dvāraṃ. Avāpuraṇaṃ ādāya gacchati.

Tattha **puranti** rājadhānī. Tathā hi “nagaraṃ puraṃ purī rājadhānī”ti ete pariyāyā. “Eso ālāriko poso, kumārī puramantare”tiādīsu pana geḥaṃ “pura”nti vuccati. Padhānatāya purato purato gamaṇena gantabbanti **puram**, rājadhānī ceva geḥaṇca. **Avāpuraṇanti** avāpuranti vivaranti dvāraṃ etenāti avāpuraṇaṃ, yaṃ “kuñcikā”tipi “tālo”tipi vuccati. **Avāpuratīti**ādīsu **ava āiccubho** upasaggāti daṭṭhabbā.

Phara pharaṇe. Pharaṇaṃ nāma byāpanaṃ gamaṇaṃ vā. Samaṃ pharati sītena. Āhāratthaṃ pharati. Pharaṇaṃ.

Gara uggame. Garati. Garu.

Garūti mātāpitādayo gāravayuttapuggalā. Te hi garanti uggacchanti uggatā pākaṭā hontīti **garūti** vuccanti. Apica pāsānacchattaṃ viya bhāriyaṭṭhena **garūti** vuccanti. **Garusaddo** “idamāsaṇaṃ atra bhavaṃ nisīdatu, bhavañhi me aññataro garūna”nti ettha mātāpitūsu dissati. “Sanarāmaralokagaru”nti ettha sabbalokācariye sabbaññumhi. Apica **garusaddo** aññesvatthesupi dissati. Sabbametaṃ ekato katvā atridaṃ vuccati –

Mātāpitācariyesu, dujjare alahumhi ca;

Mahante cuggate ceva, nichekādikaressu ca;
Tathā vaṇṇavisesesu, **garusaddo** pavattati.

Keci panācariyā “garu garū”ti ca dvidhā gahetvā bhāriyavācakatte **garusaddo** ṭhito.
Ācariyavācakatte pana **gurusaddo**ti vadanti, taṃ na gahettabbaṃ. Pāḷivisaye hi sabbesampi
yathāvuttānaṃ athhānaṃ vācakatte **garusaddo**eva icchitabbo, akārassa ākārabhāve “gārava”nti
savuddhikassa taddhitantapadassa dassanato. Sakkaṭabhāsāvisaye pana **gurusaddo**eva icchitabbo,
ukārassa vuddhibhāve aññathā taddhitantapadassa dassanato.

Mara pānacāge. Marati. Mattuṃ. Maritvā. Hetukattari “puriso purisaṃ māreti, mārayati.
Puriso purisena purisaṃ mārapeti, mārapayati. Puriso purisaṃ māretuṃ māretvā” iccādīni rūpāni.
Macco. Maru. Maraṇaṃ, maccu. Maṭṭu. Māro.

Tattha **mattunti** marituṃ. Tathā hi **alīnasattuḷātake** “yo mattumicche pituno pamokkhā”ti pāḷi
dissati. **Maccoti** maritabbasabhāvatāya “macco”ti laddhanāmo satto. **Marūti** dīghāyukopi samāno
maraṇasīloti maru, devo. **Maraṇanti** cuti.

Maraṇaṃ antako maccu, hindaṃ kālo ca maṭṭu ca;
Nikkhepo cuti cetāni, nāmāni maraṇassa ve.

Māroti sattānaṃ kusalaṃ māretīti māro, kāmadevo.

Imānissa nāmāni –

Māro namuci kaṇho ca, vasavatti pajāpati;
Pamattabandhu maddano, pāpimā dabbakopi ca;
Kandappo ca ratipati, kāmo ca kusumāyudho.

Aññe aññānīpi nāmāni vadanti, tāni sāsānānulomāni na hontīti idha na dassitāni. **Aṭṭhakathāsu**
pana “māro, namuci, kaṇho, pamattabandhū”ti cattārova nāmāni āgatāni.

Ettha ca **māro**ti devaputtamārena saddhiṃ pañca mārā kilesamāro khandhamāro
abhisaṅkhāramāro maccumāro devaputtamāroti.

Dhara avatthāne. Dharati.

Bhara posane. Bharati. Bharito, bhattā.

Thara santharaṇe. Tharati, santharati. Santharaṇaṃ.

Dara vidāraṇe. Bhūmiṃ darati. Kudālo.

Dara dāhe. Kāyo darati. Daro, daratho.

Tira adhogatiyaṃ. Tirati. Tiracchāno, tiracchā vā.

Ara gatiyaṃ. Arati. Atthaṃ, attho, utu.

Ettha **atthaṃ** vuccati nibbānaṃ. Taṃ taṃ sattakiccaṃ arati vatteti **utu**.

Rakārantadhāturūpāni.

Lakārantadhātu

Lā ādāne. Lāti. Lānaṃ, gaṛuḷo, sīhaḷo, rāhulo, kusalaṃ, bālo, mahallako, mahallikā.

Tatra **gaṛuḷoti** gaṛuṃ lāti ādadāti gaṇhātīti gaṛuḷo, yo “supaṇṇo, dijādhipo, nāgāri, karoṭī”ti ca vuccati. **Sīhaḷoti** sīhaṃ lāti ādadāti gaṇhātīti sīhaḷo, pubbapuriso. Tabbamse jātā etarahi sabbepi **sīhaḷā** nāma jātā.

Rāhulotiādīsu pana rāhu viya lāti gaṇhātīti **rāhulo**, ko so? Sikkhākāmo āyasmā rāhulabhaddo buddhaputto. Tassa hi jātadivase suddhodanamahārājā “puttassa me tuṭṭhiṃ nīvedethā”ti uyyāne kīḷantassa bodhisattassa sāsanam pahīni. Bodhisatto taṃ sutvā “rāhu jāto bandhanam jāta”nti āha. Puttassa hi jāyanam rāhuggaho viya hoti. Taṇhākilissanatāpādanato bālḥena ca saṅkhalikādibandhanena bandham viya hoti muccituṃ appadānatoti “rāhu jāto bandhanam jāta”nti āha. Rājā “kiṃ me putto avacā”ti pucchitvā taṃ vacanam sutvā “ito paṭṭhāya me nattā ‘rāhulo’ tveva hotū”ti āha, tato paṭṭhāya kumāro rāhulo nāma jāto.

Mahāpadānasuttaṭīkāyañhi “rāhu jāto”ti ettha “**rāhūti** rāhuggaho”ti vuttaṃ, taṃ pana “rāhulo”ti vacanassatthaṃ pākaṭaṃ kātuṃ adhippāyatthavasena vuttaṃ. Na hi kevalo “rāhū”ti saddo “rāhuggaho”ti atthaṃ vadati, atha kho **jātasaddasambandham** labhitvā vadati. Tathā hi “rāhu jāto”ti bodhisattena vuttavacanassa “rāhuggaho jāto”ti atthau bhavati, tasmā suddhodanamahārājā “mama nattā rāhu viya lātīti rāhuloti vattabbo”ti cintetvā “rāhulotveva hotū”ti āhāti daṭṭhabbam.

Keci pana “rāhulo jāto bandhanam jāta”nti paṭṭhanti, kathaci potthake ca likhanti, taṃ na sundaram, atthassa ayuttito **ṭīkāya** ca saddhiṃvirocato. Na hi “rāhulo”ti kumārassa nāmaṃ paṭṭhamam uppannam, pacchāyeva pana uppannam ayyakena dinnattā, tasmā tadā bodhisattena “rāhulo jāto”ti vattum na yujjati. Yathā hi anabhisitte arājini puggale “mahārājā”ti vohāro nappavattati. **ṭīkāyañca** “rāhūti rāhuggaho”ti vuttaṃ. Athāpi tesam siyā “rāhulo jāto bandhanam jāta”nti padassa vijjamānattā eva **ṭīkāyam** “rāhuggaho”ti bhāvavasena **lāsaddena** samānattho ādānattho **gahasaddo** vuttoti evampi nupapajjati, “rāhulānam jātam bandhanam jāta”nti pāṭhassa vattabbattā. **Rāhuloti** hi idaṃ padaṃ “sīhaḷo”ti padaṃ viya dabbavācakaṃ, na kadācīpi bhāvavācakaṃ, tasmā “rāhulo jāto bandhanam jāta”nti etaṃ ekaccehi duropitaṃ pāṭham aggahetvā “rāhu jāto bandhanam jāta”nti ayameva pāṭho gahetabbo, sārato ca paccetabbo superisuddhesu anekesu potthakesu diṭṭhattā, porāṇehi ca gambhīrasukhumaññehi ācariyapacāriyehi paṭhitattā.

Ayam panettha sādhippāyā atthappakāsana – **rāhu jātoti** bodhisatto puttassa jātasāsanam sutvā samvegappatto “idāni mama rāhu jāto”ti vadati, muccituṃ appadānavasena mama gahaṇatthaṃ rāhu uppannoti hi attho. **Bandhanam jātanti** iminā “mama bandhanam jāta”nti vadati. Tathā hi **ṭīkāyam** vuttaṃ “rāhūti rāhuggaho”ti. Tattha **rāhuggahoti** gaṇhātīti gaho, rāhu eva gaho rāhuggaho, mama gāhako rāhu jātoti attho. Atha vā gahaṇam gaho, rāhuno gaho **rāhuggaho**, rāhuggahaṇam mama jātanti attho. Putto hi rāhusadiso. Pitā candasadiso puttarāhunā gahitattā.

Ekacce pana “rāhulotveva hotū”ti imaṃ padesaṃ disvā “rāhu jāto”ti vutte iminā na sameti, “rāhulo jāto”ti vutteyeva pana sametīti maññamānā evaṃ pāṭham paṭṭhanti likhanti ca, tasmā so anupaparikkhitvā paṭhito duropito pāṭho na gahetabbo, yathāvutto porāṇako porāṇācariyehi abhimato pāṭhoyeva āyasmantehi gahetabbo atthassa yuttito, **ṭīkāya** ca saddhiṃ avirodhatoti.

Tattha **kusalanti** kucchitānam pāpadhammānam sānato tanukaraṇato ñāṇam **kusam** nāma, tena kusena lātabbam pavattetabbanti **kusalam**. **Bāloti** diṭṭhadhammikasamparāyikasankhāte dve anatto devadattakokālikādayo viya lāti ādadātīti **bālo**. Imāni pana taṃnāmāni –

Bālo avidvā añño ca, aññāñī avicakkhaṇo;
Apañḍito akusalo, dummedho kumati jaḷo.

Elamūgo ca nippañño, dummedhī avidū mago;
Aviññū andhabālo ca, duppañño ca aviddasu.

Mahallakoti mahattaṃ lāti gaṇhātīti mahallako, jīṇṇapuriso. Imānissa nāmāni –

Jiṇṇo mahallako vuddho, buddho vuḍḍho ca kattaro;
Thero cāti ime saddā, jīṇṇapaññattiyo siyuṃ.

Tathā hi –

“Dure apassaṃ therova, cakkhuṃ yāciturāgato”;
Evamādīsu daṭṭhabbo, **therasaddo** mahallake.

Imāni pana nāmāni itthiyā itthilingavasena vattabbāni –

Jiṇṇā mahallikā vuddhī, buddhī vuḍḍhī ca kattarā;
Therī cāti ime saddā, nāmaṃ jīṇṇāya itthiyā;

Dala phala visaraṇe. Dalati. Phalati. Dalito rukkho. Phalito bhūmibhāgo.

Ala bhūsane. Alati. Alankāro, alankato, alankataṃ. “Sālankānanayogepi, sālankānanavajjitā” ti imissañhi kavīnaṃ kabbaracanāyaṃ **alañkasaddo** bhūsanavisesaṃ vadati. Keci panettha **ala bhūsanapariyāpanavāranesūti** dhātuṃ paṭhanti, “alati” ti ca rūpaṃ icchanti. Mayaṃ pana **aladhātussa** pariyaṭṭinivāraṇatthavācakkataṃ na icchāma payogādassanato. Nipātabhūto pana **alam**saddo pariyaṭṭinivāraṇatthavācako dissati “alametaṃ sabbaṃ. Alam me tena rajjena” tiādīsu.

Mīla nimelane. Mīlati, nimīlati, ummīlati. Nimīlanam.

Bila patitthambhe. Bilati.

Nīla vaṇṇe. Nīlavattham.

Sīla samādhimhi. Sīlati. Sīlam, sīlanam.

Ettha **sīlanti** sīlanaṭṭhena sīlam. Vuttañhetam **visuddhimagge** “sīlanti kenatṭhena sīlam? Sīlanaṭṭhena sīlam, kimidaṃ sīlanam nāma? Samādhānam vā kāyakammādīnam susīlyavasena avippakiṇṇatāti attho. Upadhāraṇam vā kusalanam dhammānam patiṭṭhānavasena ādhārabhāvoti attho. Etadeva hi ettha atthadvayaṃ saddalakkhaṇavidū anujānanti. Aññe pana ‘siraṭṭho sīlaṭṭho, sīlaṭṭho sīlaṭṭho’ ti evamādīnā nāyentha attham vaṇṇenti” ti. Tattha “atthadvayaṃ saddalakkhaṇa vidū anujānanti” ti idaṃ “**sīla samādhimhi sīla upadhāraṇe**” ti dvigaṇikassa **sīladhātussa** atthe sandhāya vuttam. Imassa hi **curādigaṇam** pattassa upadhāraṇe “sīleti, sīlayatī” ti rūpāni bhavanti, upadhāretītipi tesaṃ attho. Idha pana **bhūvādigaṇikattā** samādhānatthe “sīlatī” ti rūpaṃ bhavati, samādhīyatī tassa attho. Punapī ettha sotūnam sukhaggahaṇattham nibbācanāni vuccante. Sīlati samādhīyati kāyakammādīnam susīlyavasena na vippakiratīti **sīlam**. Atha vā sīlanti samādahanti cittaṃ etenāti **sīlam**. Imāni **bhūvādigaṇikavasena** nibbācanāni. **Curādigaṇikavasena** pana sīleti kusale dhamme upadhāreti patiṭṭhābhāvena bhūso dhāretīti **sīlam**. Sīlenti vā etena kusale dhamme upadhārenti bhūso dhārenti sādhevoti **sīlanti** nibbācanāni.

Kila bandhe. Kilati. Kilam.

Kūla āvaraṇe. Kulati. Kūlam. Vahe rukkhe pakūlaje. Kūlam bandhati. Nadīkūle vasāmaṃ. Kūlati āvarati udakam bahi nikkhamitum na detīti **kūlam**.

Sūla rujāyam. Sūlati. Sūlam. Kaṇṇasūlam na janeti.

Tūla nikkarīse. Nikkarīsam nāma karīsamattenapi aminetabbato lahubhāvoyeva. Tūlati.

Tūlaṃ bhaṭṭhaṃva māluto.

Pula saṅghāte. Pulati. Pañcapuli.

Mūla patiṭṭhāyaṃ mūlati. Mūlaṃ. **Mūlasaddo** “mūlāni uddhareyya antamaso ussīranāḷimattānīpi” tiādīsu mūlamūle dissati. “Lobho akusalamūla” ntiādīsu asādhāraṇahetumhi. “Yāvamajjhanhike kāle chāyā pharati, nivāte paṇṇāni patanti, ettāvata rukkhamūla” ntiādīsu samīpe. Atridaṃ vuccati –

Mūlamūle **mūlasaddo**, padissati tatheva ca;
Asādhāraṇahetumhi, samīpamhi ca vattati.

Phala nibbattiyaṃ. Rukkho phalati. Rukkaphalāni bhuñjantā. Mahapphalaṃ mahānisaṃsaṃ. Sotāpatti-phalaṃ. Tattha **phalanti** mahānibbattiyaṃ.

Phala bhede. Phalati. Muddhā te phalatu sattadhā. Pādā phaliṃsu. Tattha **phalatūti** bhajjitu.

Phala abyattasaddo. Asanī phalati. Dveme bhikkhave asaniyā phalantiyā na santasanti. **Phalantiyāti** saddaṃ karontiyā.

Culla hāvakaṇaṃ. Hāvakaṇaṃ vilāsakaṇaṃ. Cullati.

Phulla vikaṇabhedesu. Phullati. Phullaṃ. Phullito kiṃsuko. Suphullitamaravindavaṇaṃ.

Asītihatthamubbedho, dīpaṅkaro mahāmuni;
Sobhati dīparukkhova, sālarājāva phullito.

Khaṇḍaphullapaṭisaṅkharāṇaṃ.

Cilla seṭhille. Siṭhilabhāvo **seṭhillam.** Cillati.

Velu celu kelu khelu pelu belu selu sala tila gatiyaṃ. Velati. Celati. Kelati. Khelati. Pelati. Belati. Selati. Salati. Tilati. Celam, belako. Ettha **celanti** vatthaṃ. **Pelakoti** saso.

Khala calane. Khalati. Khalo. **Khaloti** dujjano asādhu asappuriso pāpajano.

Khala sañcinane. Khalati. Khalaṃ. **Khalanti** vhiṭṭhapanokāsabhūtaṃ bhūmimaṇḍalaṃ. Tañhi khalanti sañcinanti rāsiṃ karonti ettha dhaññānīti khalanti vuccati. “Khalaṃ sālāṃ pasuṃ khettaṃ, gantā cassa abhikkhaṇa” nti payogo.

Gila ajjhoharaṇe. Gilati. Gilamakkhaṃ puriso na bujjhati.

Gala adane. Galati. Galo. Galanti adanti ajjhoharanti etenāti galo. **Galoti** gīvā vuccati.

Sala salla āsugatiyaṃ. Āsugati sīghagamaṇaṃ. Salati. Sallati. Sallaṃ. Ettha ca “sallaṃ usu saro sallo kaṇḍo tejjano” ti pariyāyā ete.

Khola gatipaṭighāte. Kholati.

Gile pītikkhaye. Gilāyati. Gilāno, gelaññaṃ. **Gilānoti** akallako. **Vinayepi** hi vuttaṃ “nāhaṃ akallako” ti. **Aṭṭhakathāyaṇca** “nāhaṃ akallakoti nāhaṃ gilāno” ti vuttaṃ.

Mile gattavināme. Milāyati. Milāyano, milāyanto, milāyamāno.

Kele mamāyane. Mamāyanam taṅhādīṭṭhivasena “mama ida”nti gahaṇam. Kelāyati. Tvaṃ kaṃ kelāyati.

Sala calane saṃvaraṇe ca, vala valla calane ca. Saṃvaraṇāpekkhāyam cakāro. Salati. Kusalam. Valati. Vallati. Vallūro.

Tattha **kusalanti** kucchite pāpadhamme salayati calayati kampeti viddhamsetīti kusalam. Kucchitam apāyadvāram salanti saṃvaranti pidahanti sādhave etenāti kusalam. Vallanti saṃvaranti rakkhanti ito kākasenādayo satte akhādanatthāyāti **vallūro**.

Mala malla dhāraṇe. Malati. Malaṃ. Mallati. Mallo.

Bhala bhalla paribhāsanahimsādānesu. Bhalati. Bhallati.

Kala saṅkhyāne. Kalati. Kalā, kālo.

Ettha **kalāti** soḷasabhāgādibhāgo. **Kāloti** “ettako atkkanto”tiādina kalitabbo saṅkhātābboti kālo, pubbaṅhādisamayo.

Kalla asadde. Asaddo. Nissaddo. Kallati.

Jala dittiyaṃ. Jalati. Jalam, jalanto, pajjalanto, jalamāno.

Ko eti siriyaṃ jalam. Jalamva yasaṃ aṭṭhā, devadattoti me sutam. Saddhammapajjoto jalito.

Hula calane. Hulati. Halo. **Haloti** phālo, so hi holeti bhūmiṃ bhindanto mattikakhaṇḍam cāletīti “halo”ti vuccati ukārassa akāram katvā.

Cala kampane. Calati. Calito, acalo. Mahanto bhūmicālo. Calanam, cālo.

Jala dhañṇe. Jalati. Jalam.

Ṭala ṭula velambe. Ṭalati. Ṭulati.

Thala thāne. Thalati. Thalo. **Thaloti** nirudakappadeso. Pabbajjānibbānesupi taṃsadisattā tabbohāro. Yathā hi loke udakoghena anottharaṇaṭṭhānam “thalo”ti vuccati, evaṃ kilesoghena anottharaṇiyattā pabbajjā nibbānaṅca “thalo”ti vuccati, “tiṅṅo pāraṅgato thale tiṭṭhati brāhmaṇo”ti hi vuttam.

Phāla vilekhane. Phālanti bhūmiṃ vilekhanti bhindatīti **phālo**.

Nala ganthe. Nalati.

Bala pāṇane. Iha **pāṇanam** jīvanam sasanaṅca. Balati. Balam, bālo.

Ettha balanti jīvitam kappenti etenāti balam, kāyabalabhogabalādikam balam. Atha vā balanti sammājīvanam jīvanti etenāti **balam**, saddhādikam balam. **Āgamatṭhakathāyam** pana “assaddhiye na kampatīti saddhābala”ntiādi vuttam, tam dalhaṭṭhena balanti vattabbānam saddhādīnam akampanabhāvadassanatham vuttanti daṭṭhabbam. Atha vā dhātūnam atthātisayayogato assaddhiyādīnam abhibhavanena saddhādībalānam abhibhavanatthopi gahetabbo “abalā nam baliyantī”ti ettha viya. **Bāloti** balati assasati ceva passasati cāti bālo, assasitapassasitamattena jīvati, na seṭṭhena paññājīvitenāti vuttam hoti. Tathā hi **aṭṭhakathāyam** vuttam “balantīti bālā, assasitapassasitamattena jīvanti, na paññājīvitenāti attho”ti. Paññājīvinoyeva hi jīvitam **seṭṭham** nāma. Tenāha bhagavā “paññājīviṃ jīvitamāhu seṭṭha”nti.

Pula mahatte. Pulati. Vipulaṃ.

Kula saṅkhāne bandhumhi ca. Kolati. Kulaṃ, kolo.

Sala gamane. Salati.

Kila pītiya kīlanesu. Pītassa bhāvo **pītiyaṃ** yathā dakkhiyaṃ. **Kīlanaṃ** kīlāyeva. Kilati.

Ila kampane. Ilati. Elaṃ, elā. Ettha **elaṃ** vuccati doso. Kenatṭhena? Kampanatṭhena. **Dosoti** cettha aḡuṇo veditabbo, na paṭiḡho. “Nelaṅgo setapacchādo”ti idamettha nidassanaṃ.

Apica **elaṃ** vuccati udakaṃ. Tathā hi “elambujaṃ kaṅṭakiṃ vārijaṃ yathā”ti imissā pāḷiyā atthaṃ niddisanto āyasmā sārīputto “elaṃ vuccati udaka”nti āha. **Elāti** lālā vuccati “elamūgo”ti ettha viya. Apica **elāti** kheḷo vuccati “sutvā nelapatiṃ vācaṃ, vālā panthā apakkamu”nti ettha viya. Ettha **nelapatiṃ vācanti** kheḷabindunipātavirahitaṃ vacananti attho. Lālākheḷavācakassa tu **elāsaddassa aññaṃ** pavattinimittaṃ pariyesitabbaṃ. Anekappavattinimittā hi saddā. Kiṃ vā aññaṃ pavattinimittena, **ila kampaneti** evaṃ vuttaṃ kampanaṃ eva lālākheḷavācakassa **elāsaddassa** pavattinimittaṃ, tasmā ilanti jigucchitabbabhāvena kampenti hadayacalanaṃ pāpuṇanti janā etthāti elāti attho gahetabbo. Samānapavattinimittāyeva hi saddā lokasaṅketavasena nānāpadatthavācakāpi bhavanti. Taṃ yathā? Hinoti gacchatīti **hetu**, sappati gacchatīti **sappo**, gacchatīti **goti**. Tathā asamānappavattinimittāyeva samānapadatthavācakāpi bhavanti. Taṃ yathā? Rañcatīti **rājā**, bhūmiṃ pāletīti **bhūmipālo**, nare indatīti **narindoti**. Esa nayo sabbatthāpi vibhāvetabbo.

Ila gatiyaṃ. Ilati.

Hila hāvakaṇe. Helati.

Sila uñche. Silati.

Tila sinehane. Tilati. Tilaṃ, telaṃ, tilo.

Cila vasane. Cilati.

Vala vilāsane. Valati.

Pila gahaṇe. Pilati.

Mila sinehane. Milati.

Phula sañcale pharaṇe ca. Phulati.

Lakārantadhāturūpāni.

Vakārantadhātu

Vā gatigandhanesu. Vāti. Vāto.

Vī pajanakanti asanakhādana gatīsu. Pajanaṃ calanaṃ. Kanti abhiruci. **Asanaṃ** bhattaparibhogo. **Khādanaṃ** pūvādibhakkhanaṃ. **Gatī** gamanaṃ. Vetī.

Ve tantasantāne. Vāyati. Tantavāyo.

Ve sosane. Vāyati.

Dhivu khivu nidassane. Dhevati. Khevati.

Thivu dittiyaṃ. Thevati. Madhumadhukā thevanti.

Jīva pāṇadhāraṇe. Jīvati. Jīvitam, jīvo, jīvikā. Atthi no jīvikā deva, sā ca yādisakādisā. Jīvitam kappeti.

Piva miva tiva niva thūliye. Pivati. Pivaro. Mivati. Tivati. Nivati.

Ettha ca **pivaroti** kacchapo, yo koci vā thūlasarīro. Tathā hi “pivaro kacchape thūle”ti pubbācariyehi vuttam.

Ava pālāne. Avati. Buddho mama avatam.

Bhava gatiyaṃ. Savati.

Kava vaṇṇe. Kavati.

Khivu made. Khivati.

Dhovu dhovane. Dhovati.

Devu deva devane. Devati ādevati, paridevati, ādevo, paridevo, ādevanā, paridevanā, ādevitattam, paridevitattam.

Sevu kevu khevu gevu gilevu mevū milevu secane. Sevati. Kevati. Khevati. Gevati. Gilevati. Mevati milevati.

Devu plutagatiyaṃ. Plutagati pari plutagamanam. Devati.

Dhātu gatisuddhiyaṃ. Dhāvati, vidhāvati. Ādhāvati, paridhāvati. Dhāvako.

Civu ādānasaṃvaresu. Civati.

Cevi cetanātulye. Cevati.

Vakārantadhāturūpāni.

Sakārantadhātu

Sā pāke. Sāti.

Si sevāyaṃ. Sevati. Sevanā, sevako, sevito, sivo, sivaṃ.

Nihīyati puriso nihīnasevī,
Na ca hāyetha kadāci tulyasevī;
Seṭṭhamupagamaṃ udeti khippaṃ,
Tasmā attano uttaritaraṃ bhajetha;

Si gatibuddhīsu. Seti, atiseti. Atisitum, atisitvā, setu.

Sī saye. Sayo supanaṃ. Seti. Sayati. Senaṃ. Sayanaṃ.

Su gatiyaṃ. Savati. Pasavati. Pasuto, suto.

Ettha **sutoti** dūto, “vittiñhi maṃ vindati suta disvā”ti “devasuto ca mātālī”ti ca imāni tattha payogāni.

Su savane. Savanaṃ sandanaṃ. Savati. Āsavo.

Sū pasave. Pasavo janaṇaṃ. Savati, pasavati. Suttaṃ.

Ettha pana **suttanti** atthe savati janeṭīti suttaṃ, tepiṭakaṃ buddhavacanaṃ, tadaññampi vā hatthisuttādi suttaṃ.

Sū pāṇagabbhavimocanesu. Sūti. Pasūti. Pasūto.

Su peraṇe. Suti.

Se khaye. Sīyati. Ekārassīyādeso.

Se pāke. Seti.

Se gatiyaṃ. Seti. Setu.

Himṣa himṣāyaṃ. Himṣati. Himṣako, himṣanā, himṣā.

Issa issāyaṃ. Issati. Purisaparakkamassa devā na issanti. Issā, issāyanā.

Namassa vandanānatiyaṃ. Vandanānati nāma vandanāsaṅkhātāṃ nanaṃ, sakammakoyevāyaṃ dhātu, na **namudhātu** viya sakammako ceva akammako ca. Namassati.

Ghusa sadde. Ghusati, ghosati. Paṭighoso, nigghoso, vacīghoso.

Cusa pāne. Cusati.

Pusa buddhiyaṃ. Pusati. Poso. Sampīle mama posanaṃ. **Posananti** vaḍḍhanaṃ.

Musa theyye. Thenanaṃ **theyyaṃ** corikā. Musati. Duddikkho cakkhumusano. Musalo.

Pusa pasave. Pusati.

Vāsi bhūsa alaṅkāre. Vāsati. Bhūsati, vibhūsati. Bhūsaṃ, vibhūsaṃ.

Usa rujāyaṃ. Usati.

Isa ucche. Esati. Isi.

Ettha pana sīlādayo guṇe esantīti **isayo**, buddhādayo ariyā tāpasapabbajjāya ca pabbajitā narā. “Isi tāpaso jaṭilo jaṭī jaṭādharo”ti ete tāpasapariyāyā.

Kasa vilekhane. Kasati, kassati. Kassako, ākāso.

Ettha **kassakoti** kasikārako. **Ākāso**ti nabhaṃ. Tañhi na kassatīti **ākāso**. Kasituṃ vilekhituṃ na sakkāti attho. Imāni tadabhidhānāni –

Ākāso ambaram abham, antalikkha'magham nabham;
Vehāso gaganam devo, kha'mādiccathopi ca.

Tārāpatho ca nakkhatta-patho ravipathopi ca;
Vehāyasam vāyupatho, apatho anilañjasam.

Kasa sisa jasa jhasa vasa masa disa jusa yusa himsatthā. Kasati. Sisati. Jasati. Jhasati.
Vasati. Masati. Masako. Omasati, omasavādo. Disati. Jusati. Yūsati.

Tattha **omasatīti** vijjhati. **Omasavādoti** paresam sūciyā viya vijjhanavādo. **Masakoti** makaso.

Bhassa bhassane. Bhassanti kathanam vuccati “āvāso gocaro bhassam.
Bhassakāraka”ntiādīsu viya. Bhassati. Bhaṭṭham. **Bhaṭṭhanti** bhāsitam, vacananti attho. Ettha pana –

“Subhāsītā atthavatī, gāthāyo te mahāmuni;
Nijjhattomhi subhaṭṭhena, tvañca me saraṇam bhavā”ti

Pāli nidassanam. Tattha **nijjhattoti** nijjhāpito dhammojapaññāya paññattigato amhi. **Subhaṭṭhenāti** subhāsitena.

Jisu nisu visu misu vassa secane. Jesati. Nesati. Vesati. Mesati. Devo vassati.

Marisu sahane ca. Cakāro secanāpekkhako. Marisati.

Pusa posane. Posati. Poso. Kammacittautuāhiārehi posiyatīti **poso**. “Aññepi devo posetī”ti
dassanato pana **curādigaṇepi** imam dhātum vakkhāma.

Pisu silisu pusu palusu usu upadāhe. Pesati. Silesati. Silesa. Posati. Palosati. Osati. Usu.

Ghasu samharise. Samhariso saṅghaṭṭanam. Ghassati.

Hasu āliṅge. Āliṅgo upagūhanam. Hassati.

Hasa hasane. Hasati. Assā hasanti, ājānīyā hasanti, pahasati, uhasati. Kārite “hāsetī”iccādi,
uhasiyamāno, hāso, pahāso, hasanam, pahasanam, hasitam. **Hakāralopena** mandhasanam “sita”nti
vuccati “sitam pātvākāsī”tiādīsu.

Tattha **uhasatīti** avahasati. **Udasiyamānoti** avahasiyamāno. Tatrāyam pāli “idha bhikkhum
araññagataṃ vā rukkhamūlagataṃ vā suññāgāragataṃ vā mātugāmo upasaṅkamitvā uhasati” iti ca
“so mātugāmena uhasiyamāno” iti ca. **Hāso**ti hasanam vā somanassam vā “hāso me
upapajjathā”tiādīsu viya.

Tusa hasa hisa rasa sadde. Tusati, hasati, hisati, rasati, rasitam. Atrāyam pāli “bheriyo sabbā
vajjantu, vīṇā sabbā rasantu tā” iti.

Rasa assādane. Rasati. Raso.

Rasa assādasinehesu. Rasati. Raso.

Rasa hāniyam. Rasati. Rasanam, raso.

Atrāyam pāli –

“Naheva ṭhita nā’sīnam, na sayānam na paddhagum;

Yāva byāti nimīsati, tatrāpi rasatibbayo’’ti.

Tattha **rasatibbayoti** so so vayo rasati parihāyati, na vaḍḍhatīti attho.

Lasa silesanakīlanesu. Lasati. Lāso. Lasī ca te nippalitā. **Lasi** vuccati matthaluṅgaṃ.
Nippalitāti nikkhantā.

Nisa samādhimhi. Samādhi samādhānaṃ cित्तेkaggatā. Nesati.

Misa masa sadde rose ca. Mesati. Masati. Meso. Masako.

Pisi pesu gatiyaṃ. Pisati. Pesati.

Sasu hiṃsāyaṃ. Sasati. Satthaṃ. **Satthaṃ** vuccati asi.

Saṃsa thutiyañca. Cakāro hiṃsāpekkhāya. Saṃsati, pasamsati. Pasamsā, pasamsanā. Pasattho bhagavā. Pasamsamāno, pasamsito, pasamsako, pasamsitabbo, pasamsaniyo, pāsamsa, pasamsitvā iccādīni.

Disa pekkhane. Etissā pana nānārūpāni bhavanti – “dissati padissati’’ iccādi **akammakaṃ**.
“Passati dakkhati’’iccādi **sakammakaṃ**.

Dissatu, passatu, dakkhatu. Disseyya, passeyya, dakkheyya. Disse, passe, dakkhe. Dissa, passa, dakkha. Adissā, apassā. Addā sīdantare nage. Addakkhā, addakkhuṃ, adassuṃ. Adassi, apassi, adakkhi.

Dassissati, passissati, dakkhissati. Adassissā, apassissā, dakkhissā. Evaṃ vattamānapañcamiyādivasena vitthāretabbāni. **Kārite** “dasseti dassayati’’ti rūpāni. Kamme “passiyati’’ iccādīni.

Disā. Passo. Passaṃ. Passitā. Dassetā. Dassanaṃ. Vipassanā, ñāṇadassananti nāmikapadāni. Tadatthe pana tumatthe ca “dakkhitāye’’ti rūpaṃ. “Āgatāma imāṃ dhammasamayaṃ, dakkhitāye aparājitasanṅha’’nti hi pāli. Imasmimṃ pana pālīppadesa “dakkhitāye’’ti idaṃ tadatthe tumatthe vā catutthiyā rūpaṃ. Tathā hi **dakkhitāyēti** imassa dassanatthāyāti vā passitunti vā attho yojetabbo. **Disāti**ādīsu pana puratthimādibhedāpi disāti vuccati. Yathāha –

“Disā catasso vidisā catasso,
Uddhaṃ adho dasa disatā imāyo;
Katamaṃ disaṃ tiṭṭhati nāgarājā,
Yamaddasā supine chabbisāṇa’’nti.

Mātāpitādayopi. Yathāha –

“Mātāpitā disā pubbā, ācariyā dakkhiṇā disā;
Puttadārā disā pacchā, mittāmaccā ca uttarā;

Dāsakammakarā heṭṭhā, uddhaṃ samaṇabrāhmaṇā;
Etā disā namasseyya, alamatto kule gihī’’ti;

Paccayadāyakāpi. Yathāha – “agārino annadapānavatthadā, avhāyikā nampi disaṃ vadantī’’ti.

Nibbānampi. Yathāha –

“Etādisā paramā setaketu,

Yaṃ patvā niddukkhā sukhino bhavanti’ ti;

Evaṃ **disā**saddena vuccamānaṃ attharūpaṃ ñatvā idānissa nibbacanamevaṃ daṭṭhabbaṃ. Dissati candāvaṭṭanādivasena “ayaṃ purimā ayaṃ pacchimā” tiādinā nānappakārato paññāyatīti **disā**, puratthimadisādayo. Tathā “ime amhākaṃ garuṭṭhāna’ntiādinā passitabbāti **disā**, mātāpitādayo. Dissanti sakāya puññakriyāya ime dāyakāti paññāyantīti **disā**, paccayadāyakā. Dissati uppādavayābhāvena niccadhammattā sabbakālampi vijjatīti **disā**, nibbānaṃ. **Passoti** kāraṇākāraṇaṃ passatīti passo. Evaṃ passatīti **passaṃ**. Atrāyaṃ pāḷi –

“Passati passo passantaṃ, apassantampi passati;
Apassanto apassantaṃ, passantampi na passatī” ti.

Passatīti **passitā**. Dassetīti **dassitā**. **Dassananti** dassanakriyā. Apica **dassananti** cakkhuvīññānaṃ. Tañhi rūpārammaṇaṃ passatīti dassananti vuccati. Tathā “dassanena pahātabbā dhammā” ti vacanato **dassanaṃ** nāma sotāpattimaggo. Kasmā sotāpattimaggo dassanaṃ? Paṭhamaṃ nibbānadassanaṃ. Nanu gotrabhū paṭhamataraṃ passatīti? No na passati, disvā kattabbakiccaṃ pana na karoti saṃyojanānaṃ appahānato, tasmā “passatī” ti na vattabbo. Yattha katthaci rājānaṃ disvāpi paṇṇākāraṃ datvā kiccanipphattiyā aditṭhattā ajjāpi rājānaṃ na passāmīti vadanto gāmaṃvāsī nidassanaṃ.

Vipassanāti aniccādivasena khandhānaṃ vipassanaṃ ñānaṃ. **Ñānadassananti** dibbacakkhupi vipassanāpi maggopi phalampi paccavekkhaṇañānaṃpi sabbaññutaññānaṃpi vuccati. “Appamatto samāno ñānadassanaṃ ārādhetī” ti ettha hi dibbacakkhu ñānadassanaṃ nāma. “Ñānadassanāya cittaṃ abhinīharati abhininnāmetī” ti ettha vipassanāñānaṃ. “Abhabbā te ñānadassanāya anuttarāya sambodhāyā” ti ettha maggo, “ayamañño uttarimanussadhammo alamariyañānadassanaviseso adhigato phāsuvihāro” ti ettha phalañānaṃ. “Ñānañca pana me dassanaṃ udapādi, akuppā me cetovimutti, ayamantimā jāti, natthi dāni punabbhavo” ti ettha paccavekkhaṇañānaṃ. “Ñānañca pana me dassanaṃ udapādi sattāhakālaṅkato ālāro kālāmo” ti ettha sabbaññutaññānaṃ. Etthetaṃ bhavati –

“Dibbacakkhupi maggopi, phalañcāpi vipassanā;
Paccavekkhaṇañānaṃpi, ñānaṃ sabbaññutāpi ca;
Ñānadassanasaddena, ime atthā pavuccare” ti.

Daṃsa daṃsane. Daṃsati, vidaṃsati. Danto. Kārite ālokaṃ vidaṃseti.

Esa buddhiyaṃ. Esati.

Saṃsa kathane. Saṃsati. Yo me saṃse mahānāgaṃ.

Kilisa bādthane. Kilisati. Kilesa.

Ettha bādhanaṭṭhena rāgādayopi “kilesā” ti vuccanti dukkhampi. Etesu dukkhavasena –

“Idaṃca paccayaṃ laddhā, pubbe kilesamattano;
Ānandiyaṃ vicariṃsu, ramaṇīye giribbaje” ti

Payogo veditabbo. **Divādiganaṃ** pana pattassa “kilissatī” ti rūpaṃ.

Vasa sinehane. Vasati. Vasā.

Ettha ca **vasā** nāma vilīnasineho. Sā vaṇṇato nāḷikeratelavaṇṇā. Ācāme āsittatelavaṇṇātipi vattuṃ vaṭṭati.

Īsa hiṃsāgatidassanesu. Īsati. Īso.

Bhāsabyattāyaṃ vācāyaṃ. Bhāsati. Bhāsā, bhāsitaṃ, bhātā. Paribhāsati. Paribhāsā, paribhāsako.

Tatra bhāsanti atthaṃ etāyāti **bhāsā**, māgadhabhāsādi. **Bhāsitanti** vacanaṃ. Vacanattho hi **bhāsitasaddo** niccaṃ napuṃsakaliṅgo daṭṭhabbo. Yathā “sutvā luddassa bhāsita”nti. Vāccaliṅgo pana **bhāsitasaddo** tiliṅgo daṭṭhabbo. Yathā “bhāsito dhammo, bhāsitaṃ catusaccaṃ, bhāsitā vācā”ti. Pubbe bhāsati **bhātā**, jeṭṭhabhātāti vuttaṃ hoti. So hi pubbe jātatā evaṃ vattumlabhati. Kiñcāpi **bhātusaddo** “bhātikasataṃ, sattabhātaro. Bhātaraṃ kena dosena, dujjāsi dakarakkhino”tiādīsu jeṭṭhakaniṭṭhabhātūsu vattati, tathāpi yebhuyyena jeṭṭhake nirūṭṭho, “bhātā”ti hi vutte jeṭṭhabhātāti viññāyati, tasmā katthaci ṭhāne “kaniṭṭhabhātā”ti visesetvā vuttaṃ.

Nanu ca bho katthaci “jeṭṭhabhātā”ti visesetvā vuttanti? Saccam, taṃ pana **bhātāsaddassa** kaniṭṭhepi vattanato pākaṭṭikaraṇatthaṃ “jeṭṭhabhātā”ti vuttaṃ. Yathā hi hariṇesu vattamānassa **migasaddassa** kadāci avasesacatuppadesupi vattanato “hariṇamigo”ti visesetvā vācaṃ bhāsanti, evaṃ sampadamidaṃ veditaṃ. Yathā ca gohatthimahimṣaacchasūkarasasabīlārādīsu sāmāññavasena **migasadde** vattamānēpi “migacammaṃ migamaṃsa”nti āgataṭṭhāne “hariṇassā”ti visesanasaddaṃ vināpi “hariṇamigacammaṃ hariṇamigamaṃsa”nti visesatthādhiḡamo hoti, ettha na gohatthiādīnaṃ cammaṃ vā maṃsaṃ vā viññāyati. Tathā “migamaṃsaṃ khādanti”ti vacanassa gohatthiādīnaṃ maṃsaṃ khādanti attho na sambhavati, evameva katthaci vināpi **jeṭṭhakaiti** visesanasaddaṃ “bhātā”ti vuttheyeva “jeṭṭhakabhātā”ti attho viññāyatīti. Nanu ca bho “migacammaṃ, migamaṃsa”nti ettha **cammamaṃsasadde** eva visesatthādhiḡamo hotīti? Na hoti, **migasaddassa** iva **cammamaṃsasaddānaṃ** sāmāññavasena vattanato, evaṃca sati kena visesatthādhiḡamo hotīti ce? Lokasaṅketavasena, tathā hi **migasadde** ca **cammāsaddādīsu** ca sāmāññavasena vattamānesupi lokasaṅketena paricchinnatā gohatthiādīnaṃ cammādīni na ñāyanti lokena, atha kho hariṇacammādīniyeva ñāyanti. “Saṅketavacanaṃ saccam, lokasammuti kāraṇa”nti hi vuttanti daṭṭhabbaṃ.

Gilesu anvicchāyaṃ. Punappunaṃ icchā **anvicchā**. Gilesati.

Yesu payatane. Yesati.

Jesu nesu esu hesu gatiyaṃ. Jesati. Nesati. Esati. Hesati. Dhātvantassa pana saññogavasena “jessati, nessatī”tiādīnīpi gahetabbāni. Jessamāno. Jessaṃ, jessanto. Ettha ca –

“Yathā āraññakaṃ nāgaṃ, dantiṃ anveti hatthini;
Jessantaṃ giriduggesu, samesu visamesu cā”ti

Pāḷi nidassanaṃ.

Desu hesu abyattasaddo. Desati. Hesati.

Kāsa saddakucchāyaṃ. Kāsati, ukkāsatī. Kāso. Kāsaṃ sāsaṃ daraṃ balyaṃ, khīṇamedho nigacchati.

Kāsu bhāsu dittiyaṃ. Dittīti pākaṭṭatā, virājanatā vā. Kāsati, pakāsati. Pakāsati tejo. Dūre santo pakāsenti. Bhāsati. Pabhāsati midam byamaṃ. Pakāso. Kāsu obhāso.

Tatra pakāsati **pakāso**, pākaṭṭo hotīti attho. Tucchabhāvena puñjabhāvena vā kāsati pakāsati pākaṭṭa hotīti **kāsu**. “Kāsu” itī āvāṭopi vuccati rāsipi.

“Kiṃnu santaramānova, kāsuṃ khanasi sārathi;
Puṭṭho me samma akkhāhi, kiṃkāsuṃ karissatī”ti

Ettha hi āvāto kāsū nāma. “Āṅgārakāsuṃ apare phuṇanti, narā rudantā paridaḍḍhagattā”ti ettha rāsi. Kārite – pakāsetīti pakāsako. Obhāsetīti obhāsako. Kamme pakāsiyatīti pakāsito. Evaṃ bhāsito. Bhāve – kāsanā. Sankāsanā. Pakāsanā. **Tumantāditte** “pakāsituṃ, pakāsetuṃ, obhāsituṃ, obhāsetuṃ. Pakāsītvā, pakāsetvā, obhāsītvā, obhāsetvā”ti rūpāni bhavanti. Taddhite bhāsu etassa atthīti bhāsu, pabhassaro yo koci. Bhāsuṃ vā kesarasīho. Imasmīṃ atthe **bhāsusaddo** “**rāja dittiya**”nti ettha **rājasaddo** viya virājanavācako siyā, tasmā rūpasiriyā virājanasampannatāya bhāsu virājanatā etassa atthīti **bhāsuṃ** nibbacanaṃ ñeyyaṃ.

Nāsu rāsu sadde. Nāsati. Rāsati. Nāsā, nāsikā.

Tatra **nāsā**ti hatthisoṇḍāpi nāsāti vuccati “sace maṃ nāganāsūrū, olokeyya pabhāvātī”tiādīsu viya. Manussādīnaṃ nāsikāpi nāsāti vuccati “yo te hatthe ca pāde ca, kaṇṇanāsaṅga chedayī”tiādīsu viya. Nāsanti abyattasaddaṃ karonti etāyāti nāsā. Nāsā eva **nāsikā**. Yattha nibbacanaṃ na vadāma, tattha taṃ suviññeyyattā appasiddhattā vā na vuttanti daṭṭhabbaṃ, avuttampi payogavicakkhaṇehi upaparikkhitvā yojetabbaṃ. Atridaṃ vuccati –

Nāsā soṇḍā karo hattho,
Hatthidabbe samā matā;
Nāsā ca nāsikā ca dve,
Narādīsu samā matā”ti.

Nasa koṭille. Nasati.

Bhisi bhaye. Bhimsati. Bhimsanako. Tadāsi yaṃ bhimsanakaṃ. Bhesmākāyo.

Āsisi icchāyaṃ. Āpubbo **sisi** icchāyaṃ vattati. Āsisi. Āsivateva puriso. Āsisanā. Āsissattaṃ. Āsissanto, āsissamāno, āsamāno. “Suggatimāsamānā”ti pāli ettha nidassanaṃ.

Gasu adane. Gasati.

Ghusī kantikaraṇe. Īkārantoyaṃ, tena ito na niggahītāgamo. Ghusati.

Paṃsu bhaṃsu avasaṃsane. Paṃsati. Bhaṃsati.

Dhaṃsu gatiyaṃ. Dhaṃsati. Rajo nuddhaṃsati uddhaṃ.

Pasa vitthāre. Pasati. Pasu.

Kusa avhāne rodane ca. Kosati, pakkosati. Pakkosako, pakkosito, pakkosanaṃ.

Kassa gatiyaṃ. Kassati, parikkassati. Paṭikkassati. Mūlāya paṭikkasseyya. **Paṭikkasseyyāti** ākaḍḍheyya, mūlapattiyāmyeva patitṭhāpeyyāti attho.

Asa dityādānesu ca. Cakāro gatipekkhako. Asati.

Disa ādānasaṃvaraṇesu. Dissati puriso.

Dāsu dāne. Dāsati.

Rosa bhaye. Rosati. Rosako.

Bhesu calane. Bhesati.

Pasa bādhanaphassanesu. Pasati. Pāso, nāgapāso, hatthapāso.

Lasa kantiyaṃ. Lasati, abhilasati, vilasati. Lāso, vilāso, vilasanaṃ.

Casa bhakkhaṇe. Casati.

Kasa himsāyaṃ. Kasati.

Tisa tittiyaṃ. Titti tappanaṃ paripuṇṇatā suhitatā. Tisati. Titti.

Vasa nivāse. Vasati, vasiyati, vacchati. Vatthu, vatthaṃ, parivāso, nivāso, āvāso, upavāso, uposatho, vippavāso, cirappavāsī, cirappavuttho, vasitvā, vattuṃ, vasituṃ iccādīni.

Atra **upavāsoti** annena vajjito vāso upavāso. **Uposathoti** upavasanti etthāti uposatho, upavasanti sīlena vā anasana vā upetā hutvā vasantīti attho. Ayaṃ panettha atthuddhāro – “āyāmāvuso kappina uposathaṃ gamissāmā” tiādīsu pātimokkhuddeso uposatho. “Evaṃ aṭṭhaṅgasamannāgato kho visākhe uposatho upavuttho” tiādīsu sīlaṃ. “Suddhassa ve sadā phaggu, suddhassuposatho sadā” tiādīsu upavāso. “Uposatho nāma nāgarājā” tiādīsu paññatti. “Na bhikkhave tadahuposathe sabhikkhukā āvāsā” tiādīsu upavasiṭṭhādivasoti.

Vasa kantiyaṃ. Vacchati. Jinavacchayo.

Sasa susane. Sasati. Saso.

Sasa pāṇane. Sasati. Satova assasati, satova passasati. Saso, sasanaṃ. Assāso passāso assasanto passasanto.

Asa bhuvi. Atthi. Asa.

Ettha **atthīti** ākhyātapadaṃ. Na atthi khīrā brāhmaṇī. Atthitā, atthibhāvo, “yaṃ kiñci ratanaṃ atthī” tiādīsu viya nipātapadaṃ. Tasmā **atthīti** padaṃ ākhyātanipātavasena duvidhanti veditabbaṃ. **Asaiti** avibhattikaṃ nāmikapadaṃ. Ettha ca “asasmīti hotī” ti pāḷi nidassanaṃ. Tattha **atthīti** asa, niccassetāṃ adhivacanaṃ. Iminā sassatadiṭṭhi vuttā.

Tatrāyaṃ padamālā – “atthi, santi. Asi, attha. Asmi, asma, amhi, amha” iccetāni pasiddhāni. “Atthu, santu. Āhi, attha. Asmi, asma amhi, amha” iccetāni ca, “siyā, assa, siyuṃ, assu, siyaṃsu. Assa, assatha. Siyaṃ, assa, assāma” iccetāni ca pasiddhāni.

Ettha pana “tesaṅca kho bhikkhave samaggānaṃ sammodamānānaṃ...pe... siyaṃsu dve bhikkhū abhidhamme nānāvādā” ti pāḷi nidassanaṃ. Tattha **siyaṃsūti** bhavēyyuṃ. **Abhidhammeti** visiṭṭhe dhamme.

Idāni **siyāsaddassa** atthuddhāro pabhedo ca vuccate. **Siyāti** ekaṃse ca vikappane ca “pathavīdhātu siyā ajjhātikā, siyā bāhirā” ti ekaṃse. “Siyā aññatarassa bhikkhuno āpattivītikkamo” ti vikappane.

Siyāti ekamārahayātapadaṃ, ekamabyayapadaṃ. Ākhyātatte ekavacanaṃ, abyayatte yathāpāvācanaṃ. “Puttā matthi dhanā matthī” ti ettha atthīti abyayapadamiva ekavacanaṃtampi bahuvacanaṃtampi bhavati. Tassākhyātatte payogoviditova. Abyayatte pana “sukhaṃ na sukhasahagataṃ, siyā pīṭisahagata” nti “ime dhammā siyā parittārammaṇā” ti ca ekavacanaṃ bahuvacanaṃ payogā veditabbā. Ettha dhātuyā kiccaṃ natthi. Parokkhāyaṃ “itiha asa itiha asā” ti dassanato **asa** iti padaṃ gahetabbaṃ. Hiyyattanīrūpāni appasiddhāni. Ajjataniyā pana “āsi, āsiṃsu, āsuṃ. Āsi, āsittha. Āsiṃ, āsimhā” iccetāni pasiddhāni. Bhavissantiyā “bhavissati, bhavissanti” iccādīni. Kālātipattiyā “abhavissā, bhavissāṃsu” iccādīni bhavanti.

Sāsa anusīṭṭhiyaṃ. Sāsati, anusāsati. Kamantaṃ vo sāsati, sāsanaṃ, anusāsanaṃ, anusāsani,

anusit̥ṭhi, satthā, satthaṃ, anusāsako, anusāsikā.

Tatra **sāsananti** adhisilādisikkhattayasāṅgahitasāsanam, pariyattipaṭipattipaṭivedhasāṅkhātaṃ vā sāsanam. Tañhi sāsati etena, ettha vāti “sāsana”nti pavuccati. Apica **sāsananti** “rañño sāsanam peseti”tiādīsu viya pāpetabbavacanam. Tathā sāsananti ovādo, yo “anusāsani”ti ca, “anusit̥ṭhi”ti ca vuccati. **Satthāti** tividhayānamukhena sadevakam lokam sāsati satthā, diṭṭhadhammikasamparāyikaparamatthehi yathārahaṃ satte anusāsati attho. **Satthanti** sadde ca atthe ca sāsati ācikkhati etenāti satthaṃ. Kiṃtaṃ? Byākaraṇam.

Īsa issariye. Issariyam issarabhāvo. Īsati. Vaṅgīso, janapadeso, manujeso.

Tatra **vaṅgīsoti** vācāya īso issaroti vaṅgīso. Ko so? Āyasmā vaṅgīso arahā. Āha ca sayameva –

“Vaṅge jātoti vaṅgīso, vacane issaroti ca;
“Vaṅgīso” iti me nāmaṃ, abhavī lokasammata”nti;

Āsa upavesane. Upavesanam nisīdanam “āsane upaviṭṭho saṅgho”ti ettha viya. Āsati. Acchati. Āsīno. Āsanam. Upāsati. Upāsako.

Tattha **āsananti** āsati nisīdati etthāti āsanam, yaṃ kiñci nisīdanayoggaṃ mañcapīṭhādi.

Kasī gatisosanesu. Īkārantoyam dhātu, tenito na niggahītāgamo. Kasati.

Nisī cumbane. Nisati.

Disī appītiyam. Dhammaṃ dessati. Diso. Diṭṭho. Dessī. Desso. Dessiyo.

Tatra **disoti** ca **diṭṭhoti** ca paccāmittassādhivacanametam. So hi pare dessati nappiyāyati, parehi vā dessiyati piyo na kariyatīti “diso”ti ca “diṭṭho”ti ca vuccati. Atha vā **disoti** coro vāpaccāmitto vā. **Diṭṭhoti** paccāmittoyeva. Atrime payogā –

“Diso disaṃ yaṃ taṃ kayirā, verī vā pana verinaṃ;
Micchāpañihitaṃ cittaṃ, pāpiyo naṃ tato kare”ti ca.

“Disā hi me dhammakatham suṇantū”ti ca, “disā hi me te manusse bhajantu ye dhammamevādapayanti santo”ti ca,

“Yassete caturo dhammā, vānarinda yathā tava;
Saccaṃ dhammo dhiti cāgo, diṭṭhaṃ so ativattati”ti ca.

Dessīti dessanasīlo appiyāyanasīloti dessī. “Dhammakāmo bhavaṃ hoti, dhammadessī parābhavo”ti idamettha payoganidassanam. **Dessoti** appiyo, tathā dessiyoti. Ettha ca –

“Na me dessā ubho puttā, maddīdevī na dessiyā;
Sabbaññutaṃ piyaṃ mayhaṃ, tasmā piye adāsaha”nti ca,

“Na me sā brāhmaṇī dessā, napi me balaṃ na vijjatī”ti ca,

“Mātā pitā na me dessā, napi dessam mahāyasaṃ;
Sabbaññutaṃ piyaṃ mayhaṃ, tasmā vatamadhiṭṭhahi”nti ca

Payogā. Sabbattha **meti** ca **mayhanti** ca sāmivacanam daṭṭhabbam.

Imāni pana paccāmittassa nāmāni –

‘‘Paccamitto ripu diṭṭho, diso verī ca satva’ri;
Amitto ca sapatto ca, evaṃ paṇṇattikārisū’’ti.

Esu gatiyaṃ. Esati.

Bhassa bhassanadittīsu. Bhassanaṃ vacanaṃ. **Ditti** sobhā. Bhassati. Bhassaṃ, pabhassaraṃ.

Dhisa sadde. Dhisati.

Disa atisaṃjane. Disati, upadisati, sandisati, niddisati, paccādisati, paṭisandisati, uddisati. Deso, uddeso iccādīni.

Pisu avayave. Pisati.

Isi gatiyaṃ. Isati.

Phusa samphasse. Phusati. Phasso, phusanā, samphusanā, samphusitattaṃ. Evarūpo kāyasamphasso ahoṣi. Phoṭṭhabbaṃ, phusitaṃ. Devo ca ekamekaṃ phusāyati. Phuṭṭhuṃ, phusituṃ, phusitvā, phusitvāna, phusiya, phusiyāna. Phussa phussa byantiṃ karoti.

Tatra **phassoti** ārammaṇaṃ phusanti etena, sayamaṃ vā phusati, phusanamattameva vā etanti phasso, ārammaṇe phusanalakkhaṇo dhammo.

Rusa risa himsāyaṃ. Rosati. Risati. Puriso.

Ettha ca ‘‘puṃ vuccati nirayo, taṃ risatīti **puriso**’’ti ācariyā vadanti.

Risa gatiyaṃ. Resati.

Visa pavesane. Visati, pavisati. Paveso, pavesanaṃ, nivesanaṃ, pavisaṃ. Ettha **nivesanaṃ** vuccati gehaṃ.

Masa āmasane. Masati, āmasati, parāmasati. Parāmāso, parāmasanaṃ.

Ettha **parāmāsoti** parato āmasatīti parāmāso, aniccādidhamme niccādivasena gaṇhātīti attho. ‘‘Parāmāso micchādīṭṭhi kummaggo micchāpatho’’tiādīni bahūni vevacanapadāni abhidhammato gahetabbāni.

Isu icchāyaṃ. Icchati, sampaṭicchati. Sampaṭicchanaṃ, icchā, abhicchā, icchaṃ, icchamāno.

Vesu dāne. Vecchati, pavecchati, paveccheti. Pavecchaṃ, pavecchantaṃ.

Nisa baddhāyaṃ. Baddhāti vinibaddho, ahānkārasetaṃ adhivacanaṃ. Nisati.

Jusi pītisevanesu. Josati.

Isa pariyesane. Esati. Isi, iṭṭhaṃ, aniṭṭhaṃ, esaṃ, esamāno.

Samkase acchane. Acchanaṃ nisīdanaṃ. Saṅkasāyati.

Sakārantadhāturūpāni.

Hakārantadhātu

Hā cāge. Jahati, vijahati. Vijahanam, jahitum, jahātave, jahitvā, jahāya.

Mhī īsamhasane. Mhayate, umhayate vimhayate.

Tattha **mhayateti** sitam karoti. **Umhayateti** pahaṭṭhākāram dasseti. **Vimhayateti** vimhayanam karoti. Tatrāyam pāḷi “na nam umhayate disvā. Pekkhitena mhitena ca. Mhitapubbaṃva bhāsati. Yadā umhayamānā maṃ, rājabuttī udikkhati. Umhāpeyya pabhāvātī. Pamhāpeyya pabhāvātī”ti.

Tattha **umhayamānāti** pahaṭṭhākāram dassetvā hasamānā. **Umhāpeyyāti** sitavasena pahaṃseyya. **Pamhāpeyyāti** mahāhasitavasena parihāseyya.

Hu dāne. Havati. Huti.

Hu pasajjakaraṇe. Pasajjakaraṇam pakārena sajjanakriyā. Havati. Huto, hutavā, hutāvī, āhuti.

Hū sattāyam. Hoti, honti. Hosi, hotha. Homi, homa. Pahoti, pahonti. Pahūtam, pahūtā, kuto pahūtā kalahā vivādā. Honto, hontā, hontam, pahonto. Pacchāsamaṇena hotabbaṃ. Hotum hotuye, pahotum, hutvāna. Vattamānavibhattirūpādīni. Ettha pasiddharūpāneva gahitāni.

Hotu, hontu. Hosi, hotha. Homi, homa. Pañcamīvibhattirūpāni. Etthāpi pasiddharūpāneva gahitāni.

Huveyya, huveyyum. Huveyyāsi, huveyyātha. Huveyyāmi, huveyyāma. Huvetha, huveram. Huvetho, huveyyāvho. Huveyyam, huveyyāmhe. Sattamiyā rūpāni. Ettha pana “upako ājīvako ‘huveyya pāvuso’ ti vatvā sīsam okampetvā ummaggaṃ gahetvā pakkamī” ti **pāḷiyam huveyyāti** padassa dassanato nayavasena ‘huveyya, huveyyu’ ntiādīni vuttāni. **Huveyyāti** pāṭho dissati, yathā paccapekkhānā. Tabbasena “huveyya, huveyyum. Huveyyāsi” tiādīnā **vakārassa pakārādesabhūtāni** rūpāni gahetabbāni.

Aparo nayo – heyya, heyyum. Heyyāsi, heyyātha. Heyyāmi, heyyāma. Hetha, heram. Hetho, heyyāvho. Heyyam, heyyāmhe. Imāni aṭṭhakathānāyena gahitarūpāni. Ettha pana “na ca uppādo hotī. Sace heyya, uppādassāpi uppādo pāpuṇeyyā” ti idampi nidassanam daṭṭhabbaṃ.

Huva, huvu. Huve, huvittha. Huvam, huvimha. Huvittha, hotha iccapi saññogatakāralopena ahoṣīti attho. Tathāhi “kasirā jīvikā hothā” ti padassattham vaṇṇentehi “dukkhā no jīvikā ahoṣī” ti attho vutto. huvire. Huvittho, huvivdo. Huvim, huvimhe. Parokkhāya rūpāni.

Ahuvā, ahuvū. Ahuvo, ahuvattha. Ahavam, ahuvamha. Ahuvattha, ahuvatthum. Ahuvase, ahuvavham. Ahuvim, ahuvamhase. Hiyyattanīrūpāni.

Ettha **ahuvamhaseti** mayam bhavamhaseti attho. “Akaramhasa te kiccaṃ, yam balaṃ ahuvamhase” ti **pāḷiyam** pana “ahuva amhase” iti vā padacchedo kātabbo “ahu amhase” ti vā. Pacchimanāye **vakārāgamo** “ahuvā” ti ca “ahū” ti ca dvinnampi ahoṣīti attho. **Amhanti** amhākaṃ. **Seti** nipātamattam. Idam vuttam hoti – amhākaṃ yam balaṃ ahoṣi, mayam tena balena tava kiccaṃ akaramhāti.

Ahoṣi, ahum, ahesum. Ahuvo, ahuvittha. Ahoṣitthaiccapi. Ahoṣim, ahuvāsim iccapi, ahoṣimhā, ahumhā. Ahuvā, ahuvu, ahuvase, ahuvivham. Ahavam, ahum iccapi. Ahuvimhe. Ajjataniyā rūpāni.

Ettha “ahaṃ kevaṭṭagāmasmiṃ, ahum kevaṭṭadārako” ti dassanato “ahu” nti vuttam, ahoṣinti attho. “Ahaṃ bhadante ahuvāsim pubbe sumedhanāmassa jinassa sāvako” ti dassanato “ahuvāsi” nti iccevattho. Tathā hi **anekavaṇṇavimānavatthuaṭṭhakathāyam** imissā pāḷiyā attham vaṇṇentehi **ahuvāsi**ti ahoṣinti attho pakāsito.

“Hessati, hehissati, hehiti, hohitī”ti imāni cattāri bhavissantiyā mātīkāpadāni vedittabbāni.

Idāni tāni vibhajissāmi – hessāti, hessanti. Hessasi, hessatha. Hessāmi, hessāma. Hessate, hessante. Hessase, hessavhe. Hessaṃ, hessāmahe. Imāni “anāgatamhi addhāne, hessāma sammukhā ima”nti dassanato vuttāni.

Hehissati, hehissanti. Hehissasi. Sesam vitthāretabbaṃ.

Hohissati, hohissanti. Hohissasi. Sesam vitthāretabbaṃ.

Hehiti, hehinti. Hehisi. Sesam vitthāretabbaṃ.

Hohiti, hohinti. Hohisi. Sesam vitthāretabbaṃ. Bhavissantiyā rūpāni.

Ahuvissā, ahuvissaṃsu. Ahuvissase, ahuvissatha. Ahuvissaṃ, ahuvissamhā. Ahuvissatha, ahuvissisu. Ahuvissase, ahuvissavhe. Ahuvissaṃ, ahuvissāmhase. Kālātipattirūpāni.

Vhe avhāyane baddhāyaṃ sadde ca. Avhāyanaṃ pakkosanaṃ. **Baddhāti** ahankāro, ghaṭṭanaṃ vā sārāmbhakarānaṃ vā. **Saddo** ravo. Vheti, vḥāyati, avheti, avhāyati, avhāsi iccapi. Kaccāyano māṇavakosmī rāja, anūnanāmo iti mavhayanti. **Āsaddo** upasaggova, so saññogaparattā rasso jāto. Avhito. Anavhito tato āgā. Avhā, avhāyanā. Vāraṇavhayanā rukkhā. Kāmaṃve visaye. Kumāro candasavhayo.

“Sattatantiṃ sumadhuraṃ,
Rāmaṇeyyaṃ avācayim;
So maṃ raṅgamhi avheti,
Saraṇaṃ me hohi kosiyā”ti.

Ettha **avhetīti** sārāmbhavasena attano visayaṃ dassetuṃ saṅghaṭṭatīti attho. “Samāgate ekasataṃ samagge, avhettha yakkho avikampamāno”ti etthāpi sārāmbhavasena ghaṭṭanaṃ avhāyanaṃ nāma.

“Tattha naccanti gāyanti, avhāyanti varāvaram;
Accharā viya devesu, nāriyo samalaṅkatā”ti

Ettha pana **avhāyanti varāvaranti** varato varaṃ naccañca gītañca karontiyo sārāmbhaṃ karontīti attho daṭṭhabbo.

Pañha pucchāyaṃ. Bhikkhu garuṃ pañhaṃ pañhati. Pañho. Ayaṃ pana pāḷi “paripucchati paripañhati idaṃ bhante kathaṃ imassa ko attho”ti. **Pañhasaddo** pulliṅgavasena gahetabbo. “Pañho maṃ paṭibhāti, taṃ suṇā”ti yebhuyyena pulliṅgappayogadassanato. Katthaci pana itthiliṅgopi bhavati napuṃsakaliṅgopi. Tathā hi “pañhā mesā kusalehi cintitā. Koṇḍañña pañhāni viyākarohī”ti taddīpikā pāḷiyo dissanti, liṅgavipallāso vā tattha daṭṭhabbo.

Pañha icchāyaṃ. Pañhati. Pañho. Ettha ca **pañhoti** ñātuṃ icchito attho. Idaṃ panettha nibbacanaṃ pañhiyati ñātuṃ icchiyati sotī **pañhoti**. Tathā hi vuttaṃ “vissajjitamhi pañhe”ti imissā **nettipāḷiyā** atthaṃ samvaṇṇentena “**pañheti** ñātuṃ icchite atthe”ti.

Miha secane. Mihati, ummihati. Megho, mehanaṃ.

Tattha **ummihatīti** passāvaṃ karoti. **Meghoti** mihati siṅcati lokam vassadhārāhīti megho, pajjunno. **Mehananti** itthīnaṃ guyhaṭṭhānaṃ.

Daha bhasmīkaraṇe dhāraṇe ca. Āgārāni aggi dahati. Ayaṃ puriso imaṃ itthiṃ ayyikaṃ

dahati, mama ayyikāti dhāretīti attho. Imassa purisassa ayaṃ itthī ayyikā hotīti adhippāyo. Atra panāyaṃ pāli “sakyā kho ambatṭha rājānaṃ ukkākaṃ pitāmaṃ dahantī”ti. Agginā daḍḍhaṃ gehaṃ, dayhati, dayhamānaṃ. **Dassa ḍādesse** “ḍahatī”ti rūpaṃ. “Ḍahantaṃ bālamaṃveti, bhasmāchannaṃ pāvako”tiādayo payogā ettha nidassanāni bhavanti.

Caha parisakkane. Cahati.

Raha cāge. Rahati. Raho, rahito.

Rahi gatiyaṃ. Rahati. Raho, rahaṃ.

Dahi bahi vuddhiyaṃ. Dahati. Bahati.

Bahi saddhe ca. Cakāro vuddhāpekkho. Bahati.

Tuhi duhi addane. Tuhati. Duhati.

Araha maha pūjāyaṃ. Arahati. Arahaṃ, arahā. Mahati.

Mahanaṃ, maho. Vihāramaho. Cetiyaṃmaho.

Tatra nikkilesattā ekantadakkhiṇeyyabhāvena attano katapūjāsakkārādīnaṃ mahapphalabhāvakaraṇena arahaṇīyo pūjanīyoti **arahā**, khīṇāsavo.

Īha cetāyaṃ. Īhati. Īhā. **Īhā** vuccati vīriyaṃ.

Vaha maha buddhiyaṃ. Vahati, mahati.

Ahi pilahi gatiyaṃ. Ahati. Pilahati, ahi.

Ettha ca **ahīti** nippādopi samāno ahati gacchati gantuṃ sakkotīti ahi.

Garaha kalaha kucchane. Garahati. Garahā, kalahati, kalaho.

Varaha valaha padhāniye paribhāsanahimsādānesu ca. Varahati. Valahati. Varāho.

Ettha ca **varāhoti** sūkaropi hatthīpi vuccati. Tathā hi “eneyyā ca varāhā ca. Mahāvarāhova nivāpapuṭṭho”tiādīsu sūkaro “varāho”ti nāmena vuccati. “Mahāvarāhassa nadīsu jaggato, bhisam ghasamānassā”tiādīsu pana hatthī “varāho”ti nāmena vuccati. **Mahāvarāhassāti** hi mahāhatthinoti attho.

Vehu jehu vāhu payatane. Vehati, jehati. Vāhati. Vāhano.

Vāhano vuccati asso. So hi vāhanti saṅgāmādīsu kicce uppanne payatanti vīriyaṃ karonti, etenāti **vāhanoti** vuccati.

Dāhu niddakkhaye. Dāhati.

Ūha vitakke. Ūhati, āyūhati, viyūhati, byūhati apohati. Ūhanaṃ, āyūhanaṃ, byūho, apoho.

Tattha **ūhatīti** vitakketi, **āyūhatīti** vāyamati, **vīyūhatīti** paṃsuṃ uddharati. Evaṃ **byūhatīti** etthāpi. **Apohatīti** chaḍḍeti, atha vā viveceti.

Gāhu vilōlane. Gāhati. Gāho, candaggāho, sūriyaggāho, nakkhattaggāho.

Gaha gahaṇe. Gahati, paggahati. Āhutiṃpaggahissāmi. Paggaho, paggāho.

Paggahoti patto. Paggāhoti vīriyaṃ.

Saha parisahane. Parisahanam khanti. Sahati. Saho, asaho, asayho.

Ruha cammani pātubhāve. Ruhati. Rukkho.

Mātu māne. Māhati.

Guhū saṃvaraṇe. Guhati nigguhati. Guho, guyhako.

Vaha pāpuṇe. Vahati. Vārivaho.

Duha papūraṇe. Duhati, dohati. Duyhamānā gāvī.

Diha upacaye. Dehati. Deho. **Dehoti** sarīraṃ.

Liha assādane. Lehati, palehati. Lehanīyaṃ. Atrāyaṃ pāḷi “sunakhā himassa palihimsu pāde”ti. Ayaṃ panattho – sunakhā imassa kumārassa pādātaḷe attano jivhāya palihimsūti.

Oha cāge. Ohati. Sabbamanatthaṃ apohati. Apoho.

Brahma uggame. Brahati. Brahā.

Daha thaha hiṃsatthā. Dahati. Thahati.

Brūha vaḍḍhane. Uparūpari brūhatīti **brahmā**. Kārite “vivekamanubrūhetuṃ vaṭṭatī”ti payogo.

Brahmāti tehi tehi guṇavisesehi brūhitoti brahmā. **Brahmā**ti mahābrahmāpi vuccati tathāgatopi brāhmaṇopi mātāpitaropi seṭṭhampi. “Sahasso brahmā dvisahasso brahmā”tiādīsu hi mahābrahmā “brahmā”ti vuccati. “Brahmāti kho bhikkhave tathāgatassetam adhivacana”nti ettha tathāgato.

“Tamonudo buddho samantacakkhu,
Lokantagū sabbabhavātivatto;
Anāsavo sabbadukkhappahīno,
Saccavhaya brahme upāsito me”ti

Ettha brāhmaṇo. “Brahmāti mātāpitaro, pubbācariyāti vuccare”ti ettha mātāpitaro. “Brahmacakkaṃ pavatteti”ti ettha seṭṭham. Etthetaṃ vuccati –

“Mahābrahmani vippe ca, atho mātāpitūsu ca;
Tathāgate ca seṭṭhe ca, **brahmasaddo** pavattatī”ti.

Aparo nayo – **brahmā**ti tividhā brahmāno sammutibrahmāno upapattibrahmāno visuddhibrahmānoti.

“Sampannaṃ sālikedāraṃ, suvā bhuñjanti kosiya;
Paṭivedemi te brahme, na ne vāretumussahe,
Paribbaja mahābrahme, pacantaññepi pāṇino”ti ca

Evamādīsu hi **brahmasaddena** sammutibrahmāno vuttā.

“Apārutā tesam amatassa dvārā,
Ye sotavanto pamuñcantu saddham;
Vihimsasaññī paguṇam na bhāsim,
Dhammam paṇītam manujesu brahme,

Atha kho brahmā sahampatī”ti ca evamādīsu **brahmasaddena** upapattibrahmā.
“Brahmacakkaṃ pavatteti”tiādivacanato **brahmanti** ariyadhammo vuccati. Tato nibbattā avisesena sabbepe ariyā visuddhibrahmāno nāma paramatthabrahmatāya. Visesato pana “brahmāti kho bhikkhave tathāgatassetam adhivacana”nti vacanato sammāsambuddho uttamabrahmā nāma sadevake loke brahmabhūtehi guṇehi ukkaṃsapāramippattito. Etthetam vuccati –

“Sammutiyupapattīnam, visuddhīnam vasena ca;
Brahmāno tividhā honti, uttamena catubbidhā”ti.

Dhimha niṭṭhubhane. Dhimheti. “Paṭivāmagataṃ sallaṃ, passa dhimhāmi lohita”nti pāḷi nidassanaṃ.

Tattha **dhimhāmīti** niṭṭhubhāmīti attho.

Hakārantadhāturūpāni.

Ḷakārantadhātu

Biḷa akkose. Beḷati. Biḷāro.

Kiḷa vihāre. Kiḷati. Kiḷā.

Aḷa uggame. Aḷati. Vāḷo.

Laḷa vilāse. Laḷati. Laḷito asso.

Kaḷa made kakkasse ca. Kakkassaṃ kassasiyaṃ pharusabhāvo. Kaḷati.

Tuḷa toḷane. Toḷati.

Huḷa hoḷa gatiyaṃ. Huḷati. Hoḷati.

Roḷa anādare. Roḷati.

Loḷa ummāde. Loyati.

Heḷa hoḷa anādare. Heḷati. Hoḷati.

Vāḷa ālape. Vāḷati.

Dāḷa dhāḷa visaraṇe. Dāḷati. Dhāḷati.

Haḷa silāghāyaṃ. Haḷati.

Hīḷa anādare. Hīḷati. Hīḷā, hīḷiko, hīḷito.

Kaḷa secane. Kaḷati. Kaḷanaṃ.

Heḷa veṭhane. Heḷati.

Īḷa thutiyam. Īḷati.

Juḷa gatiyam. Juḷati, joḷati.

Puḷa muḷa sukhane. Puḷati. Muḷati.

Guḷa rakkhāyam. Guḷati. Guḷo.

Juḷa bandhane. Juḷati.

Kuḷa ghasane. Kuḷati.

Khuḷa bālye ca. Cakāro ghasanāpekkhako. Khuḷati.

Suḷa buḷa saṃvaraṇe. Suḷati. Buḷati.

Puḷa saṅghāte. Puḷati. Puḷinaṃ.

Saḷa abyattasaddhe. Saḷati. Sāḷiko, sāḷikā.

“Usabhova mahī nadati,
Migarājāva kūjati;
Susumārova saḷati,
Kiṃ vipāko bhavissatī”’ti nidassanaṃ;

Imāni **ḷakārantadhāturūpāni.**

Iti **bhūvādigāṇe avaggantadhāturūpāni samattāni.** Ettāvataṃ sabbāpi **bhūvādigāṇe dhātuyo pakāsītā.**

Idāni **bhūvādigāṇikadhātūnaṃyeva kāci asamānasutikā, kāci asamānantikā.** Tāsu kāci samānatthavasena samodhānetvā pubbācariyehi vuttā, tāyeva dhātuyo ekadesena rūpavibhāvanādīhi saddhiṃ pakāsayissāma. Taṃ yathā?

Hū bhū sattāyam hoti, bhavati. Pahoti, pabhavati. Huveyya pāvuso. Sace uppādo heyya. Ajesi yakkho naravīraseṭṭhaṃ, tatthappanādo tumulo bahūva. Ambā’yaṃ ahuvā pure. Ahu rājā videhānaṃ. Pahūtaṃ me dhanam sakka. Pahūtamariyo pakaroti puññaṃ. Pahūtavitto puriso. Pahūtajivho bhagavā. Piyappabhūtā kalahā vivādā. Pacchāsamaṇena hotabbaṃ. Bhavitabbaṃ. Hotuṃ, hetuye, bhavituṃ. Hutvā, hutvāna. Bhavitvā, bhavitvāna.

Ettha pana “atthi hehiti so maggo, na so sakkā na hetuye”’ti pāḷi nidassanaṃ. Tattha **nahetuyeti** abhavituṃ. **Hūdhātuto tumpaccayassa tavepaccayassa vā tuye ādeso, ūkārasa ca ekārādeso** katoti daṭṭhabbaṃ. Atha vā hetubhāvāya **na** na sakkātipi attho. Ayaṃ panattho idha nādhippeto, purimoyevattho adhippeto **hotissa** dhātuno payogabhāvāya udāharitapadassatthabhāvato. Tattha **pahotīti** idaṃ vatthaṃ vipulabhāvena cīvaraṃ kātuṃ pahoti, no nappahoti. **Pahotīti** vā puriso arayo jetuṃ sakkoti. Atha vā **pahotīti** hoti. **Pabhavatīti** sandati. **Pahūtanti** vipulaṃ, mahantanti attho. **Pahūtavittoti** vipulavitto mahaddhano. **Pahūtajivhoti** suputhulasudīghasumudukajivho, **piyappabhūtāti** piyato nibbattā.

Gamu sappa gatiyam. Gacchati, gamati, ghammati, āgacchati, uggacchati, atigacchati,

paṭigacchati, avagacchati, adhigacchati, anugacchati, upagacchati, apagacchati, vigacchati, nigacchati, niggacchati. Aññānīpi yojetabbāni. “Samuggacchati”’tiādīnā upasaggadvayavasēnapi yathāsambhavaṃ yojetabbāni. Sappati, saṃsappati, parisappati. Aññānīpi yojetabbāni.

Tattha **gamatīti** gacchati. Kārite “devadattaṃ gameti gamayati”’ti rūpāni bhavanti. “Apāyaṃ gametīti apāyagamanīya”’nti idamettha nidassanaṃ. **Curādigaṇaṃ** pattassa āpubbassa imassa “āgameti, āgamayati, āgamento, āgamayamāno”’ti suddhakatturūpāni bhavanti.

Tattha **āgametīti** muhuttaṃ adhvāsetīti attho. **Ghammatīti** gacchati. **Āgacchatīti** āyāti. **Uggacchatīti** uyyāti uddhaṃ gacchati. **Atigacchatīti** atikkamitvā gacchati. **Paṭigacchatīti** puna gacchati. **Avagacchatīti** jānāti. **Adhigacchatīti** labhati jānāti vā. **Anugacchatīti** pacchato gacchati. **Upagacchatīti** samīpaṃ gacchati. **Apagacchatīti** apeti. **Vigacchatīti** vigamati. **Nigacchatīti** labhati. “Yasaṃ poso nigacchati”’ti idaṃ nidassanaṃ. **Niggacchatīti** nikkhamati. **Sappatīti** gacchati. **Saṃsappatīti** saṃsaranto gacchati. **Parisappatīti** samantato gacchati.

Idāni pana viññūnaṃ sātṭhakathe teṭṭhake buddhavacane paramakosallajananatthaṃ sappayogaṃ padamālaṃ kathayāma. Seyyathidaṃ? So gacchati, te gacchanti, gacchare. Tvaṃ gacchasi, tumhe gacchatha. Ahaṃ gacchāmi, mayaṃ gacchāma. So gacchate, te gacchante. Tvaṃ gacchase, tumhe gacchavhe. Ahaṃ gacche, mayaṃ gacchāmhe. Vattamānāya rūpāni.

So gacchatu, te gacchantu. Tvaṃ gacchāhi, gaccha, gacchassu, tumhe gacchatha. Ahaṃ gacchāmi, mayaṃ gacchāma. So gacchatam, te gacchantam. Tvaṃ gacchassu, tumhe gacchavho. Ahaṃ gacche, mayaṃ gacchāmase. Pañcamiyā rūpāni.

So gaccheyya, gacche, te gaccheyyūṃ. Tvaṃ gaccheyyāsi, tumhe gaccheyyātha. Ahaṃ gaccheyyāmi, mayaṃ gaccheyyāma, gacchemu. So gacchetha, te gaccheram. Tvaṃ gacchettho, tumhe gaccheyyāvho. Ahaṃ gaccheyyam, mayaṃ gaccheyyāmhe. Sattamiyā rūpāni.

So gaccha, te gacchu. Tvaṃ gacche, tumhe gacchittha, gañchittha. Ahaṃ gaccham, mayaṃ gacchimha, gañchimha. So gacchittha, gañchittha, te gacchire. Tvaṃ gacchittho, tumhe gacchivho. Ahaṃ gacchiṃ, gañchiṃ, mayaṃ gacchimhe. Parokkhāya rūpāni.

So agacchā, te agacchū. Tvaṃ agacche, tumhe agacchatha. Ahaṃ agaccham, mayaṃ agacchamhā. So agacchatha, te agacchatthūṃ. Tvaṃ agacchase, tumhe agacchivham. Ahaṃ agaccham, mayaṃ agacchimhe. Ajjataniyā rūpāni.

So gacchissati, te gacchissanti. Tvaṃ gacchissasi, tumhe gacchissatha. Ahaṃ gacchissāmi, mayaṃ gacchissāma. So gacchissate, te gacchissante. Tvaṃ gacchissase, tumhe gacchissavhe. Ahaṃ gacchissam, mayaṃ gacchissāmhe. Bhavissantiyā rūpāni.

So agacchissā, te agacchissamsu. Tvaṃ agacchisse, tumhe agacchissatha. Ahaṃ agacchissam, mayaṃ agacchissāmhā. So agacchissatha, te agacchissisu. Tvaṃ agacchissase, tumhe agacchissavhe. Ahaṃ agacchissam, mayaṃ agacchissāmhase. Kālātipattiyā rūpāni.

Tattha ajjataniyā kālātipattiyā ca akārāgamaṃ sabbesu purisesu sabbesu vacanesu labbhāmānampi sāsane aniyataṃ hutvā labbhātīti daṭṭhabbaṃ. Tathā hi “agacchi, gacchi, agacchissā, gacchissā”’tiādīnā dve dve rūpāni dissanti. Gamati, gamanti. Gamatu, gamantu. Gameyya. Gameyyūṃ. Sesam sabbaṃ vitthāretabbaṃ.

Idāni parokkhāhiyyattanajjatanīsu viseso vuccate – so puriso maggaṃ ga, sā itthī ghara’ māga. Te maggaṃ gu, tā ghara’ māgu. Ekārassa akārādesam tvaṃ maggaṃ ga, tvaṃ ghara’ māga. Tumhe maggaṃ guttha, tumhe ghara’ māguttha. Ahaṃ maggaṃ gam, ahaṃ ghara’ māgam. Ahaṃ tam purisaṃ anvagam, mayaṃ maggaṃ gumha, mayaṃ gharaṃ āgumha, mayaṃ tam purisaṃ anvagumha. Ayaṃ tāva parokkhāya viseso.

“So maggaṃ agamā, te maggaṃ agamū” iccādi hiyyattaniyā rūpaṃ. “So agami, te agamuṃ, te guṃ” iccādi ajjataniyā rūpaṃ.

Idāni tesam padarūpāni pākāṭikaraṇatthaṃ kiñci suttaṃ kathayāma – “sopāgā samitiṃ vanaṃ. Athettha pañcama āgā. Āguṃ devā yasassino. Māhaṃ kākova dummedho, kāmānaṃ vasamanvagaṃ. Agamā rājagahaṃ buddho. Vañkaṃ agamu pabbataṃ. Brāhmaṇā upagacchu ma”nti evamādāni bhavanti.

Ga gu ga guttha gaṃ gumha, agu agamu agamuṃ;
Agamā’gami gacchanti, ādibhedaṃ mane kare.

Idāni nāmikapadāni vuccante – gato, gantā, gacchaṃ, gacchantī, gacchantam kulaṃ, sahaṅgataṃ, gati, gamanaṃ, gamo, āgamo, avagamo, gantabbaṃ, gamanīyaṃ, gammaṃ, gammamānaṃ, gamiyamānaṃ, go, mātugāmo, hiṅgu, jagu, indagū, medhago iccādāni, kārite – gacchāpeti, gacchāpayati, gaccheti, gacchayati, gammeti. Kamme – gammati, gamiyati, adhigammati, adhigamiyati. **Tumantāditte** “gantum, gamitum, gantvā, gantvāna, gamitvā, gamitvāna, gamiya, gamiyāna, gamma, āgamma, āgantvā, adhigamma, adhigantvā” iccādāni. **Sappadhātussa** pana “sappo, sappinī, pīṭhasappī, sappi” iccādāni rūpāni bhavanti.

Tattha **sahagata**saddo tabbhāve vokiṇṇe nissaye ārammaṇe saṃsaṭṭheti imesu atthesu dissati. Tattha “yāyaṃ taṇhā ponobbhavikā nandirāgasahagatā”ti tabbhāve veditabbo, nandirāgabhūtāti attho. “Yāyaṃ bhikkhave vīmaṃsā kosajjasahagatā kosajjasampayuttā”ti vokiṇṇe veditabbo, antarantarā uppajjamānena kosajjena vokiṇṇāti ayamettha attho. “Aṭṭhikasāññāsahagataṃ satisambojjhaṅgaṃ bhāvetī”ti nissaye veditabbo, aṭṭhikasāññaṃ nissāya aṭṭhikasāññaṃ bhāvetvā paṭiladdhanti attho. “Lābhī hoti rūpasahagatānaṃ vā samāpatṭīnaṃ arūpasahagatānaṃ vā”ti ārammaṇe, rūpārūpārammaṇānanti attho. “Idaṃ sukhaṃ imāya pītiyā sahaṅgataṃ sahaṅgataṃ sampayutta”nti saṃsaṭṭhe, imissā pītiyā saṃsaṭṭhanti attho. Etthetaṃ vuccati –

Tabbhāve ceva vokiṇṇe, nissayārammaṇesu ca;
Saṃsaṭṭhe ca **sahagata**-saddo dissati pañcasu;

Gatīti gatigati nibbattigabhi ajjhāsayaṅgati vibhavagati nipphattigati nāṇagatīti bahuvadhā gati nāma.

Tattha “taṃ gatiṃ pecca gacchāmī”ti ca “yassa gatiṃ na jānanti, devā gandhabbamānusa”ti ca ayaṃ **gatigatināma**. “Imesaṃ kho ahaṃ bhikkhūnaṃ sīlavantānaṃ neva jānāmi gatiṃvā agatiṃvā”ti ayaṃ **nibbattigati** nāma. “Evaṃ kho te ahaṃ brahme gatiṃca jānāmi jutiṃca jānāmī”ti ayaṃ **ajjhāsayaṅgati** nāma. “Vibhavo gati dhammānaṃ, nibbānaṃ arahato gatī”ti ayaṃ **vibhavagati** nāma. “Dve gatiyo bhavanti anaññā”ti ayaṃ **nipphattigati** nāma. “Taṃ tattha gatiṃ dhibhimā”ti ca “sundaraṃ nibbānaṃ gato”ti ca ayaṃ **nāṇagati** nāma. Etthetaṃ vuccati –

Gatigatyaṅga nibbatyaṃ, vibhavajjhāsayaṅga ca;
Nipphattiyaṅga nāṇa ca, **gatisaddo** pavattati.

Gacchatīti **go**. Mātuyā samabhāvaṃ missībhāvaṅga gacchati pāpuṇātīti **mātugāmo**. Rogam hiṃsantaṃ gacchatīti **hiṅgu**.

Imāni tassa nāmāni

Hiṅgu hiṅgujatuceva, tathā hiṅgusipāṭikā;
Hiṅgujātīti kathitā, **vinayaṭṭhakathāya** hi.

Jagūti cutito jātiṃ gacchatīti jagu. Indriyena gacchatīti **indagū**. Atha vā indabhūtena kammunā gacchatīti **indagu**. “Hindagu”tipi pālī. Tattha **hindanti** maraṇaṃ. Taṃ gacchatīti **hindagu**.

Sabbametaṃ sattādhivacanaṃ, liṅgato pulliṅgaṃ. **Medhagoti** attano nissayañca parañca medhamāno hiṃsamāno gacchati pavattatīti medhago, kalaho. “Tato sammanti medhagā”ti ettha hi kalaho **medhagasaddena** bhagavatā vutto. Gamitvāti ettha –

“Isivhayaṃ gamitvāna, vinitvā pañcavaggiye;
Tato vinesi bhagavā, gantvā gantvā tahiṃ tahi”nti

Ayaṃ pāli nidassanaṃ. **Sappoti** sappatīti sappo, saṃsappanto gacchatīti attho. Tenāha āyasmā sārīputto “yo kāme parivajjeti, sappasseva padāsiro”ti imissā **pāliyā** niddese “**sappo** vuccati ahi. Kenatthena sappo? Saṃsappanto gacchatīti **sappo**. Bhujanto gacchatīti **bhujago**. Urena gacchatīti **urago**. Pannasiro gacchatīti **pannago**. Sarīrena sappatīti **sarisapo**. Bile sayatīti **bilāsayo**. Dāṭhā tassa āvudhoti **dāṭhāvudho**. Viṣaṃ tassaghoranti **ghoraviso**. Jivhā tassa duvidhāti **dujivho**. Dvīhi jivhāhi rasaṃ sāyatīti **dvirasaññū**”ti. **Sappinīti** uragī. **Pīṭhasappīti** pīṭhena sappati gacchatīti **pīṭhasappī**, paṅguḷo. **Sappīti** yo na paribhuñjati, tassa balāyuvaddhanatthaṃ sappati gacchati pavattatīti **sappī**, ghatam.

Sakka ṭeka laṅgha gatyattā. Sakkati, nisakkati, parisakkati. Nisakko, parisakkanam. Ṭekati. Ṭikā. Laṅghati, ullaṅghati, olaṅghati, laṅghako, ullaṅghikā pīti.

Ke re ge sadde. Kāyati. Rāyati. Gāyati. Jātakam. Rā. Gītam. Kāyitum. Rāyitum, gāyitum. Kāyitvā. Rāyitvā. Gāyitvā.

Tattha **jātakanti** jātam bhūtam atītam attano caritam kāyati katheti bhagavā etenāti jātakam. Jātakapāli hi idha jātakanti vuttam. Aññatra pana jātam evam jātakanti gahetabbā. Tathā hi **jātakasaddo** pariyattiyampi vattati “itivuttakam jātakam abbhutadhamma”ntiādīsu, jātiyampi vattati “jātakam samodhānesī”tiādīsu. **Rā** vuccati saddo. **Gītanti** gāyanam.

Khe je se khaye. Khāyati. Jāyati. Sāyati. Khayam gacchatīti attho.

Ettha pana siyā “nanu ca bho **khāyatīti** padassa khādatīti vā paññāyatīti vā attho bhavati, tathā **jāyatīti** padassa nibbattatīti attho, **sāyatīti** padassa rasaṃ assādetīti attho, evam sante bho kasmā idha evam attho tumhehi kathiyatī”ti? Saccam, dhātūnantu anekatthattā evam attho kathetum labbhati. Tathā hi “appassutāyam puriso, balibaddova jīratī”ti ettha **jīratīti** ayam saddo jaram paṇuṇatīti attham avatvā vaḍḍhatīti atthameva vadati, evam sampadamidaṃ daṭṭhabbam.

Gu ghu ku u sadde. Gavati. Ghavati. Kavati. Avati.

Khu ru ku sadde. Khoti. Roti. Koti.

Cu ju pu plu gā se gatiyam. Cavati. Javati. Pavati. Plavati. Gāti. Seti. Cavanam, cuti. Javanam, javo. Pavanam, plavanam. Gānam. Setu. Poto. Plavo.

Ettha **gānanti** gamanam. **Pototi** pavati gacchati udake etenāti poto, nāvā. Tathā plavati na sīdatīti **plavo**, nāvā eva. “Bhinnaplavo sāgarasseva majjhe”ti hi **jātakapāli** dissati. “Nāvā, poto, plavo, jalayānam, taraṇa”nti nāvābhidhānāni.

Dhe the saddasaṅghātesu. Dhāyati. Thāyati. Bhāve – dhiyati, thiyati. Itthī. Thī.

De te pālāne. Dāyati. Dayā. Tānam.

Rā lā ādāne. Rāti. Lāti.

Ati adi bandhane. Antati. Andati. Antam. Andu.

Jutasubha ruca dittiyaṃ. Jotati. Sobhati. Rocati, virocati.

Aka aga kuṭilāyaṃ gatiyaṃ. Akati. Agati.

Nātha nādha yācanopatāpissariyāsīsāsu. Nāthati. Nādhati.

Sala hula cala kampane. Salati. Hulati. Calati. Kusalaṃ.

Ettha ca kucchite pāpake dhamme salayatīti **kusalaṃ**, hetukattuvasenidaṃ nibbacanaṃ daṭṭhabbaṃ. Tathā hi **aṭṭhasālīniyaṃ** “kucchite pāpake dhamme salayanti calayanti kampaṇṭi viddhaṃsentīti kusalā”ti hetukattuvaseṇa attho kathito. Idaṃ **saladhātuvasena kusalasaddassa** nibbacanaṃ. Aññesampi dhātūnaṃ vaseṇa **kusalasaddassa** nibbacanaṃ bhavati. Tathā hi **aṭṭhasālīniyaṃ** aññānīpi nibbacanāni dassitāni. Kathaṃ? “Kucchitena vā ākāreṇa sayantīti kusā, te akusaladhammasaṅkhāte kuse lunanti chindantīti **kusalā**. Kucchitānaṃ vā sānato tanukaraṇato ñāṇaṃ kusaṃ nāma, tena kusena lātabbāti **kusalā**, gahetabbā pavattetabbāti attho. Yathā vā kusā ubhayabhāgagataṃ hatthappadesaṃ lunanti, evamimepi uppannānuppannabhāveṇa ubhayabhāgagataṃ kilesapakkhaṃ lunanti, tasmā kusā viya lunantītipi **kusalā**”ti. Evaṃ aññānīpi nibbacanāni dassitāni. Tatra “dhammā” iti padāpekkhaṃ katvā tadanurūpalingavacanaṇasena “kusalā”ti niddeso kato, idha pana sāmāññaniddesavasena “kusala”nti napuṃsakekavacananiddeso amhehi kato. Puññavācako hi **kusalasaddo** ārogyavācako ca ekantena napuṃsakalingo, itarathavācako pana tilīngiko, yathā kusalo phasso, kusalā vedanā. Kusalaṃ cittanti. **Kusalasaddo** imasmiṃ **bhūvādigaṇe lādhātusaladhātuvasena** nipphattiṃ gatoti veditabbo. Iti **bhūvādigaṇe** samodhānagatadhātuyo samattā.

Icevaṃ –

Vitthārato ca saṅkhepā, **bhūvādīnaṃ** gaṇo mayā;
Yo vibhatto sauddeso, saniddeso yathārahaṃ.

Upasagganipātehi, nānāatthayutehi ca;
Yojetvāna padānettha, dassitāni visuṃ visuṃ.

Pāḷinidassanādīhi, dassitāni saheva tu;
Tyādyantāni ca rūpāni, **syānyantāni** ca sabbaso.

Padānaṃ sadisattañca, tathā visadisattanaṃ;
Codanāparihārehi, sahito catthanicchayo.

Atthuddhāro’bhīdhānañca, līngattayavimissanaṃ;
Abhidheyyakalīngesu, savisesapadāni ca.

Nānāpadabahuppada-samodhānañca dassitaṃ;
Rūḷhīsaddādayo ceva, suvibhattā anākulā.

Sabbanāmaṃ sabbanāma-sadisāni padāni ca;
Nānāpadehi yojetuṃ, dassitāni yathārahaṃ.

Tumantāni ca rūpāni, **tvādyantāni** ca viññūnaṃ;
Piṭake pāṭavattāya, sabbametaṃ pakāsitaṃ.

Ye saddanītimhi imaṃ vibhāgaṃ,
Jānanti sammā munisāsane te;
Atthesu sabbesupi vītakaṅkhā,
Acchambhino sīhasamā bhavanti.

Vibhūtabhutaggasayambhucakke,
Subhūtabhūriṃ vadatā narānaṃ;
Yo saddanītimhi **bhuvādikaṇḍo**,
Vutto mayā taṃ bhajathatthakāmo.

Iti navāṅge sātthakathe piṭakattaye byappathagatūsu viññūnaṃ

Kosallatthāya kate saddanītipparāṇe

Pannarasahi paricchedehi maṇḍito **bhuvādigaṇo** nāma

Soḷasamo paricchedo.

17. Rudhādichakka

Rudhādigaṇika

Ito paraṃ pavakkhāmi, **rudhādikagaṇādayo**;
Sāsanassopakārāya, gaṇe tu chabbidhe kathaṃ.

Rudhi āvaraṇe. Rudhidhātu āvaraṇe vattati. Ettha **āvaraṇaṃ** nāma pidhanaṃ vā parirundhanaṃ vā palibuddhanaṃ vā harituṃ vā appadānaṃ, sabbametaṃ vaṭṭati. Rundhati, rundhiti, rundhīti, rundheti, avarundheti. Kammani – maggo purisena rundhiyati. Rodho, orodho, virodho, paṭivirodho, viruddho, paṭiviruddho, pariruddho. Rundhituṃ, parirundhituṃ. Rundhitvā. Parirundhitvā.

Tatra **rodhoti** cārako. So hi rundhati pavesitānaṃ kurūrakammantānaṃ sattānaṃ gamanaṃ āvaratīti **rodhoti** vuccati. **Orodhoti** rājubbarī, sā pana yathākāmacāraṃ carituṃ appadānena orundhiyati avarundhiyatīti **orodho**. **Virodhoti** ananukūlatā. **Paṭivirodhoti** punappunaṃ ananukūlatā. **Viruddhoti** virodhaṃ āpanno. **Paṭiviruddhoti** paṭisattubhāvena virodhaṃ āpanno. **Pariruddhoti** gahaṇatthāya samparivārito. Vuttañhi ‘yathā arīhi pariruddho, vijjante gamane pathe’ ti. **Avaruddhoti** pabbājito.

Muca mocane. Migamaṃ bandhanā muñcati. Muñcanaṃ, mocanaṃ. Dukkappamocanaṃ, moco.

Mocoti cettha aṭṭhikakadalīrukkho. Muñcituṃ. Muñcivā. Kārite ‘moceti, mocetuṃ, mocetvā’ tiādīni.

Rica virecane. Riñcati. Riñcanaṃ, virecanaṃ, vireko, virecako. Riñcituṃ. Riñcivā.

Sica paggharaṇe. Udakena bhūmiṃ siñcati. Puttaṃ rajje abhisiñci. Abhiseko. Muddhābhisitto khattiyo. Siñca bhikkhu imaṃ nāvaṃ, sittā te lahumessati. Sittatṭhānaṃ. Siñcituṃ. Siñcivā.

Yuja yoge. Yuñjati, anuyuñjati. Kammani ‘yuñjiyatī’ ti rūpāni. Keci ‘yuñjate’ ti icchanti. Yuñjanaṃ, saṃyogo, anuyogo, bhāvanānuyutto, saññogo, saññojanaṃ, atthayojanā. Dīghamaṃ santassa yojanaṃ. Yuñjituṃ, anuyuñjituṃ. Anuyuñjivā. Yojeti. Tattha **saṃyojananti** bandhanaṃ kāmarāgādi. **Yojananti** –

Vidatthi dvādasaṅgulyo, tadvayaṃ ratanaṃ matamaṃ;
Sattaratanikā yaṭṭhi, usabhaṃ vīsayaṭṭhikaṃ;
Gāvutaṃ usabhāsīti, yojanaṃ catugāvutaṃ.

Bhuja pālanabyavaharaṇesu. Pālanamaṃ rakkhaṇamaṃ. **Byavaharaṇamaṃ** ajjhoharaṇamaṃ. Bhuñjati,

paribhuñjati, sam̐bhuñjati. Dāsaparibhogena paribhuñji. Kārite “bhojeti bhojayatī” tiādīni rūpāni. Bhojanam, sambhogo, mahibhujo, gāmabhojako, upabhogo, paribhogo. Bhutto odano bhavatā. Sace bhutto bhavyeyāham. Odanam bhutto bhuttavā bhuttāvī. Tumantāditte “bhuñjituṃ, paribhuñjituṃ, bhojetuṃ, bhojayituṃ, bhuñjivā, bhuñjivāna, bhuñjiya, bhuñjiyāna, bhojetvā, bhojetvāna, bhojayitvā, bhojayitvāna” iccādīni **parisaddādīhi visesitabbāni**.

Tatra **bhuñjatīti** bhattam bhuñjati, bhojanīyam bhuñjati. Tathā hi “khādanīyam vā bhojanīyam vā khādati vā bhuñjati vā” tiādi vuttam. Apica kadāci khādanīyepi “bhuñjatī” ti vohāro dissati. “Phalāni khuddakappāni, bhuñja rāja varāvara” nti hi vuttam. **Paribhuñjatīti** cīvaram paribhuñjati, piṇḍapātam paribhuñjati, gilānapaccayabhesajjarikkhāram paribhuñjati, paṭisevatīti vuttam hoti. Teneva ca **paṭisevatīti** paribhuñjatīti attho samvaṇṇiyati. Apica “kāme bhuñjatī” ti ca “pañcakāmaguṇe paribhuñjatī” ti ca dassanato pana **bhuñjanaparibhuñjanasaddā** paṭisevanatthena katthaci samānatthāpi hontīti avagantabbā. **Sam̐bhuñjatīti** sambhogam karoti, ekato vāsam karotīti attho. Ettha siyā “nanu ca bho atra **bhujadhātu** pālanavyavaharaṇesu vutto, so katham ettakesupi atthesu vattatī” ti? Vattateva, anekatthā hi dhātavo, te upasaggasahāye labhitvāpi anekatthatarāva honti. Ito paṭṭhāya **tumantādīni rūpāni** na vakkhāma. Yattha pana viseso dissati, tattha vakkhāma.

Kati chedane. Kantati, vikantati. Sallakatto.

Bhidi vidāraṇe. Bhindati. Anāgatatthe vattabbe “bhejjissati, bhindissatī” ti dvidhā bhavanti rūpāni. Pāpake akusale dhamme bhindatīti **bhikkhu**. Tenāha –

“Na tena bhikkhu so hoti, yāvatā bhikkhate pare;
Visam dhammam samādāya, bhikkhu hoti na tāvatā.

Yodha puññaṇca pāpaṇca, bāhitvā brahmacariyam;
Saṅkhāya loke caratī, save ‘bhikkhū’ ti vuccatī’ ti.

Idaṇca khīṇāsavam sandhāya vuttam, sekkhaputhujjanasamaṇāpi yathāsambhavam “bhikkhū” ti vattabbatam pāpuṇantiyeva. Saṅgham bhindatīti **saṅghabhedako**. Devadattena saṅgho bhinno,. Bhindiyatīti **bhinnoti** hi nibbacanam. Na te kaṭṭhāni bhinnāni. Bhindatīti **bhettā**.

Chidi dvedhākarāṇe. Chindatīti **chedako**, evam chettā. Kese chettum vaṭṭati. Chindiyatīti **chinno**. Chinnopi rukkho punadeva rūhati. Idam pana **bhidichidivayam divādigaṇam** patvā “bhijjati chijjati” ti suddhakattuvācakaṃ rūpadvayam janeti, tasmā “bhijjatīti **bhinno**” tiādīnaṃ suddhakattuvasenapi nibbacanam kātabbam.

Tadi hiṃsānādaesu. Tandati. Tandī, taddu. **Taddati** kacchu.

Udi pasavakiledanesu. Pasavanam sandanam. Kiledanam tindatā. Undati. Undūro, samuddo.

Vida lābhe. Vindati. Govindo, vitti. Ettha **vittīti** anubhavanam, vedanā vā.

Vida tuṭṭhiyam. Vindati, nibbindati. Nibbindanam. Virajjati. Nibbindo kāmaratiyā. Vitti, vittam, vedo. Labhati atthavedam dhammavedam.

Ettha **vittīti** somanassam. “Vitti hi mam vindati suta disvā” ti hi vuttam. **Vittanti** vittijananattā vittasāṅkhātam dhanam. **Vedoti** ganthopi ñāṇampi somanassampi vuccati. “Tiṇṇam vedānam pārāgū” tiādīsu hi gantho “vedo” ti vuccati. “Brāhmaṇam vedagumabhijaññā akiñcanam kāmabhavasaṭṭa” tiādīsu ñāṇam. “Ye vedajātā vicaranti loke” tiādīsu somanassam.

Vedaganthe ca ñāṇe ca, somanasse ca vattati;
Vedasaddo imam nānā-dhātuto samudīraye.

Lipa limpane. Limpati, limpako. Avalepo. **Avalepoti** ahankāro.

Lupa acchedane. Lumpati. Vilumpako, vilutto vilopo.

Vilumpateva puriso, yāvassa upakappati;
Yadā caññe vilumpanti, so vilutto vilumpatīti.

Pisa cuṇṇane. Piṃsati. Pisako. Pisuṇā vācā. **Āgamaṭṭhakathāyaṃ** pana “attano piyabhāvaṃ parassa ca suññabhāvaṃ yāya vācāya bhāsati, sā pisuṇā vācā”ti vuttam, tam niruttillakkhaṇena vuttanti daṭṭhabbam.

Hisi vihiṃsāyaṃ. Hiṃsati, vihiṃsati. Hiṃsako.

Ahiṃsakoti me nāmaṃ, hiṃsakassa pure sato;
Ajjāhaṃ saccanāmomhi, na naṃ hiṃsāmi kiñcanaṃ.

Hiṃsitabbam kiṃsatīti **siho**. Ādiantakkharavipallāsavasena saddasiddhi, yathā “kantanaṭṭhena takka”nti. Vihesako, vihesanaṃ.

Sumbha pahāre. Yo no gāvova sumbhati. Parisumbhati. Sumbhoti. Atrime pālito payogā –

“Saṃsumbhamānā attānaṃ, kālamāgamayāmase”ti ca,

“Kesaggahaṇamukkhepā, bhūmyā ca parisumbhanā;
Datvā ca no pakkamati, bahudukkham anappaka”nti ca,

“Bhūmiṃ sumbhāmi vegasā”ti ca.

Aññattha pana aññāpi vuttā. Tā idha anupapattito na vuttā. Kecettha maññeyyūṃ, yathā **bhūvādigaṇe** “**saki saṅkāyaṃ khaji gativekalle**”tiādīnaṃ dhātūnaṃ paṭiladdhavaggantabhāvassa niggahītāgamassa vasena “saṅkati khañjati”ti rūpāni bhavanti, tathā imasmiṃ **rudhādigaṇe** “**muca mocane kati chedane**”tiādīnaṃ dhātūnaṃ paṭiladdhavaggantabhāvassa niggahītāgamassa vasena “muñcati kantati”tiādīni rūpāni bhavanti. Evaṃ sante ko imesaṃ tesaṅca visesoti? Ettha vuccate – ye **bhūvādigaṇasmiṃ** anekassarā asaṃyogantā ikārantavasena niddiṭṭhā, te ākhyātattaṅca nāmikattaṅca patvā suddhakattuhetukattuvisayesu ekantato niggahītāgamena nipphannarūpā bhavanti, na katthacipi tesam vinā niggahītāgamena rūpappavatti dissati. Tam yathā? Saṅkati, saṅkā, khañjati, khañjo iccādi. Ayaṃ anekassarānaṃ ikārantavasena niddiṭṭhānaṃ **bhūvādigaṇikānaṃ** viseso.

Ye ca **rudhādigaṇasmiṃ** anekassarā asaṃyogantvā akārantavasena vā ukārantavasena vā niddiṭṭhā, te ākhyātattam patvā suddhakattuvisayeyeva ekantato niggahītāgamena nipphannarūpā bhavanti, na hetukattuvisaye. Nāmikattam pana sahaniggahītāgamena vinā ca niggahītāgamena nipphannarūpā bhavanti. Yattha vinā niggahītāgamena nipphannarūpā, tattha sasamyo garūpāyeva bhavanti. Tam yathā? Muñcati, muñcāpeti, moceti, mocāpeti. Chindāpeti. Chedeti, chedāpeti. Chindanaṃ, chedo. Muñcanaṃ, mocanaṃ. Kantati, kantanaṃ, sallakatto. Piṭṭhimaṃsāni attano, sāmam ukkacca khādasi iccādīni. Tattha **ukkaccāti** ukkantivā, chinditvāti attho.

Nanu ca bho evaṃ sante ākhyātanāmikabhāvaṃ patvā suddhakattuhetukattuvisayesu ekantato paṭiladdhaniggahītāgamehi **saki khaji** ādīhiyeva **rudhādigaṇikehi** bhavitabbam, na pana **mucachidi**ādīhīti? Tanna, **mucachidi**ādīhiyeva **rudhādigaṇikehi** bhavitabbam **rucadhātuyā** samānagatikattā, tathā hi yathā “rundhissa, rundhayati, rundhāpeti, rundhanaṃ, rodho, virodho”tiādīsu niggahītāgamāniggahītāgamavasena dvippakārāni rūpāni dissanti, tathā **mucachidi**ādīnampīti.

Nanu **kaccāyane** niggahītāgamassa niccavidhānattham ‘‘rudhādito niggahītāpubbañcā’’ti lakkhaṇam vuttanti? Saccam, tam pana kriyāpadattam sandhāya vuttam. Yadi ca nāmikapadattampi sandhāya vuttam bhaveyya, ‘‘virodho’’tiādīnam dassanato vāsaddam pakkhipitvā vattabham siyā, na ca vāsaddam pakkhipitvā vuttam, tena ñāyati kriyāpadattamyeva sandhāya vuttanti.

Nanu ca bho evam sante **sakikhajjādīnam** niccam saniggahītāgamakriyāpadattamyeva sandhāya ‘‘rudhādito niggahītāpubbañcā’’ti idaṃ vuttanti sakkā mantunti? Na sakkā, **sakikhajjādīnam rudhadhātuyā** asamānagatikattā nāmikatte dvippakārassa asambhavato. Tathā hi yesam yā nāmikatte niggahītāgamāniggahītāgamavasena dvippakāravantatā, sā eva tesam **rudhādigaṇabhāvassa** lakkhaṇam. Tañca **sakikhajjādīnam** natthi. ‘‘Saṅkā khañjo’’tiādīnā hi nāmatte ekoyeva pakāro dissati saniggahītāgamō, ‘‘**kamu padavikkhepe**’’iccādīnam pana ‘‘kamo, kamanam, caṅkamo, caṅkamana’’ntiādīnā nāmikatte dvippakāravantatāsambhavepi niggahītāgamassa abbhāsavisaye pavattatā sā dvippakāravantatā **rudhādigaṇabhāvassa** lakkhaṇam na hoti, tasmā abbhāsavisaye pavattam niggahītāgamam vajjetvā yā dvippakāravantatā, sāyeva **rudhādigaṇabhāvassa** lakkhaṇanti sannitthānam kātabbam. Ayam nayo atīva sukhumo sammā manasi kātabbo.

Rudhādī ettakā diṭṭhā, dhātavo me yathābalaṃ;
Suttessaññepi pekkhitvā, gaṇhavho atthayuttitoti.

Dudhādigaṇoyam.

Divādigaṇika

Divu kīlavijigisābyavahārajutithutikantigatisattisu. Ettha ca **kīlā**ti laṇā, vihāro vā. **Laṇā**ti ca laṭitānubhavanavasena ramaṇam. **Vihāro** iriyāpathaparivattanādīnā vattanam. **Vijigisā**ti vijayicchā. **Byavahāro**ti vohāro. **Jutī**ti sobhā. **Thutī**ti thomanā. **Kantī**ti kamanīyatā. **Gatī**ti gamanam. **Sattī**ti sāmattiyaṃ. Imesu atthesu **divudhātu** vattati. Dibbati. Devo. Devī. Devatā.

Ettha **devoti** tividhā devā sammutidevā upapattidevā visuddhidevāti. Tesu mahāsammatakālato paṭṭhāya lokena ‘‘devā’’ti sammatatā rājarājakumārādayo **sammutidevā** nāma. Devaloke upapannā **upapattidevā** nāma. Khīṇāsavā **visuddhidevā** nāma. Vuttampi cetam ‘‘sammutidevā nāma rājāno deviyo kumārā. Upapattidevā nāma bhummadeve upādāya taduttaridevā. Visuddhidevā nāma buddhaccekabuddhakhīṇāsavā’’ti.

Idam panettha nibbacanam – dibbanti kāmagaṇajhānābhīññācittissariyādīhi kīlanti, tesu vā viharantīti **devā**. Dibbanti yathābhilāsitaṃ visayaṃ appaṭighātena gacchantīti **devā**. Dibbanti yathicchitanipphādane sakkontīti **devā**. Atha vā taṃtaṃbyasananītharaṇatthikehi saraṇam parāyaṇanti devanīyā abhitthavanīyāti **devā**. Sobhāvisesayogena kamanīyāti vā **devā**.

Ettha ca **thutikanti** atthā kamasādhanavasena daṭṭhabbā, **kīlā**dayo cha atthā kattusādhanavasena. Keci pana ‘‘divu kīlavijigisābyavahārajutithutigatīsū’’ti paṭhanti. Keci ‘‘gatī’’ti padaṃ vihāya ‘‘jutithutīsū’’ti paṭhanti. Keci ‘‘thutī’’ti padaṃ vihāya ‘‘jutigatīsū’’ti paṭhanti, keci pana **divudhātuṃ ‘‘sattithutika’’**ntiatthepi icchanti. Tenāha abhidhammassa **anuṭikākāro** ‘‘**devasaddo** yathā kīlavijigisāvohārajutigatiattho, evam sattiabhitthavakamanatthopi hoti dhātusaddānam anekatthabhāvato’’tiādi.

Idam pana yathāvuttesu sammutidevādīsū paccekam nibbacanam – dibbanti kīlanti attano visaye issariyam karontīti **devā**, rājāno. Dibbanti kīlanti pañcahi kāmagaṇehi, paṭipakkhe vā vijetum icchanti, voharanti ca lokassa yuttāyuttam, jotanti paramāya sarīrajutiyā, thomiyanti tabbhāvattihikehi, kāmiyanti daṭṭhum sotañca sobhāvisesayogena, gacchanti ca yathicchitaṭṭhānam appaṭihatagamanena, sakkontī ca ānubhāvasampattiyā taṃtaṃkiccam nipphādetuntī **devā**, cātumahārājikādayo. Kīlanti paramāya jhānakīlāya, vijetum icchanti paṭipakkham, paramasukhumaññānavisesavisayaṃ atthañca voharanti, jotanti sabbakilesadosakalusābhāvā

paramavisuddhāya ñāṇajutiyā, thomiyanti ca viññātasabhāvehi
paramanimmalaguṇavisesayogato, kāmiyanti ca anuttarapuññakkhetatāya daṭṭhuṃ sotuṃ pūjituṇca,
gacchanti ca amatamahānibbānaṃ apaccāgamaṇiyāya gatiyā, sakkonti ca cittācāraṃ ñatvā te te satte
hite niyojetuṃ amatamahānibbānasukhe ca paṭiṭṭhāpetunti **devā**, visuddhidevā.

Devasadda “viddhe vigatavalāhake deve” tiādīsu ajaṭākāse āgato. “Devo ca thokaṃ thokaṃ
phusāyati” tiādīsu meghe. “Ayañhi deva kumāro” tiādīsu khattiye. “Ahaṃ deva sakalajambudīpe
aññassa rañño santike kiñci bhayaṃ na passāmī” tiādīsu issarapuggale. “Pañcahi kāmaguṇehi
samappito samaṅgībhūto paricāreti devo maññe” tiādīsu upapattideve. “Devātidevaṃ
naradammasārathi” tiādīsu visuddhideve āgato.

Devīti rājabhariyāpi devadhītāpi “devī” ti vuccati. Devassa bhariyāti hi devī, sāpi atthato
“dibbatīti devī” ti vattabbā, yathā “bhikkhatīti bhikkhunī” ti. Tathā hi vuttaṃ
vimānavatthuaṭṭhakathāyaṃ “dibbati attano puññiddhiyā kīlatīti devī” ti.

Devatāti devaputtopi brahmāpi devadhītāpi. “Atha kho aññatarā devatā abhikkantāya ruttiyā
abhikkantavaṇṇā” tiādīsu hi devaputto “devatā” ti vutto “devoyeva devatā” ti katvā, tathā “tā devatā
sattasatā uḷārā, brahmā vimānā abhinikkhamitvā” tiādīsu brahmāno.

“Abhikkantena vaṇṇena, yā tvaṃ tiṭṭhasi devate;
Obhāsenti disā sabbā, osadhī viya tārakā” ti-

Ādīsu devadhītā.

Imāni upapattidevānaṃ nāmāni –

Devo suro ca vibudho, nijjaro amaro maru;
Sudhāsī tidaso sagga-vāsī animisopi ca;
Divoko’ matapāyī ca, saggaṭṭho devatāni ca.

Khi khaye. Khiyati. Khayo. Khiyanam. Rāgakkhayo.

Khi nivāse kodhahiṃsāsu ca. Khiyati. Na gacchasi yamakkhayaṃ. Nāgadānena khiyanti.

Tattha **khiyatīti** nivasati. **Yamakkhayananti** yamanivesanaṃ. **Khiyantīti** kujjhanti hiṃsanti vā.

Ghā gandhopādāne. Ghāyatīti **ghānaṃ**. Ghānena gandhaṃ ghāyituṃ ghāyitvā.

Ruca rocane. Rocanaṃ ruci. Bhattaṃ me rucati. Bhattampitassa na rucati. Pabbajjā mama
rucati. Ruccituṃ, ruccitvā. Keci pana imasmiṃ **divādigaṇe** “**ruca dittimhī**” ti paṭhanti. Taṃ na
yuttaṃ katthaciṇi dittisañkhātasobhanatthavācākassa **rucadhātuno** “ruccatī” ti rūpābhāvato. Tasmā
evaṃ sallakkhetabbaṃ, dittirucīnaṃ vācako **rucadhātu** bhuvādigaṇiko. Tassa hi “rocati, virocati.
Ekattamuparocita” nti rūpāniyeva bhavanti, na “ruccatī” ti rūpaṃ. Ruciyāyeva vācako pana
divādigaṇikopi hoti **curādigaṇikopi**. Tassa hi **divādigaṇikakāle** “gamaṇaṃ mayhaṃ rucati” ti
rūpaṃ. **Curādigaṇikakāle** “kiṃ nu jātiṃ na rocesi” ti rūpaṃ. Āpubbo ce ācikkhane vattati, “āroceti,
ārocayati” ti rūpāni dissanti.

Muca mukkhe. Dukkhatto muccati. Saddhāya adhimuccati. Mutti, vimutti, adhimutti,
muccamāno.

Uca samavāye. Uccati. Oko, ukā, ukkā.

Okoti udakampi āvāsopi. “Okapuññehi cīvarehī” ti ca, “vārijova thale khitto,
okamokatamubbhato” ti cettha payogo. **Ūkāti** sīse nibbattakimiviseso.

Ukkāti dīpikādayo vuccanti. “Ukkāsu dhāriyamānāsū”ti hi āgataṭṭhāne dīpikā “ukkā”ti vuccati. “Ukkaṃ bandheyya, ukkaṃ bandhitvā, ukkā mukhaṃ ālimpeyyā”ti āgataṭṭhāne āṅgārakapallaṃ. “Kammārānaṃ yathā ukkā, anto jhāyati no bahī”ti āgataṭṭhāne kammāruddhanaṃ. “Evaṃ vipāko ukkāpāto bhavissati”ti āgataṭṭhāne vātavego “ukkā”ti vuccati. “Saṅḍāsena jātarūpaṃ gahetvā ukkā mukhe pakkhipeyyā”ti āgataṭṭhāne suvaṇṇakārānaṃ mūsā “ukkā”ti veditabbā. Icevaṃ –

Dīpikāvātavegesu, kammārānañca uddhane;
Mūsāyampi ca āṅgāra-kapalle cāti pañcasu;
Visayesu panetesu, **ukkāsaddo** pavattati;

Che chedane. Chiyati, chiyanti. Avacchitaṃ, avacchātaṃ. Chetvāna moḷiṃ varagandhavāsitaṃ.

Saja saṅge. Saṅgo laganam. Sajjati. Sajjanaṃ, sajjito, satto.

Yuja samādhimhi. Samādhānaṃ **samādhi**, kāyakammādīnaṃ sammāpayogavasena avippakiṇṇatāti attho. Yujjati. Yogo, yogī.

Ettha **yogoti** vīriyaṃ. Tañhi –

“Vāyameve puriso, na nibbindeyya paṇḍito;
Passāmi vo’ha’ mattānaṃ, yathā icchiṃ tathā ahu’nti

Vacanato avassaṃ kātuṃ yujjati upapajjati **yogoti** vuccati.

Ranja rāge. Rajjati. Virajjati. Rajjamāno, rajjaṃ, rajjanto, rāgo, virāgo, rajjanaṃ, virajjanaṃ, rajaniyaṃ. Upasaggavasena añño attho bhavati. Samhā raṭṭhā nirajjati, attano raṭṭhā niggacchatīti attho.

Tattha **virāgoti** virajjanti ettha saṃkilesadhammāti virāgo, nibbānaṃ maggo ca.

Vijī bhayacalanesu. Vijjati, saṃvijjati. Saṃvego, saṃvejanīyaṃ. Ubbijjati. Ubbego, ubbiggahadayo.

Luja vināse. Lujjati **loko.** Lopo, lutti, lujjanaṃ, lutto.

Ṭhā gatinivattiyam. Ṭhāyati. Ṭhāyī, ṭhiti, ṭhānaṃ, ṭhito, tatraṭṭho, tiṭṭhaṃ, kappatṭhāyī, āsabhatṭhānaṭṭhāyī.

“Sukhaṃ sayāmi ṭhāyāmi, sukhaṃ kappemi jīvitam;
Ahatthapāso mārassa, aho satthānukampako”ti

Pāli nidassanaṃ. Lāpaṃ gocaraṭṭhāyinanti ca. Tattha **ṭhāyāmīti** tiṭṭhāmi.

Ḍigatiyam. Ḍiyati. Ḍemāno. Ḍino vā. “Ucce sakuṇa ḍemāna, pattayāna vihaṅgama. Vajjesi kho tvaṃ vāmūru”nti nidassanaṃ.

Ettha ḍiyatīti **ḍemānoti** nibbanaṃ gahetabbam.

Tā pālāne. Tāyati. Aghassa tātā. So nūna kapaṇo tāto, ciraṃ rujjati assame. Tānaṃ, parittaṃ, gottam. Tvaṃ khosi upāsaka katakalyāṇo katabhīrutāṇo.

Tatra **parittanti** mahātejavantatāya samantato sattānaṃ bhayaṃ upaddavaṃ upasaggañca tāyati rakkhatīti parittaṃ, gaṃ tāyatīti **gottam.**

Nata gattavināme. Gattavināmo gattavikkhepo. Naccati. Naccam. Nigaṇṭho nāṭaputto.

Dā sodhane. Dāyati. Dānaṃ. Anuyogadāpanattham. Anuyogaṃ datvā. Dānaṃ datvā.

Dā supane. Dāyati. Niddāyati. Niddāyanam, niddāyamāno, niddāyanto.

Dādāne. Puriso dānaṃ dāyati. Āpubbo gahaṇe. Adinnaṃ ādiyati. Sīlaṃ samādiyati. Kamme – purisena dānaṃ dīyati, adinnaṃ ādiyati. Kārite – ādapeti, samādapeti, ādapayati, samādapayati, ye dhammamevādapayanti santo.

Dā avakhaṇḍane. Diyati, diyanti. Parittam.

Ettha ca **parittanti** samantato khaṇḍitattā parittam. Appamattakañhi gomayapiṇḍam **parittanti** vuccati. Tasmā **parittanti** appakassa nāmaṃ kāmāvacarassa ca dhammassa appesakkhattā.

Dā suddhiyaṃ. Dāyati. Vodāyati. Vodānaṃ. Akammakoyaṃ dhātu. Tathā hi “vodāyati sujjhāti etenāti **vodānaṃ**, samathavipassanā”ti **nettisaṃvaṇṇanāyaṃ** vuttam.

Dī khaye. Dīyate. Dīno, ādīnavo.

Tatra dīnoti parikkhīṇañātidhanādībhāvena dukkhito. **Ādīnavoti**ādīnaṃ dukkhaṃ vāti adhigacchati etenātiādīnavo, doso.

Du paritāpe. Duyate. Duno, dūto.

Bhidi bhijjane. Bhijjanadhammaṃ bhijjati. Bhijjatīti bhinno. Bhijjanaṃ bhedo.

Chidi chijjane. Suttaṃ chijjati. Chijjatīti chinno. Evaṃ chiddam. Chijjanaṃ chedo.

Khidi dīniye. Dīnabhāvo **dīniyaṃ**, yathā dakkhiyaṃ. Khijjati, khinno, akhinnamati, khedo, khedaṅgato lokahitāya nātho.

Ettha **khedaṅgoti** kāyikadukkhasaṅkhātāṃ parissamaṃ patto, dukkhamanubhavīti attho.

Pada gatiyaṃ. Pajjati. Maggaṃ paṭipajjati. Paṭipattim paṭipajjati. Addhānamaggappaṭipanno hoti, phalasamāpattim samāpajjati. Āpattim āpajjati. Akammakampi bhavati, tesam adhammo āpajjati, pajjo, byagghapajjo, sampadāyo.

Ettha ca **pajjoti** maggo. Byagghapajje saddulapathe jātoti **byagghapajjo**, evaṃnāmako kulaputto. Sampadiyati nāpiyati dhammo etenāti **sampadāyo**, akkhātā.

Vida sattāyaṃ. Sattā vijjamānākāro. Vijjati, saṃvijjati. Jātavedo, vijjā, avijjā, vidito.

Tattha **jātavedoti** aggi. So hi jātova vedayati dhūmajāluttāhānena paññāyati, tasmā **jātavedoti** vuccati. **Vijjāti** dhammānaṃ sabhāvaṃ viditaṃ karotīti vijjā, ñāṇaṃ. **Avijjāti** khandhānaṃ rāsaṭṭhaṃ, āyatanānaṃ āyatanatṭhaṃ, dhātūnaṃ suññatṭhaṃ, saccānaṃ tathaṭṭhaṃ, indriyānaṃ adhipatiyaṭṭhaṃ aviditaṃ karotīti avijjā. Dukkhadīnaṃ pīlanādivasena vuttam catubbidham attham aviditaṃ karotīti **avijjā**, moho.

Mada ummāde. Ummādo nāma muyha naṃ vā sativippavāso vā cittavikkhepo vā. Majjati, pamajjati. Matto, surāmadamatto. Matto ahaṃ mahārāja. Puttamamsāni khādayim. Mattahatthī, pamatto, ummatto.

Appamādo amataṃ padaṃ, pamādo maccuno padaṃ;

Appamattā na miyyanti, ye pamattā yathā matā.

Mida sinehane. Mejjati. Mettā, metti, mittam, mitto.

Antaradhā adassane. **Antarapubbo dhādhātu** vijjamānassa vatthuno adassane vattati. Antaradhāyati. Antaradhānaṃ, antaradhāyanto. Sā devatā antarahitā. Antarāpidhāyati.

Budha avagamane. **Avagamanam** jānanaṃ. Bujjhati, buddho, buddhi, buddham, bodho, bodhi. Bujjhita saccāni. Sakalam buddho, buddhavā, vibodheti, bodhetā, buddho, vibuddho iccādīni.

Tatra buddhoti bujjhitā saccānīti buddho, bodhetā pajāyāti **buddho**. Atha vā pāramitāparibhāvitāya paññāya sabbampi ñeyyaṃ abujjhīti **buddho**. Keci pana kammenapi **buddhasaddassa** siddham icchantā evaṃ nibbanaṃ karonti “sammāsambuddho vata so bhagavāti adhigataguṇavisesehi khīṇāsavehi bujjhitabboti buddho”ti. Vitthāro pana **niddese** vuttanayena gahetabbo. Buddhīti bujjhatīti **buddhi**. Evaṃ **buddham bodho bodhi** ca. Atha vā bujjhanaṃ **buddhi**. Evaṃ **bodho bodhi** ca, sabbametam paññāyādhivacanaṃ.

Idāni **bodhisaddassa** atthuddhāraṃ vadāma. **Bodhīti** hi rukkhopi maggopi sabbaññutaññānampi nibbānampi evaṃpaṇṇattiko puggalopi vuccati, tathā hi “bodhirukkhamaṃle paṭhamābhisambuddho”ti ca, “antarā ca bodhiṃ antarā ca gaya”nti ca āgataṭṭhāne rukkho bodhīti vuccati. “Catūsu maggesu ñāṇa”nti āgataṭṭhāne maggo. “Pappoti bodhiṃ varabhūri sumedhaso”ti āgataṭṭhāne sabbaññutaññānaṃ. “Patvāna bodhiṃ amataṃ asaṅkhata”nti āgataṭṭhāne nibbānaṃ. “Bodhi bhante rājakumāro bhagavato pāde sirasā vandati”ti “ariyasāvako bodhīti vuccati”ti ca āgataṭṭhāne evaṃpaṇṇattiko puggalo.

Atridaṃ vuccati –

Rukkhe magge ca nibbāne, ñāṇe sabbaññutāya ca;
Tathā paṇṇattiyañceva, **bodhisaddo** pavattati.

Bujjhatīti **bujjhita**, bodhetīti **bodhetā**.

Ettha ca koci payogo **tumantādīni** ca rūpāni vuccante – “guyhamatthamasambuddham, sambodhayati yo naro. Paraṃ sambuddhumarahati. Bujjhitaṃ, buddhum, bujjhitvā, bujjhitvāna, bujjhituna, buddhiya, buddhiyāna, buddhā, buddhāna” iti bhavanti.

Tatra **asambuddhanti** parehi aññātaṃ, “asambodha”ntipi pāṭho, paresaṃ bodhetuṃ ayuttanti attho. **Sambuddhanti** sambujjhitaṃ. **Buddhāti** bujjhitvā, evaṃ **buddhānāti** etthāpi.

Keci pana “**nāmarūpaparicchede** ‘bodhimaggena budhvā’ti ca, “budhvā bodhitale yamāha sugato”ti ca **dhakāravakārasaññogavato** padassa dassanato **tvāpaccayantabhāvato** ca **dhakāravakārasaṃyogavasena** “budhvā”ti padasiddhi icchitabbā”ti vadanti, tam tādissa padarūpassa buddhavacane adassanato ca, buddhavacanassa ananukūlatāya ca, parisuddhe ca porāṇapotthake **vakārasaṃyogavigatassa** “bodhimaggena buddhā”tica, “buddhā bodhitale”ti ca padassa dassanato na gahetabbaṃ. Tathā hi na tādiso pāṭho buddhavacanassa anukūlo hotīti. Na hi buddhavacane vassasatampi vassasahassampi pariyesantā tādissaṃ **vakāradhakārasaññogapadaṃ** passissanti. Evaṃ “budhvā”ti padarūpassa buddhavacanassa ananukūlatā daṭṭhabbā. Tañhi sakkāṭaganthe kataparicayabhāvena vañcītehi vidūhi icchitaṃ, na saddhammanītividūhi. Ettha imāni nidassanapadāni veditabbāni –

Ko maṃ viddhā nilīyati. Laddhā macco yadicchati. Laddhāna pubbāpariyaṃ visesaṃ, adassanaṃ maccurājassa gacche.

Ummānantimahaṃ diṭṭhā, āmukkamaṇikuṇḍalaṃ;

Na supāmi divārattim, sahasaṃva parājito”ti;

Tattha **viddhāti** vijjhivā. **Laddhāti** labhitvā. **Laddhānāti** labhitvāna. **Diṭṭhāti** disvā. Iti “viddhā laddhā laddhāna diṭṭhā”ti padāni **tvāpaccayena** saddhim gatānipi saññogavasena **vakārapaṭibaddhāni** na honti, tasmā “buddhā buddhāna” iccetanipi “laddhā laddhāna” iccādīni viya parihīnavakārasaññogāni eva gahetabbāni. Ye “budhvā”ti rūpaṃ icchanti paṭhanti ca, maññe te **tvāpaccayo** vañceti, tena te vañcanaṃ pāpuṇanti, tasmā tādisaṃ rūpaṃ aggahetvā yo saddanītiyaṃ saddavinicchayo vutto, soyeva āyasmantehi sārato paccetabbo.

Budha bodhane. Sakammakāmakamkoyam dhātu. Tathā hi bodhanasadduccāraṇena jānaṃ vikaṇaṃ niddakkhaya ca gahito, tasmā “**budha** ñāṇe, **budha** vikaṇe, **budha** niddakkhaye”ti vuttaṃ hoti. Bujjhati bhagavā, dhamme bujjhati, pabujjhati, padumaṃ bujjhati. Puriso buddho, pabuddho, bodhati, pabodhati iccādīni.

Samdhā sandhimhi. Saṃpubbo **dhādhātu** sandhimhi vattati. Nevassa maddī bhākuṭi, na sandhiyati na rodati. Na **sandhiyatīti** idaṃ aññehi pakaraṇehi asādhāraṇaṃ **divādirūpaṃ**.

Dhanu yācane. Mātā hi tava irandhati, vidharassa hadayaṃ dhaniyyati. Idampi asādhāraṇaṃ **divādirūpaṃ**.

Dhī anādare. Dhīyate. Dhīno.

Yudha sampahāre. Yujjhati. Yodho, yuddhaṃ, caraṇāyudho, **yakārassa vakārabhāve** “āvudha”nti rūpaṃ. Tatra **caraṇāyudhoti** kukkuṭo.

Kudha kope. Kujjhati. Kodho, kujjhanā, kujjhitattaṃ. Kuddho atthaṃ na jānāti, kuddho dhammaṃ na passati.

Sudha soceyye. **Soceyyaṃ** sucibhāvo. Sujjhati. Suddhi, visuddhi, sujjhanaṃ, suddho, visuddho, parisuddho. Kārite “sodheti, sodhako” iccādīni.

Sidhu saṃrādhane. Sijjhati. Siddhi.

Radha hiṃsāyaṃ. Rajjhati, virajjhati, aparajjhati. Aparādhho.

Rādha sādha saṃsiddhiyaṃ. Rādhayati, sādhayati. Ārādhanaṃ, sādhanam. Sappahitaṃ sādhetīti **sādhu**, sappuriso. Accantaṃ sādhetabbanti **sādhu**, laddhakaṃ sundaraṃ dānasīlādi.

Vidha vijjhane. Vijjhati. Paṭivijjhati. Khaṇa viddha, vidhu, vijjhanako, viddho, paṭividdho, vijjhanam, vedho, paṭivedho, vijjhivā, viddhā, viddhāna. Ko maṃ viddhā nilīyati.

Idha vuddhiyaṃ. Ijjhati, samijjhati. Iddhi, ijjhanaṃ, samijjhanaṃ, iddho. Tattha **iddhīti** ijjhanaṃ iddhi. Ijjhanti vā sattā etāya iddhā vuddhā ukkaṃsagatā hontīti **iddhi**.

Gidhu abhikaṅkhāyaṃ. Gijjhati, gijjho. Gaddho. Gaddhabādhpubbo. Kāmagiddho na jānāsi. Gedho.

Rudhi āvaraṇe. Rujjhati, virujjhati, paṭivirujjhati. Virodhako, viruddho. Rodho, virodho, paṭivirodho, anuvirodho.

Anuvidhā anukaraṇe. Anuvipubbo **dhādhātu** anukriyāyaṃ vattati. Puriso aññassa purisassa kriyaṃ anuvidhīyati tatrāyaṃ pāli –

Dūsito giridattena, hayo sāmassa paṇḍavo;

Porāṇaṃ pakatiṃ hitvā, tassevānuvidhīyatī’ ti.

Idampi asādhāraṇaṃ **divādirūpaṃ**.

Anurudha kāme. Kāmo icchā. **Anupubbo rudhadhātu** icchāyaṃ vattati. Anuruddho, anurodho. Anusmāti kiṃ virodho.

Tattha **anuruddhoti** anurujjhati paṇītaṃ paṇītaṃ vatthum kāmetīti anuruddho. **Anurodhoti** anukūlatā. Ayaṃ pāli “so uppannaṃ lābhaṃ anurujjhati, alābhe paṭivirujjhatī’ ti.

Byadha tāḷane. Byajjhati. Byādho. **Byādhoti** luddho. Taṃ taṃ migaṃ byajjhati tāḷeti hiṃsatīti **byādho**.

Gudha pariveṭhane. Gujjhati. Godhā.

Mana ñāṇe. Maññati, avamaññati, atimaññati. Seyyādivasena maññatīti **māno**. “Maññanā, maññitattaṃ, māno, ahaṅkāro, unnati, ketu, paggaho, avalepo’ ti pariyāyā.

Jana janane. Sakammakoyaṃ dhātu. “Jaññatī’ timassa rūpaṃ, karotīti attho. Kārite – janesi phussatī mamaṃ. Janayati, sukhaṃ janeti, janayatīti **janako**, pitā, yo koci vā nibbattetā. Puthu kilese janetīti **puthujjano**. Tattha “janeti janayatī’ ti rūpāni **curādigaṇaṃ** patvā suddhakatturūpāni bhavanti. Karotīti hi tesam attho. Hetukattuvasenapi tadattho vattabbo “nibbattetī’ ti.

Janī pātubhāve. Īkārantoyaṃ akammako dhātu, **vipubbo** ce, sakammako. Putto jāyati, jāto. Puthu kilesā jāyanti etthāti **puthujjano**. Jananaṃ jāti, “sañjāti, nibbatti, abhinibbatti, khandhānaṃ pātubhāvo’ ti pariyāyā. Itthī puttam vijāyati, itthī puttam vijātā. So puriso vijātamātuyāpi amanāpo. Upavijaññā itthī. Kārite “jāpeti, jāpayati. Atthajāpikā paññā’ ti rūpāni.

Hana hiṃsāyaṃ. Idha **hiṃsā**vacanena ghaṭṭanaṃ gahetabbaṃ. Saddo sotamhi haññati. Paṭihaññati. Buddhassa bhagavato vohāro lokile sote paṭihaññati. Imāni kattupadāni. **Bhūvādigaṇaṃ** pana patvā “lohena ve haññati jātārūpaṃ, na jātārūpena hananti loha’ nti **pāḷiyaṃ** “haññatī’ ti padaṃ kamma padaṃ, jātārūpaṃ lohena kammārehi haññatīti attho. “Hanantī’ ti padaṃ kattupadaṃ, lohaṃ jātārūpena kammārā hanantīti hi attho. Ettha **hananaṃ** paharaṇanti gahetabbaṃ.

Rūpa ruppāne. Ruppānaṃ kuppanaṃ ghaṭṭanaṃ pīḷanaṃ. Ruppāti. Rūpaṃ, ruppānaṃ. Imassa pana “**rūpa** rūpakriyāya’ nti **curādigaṇe** ṭhitassa “rūpeti rūpayatī’ ti rūpāni bhavanti.

Tattha **rūpanti** kenatthena rūpaṃ? Ruppānatthena rūpaṃ. Vuttañhetam bhagavatā “kiñca bhikkhave rūpaṃ? Ruppātīti kho bhikkhave tasmā ‘rūpa’ nti vuccati. Kena ruppāti? Sītenapi ruppāti, uñhenapi ruppāti, jighacchāyapi ruppāti, pipāsāyapi ruppāti, ḍaṃsamakasavātātapasarīsapasamphassenapi ruppāti, ruppātīti kho bhikkhave tasmā ‘rupa’ nti vuccatī’ ti.

Tattha **ruppātīti** kuppāti ghaṭṭiyati pīḷiyati, bhijjatīti attho. **Bhijjatīti** vikāraṃ āpajjati, vikārāpatti ca sītādisannipāte visadisarūpappavattiyeva. Ettha ca **kuppātīti** etena kattuatthe rūpapadasiddhiṃ dasseti, **ghaṭṭiyati pīḷiyatīti** etehi kammātthe. Kopādikriyāyeva hi ruppānakriyāti, so pana kattubhūto kammabhūto ca attho bhijjamāno nāma hotīti imassa atthassa dassanattam **“bhijjatīti attho’ ti** vuttam.

Atha vā **ruppātīti rūpanti** kammakattutthe rūpapadasiddhi vuttā. Vikāro hi ruppānanti vuccati, teneva **bhijjatīti atthoti** kammakattutthena **bhijjatīti** saddena attham dasseti. Tattha yadā kammātthe “ruppātī’ ti padaṃ, tadā “sītenā’ tiādi kattuatthe karaṇavacanaṃ. Yadā pana “ruppātī’ ti padaṃ kattuatthe kammakattuatthe vā, tadā hetumhi karaṇavacanaṃ daṭṭhabbaṃ.

Rūpasaddo khandha bhava nimitta paccaya sarīra vaṇṇasaṅṭhānādīsu atthesu vattati. Ayañhi “yaṃ kiñci rūpaṃ atītānāgatapaccuppanna”nti ettha rūpakkhandhe vattati. “Rūpūpapattiyā maggaṃ bhāveti”ti ettha rūpabhava. “Ajjhattaṃ arūpasaññī bahiddhārūpāni passaṭi”ti ettha kasiṇanimitte. “Sarūpā bhikkhave uppajjanti pāpakā akusalā dhammā, no arūpā”ti ettha paccaye. “Ākāso parivārito rūpantveva saṅkhaṃ gacchati”ti ettha sarīre. “Cakkhuñca paṭicca rūpe ca uppajjati cakkhuvīññāṇa”nti ettha vaṇṇe. “Rūpappamāṇo rūpappasanno”ti ettha saṅṭhāne. Icevaṃ –

Khandhe bhava nimitte ca, sarīre paccayepi ca;
Vaṇṇe saṅṭhānādimhi, **rūpasaddo** pavattati.

Kupa kope. Kupati. Kuppanti vātassapi eritassa. Kopo, pakopo. Vacīpakopaṃ rakkheyya.

Tapa santāpe. Tappati, santappati. Santāpo.

Tapa pīṇane. Tappati. Tappanaṃ.

Dapa hāse. Dappati.

Dīpa dittiyaṃ. Dippiati. Dīpo.

Lupa adassane. Luppanaṃ, lopo, lutti.

Khīpa peraṇe. Khippati. Khippaṃ.

Lubha giddhiyaṃ. Lubbhati. Attanoyeva jaṇṇukaṃ olubba tiṭṭhati. Lubbhanāṃ, lobho, lubbhivā, lubbhivāna, lubbhiya, lubbhiyāna, olubbhivā, olubbhivāna, olubbhiya, olubbhiyāna, lubbhituṃ, olubbhituṃ.

Tattha **lobhoti** lubbhanti tena sattā, sayāṃ vā lubbhati, lubbhanamattameva vā tanti lobho. Ettha pana “lobho lubbhanā lubbhittamaṃ rāgo taṇhā tasiṇā mucchā eja vanaṃ vanatho” iccādīni lobhassa bahunāmāni veditabbāni.

Khubha sañcalane. Khubbhati, saṃkhubbhati. Khubbhitthanagaraṃ. Saṅkhobho. Kārite – khobheti, khobhayati.

Samu upasame. Cittaṃ sammati, upasammati, vūpasammati, samaṇo, santi, santo.

Ettha **samaṇoti** sammati santacitto bhavati samaṇo. Kāritavasena pana kilese sameti upasametīti **samaṇoti** nibbacaṇaṃ daṭṭhabbaṃ. Tathā hi “yaṃ sametīti idaṃ ariyaṃ. Samayaṭṭidha sattāna”nti dve kāritarūpāni.

Samu khede nirodhe ca. Khedo. Kilamanaṃ. **Nirodho** abhāvagamaṇaṃ. Addhānamaggappaṭipannassa kāyo sammati. Aggi sammati. Santo.

Santasaddo “dīghaṃ santassa yojana”ntiādīsu kilantabhāve āgato. “Ayañca vitakko ayañca vicāro santā honti samitā”tiādīsu niruddhabhāve. “Adhigato kho myāyaṃ dhammo gambhīro duddaso duranubodho santo paṇīto”tiādīsu santaññāgocaratāyaṃ. “Upasantassa sadā satīmato”tiādīsu kilesavūpasame. “Santo have sabbhi pavedayanti”tiādīsu sādhusu. “Pañcime bhikkhave mahācorā santo saṃvijjamaṇā”tiādīsu atthibhāve. Etthetaṃ vuccati –

“Kilantatte niruddhatte, santadhīgocarattane;
Kilesūpasame ceva, atthibhāve ca sādhusu;
Imesu chasu ṭhānesu, **santasaddo** panāgato”ti.

Damu damane. Dammati. Danto, damo, damanaṃ. Kārite “cittaṃ dameti, damayati”ti rūpāni.

Tattha **damoti** indriyaṣaṃvarādīnaṃ etaṃ nāmaṃ. “Saccena danto damasā upeto. Vedantaḡ vusitabrahmacariyo”ti ettha hi indriyaṣaṃvaro “damo”ti vutto. “Yadi saccā damā cāgā, khantiyā bhīyodha vijjati”ti ettha paññā “damo”ti vuttā. “Dānena damena saṃyamena saccavajjena”ti ettha uposathakammaṃ “damo”ti vuttaṃ. “Damupasamenā”ti ettha khanti “damo”ti vuttā. Iccevaṃ –

“Indriyaṣaṃvaro paññā, khanti cāpi uposatho;
Ime atthā pavuccanti, **damasaddena** sāsane”ti.

Yā gatipāpuṇesu. Yāyati, yāyanti. Pariyāyo. Yāyamāno mahārājā, addā sīdantare nage. Yāyanto. Yāyantamanuyāyati. Yātānuyāyī. Yāyituṃ, yāyitvā iccādīni.

Ettha **pariyāyasaddassa** atthuddhāro vuccate, **pariyāyasaddo** vāradesanākāraṇesu samantato gantabbaṭṭhāne ca sadise ca vattati. “Kassa nu kho ānanda ajja pariyāyo bhikkhuniyo ovaditu”ntiādīsu hi vāre vattati. “Madhupiṇḍikapariyāyotinaṃ dhārehī”tiādīsu desanāyaṃ. “Imināpi kho te rājañña pariyāyena evaṃ hotū”tiādīsu kāraṇe. “Pariyāyapatho”tiādīsu samantato gantabbaṭṭhāne. “**Kopasaddo** khobhapariyāyo”tiādīsu sadise vattati. Iccevaṃ –

Pariyāyaravo vāra-desanākāraṇesu ca;
Samantatova gantabba-ṭṭhāne ca sadise siyā.

Ri vasane. Riyati.

Vilī vilīnabhāve. Sappi vilīyati. Kārite vilāpayati.

Vā gatigandhanesu. Vāyati. Vāyo, vāto.

Sivu tantasantāne. Sibbati, saṃsibbati. Sibbaṃ, sabbanto. Kārite – sibbeti, sabbayati, sabbāpeti, sabbāpayati.

Sivu gatisosanesu. Sibbati.

Dhivu khivu nidassane. Dhibbati. Khibbati.

Sā tanukaraṇe. Siyati, siyanti.

Sā antakammani. Siyati anavasesato mānaṃ siyati samucchindatīti aggamaggo **mānasanti** hi vuttaṃ.

Sā assādane. Rasaṃ sāyati. Sāyitaṃ, sāyanāṃ.

Si pāṇippasave. Sūyati, pasūyati. Pasūtā gāvī.

Kusu haraṇadittīsu. Kusayati.

Silisa āliṅgane. Silissati. Silesa.

Kilisa upatāpe. Kilissati, saṃkilissati. Kilesa, saṃkilesa. Ikāralope klissati kleso iccādīni. Apica malīnatāpi **kilisasaddena** vuccati, kiliṭṭhavatthaṃ paridahati. “Cittena saṃkiliṭṭhena, saṃkilissanti māṇavā”tiādīsu dhātūnaṃ anekatthāyā.

Masa appībhāve khamāyaṅca. Massati.

Līsa appībhāve. Lissati. Leso. “Lisa lesane”’tipi paṭhanti ācariyā.

Tasa pipāsāyaṃ. Tassati, paritassati. Paritassanā, tasiṇā, tasito.

Dusa dosane. Dussati. Doso, dosanaṃ, dosito.

Dusa appītiyaṃ. Dussati, padussati. Doso, padoso, duṭṭho, paduṭṭho, dūsako, dūsito, dūsanā.

Asu khepe. Khepo khipanaṃ. Assati. Nirassatiādiyati ca dhammaṃ. Issāso.

Ettha ca **nirassatīti** chaḍḍeti sathhāraṃ tathā dhammakkhānādīni. **Issāsoti** usum assati khipatīti issāso, dhanuggaho.

Yasu payatane. Yassati. Niyasakammaṃ.

Ettha ca yena vinayakammena “nissāya te vatthabba”’nti niyassiyati bhajāpiyatīti niyaso bālaṃ, taṃ niyasakammaṃ nāma. “Karoḥi me yakkha niyasakamma”’nti ettha pana niggahakammaṃ niyasakammaṃ nāma.

Bhassa bhassane. Bhassati. Bhassaṃ, bhassakārako.

Vasa sadde. Sakuṇo vassati. Adhamo migajātānaṃ, siṅgālo tāta vassati. Maṇḍūko vassati.

Nasa adassane. Nassanadhammaṃ nassati. Panassati. Vinassati. Nassa vasali, cara pire vinassa. Naṭṭho, vinaṭṭho. Kārite – nāseti, nāsayati.

Susa sosane. Paṇṇaṃ sussati. Kārite – vāto paṇṇaṃ soseti, sosayati. Kamme – vātena paṇṇaṃ sosiyati. Bhāve kriyāpadamappasiddhaṃ. Soso, sukkhaṃ kaṭṭhaṃ. Sussaṃ, sussanto. Sussamāno dahado.

Tusa tuṭṭhiyaṃ. Tussati, santussati. Santuṭṭhi, santoso, tosanāṃ, tuṭṭhabbaṃ, tussitabbaṃ, tusitā. Kārite “toseṭi”’ iccādīni.

Hā parihāniyaṃ. Hāyati, parihāyati. Hāyanti tattha vaḷavā. Bhāve “bhayaṃ vā chambhitattaṃ vā lomahaṃso vā, so pahīyissatī”’ti ca “rāgo pahīyatī”’ti ca rūpaṃ. Kamme kriyāpadamappasiddhaṃ. “Rāgo pahīyatī”’ti idaṃ pana “**hā** cāge”’ti vuttassa **bhūvādi**gaṇikadhātussa rūpaṃ “rāgaṃ pajahatī”’ti kattupadassa dassanato.

Naha bandhane. Nayhati. Upanayhati. Sannayhati. Sannāho. Sannaddho.

Muha vecitte. Muyhati, sammuyhati, pamuyhati. Moho, pamoho. Mūḷho. Momūho puriso. Momūhaṃ cittaṃ. Kārite – moheti. Pamohako. Ettha ca **momūhoti** avisadatāya momūho, mahāmūḷhoti attho.

Saha suha sattiyaṃ. Sayhati. Suyhati.

Nhā soceyye. Nhāyati, appakkharānaṃ bahubhāve nahāyati. Nahāyitvā, nhāyitvā. Nahānaṃ, nhānaṃ. Sīsaṃ nhāto. Ettha ca **sīsaṃ nhātoti** sīsaṃ dhovitvā nhātoti attho gahetabbo porāṇehi anumattā.

Siniha pītiyaṃ. Siniyati. Sinehako, sinehito, siniddho. Putte sineho ajāyatha. Ikāralopena sneho. Tathā hi “nisnehamabhikaṅkhāmī”’ti pāḷi dissati.

Virīla lajjāyaṃ codane ca. Virīlito. Lajjāvasena attho pasiddho, na codanāvasena. Tathā hi

“**virilitoti** lajjito”ti atthasamvaṇṇakā garū vadanti “lajjanākārappatto”ti ca.

Divādī ettakā diṭṭhā, dhātavo me yathābalaṃ;
Suttasvañṇepi pekkhitvā, gaṇhavho atthayuttitoti.

Divādigaṇoyam.

Svādigaṇika

Su savane. “Suṇoti, suṇāti. Suṇiṃsu. Paṭissuṇi, paṭissuṇiṃsu. Assosi, assosum. Paccassosi, paccassosum” iccādīni, “suṇissati, sossati” iccādīni ca bhavanti. Abbhāsavisaye “sussūsati, sussūsā” iccādīni. Anabbhāsavisaye – sāvako, soto, suṇaṃ, suṇanto, suṇamāno, suyyamāno, savanaṃ, sutam. Asuyitthāti vā sutam. Sutavā, sotam, soṇo, suṇitum, sotum. Suṇitvā, suṇiya, suṇiyāna, sutvā, sutvāna. Kārite – sāvetai, sāvayati. Kamme – saddo suyyati, sūyati ca. Bhāve padarūpamappasiddham.

Tattha **sāvakoti** antevāsiko, so duvidho āgatapphalo anāgatapphalo ca, tattha āgatapphalo savanante ariyāya jātiyā jātoti “sāvako”ti vuccati, itaro garūnaṃ ovādaṃ suṇātīti “sāvako”ti. Sāvako, antevāsiko, sissoti pariyāyā.

Ettha **sutasaddassa** atthuddhāraṃ vadāma saddhiṃ **sotasaddassa** atthuddhārena. **Sutasaddo** saupasaggo anupasaggo ca anupapadena, **sutasaddo** ca –

Gamane vissute tinte, niyogo’pacitepi ca;
Sadde ca sotadvārānu-sārañātesu dissati.

Tathā hi “senāya pasuto”tiādīsu gacchantoti attho. “Sutadhammassa passato”tiādīsu vissutadhammassāti attho. “Avassutā avassutassa purisapuggalassā”tiādīsu tintassāti attho. “Ye jhānappasutā dhīrā”tiādīsu anuyuttāti attho. “Tumhehi puññaṃ pasutaṃ anappaka”ntiādīsu upacitanti attho. “Diṭṭham sutam mutaṃ viññāta”ntiādīsu saddoti attho. “Bahussuto hoti sutadharo sutasannicayo”tiādīsu sotadvārānusāraviññātadhammadharoti attho.

Sotasaddopi anekathappabhedo. Tathā hesa –

Maṃsaviññāṇaṇṇesu, taṇhādīsu ca dissati;
Dhārāyam ariyamagge, cittasantatiyampi ca.

“Sotāyatanam, sotadhātu, sotindriya”ntiādīsu **sotasaddo** maṃsasote dissati, “sotena saddam sutvā”tiādīsu sotaviññāṇe. “Dibbāya sotadhātuyā”tiādīsu ṇāṇasote. “Yāni sotāni lokasminti, yāni etāni sotāni mayā kittitāni pakittitāni ācikkhitāni desitāni paññāpitāni paṭṭhapitāni vivaritāni vibhattāni uttānīkatāni pakāsītāni. Seyyathidaṃ? Taṇhāsoto diṭṭhisoto kilesasoto duccharitasoto avijjāsoto”tiādīsu pañcasu dhammesu. “Addasā kho bhagavā mahantaṃ dārukkhandham gaṅgāya nadiyā sotena vuyhamāna”ntiādīsu udakadhārāyam. “Ariyassetam āvuso aṭṭhaṅgikassa maggassa adhivacanaṃ, yadidaṃ soto”tiādīsu ariyamagge. “Purisassa ca viññāṇasotaṃ pajānāti ubhayato abbochinnam idhaloke patiṭṭhitaṇca paraloke patiṭṭhitaṇcā”tiādīsu cittasantatiyanti.

Soṇoti sunakho. So hi sāmikassa vacanaṃ suṇātīti soṇoti vuccati.

Imāni tadabhidhānāni –

Sunakho sārameyyo ca, suṇo sūno ca kukkuro;
Soṇo svāno suvāno ca, sāluro migadaṃsano.

Sā sunidhāti’me saddā, pumānesu pavattare;

Sunakhī kukkurī sī'ti, ime itthīsu vattare.

Sunakhā sārameyyāti, ādi bahuvaco pana;
Pavattati pumitthīsu, aññatrāpi ayam nayo;

Kukkuroti ayam tattha, bālakāle ravena ve;
Mahallakepi sunakhe, rūḷhiyā sampavattati.

Tathā hi aṭṭhakathācariyā **kukkurajātake** “ye kukkurā rājakulamhi vaḍḍhā, koleyyakā vaṇṇabalūpapannā” tiimasmimpadese evamatthaṃ vaṇṇayiṃsu “ye kukkurāti ye sunakhā. Yathā hi taruṇopi passāvo pūtimuttanti tadahuḷatopi siṅgālo “jarasiṅgālo” ti, komalāpi gaḷācīlatā ‘pūtilatā’ ti, suvaṇṇavaṇṇopi kāyo ‘pūtikāyo’ ti vuccati, evameva vassasatikopi sunakho ‘kukkuro’ ti vuccati, tasmā mahallakā kāyūpapannāpi te ‘kukkurā’ tveva vuttā’ ti.

Ki hiṃsāyam. Kiṇoti, kiṇāti, kiṇanti.

Saka sāmattiye. Samatthabhāvo **sāmattiyaṃ**, yathā dakkhiyaṃ. Sakkuṇāti, sakkuṇanti. Asakkhi. Sakkhissati. Sakko. Sakkī.

Ettha **sakkoti** devarājā. So hi parahitaṃ sakahitaṅca kātuṃ sakkuṇātīti sakko. Apica sakyakulajāto yo kocipi. Tathā hi “atha kho mahānāmo sakko” tiādi vuttaṃ. “Bhagavantaṅca piṅgiyo maṃ sakka samuddharāhīti ālapi. Sakyā vata bho kumārā paramasakyā vata bho kumārā” ti vacanamupādāya sabbepi sakyakule jātā “sakyā” ti ca “sākiyā” ti ca “sakkā” ti ca vuccanti. Ettha **svādittepi** anekassaradhātuto ekova uṇāpaccayo hoti, na ṇu ṇāpaccayāti daṭṭhabbaṃ.

Khī khaye. Khīṇoti. Khīṇāti. Khīṇā jāti. Khīṇo. Ayogā bhūrisaṅkhayo.

Ge sadde. Giṇoti, giṇāti.

Ci caye. Nakārassa **nakārattaṃ**. Pākāraṃ cinoti. Citaṃ kusalaṃ. Ceto puggalo.

Ru upatāpe. Ruṇoti, ruṇāti.

Rādha sādha saṃsiddhiyaṃ. Rādhuṇāti. Sādhuṇāti. Rādhanam. Ārādhanam. Sādhanam.

Pī pītiyaṃ. Pīṇoti, pīṇāti. Pīti, piyo.

Apa pāpuṇe sambhu ca. Pāpuṇoti, pāpuṇāti. Patto. Sabbaññutaṃ satthā patto. Sampatto yamasādhanam. Sambhuṇāti, na kiñci atthaṃ abhisambhuṇāti. Sambhuṇanto, abhisambhuṇamāno.

Tattha **pattoti pasaddo** upasaggo “pappotī” ti ettha **pasaddo** viya. Tathā hi “patto” ti ettha pāpuṇīti atthe **papubbassa apadhātussa pakāre** lutte **tapaccayassa** dvibhāvo bhavati. Tattha **na abhisambhuṇātīti** na sampāpuṇāti, na sādhetīti vuttaṃ hoti.

Khīpa khepe. Khipuṇāti. Khippaṃ. **Khippanti** macchapañjaro.

Āpa byāpane. Āpuṇāti. Āpo.

Mi pakkhepane. Minoti. Mitto.

Ettha ca sabbaguyhesu nimiyati pakkhipiyatīti **mitto**. “Mitto have sattapadena hotī” ti vacanaṃ pana vohārasena vuttaṃ, na atthavasena. Vuceyya ce, yo koci avissāsiko attano paṭiviruddhopi ca mitto nāma bhavēyya, na cevaṃ daṭṭhabbaṃ. Evaṅca pana daṭṭhabbaṃ “sattapadavīthīhāramattenapi saha gacchanto saha gacchantassa piyavācānicchāraṇena aññamaññaṃ ālāpasallāpakaraṇamattena

mitto nāma hotīti vattabbaṃ. Kimkāraṇā? Daḷhavissāso mitto nāma na bhavyeyāti mittassa guṇapasamsāvasena evaṃ vutta’nti.

Vu saṃvaraṇe. Vuṇoti, vuṇāti, saṃvuṇoti, saṃvuṇāti. Paṇḍito sīlasaṃvuto.

Su abhisave. Abhisavo nāma pīlanam manthanam sandhānam sinhānam vā. Suṇoti, suṇāti.

Si bandhane. Sinoti.

Si nisāne. Siṇoti, siṇāti. Nisitasattham.

Na hi nūnāyam sā khujjā, labhati jivhāya chedanam;
Sunisitena satthena, evam dubbhāsitam bhaṇam;

Ettha **bhaṇanti** bhaṇantī.

Vusa pāgabbiye. Pāgabbiyam nāma kāyavācāmanehi pagabbabhāvo. Vusuṇāti.

Asu byāpane. Asuṇāti. Assu.

Hi gatibuddhīsu upatāpe ca. Hinoti.

Ettha pana asamānantattepi samānatthānam samodhānam vuccati.

Tika tiga sagma dikkha kivi ciri jiri dāsa du himsāyam. Tikuṇāti. Tiguṇāti. Saguṇāti. Dikkhuṇāti. Kivuṇāti. Cīruṇāti. Jīruṇāti. Dāsuṇāti. Duṇoti, duṇātīti rūpāni himsāvācakāni bhavanti.

Suvādī ettakā diṭṭhā, dhātavo me yathābalaṃ;
Suttasvaññepi pekkhitvā, gaṇavho atthayuttito.

Svādigaṇoyam.

Kiyādigaṇika

Kī dabbavinimaye. Dabbavinimayo kayavikkayavasena bhaṇḍassa parivattanam. Kiṇāti, kiṇanti. Vikkiṇāti, vikkiṇanti. Ketuṃ, kiṇituṃ. Vikketuṃ, vikkiṇituṃ. Kiṇitvā, vikkiṇitvā. Kītam bhaṇḍam. Kayo, vikkayo. Vikkiṇeyya haneyya vā.

Khi gatiyam. Khiṇāti. Atikhiṇo saro. Kham, khāni. Nakārassa ṇakārattam.

Tattha **khiṇātīti** gacchati. **Atikhiṇoti** atigato. Atrāyam pāli “senti cāpātikhiṇāva, purāṇāni anutthuna”nti. Tattha **cāpātikhiṇā**’ti cāpato atikhiṇā atigatā. **Aṭṭhakathāyam** pana “**cāpātikhiṇāti** cāpato atikhiṇā cāpā vinimuttāti attho”’ti padatthavivaraṇam katham, tampi gatatthaññeva sandhāya adhippāyathavasena katanti daṭṭhabbam. Tatra **khanti** saggo. So hi katapuññehi gantabbattā “kha”nti vuccati. **Khānīti** saggā.

Ci caye. Puññaṃ cināti. Pākāram cināti. Pāramiyo vicināti, vicinati ca. Pupphaṃ ocināti, ocinati vā. Pacināti. Pacinitvā. Cītam kusalam. Cayo sañcayo. Cīto pākāro. Cinātīti ceto, iṭṭhakavaḍḍhakī. Yo satto puññañcayo. “Sañcayo rāsi samūho piṇḍo gaṇo saṅgho kadambo vaggio karo ghaṭā”’iccevamādayo pariyāyā.

Ji jaye. Jināti, vijināti, jiniyati. Jetā, jino. Jito māro. Māram jito. Jitavā, jitāvī, jītabbo, jeyyo, jayanam, jītam, vijītam, jayo, parājayanam, parājayo. Yassa jītam nāvajīyati. Jītamassa noyāti koci loke. Jayo hi buddhassa sirīmato ayam, māraṇsa ca pāpimato parājayo.

Tattha **jetāti** jinātīti jetā, yo koci puggalo. Ajinīti **jino**, sabbaññū dhammarājā. Kiṃ so ajini? Pāpake akusale dhamme mārādiarayo ca. Iti pāpake akusale dhamme mārādayo ca arayo ajinīti **jino**. Vuttampi cetaṃ –

“Mādisā ve jinā honti, ye pattā āsavakkhayaṃ;
Jitā me pāpakā dhammā, tasmāhaṃ upaka jino”ti,

“Tathāgato bhikkhave abhibhū anabhibhūto”ti ca.

Jinasaddo hi kevalo sabbaññumhi pavattati, sopapado pana paccekabuddhādīsu tamhi ca yathārahaṃ pavattati. “Paccekajino, odhijino, anodhijino, vipākajino, avipākajino”ti imānettha nidassanapādāni.

Ji jāniyaṃ. Jināti, na jināti na jāpaye, jino rathassaṃ maṇikuṇḍale ca, putte ca dāre ca tatheva jino. Jino dhañca dāse ca.

Ñā avabodhane. Jānāti, ñāyati, nāyati. Animittā na nāyare. Jaññā so yadi hāpaye. Mā maṃ jaññūti icchati. “Ime amhāka”nti ñātabbatthena ñāti, ñātako. Ñātimittā suhajjā ca. Ñātako no nisinnoti. Ñātabbaṃ ñeyyaṃ, saṅkhāravikāralakkhaṇanibbānapaññattidhammā. Īdisesu thānesu **ñeyyasaddo** ekantena napuṃsako, vāccaliṅgatte sabbaliṅgiko, yathā? Ñeyyo phasso. Ñeyyā vedanā. Ñeyyaṃ cittaṃ. Ñeyyo puriso, ñeyyā itthī, ñeyyaṃ dhananti ca.

Thu abhitthave. Thunāti. Abhitthunāti. Thuti, abhitthuti. Thavanā, abhitthavanā, thuto, abhitthuto.

Thu nitthunane. Thunāti.

Uṭṭhehi revate supāpadhamme,
Apārutadvāre adānasīle;
Nessāma taṃ yattha thunanti duggatā,
Samappitā nerayikā dukkhena;
Purāñāni anutthuna”nti ca payogo.

Du hiṃsāyaṃ. Dunāti. Mittaddu. Dumo.

Ettha **mittaddūti** mittam dunāti hiṃsati dubbhatīti mittaddu. Atra “vedā na tāṇāya bhavanti tassa, mittadduno bhūnahuno narassā”ti pāḷi nidassanaṃ. **Dumoti** duniyati gehasambhārādiatthāya hiṃsiyati chindiyati, paṇṇapupphādiatthikehi vā paṇṇapupphādiharaṇena pīḷiyatīti **dumo**.

Dhū kampane. Dhunāti. Dhūmo, dhonā, dhono, dhuto. Dhunanto vākacīrāni, gacchāmi ambare tadā.

Tattha **dhūmoti** dhunāti kampaṭīti dhūmo. **Dhūmasaddo** kodhe taṇhāya vitakke pañcasu kāmagaṇesu dhammadesanāyaṃ pakatidhūmeti imesu atthesu vattati. “Kodho dhūmo bhasmāni mosavajja”nti ettha hi kodhe vattati. “Icchā dhūmayito sadā”ti ettha taṇhāyaṃ. “Tena kho pana samayena aññataro bhikkhu bhagavato avidūre dhūmayanto nisinno hotī”ti ettha vitakke.

“Pañko ca kāmā palipo ca kāmā,
Bhayañca metaṃ timulaṃ pavuttaṃ;
Rajo ca dhūmo ca mayā pakāsito,
Hitvā tuvaṃ pabbaja brahmadattā”ti

Ettha pañcasu kāmagaṇesu. “Dhūmaṃ kattā hotī”ti ettha dhammadesanāyaṃ. “Dhajo rathassa paññāno, dhūmo paññānamaggino”ti ettha pakatidhūme. Icevaṃ –

Kodhataṇhāvitakkesu, pañcakāmaguṇesu ca;
Desanāyañca pakati-dhūme **dhūmo** pavattati.

Dhonāti paññā. Vuttañhetam **niddese** “dhonā vuccati paññā, yā paññā pajānanā sammādiṭṭhi, kiṃkāraṇā dhonāti vuccati paññā? Yaṃ tāya paññāya kāyaduccaritam dhutañca dhotañca sandhotañca niddhotañca, vacīduccaritam manoduccaritam dhutañca dhotañca sandhotañca niddhotañca. Taṃkāraṇā dhonā vuccati paññā. Atha vā sammādiṭṭhi micchādiṭṭhiṃ dhutā ca dhotā ca sandhotā ca niddhotā ca, taṃkāraṇā dhonā vuccati paññā”ti. “Dhonassa hi natthi kuhiñci loke, pakappitā diṭṭhi bhavābhavesū”ti ayamettha pāli nidassanaṃ. Atra dhonā assa atthīti dhono, tassa dhonassāti nibbanaṃ. Dhātūnamanekatthātāya **dhūdhātu** kampanatthepi dhovanatthepi vattati.

Muna ñāṇe. Munāti. Monam, muni. Imasmiṃ ṭhāne dhātuyā ākhyātatte ekantena antalopo bhavati. **Sobhitattheragāthāyaṃ** pana anāgatavacane ukārassa vuddhivasena “ahaṃ monena monissa”nti rūpantarañca dissati. Tattha **monissanti** jānissam. Nāmatte antalopo na hoti. Tattha monanti kiñcāpi “na monena muni hoti”ti ettha tuṅhībhāvo “mona”nti vuccati, tathāpi idha “ñāṇe”ti vacanato na so adhippeto, ñāṇamevādhippetam, tasmā moneyyapaṭipadāsāṅkhātam maggañāṇamonampi gahetabbaṃ. **Munīti** munāti jānāti hitāhitam paricchindatīti muni. Atha vā khandhādiloke tulaṃ āropetvā minanto viya “ime ajjhantikā khandhā, ime bāhirā”tiadinā nayena ime ubho atthe munātīti **muni**. Tenāha bhagavā –

“Na monena muni hoti, mūlharūpo aviddasu;
Yo ca tulaṃva paggayha, varamādāya paṇḍito.

Pāpāni parivajjeti, sa muni tena so muni;
Yo munāti ubho loke, muni tena pavuccati”ti.

Aparāpettha bhavati atthavibhāvanā. **Munīti** monam vuccati ñāṇam, kāyamoneyyādīsu vā aññataram, tena samannāgatattā puggalo “munī”ti vuccati. So panesa agāriyamuni anagāriyamuni sekkhamuni asekkhamuni paccekamuni munimunīti anekavidho. Tattha **agāriyamunīti** gihipi āgataphalo viññātasāsano. **Anagāriyamunīti** tathārūpova pabbajito. **Sekkhmunīti** satta sekkhā. **Asekkhamunīti** khīṇāsavo. **Paccekamunīti** paccekabuddho. **Munimunīti** sammāsambuddho. Tathā hi **āyasmāpi sārīputto** āha “munīti vuccati tathāgato araham sammāsambuddho”ti.

Pū pavane. Pavanaṃ sodhanaṃ. Punāti. Puññaṃ, putto, dantapoṇam.

Ettha ca **puññanti** attano kāraṃ punāti sodhetīti puññaṃ. Atha vā yattha sayam uppannam taṃsantānam punāti visodhetīti **puññaṃ**. Kintam? Sucaritam kusalakammaṃ. Sakammikattā dhātussa kāritavasena atthavivaraṇam labbhati. **Puttoti** attano kulaṃ punāti sodhetīti putto. Evañca satī hīnajaccānam caṇḍālādīnam putto nāma na bhavyeyāti na vattabbaṃ saddānamatthakathanassa nānappakārena pavattito, tasmā attano pitu hadayaṃ pūretīti puttoti evamādināpi nibbanaṃ gahetabbameva. Nānādhātuvasenapi hi padāni siddhiṃ samupagacchanti.

Putto ca nāma atrajo khetrajo antevāsiko dinnakoti catubbidho. Tattha attānam paṭicca jāto **atrajo** nāma. Sayanapīṭhe pallañke ureti evamādīsu nibbato **khetrajo** nāma. Santike sippuggaṇhanako **antevāsiko** nāma. Posāpanatthāya dinno **dinnako** nāma **dantapoṇanti** dante punanti visodhenti etenāti dantapoṇam, dantakaṭṭham.

Pi tappanakantīsu. Piṇātīti **pīti**. Ettha ca **pīti** piṇanam pīti, tappanam kantīti ca vuttam hoti. Idaṃ bhāvavasena nibbanaṃ. Idaṃ pana hetukattuvaseṇa piṇayatīti **pīti**, tappetīti attho.

Sā panesā khuddakāpīti khaṇikāpīti okkantikāpīti ubbegāpīti pharaṇāpīti pañcavidhā hoti. Tattha **khuddakāpīti** sarīre lomahaṃsanamattameva kātuṃ sakkoti. **Khaṇikāpīti** khaṇe khaṇe vijjuppādasadisā hoti. **Okkantikāpīti** samuddatīram vīci viya kāyam okkamitvā okkamitvā bhijjati. **Ubbegāpīti** balavatī hoti kāyam uddhagam katvā ākāse laṅghāpanappamāṇā hoti. **Pharaṇāpītiyā**

pana uppannāya sakalasarīraṃ dhamitvā pūritavatthi viya mahatā udakoghena pakkhandapabbatakucchi viya ca anuparipphuṭaṃ hoti, evaṃ pañcavidhā pīti, sā sampiyāyanalakkhaṇattā “piṇāti”ti pītīti suddhakattuvasenapi vattum yujjati. Ettha “piyāyati, pitā, piyo, pemo”tiādīni pīdhātuyā eva rūpāni. Tatha “puttaṃ piyāyatīti pitā”ti vadanti. Piyāyitabboti **piyo**. Pemaṇaṃ pemo.

Mā parimāṇe. Mināti. Mānaṃ, parimāṇaṃ, mattaṃ, mattā, mano, vimānaṃ, minitabbaṃ, metabbaṃ, chāyā metabbā. Īdisesu ṭhānesu **anīya**paccayo na labbhati.

Ettha **manoti** ekāya nāliya ekāya ca tulāya minamāno viya ārammaṇaṃ mināti paricchindatīti mano. Viseso miniyate paricchindiyateti **vimānaṃ**, devānaṃ puññabalena nibbattabyamaṃ devaniketamaṃ. Yaṃ vimānaṃ upasobhitaṃ, pabhāsatimidaṃ byamhanti ca ādinā thomyati.

Mī hiṃsāyaṃ. Mināti. Mīno, kumīnaṃ.

Ettha **mīnoti** maccho. Macchassa hi “mīno maccho ambujo vārijo vāricaro”ti anekāni nāmāni. Visesanāmāni pana “amaro khaliso candakulo kandaphali indaphali indavalo kuliso vāmi kuṅkotalo kaṇḍiko sakulo maṅguro siṅgī satavaṅko rohito pāṭhīno kāṇo savaṅko pāvuso” iccevamādīni, “timi timiṅgalo” iccevamādīni ca bhavanti. **Kumīnanti** kucchitenākārena macche minanti hiṃsanti etenāti kumīnaṃ, macchabandhanapañjaro. So pana pāliyaṃ **kumīna**saddena vuccati. Tathā hi –

“Vārijasseva me sato, bandhassa kumināmukhe;
Akkosati paharati, piye putte apassato”ti

Pāli dissati.

Mū bandhane. Munāti. Muni.

Ettha **munīti** attano cittaṃ munāti mavati bandhati rāgadosādivasaṃ gantuṃ na detīti muni.

Ri gatidesanesu. Rikāti. Reṇu. Nakārassa **ṇattaṃ**.

Lī silese. Lināti, nilināti. Līnaṃ, sallīnaṃ, paṭisallānaṃ.

Vī tantasantāne. Vatthaṃ vināti. Iminā suttana cīvaraṃ vināhi. Kamme – idaṃ kho āvuso cīvaraṃ maṃ uddissa viyyati. Vītaṃ. Suvītaṃ. Appakaṃ hoti vetabbaṃ. Kārite “vāyāpeti, tantavāyehi cīvaraṃ vāyāpessāmā”ti cīvaraṃ vāyāpesuṃ” iccevamādīni bhavanti.

Vī hiṃsāyaṃ. Vināti. Veṇu. **Veṇūti** vaṃso.

Lū chedane. Lunāti. Loṇaṃ, kusalaṃ, bālo, lūto.

Ettha ca **loṇanti** lunāti vītarasabhāvaṃ vināseti sarasabhāvaṃ karotīti loṇaṃ, lavaṇaṃ. Kuso viya hatthappadesaṃ akusaladhamme lunātīti **kusalaṃ**, anavajjaiṭṭhavipākalakkaṇo dhammo. Diṭṭhadhammikasamparāyike dve atthe lunātīti **bālo**, avidvā. **Lūtoti** makkaṭako vuccati. Tassa hi suttaṃ “lūtasutta”nti vadanti. Yūsaṃ pātuṃ paṭaṅgamakkhikādīnaṃ jīvitaṃ lunātīti **lūto**.

Si bandhane. Sināti. Sīmā, sīsaṃ.

Ettha **sīmāti** sinīyate samaggena saṅghena kammavācāya bandhiyateti sīmā. Sā duvidhā baddhasīmā abaddhasīmāti. Tāsu abaddhasīmā mariyādakaraṇavasena “sīmā”ti veditabbā. Sināti bandhati kese moḷikaraṇavasena etthāti sīsaṃ. Aññānīpi yojetabbāni.

Sā pāke. Sināti.

Su hiṃsāyaṃ. Suṇāti. Parasu. Paraṃ suṇanti hiṃsanti etenāti **parasu.**

Asa bhojane. Vuttānaṃ phalamasānāti. Asanaṃ.

Ettha **asananti** āhāro. So hi asiyati bhūñjīyatīti “asana”nti vuccati. “Asnātha khādatha pivathā”ti idamettha nidassanaṃ.

Kilisa vibādhane. Kilisnāti. Kilesa.

Ettha ca **kilesoti** rāgādayopi dukkhampi vuccati.

Uddhasa uñche. Uñcho pariyesanaṃ. Uddhasnāti.

Isa abhikkhaṇe. Isnāti.

Visa vippayoge. Visnāti. Visaṃ.

Pusa sinehasavanapūraṇesu. Pusnāti.

Pusa posane. Pusnāti.

Musa theyye. Musnāti. Musalo.

Kiyādī ettakā diṭṭhā, dhātavo me yathābalaṃ;
Suttasvaññepi pekkhitvā, gaṇhavho atthayuttito.

Sāsanā lokato cete,
Dassitā tesu lokato;
Sāsanassopakārāya,
Vuttā tadanurūpakā.

Kiyādigaṇoyaṃ.

Gahādigaṇika

Idāni **gahādigaṇo** vuccate. Ettheke evaṃ maññanti.

Gahādīnaṃ gaṇo nāma, paccekaṃ nupalabbhati;
Athameko **gahadhātu**, **gahādīnaṃ** gaṇo siyā.

Yato **ppañhā** parā heyyuṃ, dhātuto jinasāsane;
Tepi aññe na vijjanti, aññatra **gahadhātuyā**.

Iti cintāya ekacce, **gahadhātuṃ kiyādīnaṃ**;
Pakkhipiṃsu gaṇe evaṃ, na vadiṃsu **gahādikaṃ**.

Na tesam gahaṇaṃ dhīro, gaṇheyya suvicakkhaṇo;
Yato **kaccāyane** vutto, **gahādīnaṃ** gaṇo visuṃ.

“Gahādito ppañhā” iti, lakkhaṇaṃ vadatā hi so;
Kaccāyanena garunā, dassito nanu sāsane.

Sace visuṃ **gahādīnaṃ**, gaṇo nāma na labbhati;

Gahādīdīpake sutte, hitvāna bāhiraṃ idaṃ.

“Gahato ppaṇhā” icceva, vattabbaṃ atha vā pana;
“Kiyādito nāppaṇhā”ti, kātabbaṃ ekalakkhaṇaṃ.

Yasmā tathā na vuttañca, na katañcekalakkhaṇaṃ;
Tasmā ayaṃ viṣuṃyeva, gaṇo icceva ñāyati.

“Sarā sare lopa”miti-ādīni lakkhaṇāniva;
Gambhīraṃ lakkhaṇaṃ etaṃ, dujjānaṃ takkagāhinā.

Usādayopi sandhāya, **ādigga**ho kato taḥiṃ;
Tathā hi “uṇhāpetī”ti, ādirūpāni dissare.

Idāni pākaṭaṃ katvā, **ādisadda**phalaṃ ahaṃ;
Sappayogaṃ **gahādīna**ṃ, gaṇaṃ vakkhāmi me suṇa.

Gaha upādāne. **Upādānaṃ** gahaṇaṃ, na kilesupādānaṃ. **Upasaddo** hettha na kiñci atthavisesaṃ vadati. Atha vā kāyena cittena vā upagantvā ādānaṃ gahaṇaṃ upādānanti samīpattho **upasaddo**. Katthaci hi **upasaddo ādāna**saddasahito daḥhaggahaṇe vattati “kāmuṇpādāna”ntiādīsu. Idha pana daḥhaggahaṇaṃ vā hotu sithilaggahaṇaṃ vā, yaṃ kiñci gahaṇaṃ upādānameva, tasmā **gahadhātu** gahaṇe vattatīti attho gahetabbo. Gheppati, gaṇhāti vā. Pariggaṇhāti, paṭiggaṇhāti, adhigaṇhāti, paggaṇhāti, niggaṇhāti. Padhānagaṇhanako. Gaṇhituṃ, uggaṇhituṃ. Gaṇhitvā, uggaṇhitvā. Aññathāpi rūpāni bhavanti. Ahaṃ jāliṃ gahessāmi. Gahetuṃ. Gahetvā. Uggāhako, saṅgāhako, ajjhogāḷho. Kārite “gaṇhāpeti, gaṇhāpayati, aññataraṃ satipaṭṭhānaṃ uggaṇhāpeti, saddhiṃ amaccasahassena gaṇhāpetvā. Upajjhaṃ gāhāpetabbo. Upajjhaṃ gāhāpetvā. Gāheti, gāhayati, gāhāpessati. Gāhāpayanti sabbhāvaṃ. Gāhako, gāhetvā” iccādīni. Kammani – gayhati, saṅgayhati, gaṇhiyati vā. Tathā hi “gaṇhiyanti uggaṇhiyanti”ti **niddesapāḷi** dissati. “Gehaṃ, gāho, pariggaho, saṅgāhako, saṅgahetā” iccādīni yojetabbāni.

Tatra **akārānantaratyantapadānaṃ** “gheppati, gheppanti. Gheppasī”ti ca “gaṇhati, gaṇhanti. Gaṇhasī”ti ca ādinā nayena sabbāsu vibhattīsu sabbathā padamālā yojetabbā. **Ākārekārānantaratyantapadānaṃ** “gaṇhāti gaṇhāpetī”tiādīnā yathāsambhavaṃ padamālā yojetabbā vajjetabbaṭṭhānaṃ vajjetvā.

Imāni pana pasiddhāni kānici ajjatanīrūpāni “aggahī mattikāpattaṃ. Aggahaṃ, aggahiṃsu, aggahesu”nti. Bhavissantiādīsu gahessati, gahessanti. Sesam paripuṇṇaṃ kātabbaṃ. Aggahissā, aggahissamsu. Sesam paripuṇṇaṃ kātabbaṃ.

Usa dāhe. **Dāho** uṇhaṃ. Usati dahatīti uṇhaṃ. **Uṇhasaddo** “uṇhaṃ bhattaṃ bhuñjati”tiādīsu dabbamapekkhati, “sītaṃ uṇhaṃ paṭihanatī”tiādīsu pana guṇaṃ uṇhabhāvassa icchitattā. Uṇhabhāvo hi sītabhāvo ca guṇo.

Tasa vipāsāyaṃ. Taṇhā. Kenatṭhena **taṇhā**? Tassati paritassatīti atthena.

Jusi pītisevanesu. Juṇho samayo. Kāḷe vā yadi vā juṇhe, yadā vāyati māluto.

Tattha **juṇhoti** joseti lokassa pītiṃsomanassañca uppādetīti juṇho.

Juta dittiyaṃ. Juṇhā ratti. Jotati sayam nippabhāpi samānā candatārakappabhāsenapi dibbati virocati sappabhā hotīti juṇhā.

Sā tanukaraṇe. Saṇhavācā. Siyati tanukariyati, na pharusabhāvena kakkasā kariyatīti **saṇhā**.

So antakammani. Saṅhaṃ, ñāṇaṃ. Siyati sayamaṃ sukhumabhāvena atisukhumampi atthaṃ antaṃ karoti nipphattiṃ pāpetīti saṅhaṃ.

Tija nisāne. Nisānaṃ tikkhatā. Tiṅho parasu. Titikkhatīti **tiṅho**.

Si sevāyaṃ. Attano hitamāsīsantehi seviyateti **sippaṃ**, yaṃ kiñci jīvitahetu sikkhitabbaṃ sippāyanaṃ. Apica **sippanti** aṭṭhārasa mahāsippāni – suti sūramati byākaraṇaṃ chandovicīti nirutti jotisaṭṭhaṃ sikkhā mokkhaññaṃ kriyāvidhi dhanubbedo hatthisikkhā kāmataṅṭaṃ assalakkhaṇaṃ purāṇaṃ itihāso nīti takko vejjakañcāti.

Ku kucchāyaṃ. Kucchā garahā. Kaṇhā dhammā. Kaṇho puriso.

Tattha **kaṇhā**ti apabhassarabhāvakaraṇattā paṇḍitehi kucchitabbā garahitabbāti kaṇhā, akusaladhammā. Kāḷavaṇṇattā suvaṇṇavaṇṇādikāṃ upanidhāya kucchitabbo ninditabboti **kaṇho**, kāḷavaṇṇo. Vuttampi cetamaṃ –

“Kaṇho vatāyaṃ puriso, kaṇhaṃ bhuñjati bhojanaṃ;
Kaṇhe bhūmippadesasmim, na mayhaṃ manaso piyo”’ti ca,

“Na kaṇho tacasā hoti,
Antosāro hi brāhmaṇo;
Yasmim pāpāni kammāni,
Sa ve kaṇho sujampatī”’ti ca.

Icevaṃ –

Gahādike dhātugaṇe, sandhāya **tasiā**dayo;
Ādiggaho kato **ppaṇhā**, **gahādī**su yathārahaṃ.

Gahato dhātuto hi **ppo**,ākhyātattevadissati;
Ākhyātatte ca nāmatte, **ṇhāsaddo usato** tathā.

Usagahehi aññasmā, nāmatteva duve matā;
Evaṃ visesato ñeyyo, **gahādigaṇa**nicchayo.

Ettha pana kiñcāpi sāsane “taṅhāyatī”’ti kriyāpadampi dissati, tathāpi tassa “pabbatāyati, mettāyati”’tiādīni viya nāmasmā vihitassa **āyapaccayassa** vasena siddhattā kriyāpadattepi **ṇhāpaccayo** mukhyato labbhatīti na sakkā vattum. “Taṅhāyatī”’ti hi idamaṃ **ṇhāpaccayavatā tasadhātuto** nipphannataṅhāsaddasmā parassa **āyapaccayassa** vasena nipphannaṃ. Tathā kiñcāpi **rūpiyasamaṃvohārasikkhāpadavaṇṇanāyaṃ** “vāsiphalaṃ tāpetvā udakaṃ vā khīraṃ vā uṇhāpetī”’ti imasmim padese “uṇhāpetī”’ti hetukattuvācakaṃ kriyāpadaṃ dissati, tathāpi tassa **ṇhāpaccayavatā usadhātuto** nipphannaṃ **ṇhāsaddato** vihitassa kārītasaññassa **ṇāpepaccayassa** vasena nipphannattā kriyāpadattepi **ṇhāpaccayo** mukhyato labbhatīti na sakkā vattum. “Uṇhāpetī”’ti idamaṃ vuttappakāraṃ **ṇhāsaddato ṇāpepaccayavasena** nipphannaṃ, etasmim diṭṭhe “uṇhāpayatī”’ti padampi diṭṭhameva hoti.

Kiñca bhīyyo **vinayaṭṭhakathāyaṃ** “uṇhāpetī”’ti kārītapadassa diṭṭhattāyeva “uṇhatī”’ti kattupadampi nayato diṭṭhameva hoti kattukārītapadānaṃ ekadhātumhi upalabbhamānattā, yathā? Gaṇhāti, gaṇhāpeti, gacchati, gacchāpetīti, tasmā “**usa dāhe**”’ti dhātussa “uṇhatī”’ti rūpaṃ upalabbhatīti mantvā “uṇhatīti uṇha”’nti nibbanaṃ kātappaṃ. Iti **ppapaccayo gahato** ca aññato ca ekadhā labbhati, **ṇhāpaccayo** pana **gahato usato** ca dvidhā aññato ekadhā labbhatīti daṭṭhabbaṃ. Kiñcāpettha evaṃ niyamo vutto, tathāpi sātṭhakathe tepiṭake buddhavacane aññānīpi ekekassa dhātussa nāmikapadāni dve dve kriyāpadāni vicinitabbāni. Yena pana buddhavacanānurūpena nayena **gahādigaṇe ādisaddena tasadhātādayo** amhehi gahitā, imasmā nayā añño nayo pasatthataro

natthi, ayameva pasatthataro, tasmā ayam nīti sāsanaṭṭhitiyā āyasmantehi sādhuḥkaṃ dhāretabbā vācetaḥḥā ca.

Gahādī ettakā diṭṭhā, dhātavo me yathābalaṃ;
Suttasvaññepi pekkhitvā, gaṇhavho atthayuttito.

Gahādigaṇoyam.

Tanādigaṇika

Tanu vitthāre. Tanoti. Āyatanam, tanu. Kammani “taniyyati, taniyyanti. Vitaniyyatī” ti rūpāni. Atrāyam pāli “yathā hi āsabham cammam, pathabyā vitaniyyatī” ti. Garū pana “patāyate, pataññatī” ti rūpāni vadanti. Tanitum, tanitvāna. **Tumantādirūpāni.**

Tattha **āyatananti** āyabhūte dhamme tanoti vitthāretīti āyatanam. **Tanūti** sarīram. Tañhi kalalato paṭṭhāya kammādīhi yathāsambhavam taniyyati vitthāriyati mahattam pāpiyatīti “tanū” ti vuccati. “Tanu vapu sarīram puṃ kāyo deho” tiādayo sarīravācakā saddā. Sarīram khandhapañcakam. Yañhi mahājano sarīranti vadati, tam paramatthato khandhapañcakamattameva, na tato attā vā attaniyam vā upalabbhati. “Kāmarāgabyāpādānam tanuttakaram sakadāgāmimaggacitta” ntiādīsu pana **tanusaddo** appatthavācako, appatthavācakassa ca tassa kriyāpadam na passāma, tasmā nipātapadena tena bhavitabbam. **Tanusaddo** nipātapadanti vuttaṭṭhānampi na passāma, nicchayena pana anipphannapāṭipadikoti gahetabbo.

Tanoti, tanonti. Tanosi, tanotha. Tanomi, tanoma. Tanute, tanunte. Tanuse, tanuse, tanuvhe. Tane, tanumhe. Sesam yathāsambhavam vitthāretabbam.

Tanotu, tanontu. Taneyya, tane, taneyyum. Vitana, vitanu. Atanā, atanu. Ammāya patanu kesā. Atani, ataniṃsu. Tanissati, tanissanti. Atanissā, atanissamsu. Kammani “taniyyati, taniyyanti. Taniyyasī” tiādīna vitthāretabbam.

Saka sattiyaṃ. Satti samatthabhāvo. Sakkoti sakko. Viññāpetum asakkhi. Sakkhissasi. Sakkhati. Tvampi amma pabbajitum sakkhissasi. Sakkate jarāya paṭikammam kātunti pāli.

Tattha **sakkoti** devarājā. So hi atthānam sahasampi muhuttana cintanasamatthatāya saparahitam kātum sakkotīti “sakko” ti vuccati. Aññatra pana dhātūnam avisaye taddhitavasena sakkaccam dānam adāsīti sakkoti evampi attham gahetvā **sakkasaddo** niruttinayena sādhetabbo. Vuttañhi bhagavatā “sakko mahāli devānamindo pubbe manussabhūto samāno sakkaccam dānam adāsī, tasmā ‘sakko’ ti vuccatī” ti. Sakkonto. Sakkontī. Sakkontam kulam.

Khuṇu khiṇu hiṃsāyam. Khuṇoti. Khiṇoti.

Iṇu gatiyam. Iṇoti. Iṇam iṇāyiko.

Tiṇu adane. Tiṇoti. Tiṇam. Ettha **tiṇanti** yavasam. Tañhi tiṇiyate tiṇabhakkhehi goṇādīhi adiyate khādiyateti **tiṇam.**

Ghiṇu ditiyam. Ghiṇoti.

Hanu apanayane. Apanayanam anālāpakaraṇam nibbanatākaraṇam. Hanoti. Hanute.

Panu dāne panoti. Panute.

Manu bodhane. Manoti. Manute. Mano. Manam. Mānasam. Manusso. Mānavo. Mānavo.

Ettha **manoti** manute bujjhatīti mano, evaṃ manañ. Imesaṃ pana dvinnañ **manasaddānaṃ** “yasmimṃ mano nivisati. Santaṃ tassa manañ hotī”tiādīsu punnapuṃsakalingatā daṭṭhabbā. **Mānasanti** rāgopi cittampi arahattampi. “Antalikkhacaro pāso, yvāyaṃ carati mānaso”ti ettha hi rāgo mānasaṃ. “Cittaṃ mano mānaso”nti ettha cittaṃ. “Appattamānaso sekkho, kālaṃ kayirā jane suto”ti ettha arahattaṃ. Etthetaṃ vuccati –

Rāgo cittaṃ arahattañca, “mānaso”nti samīritaṃ;
Sathuno sāsane pāpa-sāsane’khilasāsane.

Tattha **sampayuttamanasi bhavoti** rāgo **mānaso**. Mano eva mānasanti katvā cittaṃ **mānasaṃ**. Anavasesato mānaṃ siyati samucchindatīti aggamaṃ **mānasaṃ**. Tannibattattā pana arahattassa mānasatā daṭṭhabbā. **Manūti** satto. “Yena cakkhupasādena, rūpāni manu passatī”ti ettha hi “manū”ti satto vutto. Atha vā **manūti** paṭhamakappikakāle manussānaṃ mātāpibhuṭṭhāne ṭhito manunāmako puriso, yo sāsane “mahāsammatarājā”ti vutto. So hi sakalalokassa hitaṃ kātum manute jānātīti “manū”ti vuccati. Yathābalaṃ attano hitaṃ manute jānātīti **manusso**, manassa vā ussannattā **manusso**. Atha vā vuttappakārassa manuno apaccaṃ **manusso**. Evaṃ **mānavo māṇavo** ca, **nakārassa** hi **ṇakāre** kate “māṇavo”ti rūpaṃ sijjhati. Keci panāhu “dantajanakārasahito **mānavasaddo** sabbasattasādhāraṇavacano, muddhajaṇakārasahito pana **māṇavasaddo** kucchitamūḷhāpaccavacano”ti, taṃ vīmaṃsitvā yuttañce, gahetabbaṃ, na panettha vattabbaṃ “**māṇavasaddo** atthuddhāravacane idaṃ vacanaṃ virujjhatī”ti **antarāsaddo** atthuddhāre **antaraantarikāsaddo** āharaṇassa dassanato.

Tatra panāyaṃ vīmaṃsanā – **cūlakammavibhaṅgasuttasmiñhi** “subho mānavotodeyyaputto”ti imasmimṃ padese aṭṭhakathācariyehi “subhoti so kira dassanīyo ahoṣi pāsādiko, tenassa aṅgasubhatāya ‘subho’ tveva nāmaṃ akāṃsu. ‘Māṇavo’ti pana taṃ taruṇakāle vohariṃsu, so mahallakakālepi teneva vohārena vohariyatī”ti evaṃ muddhajaṇakārassa **māṇavasaddo** attho pakāsito, **taṭṭikāyampi** garūhi “yaṃ apaccaṃ kucchitaṃ muddhaṃ vā, tattha loke mānavavohāro, yebhuyyena ca sattā daharakāle muddhadhātukā hontīti vuttaṃ ‘taruṇakāle vohariṃsū”ti, evaṃ muddhajaṇakārassa **māṇavasaddo** attho pakāsito. Idāni **māṇavasaddo** atthuddhāro bhavati, **māṇavoti** sattopi coropi taruṇopi vuccati. “Coditā devadūtehi, ye pamajjanti māṇavā”tiādīsu hi satto “māṇavo”ti vutto. “Māṇavehi saha gacchanti katakammehipi akatakammehipī”tiādīsu coro. “Ambaṭṭho māṇavo”tiādīsu taruṇo “māṇavo”ti vutto.

Appa pāpuṇe. Appoti. Āpo.

Ettha **āpoti** appoti taṃ taṃ ṭhānaṃ vissaratīti āpo.

Mā parimāṇe. Minoti. Upamā, upamānaṃ, vimānaṃ. Aññānīpi yojetabbāni.

Ettha ca yā accantaṃ na minoti na vicchindati, sā mānassa samīpe vattatīti **upamā** yathā “goṇo viya gavajo”ti. **Upamānanti** upamā eva. Tathā hi “vītopamānamappamāṇamanāthanātha”nti. Ettha **vītopamānanti** imassa vītopamaṃ, nirupamanti attho. Atha vā **upamānanti** upametabbākāro “sīho viya bhagavā”ti. Ettha hi sīho upamā, bhagavā upameyyo tejoparakkamādīhi upametabbattā, tejoparakkamādayo upametabbākāro. Ettha pana sātisaṃyattā kiñcāpi sīhassa tejādīhi bhagavato tejādiupametabbākāro natthi, tathāpi hīnūpamāvasena “sīho viya bhagavā”ti vuttanti daṭṭhabbaṃ. **Vimānanti** utusamuṭṭhānattepi kammappaccayautusamuṭṭhānattepi kammaṃ visesato miniyati paricchindiyatīti vimānaṃ.

Kara karaṇe. “Karoti, kayirati, kubbati, krubbati, pakaroti, upakaroti, apakaroti, paṭikaroti, nirākaroti, paṭisaṅkharoti, abhisāṅkharoti” iccevamādīni kattari bhavanti. Kamme pāḷinayavasena ikārāgamaṭṭhāne **yakārassa** dvebhāvo. Tasmimyevaṭṭhāne **rayakārānaṃ** vipariyāye sati na dvebhāvo. Tathā ikārāgamaṭṭhāne “kariyyati, kayirati, karīyati, kayyati, pakarīyati, pakariyyati, paṭisaṅkharīyati, abhisāṅkharīyati” iccevamādīni kammani bhavanti.

Ettha ca **kayiratī**ti padaṃ dvīsu ƥhānesu dissati kattari kamme ca. Tesa kattuvaseṇa “puriso kammaṃ kayiratī”ti yojetabbam, kammavasena pana ayaṃ pāḷi “kuṭi me kayirati adesitavattukā”ti. Tattha ca kattuvaseṇa vuttaṃ kattupadaṃ **yirapaccayena** siddham. Kammavasena pana vuttaṃ kammaṃ **ikārāgama**ssa ādiantabhūtānaṃ **rayakārānaṃ** vipariyāyenāti daṭṭhabbam. “Kāreti, kārayati, kārapeti, kārapayati”ti cattāri kāritarūpāni, yāni “hetukatturūpāni”ti vuccanti taddīpakattā.

Idāni pana padamālā vattabbā, tatra paṭhamam “kubbati”ti padasseva padamālam yojesāma sabbāsu vibhattīsu ekākāreṇa yojetabbattā. “Karotī”ti **okārānantaratyāntapadassa** pana “kāretī”ti **ekārānantaratyāntapadassa** ca padamālam yathāsambhavam pacchā yojesāma ekākāreṇa ayojetabbattā.

Tatra kubbati, kubbanti. Kubbasī, kubbatha. Kubbāmi, kubbāma. Kubbate, kubbante. Kubbase, kubbavhe. Kubbe, kubbamhe. Vattamānāvasena vuttarūpāni.

Pañcamiyādīnaṃ vaseṇa pana kubbatu, kubbantu. Kubbeyya, kubbeyyūṃ. Sesam “bhavati, bhavanti”ti vuttanayānusāreṇa sabbattha vitthāretabbam.

“Kariyatī”tiādīnīpi **a** kārānantaratyāntapadāni evameva yojetabbāni. Ettha ca “kubbati, kubbanti. Kubbasī”tiādīnā vuttā ayaṃ padamālā pāḷinayadassanato edisī vuttā. Saddasatthavidū pana sāsānikā saddasattheyeva ādaram katvā “kubbati, kubbasī”ti evaṃpakārāni rūpāni pāḷiyam natthīti maññantā na icchanti. Tehi saddasatthe viya pāḷiyampi “asanto nānukubbanti”tiādīsu **okārāpaccayassādesabhūto ukāro** sareyeva pare **vakāram** pappotīti maññamānā “kubbanti, kubbante”tiādīniyeva rūpāni icchanti, parasarassābhāvato “kubbati, kubbasī”tiādīni pāḷiyam natthīti na icchanti. Mayaṃ pana pāḷinayadassanato tāni rūpāni icchāma. Atra sotārānaṃ kaṅkhāvinodanattaṃ kiñci pāḷinayam vadāma – “sīlavanto na kubbanti, bālo sīlāni kubbati”ti ca, “kasmā bhavaṃ vijānamaraññanissito, tapo idha krubbati”ti ca, “pharusāhi vācāhi pakrubbamāno”ti ca. Idīsesu pana ƥhānesu **akārāgamo** kātabbo. Acinteyyo hi pāḷinayo, yebhuyyena saddasatthanayavidūro ca. Tathā hi yathā “agginim sampajjalitam pavisanti”ti pāḷigatidassanato “agginī, agginī, agginayo. Agginim, agginī, agginayo. Aggininā”ti padamālā kātabbā hoti, evameva “bālo sīlāni kubbati”ti pāḷigatidassanato “kubbati, kubbanti. Kubbasī”ti padamālāpi yojetabbāva.

Yathā ca “bahumpetaṃ asabbhi jātavedā”ti pāḷigatidassanato “santo sabbhīhi saddhim satam dhammo na jaram upetīti pavedayanti”ti aṭṭhakathāgatidassanato ca “sabbhi, sabbhī, sabbhayo. Sabbhim, sabbhī, sabbhayo. Sabbhinā”ti padamālā yojetabbā hoti, evameva “bālo sīlāni kubbati”ti pāḷigatidassanato “kubbati, kubbanti. Kubbasī”ti padamālāpi yojetabbāva. Tathā “krubbati, krubbanti. Krubbasi”tiādī sabbam sabbattha yojetabbam.

Idāni yathāpaṭiññātā padamālā anuppattā. Karoti, karonti. Karosi, karotha. Karomi, kummi, karoma, kumma. Kurute, kubbante. Kuruse, kuruvhe. Kare, karumhe. Vattamānāvasena vuttarūpāni.

Karotu, kurutu, karontu. Karohi, karotha. Karomi, kummi, karoma, kumma. Kurutam, kubbantam. Karassu, kurussu, kuruvho. Kare, kubbāmase. Pañcamīvasena vuttarūpāni.

Ettha pana koci vadeyya –

“Na no vivāho nāgehi, katapubbo kudācanam;
Tam vivāham asaṃyuttam, katham amhe karomase”ti

Pāḷidassanato “karomase”ti padaṃ kasmā idha na vuttaṃ, nanu **karadhātuto** paraṃ **okāram** paṭicca **āmasevacanassāvayavabhūto ākāro** lopaṃ pappotīti? Tanna, “karomase”ti ettha “āmase”ti vacanassa abhāvato mavacanassa sabbhāvato. Ettha hi **sekāro** āgamo, tasmā “karomā”ti vattamānāvacaṇavasena attho gahetabbo, na pana pañcamīvacanavasena. Evaṃbhūto ca **sekāro** katthaci nāmikapadato paro hoti “ye keci buddham saraṇam gatāse. Yam balaṃ

ahuvamhase’’tiādīsu. Katthaci panākhyātīkapadato sādesanirādesavasena –

‘‘Akaramhasa te kiccaṃ; Okkantāmasi bhūtāni;
Sutaṃ netāṃ abhiṅhaso, tasmā evaṃ vademase’’ti

Ādīsu.

Kareyya, kareyyuṃ. Kareyyāsi, kareyyātha. Kareyyāmi, kareyyāma. Kubbetha, kubberaṃ. Kubbetho, kubbeyyavho. Kareyyaṃ, kare, kareyyāmhē. Sattamīvasena vuttarūpāni.

Kara, karu. Kare, karittha. Karaṃ, karimha. Karittha, karire. Karittho, karivho. Karim, karimhe. Parokkhāvasena vuttarūpāni.

Ettha **karāti** puriso kammaṃ karīti paṭhamapurisayojanāya yojetabbaṃ. ‘‘Āguṃ kara mahārāja, akaraṃ kammaṃ dukkaṭa’’nti etthāpi ‘‘mahārāja bhavaṃ āguṃ karī’’ti paṭhamapurisayojanāya yojetabbaṃ. Evañhi sati ayaṃ payogo ‘‘maññe bhavaṃ patthayati, rañño bhariyaṃ patibbata’’ntiādayo viya paṭhamapurisappayogo bhavati.

Jātakatthakathāyaṃ pana majjhimapurisappayogo vutto ‘‘āguṃ karāti mahārāja tvaṃ mahāparādhaṃ mahāpāpaṃ kari. **Dukkaṭanti** yaṃ kataṃ dukkaṭaṃ hoti, taṃ lāmaṃ kammaṃ akara’’nti, tasmā jātakatthakathāvasenāpi kadāci **karāti** ca **karīti** ca **akaranti** ca majjhimapurisappayogo bhavatīti daṭṭhabbaṃ. Yebhuyyavasena pana ‘‘puriso kammaṃ kara, puriso kammaṃ kari, ahaṃ kammaṃ akara’’nti paṭhamuttamapurisappayogo daṭṭhabbo. Ettha ca **karāti** yathāvuttavibhattivāsena, **karīti** ajjatanīvasena, **akaranti** hiyyattanīvasena vuttaṃ. Tattha ‘‘karittho’’ti padaṃ ‘‘aññaṃ bhattāraṃ pariyesa, mā kisittho mayā vinā’’ti ettha ‘‘kisittho’’ti padena samaṃ parokkhāyattanopadamajjhimapurisekavacanavasena, ediso pana nayo aññatrāpi yathāsambhavaṃ yojetabbo.

Akā, akarā, akara iti rassapāṭhopi. Akaru. Ettha ‘‘sabbārivijayaṃ akā’’ti padaṃ nidassanaṃ. **Akarāti** puriso kammaṃ akāsīti atītakriyāvācako paṭhamapurisappayogo daṭṭhabbo. Tathā hi ‘‘rajjassa kira so bhīto, akarā ālaye bahū’’ti pāli dissati. ‘‘Mā metaṃ akarā kammaṃ, mā me udakamāhari’’ti ettha pana santepi atītavācakaṃ paṭṭhamapurisappayogabhāve **māsaddayogato** hiyyattanajjatanīvibhattiyo pañcamīvibhattiatthe anuttakālikā hutvā ‘‘tvaṃ mā karosi, mā āharasi’’ti majjhimapurisappayogārahā bhavanti.

Kiñca bhiyyo ‘‘jarādhammaṃ mā jīrīti alabbhaneyyaṃ ṭhāna’’ntiādīsipi santepi atītavācakaṃ paṭṭhamapurisappayogabhāve **māsaddayogato** ajjatanīvibhattipañcamīvibhattiatthe anuttakālikā hutvā ‘‘mā jīratū’’tiādīnā paṭhamapurisappayogārahā bhavanti. Tenāhu **aṭṭhakathācariyā** ‘‘**jarādhammaṃ mā jīrīti** yaṃ mayhaṃ jarāsabhāvaṃ, taṃ mā jīritu. Esa nayo sesesupī’’ti. Yaṃ panamhehi ‘‘akara iti rassapāṭhopi’’ti vuttaṃ, tassa ‘‘atikara’makarā’cariya, mayhampetaṃ na rucati’’ti imāya pāliyā vasena atthitā veditabbā. Tassāyattho ‘‘ācariya bhavaṃ atikkantakaraṇaṃ akarā’’ti paṭhamapurisavasena gahetabbo. Apica ‘‘bhava’’nti vattabbe atthe ‘‘tva’’nti vacanaṃ vattabbamevāti adhippāyavasena ‘‘ācariya tvaṃ atikkantakaraṇaṃ karosi’’ti yojanāpi kātabbāva.

Akaro, akattha, akarotha. Akaraṃ, akaṃ, akaramha, akamha. Ettha ‘‘saṃvaḍḍhayitvā puḷinaṃ, akaṃ puḷinacetiya’’nti pāli nidassanaṃ. Akattha, akatthūṃ. Akuruse, akaravhaṃ. Akarim, akaraṃ, akaramhase. Hiyyattanīvasena vuttarūpāni.

Ettha ca pañcavidho **sekāro** āharitvā dassetabbo. Tathā hi pañcavidho **sekāro** padāvayava apadāvayavaanekantapadāvayava sosaddattha ādesavasena. Tattha padāvayavo **sekāro** ‘‘tvaṃ kammaṃ kuruse, tvaṃ atthakusalo abhavase’’tiādīsu daṭṭhabbo. Apadāvayavo pana ‘‘tasmā evaṃ vademase. Mūlā akusalā samūhatāse’’tiādīsu daṭṭhabbo. Anekantapadāvayavo ‘‘arogā ca bhavāmasē. Mañiṃ tāta gaṇhāmasē’’tiādīsu daṭṭhabbo. Ettha hi **sekāro** yadi pañcamīvibhattiyaṃ

“labhethā”ti ulliṅgitvā “labheyya”nti purisavipallāsavasena vivaraṇaṃ kataṃ. “Adhammaṃ sārathi kayirā”ti imassa pana **aṭṭhakathāyaṃ** “kayirā”ti ulliṅgitvā “kareyyāsi”ti vivaraṇaṃ kataṃ, tasmā “adhammaṃ sārathi kayirā”ti ettha purisavipallāso na cintetabbo. Atha vā yathā “puttaṃ labhetha varada”nti ettha ca “kāye rajo na limpethā”tiādīsu **ethavacanaṃ** gahitaṃ, evaṃ **ethavacanaṃ** aggahetvā “labhe athā”ti padacchedo karaṇīyo. Evañhi sati purisavipallāsena kiccaṃ natthi. Tattha **labheti** sattamiyā uttamapurisavacanaṃ “vajjhañcāpi pamocaye”ti padamiva. **Athā**ti adhikārantare nipāto padapūraṇe vā. Ettha ca adhikārantaravasena aparampi vamaṃ puttaṃ labheyyanti attho. Yasmā panettha dvinnamatthānaṃ uppatti dissati, yasmā cetesu dvīsu dujjāno bhagavato adhippāyo, tasmā dvepi atthā gahetabbāva.

Ettha pana kiñcāpi liṅgavipallāso vibhattivipallāso vacanavipallāso kālavipallāso purisavipallāso akkharavipallāsoti chabbidho vipallāso āharitvā dassetabbo, tathāpi so upari āvibhavissatīti na dassito. Tatra **kayirāthā**ti padaṃ sattamiyā parassapadavasena attanopadavasena ca dvidhā bhijjati, tathā majjhimapurisabahuvacanavasena paṭhamapurisekavacanavasena ca. Tathā hi “yathā puññāni kayirātha, dadantā aparāpara”nti ettha “kayirāthā”ti idaṃ sattamiyā parassapadavasena majjhimapurisabahuvacanavasena ca vuttaṃ. Yathānurūpaṃ puññāni kareyyāthayevāti hi attho. “Kāyirātha dhīro puññāni”ti ettha pana “kayirāthā”ti idaṃ sattamiyā attanopadavasena paṭhamapurisekavacanavasena ca vuttaṃ. Kareyyāti hi attho. Idha parokkhādivasena **yirapaccayasahitā**ni rūpāni yebhuyyena sāsane appasiddhānīti **na** dassitāni.

Attano phalaṃ karotīti **kāraṇaṃ**. Karotīti **kattā**, evaṃ kārako kārakaṃ vā. Ettha hi **kārakasaddo** yattha kattukārakakammakārakādivācako, tattha pulliṅgopi hoti, yebhuyyena napuṃsakaliṅgopi. Yattha pana rajatakārakammakārakālohakārādivācako, tattha pulliṅgo eva. Kārāpetīti **kārāpako**. Karaṃ, kubbaṃ, krubbaṃ, karonto, kubbanto, kubbāno, kurumāno, pakruṃbbamāno. Kārikā, kārāpikā. Karontī, kubbantī. Kārakaṃ kulaṃ. Kārāpakaṃ, karontaṃ, kubbantaṃ, kurumānaṃ. Saṅkhāro, parikkhāro, parikkhato, purakkhato, karaṇaṃ, kriyā. Akkharacintakā pana “kriyā” iccāpi padamicchanti. Ettha **kriyāsaddo** kiñcāpi “aphalā hoti akruṃbbato”tiādīsu **kakārarakārasaṃyogavantā**ni padāni dissanti, tathāpi **klesasaddo** viya pāliyaṃ na dissati, adissamānopi so aṭṭhakathācariyādīhi garūhi gahitattā gahetabbova. Tathā hi “kriyākriyāpattivibhāgadesako”tiādikā saddaracānā dissati.

Kātuṃ, kattuṃ. Kātave, karetuṃ. Katvā, katvāna, kātuna, karitvā, karitvāna, kacca, adhikacca, kariya, kariyāna, purakkhitvā, karetvā. Aññānīpi **tumantādī**ni yojetabbāni.

Tatra **kaccā**ti katvā. **Adhikaccā**ti adhikaṃ katvā. Akkharacintakā pana saddasatthanayaṃ nissāya “adhikicca” itī rūpaṃ icchanti, mayaṃ panetādisaṃ rūpaṃ pāliyā anukūlaṃ na hotīti na icchāma. Tathā hi **therikāgāthāyaṃ** gotamiyā parinibbānavacane “padakkhiṇaṃ kacca nipacca pāde”ti pālī dissati. Tattha hi padakkhiṇaṃ katvāti attho. **Kaccā**ti padassa dassanena **adhikaccā**ti padampi diṭṭhameva hoti, esa nayo aññātrāpi yathārahaṃ veditabbo.

Idāni **karotissa** dhātussa appamattakaṃ atthātisayayogaṃ kathayāma – taṇhaṅkaro. Kāraṇā. Pharusāhi vācāhi pakruṃbbamāno. Sante na kurute piyanti.

Tatra **taṇhaṅkaroti** veneyyānaṃ taṇhaṃ lobhaṃ karoti hiṃsatīti taṇhaṅkaro. Atha vā rūpakāyadhammakāyasampattiyā attani sakalalokassa taṇhaṃ sinehaṃ karoti janetīti **taṇhaṅkaro**. **Kāraṇā**ti hiṃsanā. **Pakruṃbbamānoti** hiṃsamāno. **Sante na kurute piyanti** sappurise attano piye iṭṭhe kante manāpe na karotīti attho. Atha vā piyaṃ piyāyamaṃ tussamāno modamāno sante na kurute na sevātīti attho. Yathā “rājānaṃ sevati”ti etasmiṃ atthe rājānaṃ piyaṃ kuruteti saddasatthavidū mantenti, dullabhāyaṃ nīti sādhuṃkaṃ manasi kātabbā.

Ettha ca **parikkhārasaddassa** atthuddhāro nīyate, “parikkhāroti sattahi nagaraparikkhārehi suparikkhittam hoti”tiādīsu parivāro vuccati. “Ratho setaparikkhāro, jhānakkho cakkavīriyo”tiādīsu alaṅkāro. “Ye cime pabbajitena jīvitaparikkhārā samudānetabbā”tiādīsu sambhāro. Etthetāñhi vuccati –

Sāsanaññūhi viññūhi, parikkhāroti sāsane;
Parivāro alankāro, sambhāro ca pavuccati.

Jāgara niddakkhaye. Jāgaroti. Jāgaram. Dīghā jāgarato ratti.

Tanādi ettakā diṭṭhā, dhātavo me yathābalaṃ;
Suttēsvaññēpi pekkhitvā, gaṇhavho atthayuttitoti.

Tanādigaṇoyam.

Rudhādichakkaṃ vividhatthasāraṃ,
Matīnkaraṃ viññujanādhiraṃam;
Uḷārachandehi susevanīyam,
Suvaṇṇahaṃsehi suciṃva ṭhānaṃ.

Iti navaṅge sātṭhakathe piṭakattaye byappathagatīsu viññūnaṃ

Kosallatthāya kate saddanītipparāṇe **rudhādichakkaṃ**

Nāma

Sattarasamo paricchedo.

18. Curādigaṇaparidīpana

Ito paraṃ pavakkhāmi, pacuratthahitakkaraṃ;
Curādikaṇānaṃ, nāmato aṭṭhamaṃ gaṇaṃ.

Cura theyye. Thenanaṃ **theyyam**, corikāti vuttaṃ hoti. Tasmim̐ theyye **curadhtu** vattati. Coreti, corayati, coro, corī, corikā, coretu, corayitum, coretvā, corayitvā. Kattutthesu **neṇayatā curādigaṇalakkhaṇaṃ**. Kārite – corāpeti, corāpayati, corāpetum, corāpayitum, corāpetvā, corāpayitvā. Kammedhanaṃ corehi coriyati, coritaṃ dhanaṃ. Esa nayo sabbattha.

Kakārantadhātu

Loka dassane. Loketi, lokayati, oloketi, olokayati, ulloketi, ullokeyati, apaloketi, apalokayati, āloketi, ālokeyati, viloketi, vilokayati. Loko, āloko, lokanaṃ, olokanaṃ, ullokanaṃ, ālokanam, vilokanaṃ, apalokanaṃ, avalokanaṃ. Oloketum, olokayitum, oloketvā, olokayitvā. Kārite pana “olokāpeti, olokāpayati, olokāpetum, olokāpayitum, olokāpetvā, olokāpayitvā” iccevamādīni yojetabbāni. Esa nayo sabbatthāpi.

Tattha **lokoti** tayo lokā saṅkhāraloko sattaloko okāsalokoti. Tattha “eko loko sabbe sattā āhāraṭṭhitikā”ti āgataṭṭhāne saṅkhāraloko veditabbo. “Sassato loko”ti vā ‘asassato loko’ti vā”ti āgataṭṭhāne sattaloko.

“Yāvatā candimasūriyā pariharanti,
Disā bhanti virocamaṇā;
Tāva saḥassadhā loko,
Ettha te vattate vaso”ti

Āgataṭṭhāne okāsaloko.

Atha vā **lokoti** tividho loko kilesaloko bhavaloko indriyalokoti. Tattha rāgādikilesabahulatāya

kāmāvacarasattā kilesaloko. Jhānābhīṇṇāparibuddhiyā rūpāvacarasattā bhavaloko. Āneñjasamādhībahulatāya visadindriyattā arūpāvacarasattā indriyaloko. Atha vā kilissanam kilesa, vipākadukkhanti attho. Tasmā dukkhabahulatāya apāyesu sattā kilesaloko. Tadaññe sattā sampattibhavabhāvato bhavaloko. Tattha ye vimuttipariṇāpakehi indriyehi samannāgatā sattā, so indriyalokoti vedītabbā.

Jātakaṭṭhakathāyaṃ pana –

“Saṅkhāraloko sattaloko okāsaloko khandhaloko āyatanaloko dhātulokoti anekavidho loko. Ettha ‘eko loko sabbe sattā āhāraṭṭhitikā...pe... aṭṭhārasa lokā aṭṭhārasa dhātuyo’ti ettha **saṅkhāraloko** vutto. Khandhalokādayo tadantogadhāyeva. ‘Ayaṃ loko paro loko brahmaloko sadevako’tiādīsu pana **sattaloko** vutto. ‘Yāvata candimasūriyā pariharanti, disā bhanti virocāmānā. Tāva sahasadhā loko, ettha tevattate vaso’ti ettha **okāsaloko** vutto’ti vuttaṃ.

Atthato pana indriyabaddhānaṃ khandhānaṃ samūho santāno ca **sattaloko**, rūpādīsu sattavisattatāya satto, lokiyati ettha kusalākusalāṃ tabbipāko cāti. Anindriyabaddhānaṃ rūpānaṃ samūho santāno ca **okāsaloko**, lokiyanti ettha tasā thāvarā ca, tesañca okāsabhūtoti, tadādhāraṇatāya hesa “bhājanaloko”tipi vuccati. Duvidhopi cesa rūpādīdhamme upādāya paññattattā upādāpaññattibhūto aparamatthasabhāvo sappaccaye pana rūpārūpadhamme upādāya paññattattā tadubhayassāpi upādānaṃ vasena pariyaṃyato paccayāyattavuttitā upacaritabbā, tadubhaye khandhā **saṅkhāraloko**, paccayehi saṅkhariyanti, lujjanti palujjanti cāti ettha paccayāyattavuttitāya maggaphaladhammānampi satipi lujjanapalujanatte tebhūmikadhammānaṃyeva “loko”ti adhippetattā natthi lokatāpajjanaṃ. Tathā hi te “lokuttarā”ti vuttā.

Ālokoti rasmi, āloketi etena bhūso passanti janā cakkhuvīṇṇānaṃ vāti āloko. **Olokananti** heṭṭhā pekkhanaṃ. **Vilokananti** uddham pekkhanaṃ. **Ālokananti** purato pekkhanaṃ. **Vilokananti** dvīsu passesu pekkhanaṃ, vividhā vā pekkhanaṃ. **Apalokananti** “saṅghaṃ apaloketvā”tiādīsu viya jānāpanaṃ. **Avalokananti** “nāgāvalokitaṃ avaloketvā”tiādīsu viya purimakāyaṃ parivattetvā pekkhanaṃ. “Ālokite vilokite sampajānakārī hoti”ti etthāpi bhāvavasena ālokanam ālokitaṃ vilokanam vilokanti attho gahetabbo.

Thaka paṭighāte. Thaketi, thakayati dvāraṃ puriso.

Takka vitakke. Takketi, vitakketi, vitakkayati. Takko, vitakko, vitakkita.

Tattha takkanaṃ **takko**, ūhananti vuttaṃ hoti, evaṃ **vitakko**. Atha vā vitakkenti etena, sayam vā vitakketi, vitakkanamattameva vā etanti **vitakko**. “Takko, vitakko, appanā, byappanā, cetaso abhiniropanā”ti abhidhamme pariyaṃyaddā vuttā. Vitakketi **vitakkita**, puggalo. “Avitakkita maccumupabbajanti”ti pāḷi.

Aki lakkhaṇe. Lakkhaṇam saññānaṃ, sañjānanakāraṇanti vuttaṃ hoti. Atridaṃ sallakkhitabbaṃ. Ye imasmim **curādigāṇe** anekassarā asaṃyogantā **ikārānubandhavasena** niddiṭṭhā dhātavo, te evaṃvuttehi imehi tīhi lakkhaṇehi samannāgatā ākhyātattaṃ nāmikattañca pāpuṇantā ekantato niggahītāgamena nipphanarūpāyeva bhavanti, na katthacipi vigataniggahītāgamarūpāni bhavanti. Añkenti, añkayati. Añkanaṃ, añko. Samāse pana “sasanko, cakkankitacaraṇo”tiādīni rūpāni bhavanti.

Sakka vakka bhāsane. Sakketi, sakkayati. Vakketi, vakkayati.

Nakka vakka nāsane. Nakketi, nakkayati. Vakketi, vakkayati.

Cakka cukka byathane. Cakketi, cakkayati. Cukketi, cukkayati. Cakkaṃ. **Cakkanti** kenatthena cakkaṃ? Cakketi byathati himsati atthena cakkaṃ. **Cakkasaddo** –

Sampattiyam lakkhaṇe ca, rathaṅge iriyāpathe;
Dāne ratnadhammakhura-cakkādīsu padissati;

“Cattārimāni bhikkhave cakkāni yehi samannāgatānaṃ devamanussāna”ntiādīsu hi ayam sampattiyam dissati. “Pādātesu cakkāni jātāni”ti ettha lakkhaṇe. “Cakkaṃva vahato pada”nti ettha rathaṅge. “Catucakkaṃ navadvāra”nti ettha iriyāpathe. “Dada bhuñja ca mā cappamādo, cakkaṃ vattassu pāṇina”nti ettha dāne. “Dibbaṃ cakkaratanaṃ pāturaḥosī”ti ettha ratanacakke. “Mayā pavattitaṃ cakka”nti ettha dhammacakke. “Icchāhatassa posassa, cakkaṃ bhamati matthake”ti ettha khuracakke. “Khurapariyanta cepi cakkenā”ti ettha paharaṇacakke. “Asanivacakka”nti ettha asanimaṇḍaleti.

Taki bandhane. Taṅketi, taṅkayati.

Akka thavane. Thavanam thuti. Akketi, akkayati. Akko. **Akkoti** sūriyo. So hi mahājūtīyā akkiyati abhitthaviyati tappasannehi janehīti **akko**. Tathā hi tassa “natthi sūriyasamā ābhā. Udetayam cakkhumā ekarājā”tiādīnā abhikkhuti dissati.

Hikka hiṃsāyam. Hikketi, hikkayati.

Nikka parimāṇe. Nikketi, nikkayati.

Bukka bhassane. Ettha sunakhabhassanaṃ **bhassananti** gahetabbaṃ, na vācāsāṅkhātāṃ bhassanaṃ. Bukketi, bukkayati. Ettha ca “bukkayati sā core” iti lokiyappayogo veditabbo. **Bhūvādigāṇe** pana “bukkati sā”ti rūpaṃ bhavati. Añño tu “bukka paribhāsane” iti paṭhati, evaṃ paṭhantepi sunakhabhassanamevādhippetaṃ.

Daka laka assādane. Daketi, dakayati. Laketi, lakayati.

Takka loka bhāsāyam. Takketi, takkayati. Loketi, lokayati.

Cika sika āmasane. Ciketi, cikayati. Siketi, sikayati.

Kakārantadhāturūpāni.

Khakārantadhātu

Lakka dassanañkesu. Dassanam passanaṃ. **Añko** lañjanaṃ. Lakkheti, lakkhayati. Sallakkheti, sallakkhayati. Lakkhaṃ vijjhati usunā, lakkhaṃ karoti.

Gaṅgāya vālukā khīye, udakaṃ khīye mahaṇṇave;
Mahiyā mattikā khīye, lakkhe na mama buddhiyā.

Kappalakkhaṇaṃ. Golakkhaṇaṃ. Itthilakkhaṇaṃ. Dhammānaṃ lakkhaṇaṃ. Sallakkhanā. Upalakkhanā. Paccupalakkhanā. **Lakkhadhātuyā yuppaccayantāya samādīpubbānaṃ rūpānaṃ nakāro** dantajo.

Bhakkha adane. Bhakkheti, bhakkhayati. Bhakkho no laddho. Bhakkhayanti migādhama. **Bhūvādigāṇe** pana “bhakkhati”ti rūpaṃ.

Nakka sambandhe. Nakkheti, nakkhayati.

Makka makkhane. Makkheti, makkhayati. Makkho, makkhī. Tattha **makkhoti** parehi katagunaṃ makkheti pisatīti makkho, guṇadhamaṇṇā. “Makkaṃ asahamāno”ti ettha pana attani parehi kataṃ avamaññaṇaṃ **makkhoti** vuccati.

Yakkha pūjāyaṃ. Yakkheti, yakkhayati. Yakkho. **Yakkhoti** mahānubhāvo satto. Tathā hi “pucchāmi taṃ mahāyakkha, sabbabhūtānamissarā”ti ettha sakko devarājā “yakkho”ti vutto. Atha vā **yakkhoti** yakkhayoniyaṃ nibbattasatto. Sabbepi vā sattā “yakkhā”ti vuccanti. “Paramayakkhavisuddhiṃ paññāpentī”ti ettha hi **yakkhasaddo** satte vattati. Tathā hi yakkhopi sattopi devopi sakkopi khīṇāsavopi yakkhoyeva nāma, mahānubhāvatāya yakkhiyati saraṇagatehi janehi nānāpaccayehi nānābalīhi ca pūjīyatīti **yakkho**.

Satte deve ca sakke ca, khīṇāsave ca rakkhase;
Pañcasvetesu atthesu, **yakkhasaddo** pavattati.

Lakkha ālocane. Lakkheti, lakkhayati. Lakkhaṃ vijjhati usunā.

Mokkha āsane. Mokkheti, mokkhayati.

Rukkha phārusse. Phārusaṃ pharusabhāvo. Rukkheti, rukkhayati. Samāse “rukkhakeso, atirukkhavacano”ti rūpāni. Ettha ca “samaṇo ayaṃ pāpo atirukkhavāco”ti pāli nidassanaṃ. Tattha **atirukkhavācoti** atipharusavacanoti attho.

Khakārantadhāturūpāni.

Gakārantadhātu

Liṅga cittikaraṇe. Cittikaraṇaṃ vicitrabhāvakaraṇaṃ. Liṅgeti, liṅgayati, liṅgaṃ. Ettha **liṅgaṃ** nāma dīgharassakisathūlaparimaṇḍalādibhedam saṅghānanti gahaṇe atīva yujjati. Tañhi nānappakārehi vicitraṃ hoti, liṅgiyati vicittaṃ kariyati avijjātaṅhākammehi utunā vā cuṇṇādīhi vā sarīramiti **liṅgaṃ**, ajjhattasantānatiṇarukkhādikuṇḍalakarāṇḍakādīsu pavattasaṅghānavasenetam daṭṭhabbam. **Liṅgasaddo** sadde saddappavattinimutte itthibyañjane purisabyañjane saññāṇe ākāre cāti imesu atthesu dissati. Ayañhi “rukkhoti vacanaṃ liṅga”nti ettha sadde dissati. “Sataliṅgassa atthassā”ti ettha saddappavattinimutte. “Tena kho pana samayena aññatarassa bhikkhuno itthiliṅgaṃ pātubhavatī”ti ettha itthibyañjane. “Purisaliṅganimitakuttākappāna”nti ettha purisabyañjane. “Tena liṅgena jānāma, dhuvam buddho bhavissatī”ti ettha saññāṇe. “Tehi liṅgehi tehi nimittehi tehi ākārehi āgantukabhāvo jānitabbo “āgantukā ime”ti ettha ākāre dissati.

Sadde ca tannimutte ca, kāṭakoṭacikāya ca;
Lakkhaṇe ceva ākāre, **liṅgasaddo** pavattati.

Maga anvesane. Mageti, magayati. Migo, mago, mago, magayamāno.

Ettha ca “yathā bilāro mūsikaṃ magayamāno”ti pāli nidassanaṃ. “Migo”ti ca “mago”ti ca catuppado pavuccati. Ettha **migoti** magayati ito cito gocaraṃ anvesati pariyesatīti migo. Evaṃ **mago**. Ettha visesato hariṇa migo migo nāma. Sāmaññato pana avasesāpi catuppadā “migo” icceva vuccanti. Tathā hi **susīmajātaka** “kāḷā migā setadantā tava ime, parosahassaṃ hemajālābhisañchannā”ti etasmim pāḷippadesa hatthinopi **migasaddena** vuttā “kāḷamigā”ti. Atha vā magiyati jīvitakappanattāya maṃsādīhi atthikehi luddehi anvesiyati pariyesiyatīti **migo**, araññajātā sasapasadahariṇeṇeyyādayo catuppādā, evaṃ mago. “Atthaṃ na labhate mago”ti ettha pana mago viyāti mago, bāloti attho.

Magga gavesane. Maggeti, maggayati. Maggo, magganam.

Ettha ca **maggoti** paṭipadāya ca pakatimaggassa ca upāyassa ca adhivacanaṃ. “Mahāvihāravāsīnaṃ, vācanāmagganissita”ntiādīsu pana kathāpabandhopi “maggo”ti vuccati. Tatra paṭipadā ekantato jātijarābyādhidukkhādīhi pīḷitehi sattehi dukkhakkhayaṃ nibbānaṃ pāpuṇattāya maggitabbo gavesitabboti **maggo**. Pakatimaggo pana maggamūlḥehi maggitabboti **maggo**. Pakatimaggamūlḥehi ca paṭipadāsaṅkhātāriyamaggamūlḥā eva bahavo santi. Pakatimaggo hi

kadāci eva addhikānaṃ muyhati, ‘‘esa maggo’’ti nāyakā na dullabhā. Ariyamaggo pana sabbadāyeva sabbalokassa muyhati, nāyakā paramadullabhā. Tasmā so eva avijjāsammūlhehi maggitabboti **maggo**. Aññesaṃ pana dvinnaṃ dhātūnaṃ vasenapi atthaṃ vadanti garū ‘‘kilese mārento gacchatīti maggo’’ti. Taṃ taṃ kiccaṃ hitaṃ vā nipphādetukāmehi maggiyati gavesiyatīti **maggo**, upāyo. **Maggasaddo** hi ‘‘abhidhammakathāmaggaṃ, devānaṃ sampavattayī’’ti ettha upāyepi vattati. Tathā hi **abhidhammaṭṭikāyaṃ** ‘‘**maggoti** upāyo, khandhāyatanādīnaṃ kusalādīnaṃca dhammānaṃ avabodhassa saccappaṭivedhasseva vā upāyabhāvato abhidhammakathāmaggo’’ti vutto, pabandho vā ‘‘maggo’’ti vuccati. So hi dīghattā maggo viyāti **maggo**, tasmā abhidhammakathāpabandho abhidhammakathāmaggoti vutto. Idāni pakatipaṭipadāmaggaṇaṃ nāmāni kathayāma. Tesu pakatimaggassa –

‘‘Maggo pantho patho pajjo, añjhasaṃ vaṭumā’yanam;
Addhāna’ maddhā padavī, vattani ceva santatī’’ti

Imāni nāmāni. Paṭipadāmaggassa pana –

‘‘Maggo pantho patho pajjo, añjasaṃ vaṭumā’yanam;
Nāva uttara setu ca, kullo ca bhisi saṅkamo’’ti

Anekāni nāmāni. Ettha pana keci ‘‘nāvātiādīni pakatimaggassa nāmāni’’ti vadanti, taṃ na gahetabbaṃ, pakatimaggassa kismiñcipi pālīppadesa ‘‘nāvā’’tiādīhi padehi vuttaṭṭhānābhāvato, abhidhānasatthesu ca ‘‘nāvā’’ iccādikānaṃ tadabhidhānānaṃ anāgatattā.

Ayaṃ panettha vacanattho – nāvāviyāti **nāvā**, uttaranti etenāti **uttaram**, nāvāyeva uttaranti. Ayañhi nāvāpariyāyo ‘‘taram, taraṇaṃ, poto, plavo’’ti. Imepi taṃpariyāyāyeva. Uttaram viyāti **uttaram**. Setu viyāti **setu**. Kullo viyāti **kullo**. Bhisi viyāti **bhisi**. Saṅkamo viya, saṅkamanti vā etenāti **saṅkamo**, sabbametaṃ ariyamaggasseva nāmaṃ, na pakatimaggassa. Tathā hi ‘‘dhammanāvaṃ samārūya, santāressaṃ sadevaka’’nti ca, ‘‘dhammasetuṃ daḷhaṃ katvā, nibbuto so narāsabho’’ti ca, ‘‘kullo’’ti kho bhikkhave ariyamaggasettaṃ adhivacana’’nti ca evamādinā tattha tattha bhagavatā ariyamaggo ‘‘nāvā’’tiādīhi anekehi nāmehi vutto. Aṭṭhakathācariyehipi **suttanipātaṭṭhakathāyaṃ** ‘‘baddhā bhisi susaṅkhatā bhagavā’’ti etasmiṃ padese evaṃ atthasaṃvaṇṇanā katā ‘‘bhisīti pattharivā puthulaṃ katvā baddhā ‘kullā’’ti vuccati loke, ariyassa vinaye pana ariyamaggo’ti.

‘‘Maggo pajjo patho pantho, añjasaṃ vaṭumā’yanam;
Nāvā uttara setu ca, kullo ca bhisi saṅkamo;
Addhānaṃ pabhavo’cceva, tattha tattha pakāsito’’ti.

Evam ācariyehi katāya atthasaṃvaṇṇanāya dassanato ca ‘‘nāvātiādīnīpi pakatimaggassa nāmāni’’ti vacanaṃ na gahetabbaṃ, yathāvuttameva vacanaṃ gahetabbaṃ.

Koci panettha evaṃ vadeyya ‘‘dhammasetuṃ daḷhaṃ katvā’’ti ettha ‘dhammasetunti maggasetu’nti vacanato **dhammasaddo** magge vattati, na **setusaddo**’ti. Tanna, **dhammasaddo** viya **setusaddopi** magge vattatīti setu viyāti setu, dhammo eva setu dhammasetūti atthavasena, esa nayo aññatrāpi. Aparampi vadeyya ‘‘nanu **brahmajālasuttantaṭṭhakathāyaṃ** ‘dakkhiṇuttarena bodhimaṇḍaṃ pavisitvā assatthadumarājānaṃ padakkhiṇaṃ katvā pubbuttarabhāge ṭhito’’ti imasmiṃ ṭhāne **dakkhiṇuttarasaddena** dakkhiṇo maggo vutto’’ti. Na, anekesu pālīppadesesu aṭṭhakathāpadesesu ca abhidhānasatthesu ca maggavācakassa **uttarasaddassa** anāgatattā, tasmā tattha evamattho daṭṭhabbo ‘‘dakkhiṇadisato gantabbo uttaradisābhāgo dakkhiṇuttaroti vuccati, evaṃbhūtena dakkhiṇuttarena bodhimaṇḍapavisanaṃ sandhāya dakkhiṇuttarena bodhimaṇḍaṃ pavisitvāti vutta’’nti. Atha vā **dakkhiṇuttarenāti** dakkhiṇapacchimuttarena, ettha ādiavasānaggahaṇena majjhassapi gahaṇaṃ daṭṭhabbaṃ. Evam gahaṇaṃyeva hi yaṃ **jātakanidāne** vuttaṃ ‘‘bodhisatto tiṇaṃ gahetvā bodhimaṇḍaṃ ārūya dakkhiṇadisābhāge uttarābhimukho aṭṭhāsi, tasmīṃ khaṇe dakkhiṇacakkavāḷaṃ osīditvā heṭṭhā avīcisampattaṃ viya ahoṣi, uttaracakkavāḷaṃ ullaṅghitvā upari bhavaggappattaṃ viya ahoṣi, bodhisatto idaṃ sambodhipāpunaṭṭhānaṃ na bhavati

maññeti padakkhiṇaṃ karonto pacchimadisābhāgaṃ gantvā puratthābhimukho aṭṭhāsī”tiādi, tena sameti. Athāpi vadeyya “yadi **uttarasaddo** disāvācako, evañca sati “dakkhiṇuttarenā”ti **enayogaṃ** avatvā “dakkhiṇuttarāyā”ti **āyayogo** vattabbo”ti. Tanna, disāvācakassapi saddassa “uttarena nadī sītā, gambhīrā duratikkamā”ti **enayogavasena** vacanato. Apica disābhāgaṃ sandhāya “dakkhiṇuttarenā”ti vacanaṃ vuttaṃ. Disābhāgo hi disā evāti niṭṭhametthāvagantabbaṃ.

Gakārantadhāturūpāni.

Ghakārantadhātu

Lighi bhāsane. Laṅgheti, laṅghayati. Etāni buddhavacane appasiddhānipi lokikappayogadassanavasena āgatāni. Sāsanasmīhi **bhūvādigaṇacurādi**gaṇapariyāpanassa gatyatthavācakaullaṅghanatthaparidīpakassa dhātussa rūpaṃ atīva pasiddhaṃ.

Laṅgha laṅghane. Laṅgheti, laṅghayati.

“Atikara’makarā’cariya, mayhampetaṃ na ruccati;
Catutthe laṅghayitvāna, pañcamiyampi āvuto”ti

Imasmim **sattilaṅghanajātake curādi**gaṇapariyāpanassa gatyatthavācakassa ullaṅghanatthaparidīpakassa **laṅghadhātussa** “laṅghayitvā, laṅghayitvānā”ti rūpe diṭṭhēveva “laṅgheti, laṅghayati”ti rūpāni diṭṭhāni eva honti. Bhāsattavācakassa pana tathārūpāni rūpāni na diṭṭhāni, evaṃ santēpi pubbācariyehi dīghadassīhi abhimatattā bhāsattavācikaṃ **laṅghadhātu** atthīti gahetabbā, evaṃ sabbesupi **bhūvādigaṇādisu** sāsane appasiddhānampi rūpānaṃ sāsānānukūlānaṃ gahaṇaṃ veditabbaṃ, ananukūlānañca appasiddhānaṃ chaḍḍanaṃ.

Agha pāpakaraṇe. Agheti, aghayati. Aghaṃ, agho, anagho.

Tattha **aghanti** dukkhaṃ. “Aghantaṃ paṭisevissaṃ. Vane vālamigākīṇṇe. Khaggadīpinisevite”ti idaṃ nidassanaṃ. **Aghoti** kilesa. Tena aghena arahā anagho. Tattha aghayanti pāpaṃ karonti sattā etenāti **aghaṃ**, kintaṃ? Dukkhaṃ, evaṃ **agho**. Nanu ca sappurisā dukkahetupi kilesahetupi ca attano sukhatthāya pāpaṃ na karonti. Tathā hi –

“Na paṇḍitā attasukhassa hetu,
Pāpāni kammāni samācaranti;
Dukkheṇa phutṭhā khalitāpi santā,
Chandā ca dosā na jahanti dhamma”nti

Vuttaṃ. Evaṃ sante kasmā “**agha pāpakaraṇe**”ti dhātu ca “aghayanti pāpaṃ karonti sattā etenāti **agha**”ntiādivacanañca vuttanti? Saccam, yebhuyyena pana sattā dukkhādihetu pāpakammaṃ karonti, etesu sappurisā eva na karonti, itare karonti. Evaṃ pāpakaraṇassa hi dukkhaṃ kilesa ca hetu. Tathā hi –

Sukhīpi heke na karonti pāpaṃ,
Avaṇṇasaṃsaggabhayā puneke;
Pahū samāno vipulathacintī,
Kiṃkāraṇā me na karosi dukkha”nti

Vuttaṃ. Ayañhi gāthā dukkahetupi sattā pāpaṃ karontīti etamatthaṃ dīpeti. “Kuddho hi pitaraṃ hanti, kuddho hanti samātara”nti ayaṃ pana kilesahetupi pāpaṃ karontīti etamatthaṃ dīpeti, tasmā amhehi “**agha pāpakaraṇe**”tiādivacanaṃ vuttaṃ.

Ghakārantadhāturūpāni.

Cakārantadhātu

Loca dassane. Loceti, locayati. Locanaṃ. Rūpārammaṇaṃ locayati passatīti **locanaṃ**, cakkhu.

Kici maddane. Kiñceti, kiñcayati. Kiñcanaṃ, akiñcano.

Tattha **kiñcananti** palibodho. Kiñceti satte maddatīti **kiñcanaṃ**. **Kiñcanasaddo** maddanathe vattati. Manussā hi vīhiṃ maddantā goṇaṃ “kiñcehi kāpila, kiñcehi kāpilā”ti vadanti.

Paci vitthāre. Pañceti, pañcayati. Papañceti, papañcayati. Papañcā.

Ettha **papañcā**ti taṇhāmānadiṭṭhiyo. Etā hi attanissitānaṃ sattānaṃ samsāraṃ papañcenti vitthinnaṃ karontīti papañcāti vuccanti. Atha vā papañcenti yattha sayaṃ uppannā taṃsantānaṃ vitthārenti ciraṃ ṭhapentīti **papañcā**. Lokiyā pana “amhākaṃ tumhehi saddhiṃ kathentānaṃ papañco hotī”tiādīni vadantā kālassa cirabhāvaṃ papañcoti vadanti, sāsane pana dvayampi labbhati.

Sicca kuḍḍane. Sicceti, siccayati.

Vañcu palambhane. Palambhanaṃ upalāpanaṃ. Vañceti, vañcayati. Vañcako, vañcanaṃ. **Bhūvādigaṇe** pana **vañcadhātu** gatyatthe vattati. “Santi pādā avañcanā”ti hi pāḷi

Cacca ajjhayane. Cacceti, caccayati.

Cu cavane. Cāveti, cāvayati. Añño “**cu** sahane” iti brute. Cāveti, cāvayati, sahatīti attho.

Añcu visesane. Añceti, añcayati.

Loca bhāsāyaṃ. Loceti, locayati. Locanaṃ, locayati samavisamaṃ ācikkhantaṃ viya bhavatīti **locanaṃ**, cakkhu.

Raca patiyatane. Raceti, racayati. Racaṇā, viracitaṃ, kesaracaṇā, gāthāraṇā.

Sūca pesuñṇe. Pisunaḥbhāvo **pesuñṇaṃ**. Sūceti, sūcayati. Sūcako.

Pacca saṃyamane. Pacceti, paccayati.

Rica viyojanasampajjanesu. Receti, recayati. Setṭhiputtaṃ vireceyya. Vireceti, virecayati. Virecako, virecanaṃ.

Vaca bhāsane. Vaceti, vacayati. **Bhūvādigaṇepi** ayaṃ vattati. Tadā tassā “vatti, vacati, avoca, avocu”ntiādīni rūpāni bhavanti. Kārite pana “antevāsikaṃ dhammaṃ vāceti, vācayati”ti rūpāni. Vattuṃ, vattave, vatvā, vuttaṃ, vuccati.

Acca pūjāyaṃ. Acceti, accayati. Brahmāsurasuraccito.

Sūca gandhane. Suceti, sūcayati. Sūcako, suttaṃ.

Ettha ca attatthaparathādībhede atthe sūcetīti **suttaṃ**. Tepiṭakaṃ buddhavacanaṃ.

Kaca dittiyaṃ. Kacceti, kaccayati. Kacco.

Ettha **kaccoti** rūpasampattiyā kacceti dibbati virocātīti **kacco**, evaṃnāmako ādipuriso, tabbamse jāta purisā “kaccānā”tipi “kaccāyanā”tipi “kātiyānā”tipi vuccanti, itthiyo pana “kaccānī”tipi

“kaccāyanī”’tipi “kātiyānī”’tipi vuccanti.

Chakārantadhāturūpāni.

Chakārantadhātu

Milecha abyattāyaṃ vācāyaṃ. Mileccheti, milecchayati. Milakkhu.

Ettha **milakkhūti** mileccheti abyattavācam bhāsātīti milakkhu.

Kuccha avakkhepe. Avakkhepo adhokhipanaṃ. Kuccheti, kucchayati.

Viccha bhāsāyaṃ. Viccheti, vicchayati.

Chakārantadhāturūpāni.

Jakārantadhātu

Vajja vajjane. Vajjeti, vajjayati. Parivajjanako. Vajjito sīlavantehi, kathaṃ bhikkhu karissasīti.

Tujja balapālanesu. Tujjeti, tujjayati.

Tuji piḍi hiṃsābaladānaniketanesu. Niketanaṃ nivāso. Tuñjeti, tuñjayati. Piñjeti. Piñjayati.

Khaji kicchajīvane. Khañjeti, khañjayati. Khañjo.

Khaji rakkhaṇe. Tādisāniyeva rūpāni. **Bhūvādigāṇe** “**khaji** gativekalleti imissā “khañjatī”’ti rūpaṃ.

Pūja pūjāyaṃ. Pūjeti, pūjayati. Pūjā. Esāva pūjanā seyyo. Pūjako, pūjito, pūjanīyo, pūjaneyyo, pūjetabbo, pūjjo.

Gaja maddanasaddesu. Gajeti, gajayati. Gajo.

Tija nisāne. Tejeti, tejayati.

Vaja magganasaṅkhāresu. Vajeti, vajayati.

Tajja santajjane. Tajjeti, tajjayati. Santajjeti, santajjayati. Santajjito.

Ajja paṭisajjane. Ajjeti, ajjayati.

Sajja sajjane. Sajjeti, sajjayati dānaṃ. Gamanasajjo hutvā.

Bhaja vissāse. Bhajeti, bhajayati. **Bhūvādigāṇe** pana “bhajatī”’ti rūpaṃ, bhatti, sambhatti.

Tuji piḍi luji bhaji bhāsāyaṃ. Tuñjeti, tuñjayati. Piñjeti, piñjayati. Luñjeti, luñjayati. Bhañjeti, bhañjayati. Kathetīti attho.

Ruja hiṃsāyaṃ. Rojeti, rojayati. Rogo.

Bhāja puthakammaṃ. Puthakammaṃ puthakkaraṇaṃ, visuṃ kriyāti attho. Bhājeti, bhājayati. Vibhājeti, vibhājayati. Vibhatti.

Sabhāja sītisevanesu. Sabhājeti, sabhājayati.

Laja pakāsane. Lajeti, lajayati. Lājā.

Yuja saṃyamane. Saṃpubbo bandhane. Yojeti, yojayati. Saṃyojeti, saṃyojayati. Saṃyojanam.

Majja soceyyālaṅkāresu. Majjeti, majjayati. Sammajjeti, sammajjayati. Sammajjā.

Bhāja bhājanadānesu. Bhājeti, bhājayati. Kathaṃ vessantaro putto, gajaṃ bhājeti sañcaya.

Jakārantadhāturūpāni.

Jhañantā appasiddhā. Saddasatthe pana “**ñā** niyojane”ti paṭhanti, rūpaṃ pana buddhavacanānukūlaṃ na bhavati, tasmā na dassitaṃ amhehi.

Ṭakārantadhātu

Ghaṭṭa ghaṭṭane. Ghaṭṭanam vāyāmakaraṇam. Ghaṭṭeti, ghaṭṭayati. Ettha tu “ghaṭṭesi, ghaṭṭesi, kiṃkāraṇā ghaṭṭesi, ahaṃ taṃ jānāmi”ti nidassanam.

Ghaṭa saṅghāte. Pubbe viya kriyāpadāni, nāmikatte “ghaṭo, ghaṭā”ti rūpāni. Ettha **gaṭoti** pāṇiyaghaṭo. **Ghaṭāti** samūho “macchaghaṭā”tiādīsu viya.

Ghaṭṭa calane. Ghaṭṭeti, ghaṭṭayati.

Naṭa avasandane. Avasandanam gattavikkhepo. Naṭeti, naṭayati.

Cuṭa chuṭa kuṭṭa chedane. Cuṭeti, cuṭayati. Chuṭeti, chuṭayati. Kuṭṭeti, kuṭṭayati.

Puṭṭa caṭṭa appabhāve. Puṭṭeti, puṭṭayati. Cuṭṭeti, cuṭṭayati, appaṃ bhavatīti attho.

Muṭa sañcuṇṇane. Moṭeti, moṭayati.

Aṭṭa suṭṭa anādare. Aṭṭeti, aṭṭayati. Suṭṭeti, suṭṭayati.

Khaṭṭa saṃvaraṇe khaṭṭeti, khaṭṭayati.

Saṭṭa hiṃsābaladānaniketanesu. Saṭṭeti, saṭṭayati.

Tuvaṭṭa nipajjāyam. Tuvaṭṭeti, tuvaṭṭayati. Chabbaggiyā bhikkhū ekamañce tuvaṭṭenti.

Chaṭṭa chaṭṭane. Chaṭṭeti, chaṭṭayati. Atrāyaṃ pāḷi – sace so chaṭṭeti, iccetaṃ kusalaṃ. Noce chaṭṭeti, pañcahaṅgehi samannāgato bhikkhu rūpiyachaṭṭako sammannitabbo.

Puṭa hiṃsāyam. Poṭeti, poṭayati.

Kīṭa bandhe. Bandho bandhanam. Kīṭeti, kīṭayati. Kīṭo.

Cuṭi chedane. Cuṭṭeti, cuṭṭayati.

Luṭi theyye. Luṭṭeti, luṭṭayati.

Kūṭa appasāde. Kūṭeti, kūṭayati. Kūṭaṃ rajataṃ. Kūṭā gāvī. Kuṭatāpaso.

Cuṭa puṭa phuṭa vibhede. Cuṭeti, cuṭayati. Poṭeti, poṭayati. Phoṭeti, photoṭayati. Aṅguliyo photoṣuṃ.

Ghaṭa saṅghāṭe hantyatthe ca. Ghaṭeti, ghaṭayati.

Paṭa puṭa luṭa ghaṭa ghaṭi bhāsāyaṃ. Pāṭeti, pāṭayati. Poṭeti, poṭayati. Loṭeti, loṭayati. Ghāṭeti, ghāṭayati. Ghaṅṭeti, ghaṅṭayati.

Paṭa vaṭa ganthe. Paṭeti, paṭayati. Vaṭeti, vaṭayati.

Kheṭa bhakkhaṇe. Kheṭeti, kheṭayati.

Khoṭa khepe. Khoṭeti, khoṭayati.

Kuṭi dāhe. Kuṭeti, kuṭayati.

Yuṭa saṃsagge. Yoṭeti, yoṭayati.

Vaṭa vibhajane. Vaṭeti, vaṭayati.

Ṭakārantadhāturūpāni.

Ṭhakārantadhātu

Saṭha saṅkhāragatīsu. Saṭheti, saṭhayati.

Suṭha ālasiye. Soṭheti, soṭhayati.

Suṭhi sosane. Suṅṭheti, suṅṭhayati.

Saṭha silāghāyaṃ. Saṭheti, saṭhayati.

Saṭha asammābhāsane. Saṭheti. Saṭhayati, saṭho.

Ettha saṭhoti kerāṭiko. Saṭhayatīti saṭho, na sammā bhāsātīti attho.

Saṭha ketave. Rūpaṃ tādisameva.

“Sudassaṃ vajjamaññesaṃ, attano pana duddasaṃ...pe...
Attano pana chādeti, kalimva kitavāsaṭho”ti.

Ettha sākuṇiko “kitavā”ti vutto. Tassa idaṃ ketavaṃ, tasmimṃ ketave ayaṃ dhātu vattatīti attho.

Kaṭhi soke. Kaṅṭheti, kaṅṭhayati.

Ṭhakārantadhāturūpāni.

Ḍakārantadhātu

Paṭi parihāse. Paṇḍeti, paṇḍayati. Uppaṇḍeti, uppaṇḍayati. Manussānaṃ naṃ bhikkhuniṃ uppaṇḍimsu.

Laḍi ukkhepe. Laḍeti, laḍayati.

Khaḍi kaḍi chede. Khaḍeti, khaḍayati. Kaḍeti, kaḍayati. Khaḍo, kaḍo.

Piḍi saṅghāte. Piḍeti, piḍayati. Piḍo.

Ettha ca **piḍoti** samūhasaṅkhāto kalāpopi “coḷaṃ piḍo rati khiḍḍā”ti ettha vutto āhārasaṅkhāto piḍopi piḍoyeva.

Kuḍi vedhane. Kuḍeti, kuḍayati. Kuḍalaṃ.

Maḍi bhūsāyaṃ hasane ca. Maḍeti, maḍayati. Maḍo, maḍanaṃ, maḍito.

Bhaḍi kalyāṇe. Kalyāṇaṃ kalyāṇatā. Bhaḍeti, bhaḍayati. Bhaḍo.

Ettha ca **bhaḍoti** dhanam, alaṅkāro vā. “Bhaḍaṃ gaṅhāti. Samalaṅkaritvā bhaḍenā”ti ca ādīsu viya.

Daṅḍa daṅḍavinipāte. Daṅḍeti, daṅḍayati. Daṅḍo.

Chaḍḍa chaḍḍane. Chaḍḍeti, chaḍḍayati. Chaḍḍanaḷo. Chaḍḍiyati, chaḍḍito. Chaḍḍituṃ, chaḍḍayituṃ, chaḍḍetvā, chaḍḍayitvā.

Dakārantadhāturūpāni.

Dhakārantadhātu

Vaḍḍha ākiraṇe. Kaṃsapātiyā pāyāsaṃ vaḍḍheti, vaḍḍhayati. Bhattaṃ vaḍḍhetvā adāsi.

Imāni **ḍhakārantadhāturūpāni.**

Ṇakārantadhātu

Vaṇṇa vaṇṇakriyāvithhāraguṇavacanesu. Vaṇṇo pasamsā. **Kriyā** karaṇaṃ. **Vithhāro** vitthinnatā. **Guṇo** silādiddhammo. **Vacanaṃ** vācā. Vaṇṇeti, vaṇṇayati. Vaṇṇo, vaṇṇaṃ, suvaṇṇaṃ, saṃvaṇṇanā.

Vaṇṇasaddo chavithutikulavaggakāraṇasaṅghānapamāṇarūpāyatanādīsu dissati. Tattha “suvaṇṇavaṇṇosi bhagavā”ti evamādīsu chaviyaṃ. “Kadā saññūlḥā pana te gahapati samaṇassa gotamassa vaṇṇā”ti evamādīsu thutiyāṃ. “Cattārome bho gotama vaṇṇā”ti evamādīsu kulavagge. “Atha kena nu vaṇṇena, gandhathenoti vuccatī”ti evamādīsu kāraṇe. “Mahantaṃ hatthirājavaṇṇaṃ abhinimminivā”ti evamādīsu saṅghāne. “Tayo pattassa vaṇṇā”ti evamādīsu pamāṇe. “Vaṇṇo gandho raso ojā”ti evamādīsu rūpāyataneti.

Tattha **chaviyanti** chavigatā vaṇṇadhātu eva “suvaṇṇavaṇṇo”ti ettha **vaṇṇaggahaṇena** gahitāti apare. Vaṇṇanaṃ kittiyā ugghosananti **vaṇṇo**, thuti. Vaṇṇiyati asaṅkarato vavatthapiyatīti **vaṇṇo**, kulavaggo. Vaṇṇiyati phalaṃ etena yathāsabhāvato vibhāviyatīti **vaṇṇo**, kāraṇaṃ, vaṇṇaṃ dīgharassādivasena saṅghānananti **vaṇṇo**, saṅghānaṃ. Vaṇṇiyati aḍḍhamahantādivasena pamiyatīti **vaṇṇo**, pamāṇaṃ. Vaṇṇeti vikāramāpajjamānaṃ hadayaṅgatabhāvaṃ pakāsetīti **vaṇṇo**, rūpāyanaṃ. Evaṃ tena tena pavattinimittena **vaṇṇasaddassa** tasmim tasmim atthe pavatti veditabbā.

Aparampi **vaṇṇasaddassa** atthuddhāraṃ vadāma. **Vaṇṇasaddo** saṅghānajāti rūpāyatanakāraṇapamāṇaguṇapasamsājātarūpapuḷinakkharādīsu dissati. Ayañhi “mahantaṃ

sapparājavannaṃ abhinimminivā”tiādīsu saṅghāne dissati, “brāhmaṇova seṭṭho vaṇṇo, hīno añño vaṇṇo”tiādīsu jātiyaṃ. “Paramāya vaṇṇapokkharatāya samannāgato”tiādīsu rūpāyatane.

“Na harāmi na bhañjāmi, ārā siṅghāmi vāriyaṃ;
Atha kena nu vaṇṇena, gandhathenoti vuccatī”ti

Ādīsu kāraṇe. “Tayo pattassa vaṇṇā”tiādīsu pamāṇe. “Kadā saññūlhā pana te gahapati samaṇassa gotamassa vaṇṇā”tiādīsu guṇe. “Vaṇṇārahassa vaṇṇaṃ bhāsati”tiādīsu pasamsāyaṃ. “Vaṇṇaṃ añjanavaṇṇena, kāliṅgamhi vanimhase”ti ettha jātarūpe. “Akilāsuno vaṇṇapathe khaṇantā”ti ettha puḷine. “Vaṇṇāgamo vaṇṇavipariyāyo”tiādīsu akkhare dissati. Icevaṃ sabbathāpi –

Chaviyaṃ thutiyāṃ heme, kulavagge ca kāraṇe;
Saṅghāne ca pamāṇe ca, rūpāyatanajātisu;
Guṇakkhāresu puḷine, **vaṇṇasaddo** pavattati;

Suvaṇṇasaddo chavisampattigarulajātarūpesu āgato. Ayañhi “suvaṇṇe dubbaṇṇe, sugate duggate”ti, “suvaṇṇatā sussaratā”ti ca evamādīsu chavisampattiyaṃ āgato. “Kākaṃ suvaṇṇā parivārayantī”tiādīsu garuḷe. “Suvaṇṇavaṇṇo kañcanasannibhattaco”tiādīsu jātarūpeti.

Puṇa saṅghāte. Puṇeti, puṇayati.

Cuṇa saṅkocane. Cuṇeti, cuṇayati.

Cuṇṇa peraṇe. Cuṇṇeti, cuṇṇayati. Cuṇṇaṃ. Cuṇṇavicuṇṇaṃ karoti.

Saṇa dāne. Saṇeti, saṇayati.

Kuṇa saṅkocane. Kuṇeti, kuṇayati. Kuṇo. Kuṇahattho. Hatthena kuṇī.

Tūṇa pūraṇe. Tūṇeti, tūṇayati. Tūṇī.

Ettha **tūṇī**ti sarakalāpo. Sā hi tūṇenti pūrenti sare etthāti tūṇī.

Bhūṇa bhāsāyaṃ. Bhūṇeti, bhūṇayati.

Kaṇa nimilane. Kāṇeti, kāṇayati. Kāṇo.

Ettha **kāṇoti** ekena vā dvīhi vā akkhīhi parihīnakkhi. **Aṭṭhakathācariyā** pana “**kāṇo** nāma ekakkhinā kāṇo, **andho** nāma ubhayakkhikāṇo”ti vadanti, taṃ **kāṇandhasaddānaṃ** ekatthasannipāte yujjati. Itarathā **kāṇakacchapopamasutte** vutto kacchapo ekasmiṃ kāṇo siyā, ekakkhikāṇo ca pana puriso “andho”ti na vattabbo siyā, tasmā tesamayugaḷatte ekekassa yathāsambhavaṃ dvinnaṃ dvinnamākārānaṃ vācakatā datṭhabbā. Tathā hi **kosalasamṃyuttaṭṭhakathāyaṃ** “**kāṇoti** ekacchikāṇo vā ubhayacchikāṇo vā”ti vuttaṃ. Atha vā “ovadeyyānusāseyyā”ti ettha ovādānusāsanānaṃ viya savisesatā avisesatā ca datṭhabbā.

Gaṇa saṅkhyāne. Gaṇeti, gaṇayati. Gaṇanā, gaṇo.

Ettha **gaṇanā**ti saṅkhyā. **Gaṇoti** bhikkhusamūho. Yesaṃ vā kesañci samūho. Samūhassa ca anekāni nāmāni. Seyyathidaṃ –

Saṅgho gaṇo samūho ca,
Khandho sannicayo cayo;
Samuccayo ca nicayo,
Vaggo pūgo ca rāsi ca.

Kāyo nikāyo nikaro,
Kadambo visaro ghaṭā;
Samudāyo ca sandeho,
Saṅghāto samayo karo.

Ogho puñjo kalāpo ca,
Piṇḍo jālañca maṇḍalam;
Saṇḍo pavāho iccete,
Samūhatthābhīdhāyakāti.

Kiñcāpi ete **saṅghagaṇasamūhā**dayo saddā samūhatthavācakā, tathāpi **saṅghagaṇas**saddāyeva vināpi visesakapadena bhikkhusamūhe vattanti, nāññe, aññe pana **saṅghagaṇas**addehi saddhiṃ aññamaññañca kadāci samānatthavisayā honti, kadāci asamānatthavisayā, tasmā yathāpāvacaṇaṃ asammuyhantena yojetabbā. “Eko, dve”tiādinā gaṇetabboti **gaṇo**.

Kaṇṇa savane. Kaṇṇeti, kaṇṇayati. Kaṇṇo. Kaṇṇayanti saddaṃ suṇanti etenāti **kaṇṇo**, yo loke “savaṇaṃ, sota”nti ca vuccati.

Kuṇa guṇa āmantane. Kuṇeti, kuṇayati. Guṇeti, guṇayati. Guṇo. Goṇo.

Ettha **guṇoti** sīlādayo dhammā, kenatṭhena te guṇā. Goṇāpiyati āmantāpiyati attani patiṭṭhito puggalo daṭṭhuṃ sotuṃ pūjituñca icchantehi janehīti guṇo. Ettha kiñcāpi sīlādidhammānaṃ āmantāpanaṃ natthi, tathāpi taṃhetuāmantanaṃ nimantanañca teyeva karonti nāmāti evaṃ vuttaṃ. Tathā hi –

“Yathāpi khettsampanne,
Bījaṃ appampi ropitaṃ;
Sammā dhāraṃ pavassante,
Phalaṃ toseti kassaka”nti

Ettha kassakassa tuṭṭhiuppattikāraṇattā hetuvasena niccetanassapi phalassa tosaṇaṃ vuttaṃ, evamidhāpi āmantāpanakāraṇattā evaṃ vuttaṃ. Aññe pana “guṇjante abyayante itī guṇā”ti atthaṃ vadanti. Tadanurūpaṃ pana dhātusaddaṃ na passāma, “**guṇa āmantane**” icceva passāma, vicāretvā gahetabbāṃ.

Vaṇa gattavicuṇṇane. Vaṇeti, vaṇayati. Vaṇo.

Ettha **vaṇoti** aru. Sā hi sarīraṃ vaṇayati vicuṇṇeti chiddāvachiddaṃ karotīti vaṇoti vuccati.

Paṇṇa harite. Paṇṇeti, paṇṇayati. Tālapaṇṇaṃ. Sūpeyyapaṇṇaṃ.

Ettha ca haritabhāvavigatepi vatthusmiṃ paṇṇabhāvo rūḷhito pavattoti daṭṭhabbo. “Paṇṇaṃ, pattaṃ, palāso, dalaṃ” iccete samānatthā.

Paṇa byavahāre. Paṇeti, paṇayati. Rājā ca daṇḍaṃ garukaṃ paṇeti.

Imāni **ṇakārantadhāturūpāni**.

Takārantadhātu

Cinta cintāyaṃ. Cinteti, cintayati. Cittaṃ, cintā, cintanā, cintanako. Kārite “cintāpeti, cintāpayatī”ti rūpāni.

Tattha **cittanti** ārammaṇaṃ cintetīti cittaṃ, vijānātīti attho, sabbacittasādhāraṇavasaneṭaṃ

daṭṭhabbaṃ. Ettha siyā – kasmā “ārammaṇaṃ cintetīti citta”nti vatvāpi “vijānātīti attho”ti vuttaṃ, nanu cintanavijānanā nānāsabhāvā. Na hi “cintetī”ti padassa “vijānātī”ti attho sambhavati, duppaññassa hi nānappakārehi cintayatopi sukhumatthādhigamo na hotīti? Saccam, “vijānātī”ti idaṃ padaṃ cittassa saññāpaññākiccehi visiṭṭhavisayaggahaṇaṃ dīpetuṃ vuttaṃ sabbacittasādhāraṇattā **cittasaddassa**. Yañhi dhammajātaṃ “citta”nti vuccati, tadeva viññāṇaṃ, tasmā vijānanatthaṃ gahetvā saññāpaññākiccāvisiṭṭhavisayaggahaṇaṃ dīpetuṃ “vijānātī”ti vuttaṃ.

Idāni aññaganikadhātuvasenapi nibbacaṇaṃ pakāsayāma – sabbesu cittesu yaṃ lokiyakusalākusalamahākriyacittaṃ, taṃ javanavīthivasena attano santānaṃ cinotīti **cittaṃ**, vipākaṃ kammakilesehi citanti **cittaṃ**, idaṃ **cidhātuvasena** nibbacaṇaṃ. Yaṃ kiñci loke vicittaṃ sippajātaṃ, sabbassa tassa citteneva karaṇato citteti vicitteti vicittaṃ kariyati etenāti **cittaṃ**, cittakaraṇatāya cittanti vuttaṃ hoti, idaṃ **cittadhātuvasena** nibbacaṇaṃ. Cittatāya cittaṃ, idaṃ pāṭipadikavasena nibbacaṇaṃ. Tenāhu **aṭṭhakathācariyā** “sabbampi yathānurūpato cittatāya cittaṃ, cittakaraṇatāya cittanti evamettha attho veditabbo”ti.

Ettha hi cittassa sarāgasadosādibhedabhinnattā sampayuttabhūmiārammaṇahīnamajjhimaṇṇatīdhīpatīnaṃ vasena cittassa cittaṭā veditabbā. Kiñcāpi ekassa cittassa evaṃ vicittatā natthi, tathāpi vicittānaṃ antogadhattā samudāyavohārena avayavopi “citta”nti vuccati, yathā pabbatanadīsamuddādiekadesesu diṭṭhesu pabbatādayo diṭṭhāti vuccanti. Tenāhu **aṭṭhakathācariyā** “kāmañcettha ekameva evaṃ cittaṃ na hoti, cittaṇaṃ pana antogadhattā etesu yaṃ kiñci ekampi cittaṭāya ‘citta’nti vattuṃ vaṭṭati”ti.

Ettha ca vuttappakārānamatthānaṃ vinicchayo bavati. Kathaṃ? Yasmā yattha yattha yathā yathā attho labbhati, tattha tattha tathā tathā gahetabbo. Tasmā yaṃ āsevanapaccayabhāvena cinoti, yañca kammunā abhisankhatattā citaṃ, taṃ tena kāraṇena cittanti vuttaṃ. Yaṃ pana tathā na hoti, taṃ parittakriyadvayaṃ antimajavanañca labbhamānacintanavicittatādivasena cittanti veditabbaṃ, hasituppādo pana aññajavanagatikoyevāti.

Imāni cittassa nāmāni –

Cittaṃ mano mānasañca, viññāṇaṃ hadayaṃ manañca;
Nāmānetāni vohāra-pathe vattanti pāyato.

Cittasaddo paññattiyam viññāṇe vicitte cittakamme acchariyeti evamādīsu atthesu dissati. Ayañhi “citto gahapati. Cittaṃāso”tiādīsu paññattiyam dissati. “Cittaṃ mano mānasa”ntiādīsu viññāṇe. “Vicittavattābhāraṇā”tiādīsu vicitte. “Diṭṭhaṃ vo bhikkhave caraṇaṃ nāma citta”ntiādīsu cittakamme. “Ingha maddi nisāmehi, cittarūpaṃva dissati”tiādīsu acchariyeti.

Cita sañcetane. Ceteti, cetayati. Ratto kho brāhmaṇa rāgena abhibhūto attabyābādāyapi ceteti, parabyābādāyapi ceteti, ubhayabyābādāyapi ceteti. Ākañkhati cetayati, taṃ nisedha jutindhara. Cetanā, sañcetanā. Cetayitaṃ, cetetvā, cetayitvā. Sañcicca paṇaṃ jīvītā voropeti.

Tattha **cetanā**ti cetayatīti cetanā, saddhiṃ attanā sampayuttadhamme ārammaṇe abhisandahatīti attho. **Sañcetanā**ti upasaggavasena padaṃ vaḍḍhitaṃ. **Cetayitanti** cetanākāro. **Sañciccā**ti sayam ñatvā, cecca abhivitaritvāti attho. Imāni cetanāya nāmāni –

Sañcetanā cetayitaṃ, cetanā kammameva ca;
Kammañhi “cetanā” tveva, jinenāhacca bhāsitaṃ.

Atrāyaṃ pāli “cetanāhaṃ bhikkhave kammaṃ vadāmi, cetayitvā kammaṃ karoti kāyena vācāya manasā”ti.

Manta guttabhāsane. Manteti, mantayati, nimanteti, nimantayati, āmanteti, āmantayati. Janā saṅgama mantenti, mantayanti, mantayimṣu rahogātā. Nimantayittha rājānaṃ. Āmantayittha

devindo, visukammaṃ mahiddhikaṃ. Mantā, manto. Kārite “mantāpeti, mantāpayatī” ti rūpāni.

Ettha **mantā**ti paññā, “gavesanasaññā” tipī vadanti. **Mantoti** guttabhāsanam. “Upassutikāpi suṇanti mantam, tasmā hi manto khippamupeti bheda”nti ettha hi guttabhāsanam “manto”ti vuccati. Apica **mantoti** chaḷaṅgamanto. Vuttañca “ye mantam parivattenti, chaḷaṅgam brahmacintita”nti. Ettha sikkhā nirutti kappa byākaraṇa jotisattha chandovicitivasena manto “chaḷaṅgo”ti veditabbo. Etāni eva cha “vedaṅgāni”ti vuccanti. Vedo eva hi “manto, sutī”ti ca vutto. Atha vā **mantoti** vedādivijjā.

Yanta saṅkocane. Yanteti, yantayati. Yantam, telayantam yathācakkam, evam kampati medanī.

Satta gatiyam. Satteti, sattayati.

Santa āmappayoge. Āmappayogo nāma ussannakriyā. Santeti, santayati.

Kitta saṃsandane. Kitteti, kittayati. “Ye voham kittayissāmi, girāhi anupubbaso. Kittanā parikittanā”tiādīsu pana katthanā “kittanā”ti vuccati.

Tanta kuṭumbadhāraṇe. Tanteti, tantayati. Satanto, sappadhānoti attho.

Yata nikāropakāresu. Yateti, yatayati. Nīto ca paṭidāne, **yata**dhātu niupasaggato paro paṭidāne vattati, niyyādeti, niyyādayati. **Takārassa** pana **dakāratte** kate “niyyādeti, niyyādayati. Ratham niyyādayitvāna, aṇaṇo ehi sārathī”ti rūpāni.

Vatu bhāsāyam. Vatteti, vattayati.

Pata gatiyam. Pateti, patayati.

Vāta gatisukhasevanesu. Gati sukham sevananti tayo atthā. Tattha sukhanam **sukham.** Vātetī, vātayati. Vāto, vātapuppham. Cīvarassa anuvāto.

Keta āmantane. Keteti, ketayati. Ketako.

Satta santānakriyāyam. Santānakriyā nāma pabandhakriyā avicchedakaraṇam. Satteti, sattayati. Satto.

“Kinnu santaramānova, lāyitvā haritam tiṇam;
Khāda khādāti lapasi, gatasattam jaraggava”nti

Pāliyam pana “gatasattam jaraggava”nti pāṭhassa “vigatajīvitam jīṇṇagoṇa”nti attham saṃvaṇṇesum. Iminā **sattasaddassa** jīvitavacanam viya dissati, “na sukarā uñchena paggahena yāpetu”nti ettha **paggahasaddassa** pattakathanam viya. Suṭṭhu vicāretabbam.

Sutta avamocane. Sutteti, suttayati.

Mutta pasavane. Mutteti, muttayati. Omutteti, omuttayati. Muttam. Atrāyam pāli “mutteti ohadeti cā”ti. Tattha **muttetī**ti passāvam karoti. **Ohadetī**ti karīsam vissajjeti. Kārite “muttāpeti, muttāpayatī”ti rūpāni.

Kattara sethille. Kattareti, kattarayati. Kattaro. Kattaradaṇḍo, kattarasuppaṃ.

Tattha **kattaroti** jīṇṇo. Mahallakoti vuttam hoti. Kenatṭhena? Kattarayati aṅgānam sithilabhāvena sithilo bhavatīti atthena. **Kattaradaṇḍoti** kattarehi jīṇṇamanussehi ekantato

gahetabbatāya kattarānaṃ daṇḍo kattaradaṇḍo. Tenāhu **aṭṭhakathācariyā** “**kattaradaṇḍoti** jiṇṇakāle gahetabbadaṇḍo”’ti. **Kattarasuppanti** jiṇṇasuppaṃ. Kattarañca taṃ suppañcāti kattarasuppanti samāso.

Citta cittakarane, kadāci **dassanepi**. **Cittakaraṇaṃ** vicittabhāvakaraṇaṃ. Citteti, cittayati. Cittaṃ.

Takārantadhāturūpāni.

Thakārantadhātu

Katha kathane. Katheti, kathayati. Dhammaṃ sākacchatī. Sākacchā, kathā, parikathā, aṭṭhakathā.

Tattha **sākacchatīti** saha kathayati. Attho kathiyati etāyāti **aṭṭhakathā**, tthakārassa ṭṭhakārattaṃ.

Yāya’tthamabhivaṇṇenti, byañjanatthapadānugaṃ;
Nidānavatthusambandhaṃ, esā aṭṭhakathā matā.

“Aṭṭhakathā”’ti ca “atthasaṃvaṇṇanā”’ti ca ninnānākaraṇaṃ.

Pathi gatiyaṃ. Panthenti, panthayanti. Pantho. **Bhūvādigane** “**patha** gatiya”’nti akārantavasena kathitassa “pathati, patho”’ti niggahītāgamavajjitāni rūpāni bhavanti, idha pana ikārantavasena kathitassa saniggahītāgamāni rūpāni niccaṃ bhavantīti daṭṭhabbaṃ.

Puttha ādarānādaesu. Puttheti, putthayati.

Muttha saṅghāte. Muttheti, mutthayati.

Vattha addane. Vattheti, vatthayati.

Putha bhāsāyaṃ. Potheti, pothayati. Kathetīti attho.

Putha pahāre. Potheti, pothayati. Kumāre pothetvā agamāsi.

Katha vākyapabandhe. Katheti, kathayati. Kathā.

Satha dubbalye. Satheti, sathayati.

Attha pattha yācanāyaṃ. Attheti, atthayati. Attho. Pattheti, patthayati. Patthanā. Paṭipakkhaṃ atthayanti icchantīti **paccatthikā**.

Thoma silāghāyaṃ. Thometi, thomayati. Thomanā.

Kātha hiṃsāyaṃ. Kātheti, kāthayati.

Satha bandhane. Satheti, sathayati.

Santha gantha santhambhe. Santheti, santhayati. Gantheti, ganthayati. Gantho.

Thakārantadhāturūpāni.

Dakārantadhātu

Hada karīsussagge. Karīsussaggo karīsassa ussaggo vissajjanam. Hadeti, hadayati. Ohadeti, ohadayati.

Vida lābhe. Imasmiṃ ṭhāne **lābho** nāma anubhavanam, tasmā **vidadhātu** anubhavane vattatīti attho gahetabbo. Sukham vedanam vedeti. Dukkham vedanam vedeti. Vedayati. Vedanā, vitti. Vedayitam. Sukham vedanam vedayamāno.

Kudi anatabhāsane. Kundeti, kundayati.

Mida sinehane. Atra **sineho** nāma pīti. Medeti, medayati.

Chada samvaraṇe. Geham chādeti, chādayati. Dosam chādeti, chādayati. Paṭicchādeti, paṭicchādayati. Chattam. Channā kuṭi.

Tatra **chattanti** ātapattam. Ātapam chādetīti **chattam**. Paṭicchādiyateti **channā**.

Cuda sañcodane āṇattiyañca. Codeti, codayati. Codako, cuditako, codanā. Ānando buddhacodito.

Tatra **codanāti** cālanā. **Cālanāti** dosāropanāti attho.

Chadda vamaṇe. Chaddeti, chaddayati.

Mada vittiyoge. Madeti, madayati.

Vida cehanākhyānanivāsesu. Cehanā saññānam. **Ākhyānam** kathanam. **Nivāso** nivasanam. Vedeti, vedayati. Paṭivedeti, paṭivedayati. Paṭivedayāmi te mahārāja.

Sadda saddane. Saddeti, saddayati. Visaddeti, visaddayati. Saddo, saddito. Dīghatte “saddāyatī”ti rūpam.

Ettha ca “mam saddāyatīti saññāya vegena udake patī”ti **aṭṭhakathāpāṭho** nidassanam, idam “pabbatāyatī”ti rūpam viya dhātuvasena nipphanam na hotīti na vattabbam, dhātuvasena nipphanamyevāti gahetabbam. **Saddoti** saddiyatīti saddo, yathāvucchatīti vacanam. Atha vā saddiyati attho anenāti **saddo**. Garavo pana “sappatīti **saddo**. Udīriyati abhilapiyatīti attho”ti vadanti.

Sūda āsecane. Sūdeti, sūdayati. Sūdo.

Sūdoti bhattakārako, yo “rasako”tipi vuccati.

Kanda sātacce. Sātaccam satatabhāvo nirantarabhāvo. Kandeti, kandayati.

Muda saṃsagge. Ekatokaraṇam **saṃsaggo**. Modeti, modayati sattūni sappinā.

Nada bhāsāyam. Nādeti, nādayati. Hetukatturūpānīti na vattabbāni pālīdassanato “sīho ca sīhanādena, daddaram abhinādayī”ti. Aññatrāpi saṃsayo na kātabbo. Imasmiṃ **curādigāṇe** hetukatturūpasadisānampi suddhakatturūpanam sandissanato.

Sada assādane. Sādeti, sādayati. Assādeti, assādayati. Ettha āupasaggo rassavasena ṭhito.

Gada devasadde. Devasaddo vuccati meghasaddo. Gadedeti, gadayati.

Pada gatiyaṃ. Padeti, padayati. Padaṃ. Imissā **divādigāṇe** “pajjati”ti rūpaṃ bhavati, idha pana īdisāni.

Chidda kaṇṇabhede. Chiddeti, chiddayati. Chiddaṃ.

Chida dvedhākaṇṇe. Nanu bho yo catudhā vā pañcadhā vā anekasatadhā vā chindati, tassa taṃ chedanāṃ dvedhākaṇṇaṃ nāma na hoti, evaṃ sante kasmā sāmāññena avatvā “dvedhākaṇṇe”ti dvidhā gahaṇaṃ katanti? Dvidhākaṇṇaṃ nāma na hotīti na vattabbaṃ, anekasatadhā chedanampi dvidhākaṇṇaṃyeva. Aparassa hi aparassa chinnakoṭṭhāsassa pubbena ekena koṭṭhāsena saddhiṃ apekkhanavasena dvidhākaṇṇaṃ hotiyeva. Chedeti, chedayati.

Yo te hatthe ca pāde ca, kaṇṇanāsañca chedayi;
Tassa kujjha mahāvīra, mā raṭṭhaṃ vinassa idaṃ;

Yo me hatthe ca pāde ca, kaṇṇanāsañca chedayi;
Ciraṃ jīvatu so rājā, na hi kujjhanti mādisāti.

Chada apavāraṇe. Chādeti, chādayati. Chattaṃ. Purisassa bhattaṃ chādayati.

Īdī sandīpane. Īdeti, īdayati. Īkārantavasena niddiṭṭhattā saniggahītāgamāni rūpāni na bhavanti.

Adda hiṃsāyaṃ. Addeti, addayati.

Vada bhāsāyaṃ. Vādeti, vādayati. Vādo.

Tattha “vādeti, vādayati”ti imesaṃ “vadati”ti suddhakattuvaseva attho daṭṭhabbo, na hetukattuvaseva. Tathā hi “saṅketā katvā viṣaṃvādeti. Ovadeyyānusāseyya. Idameva saccanti ca vādayanti. Avisamvādako lokassā”ti suddhakattudīpakapālinayā dissanti, saddasatthe ca “vādayati”ti suddhakattupadaṃ dissati. Tattha **viṣamvādeti**ti musā vadeti, atha vā vipalambheti, **vādoti** vacanaṃ. “Vādo jappo vitaṇḍā”ti evaṃvidhāsu tīsu kathāsu vādasankhātā kathā. “Vādāpeti, vādāpayati”ti dveveva hetukattupadāni bhavanti.

Chadī icchāyaṃ. Īkārantoyaṃ dhātu, tasmā saniggahītāgamānissa rūpāni na bhavanti. Purisassa bhattaṃ chādeti, chādayati, rucati attho. Purisassa bhattaṃ chādayamaṇaṃ tiṭṭhati chādentā vā.

Vadī abhivādanathutīsū. Ayampi ikāranto dhātu, tasmā imassapi saniggahītāgamāni rūpāni na bhavanti. Vādeti, vādayati, vandati, thometi vāti attho. Imāni anupasaggāni rūpāni. Saddasatthepe ca “vādayati”ti anupasaggavandanathutiattaṃ padaṃ vuttaṃ, sāsane pana “abhivādeti, abhivādayati, abhivādanaṃ, bhagavantaṃ abhivādetvā”tiādīni sopasaggāni rūpāni dissanti.

Tattha **abhivādetvā**ti vanditvā, thometvā vā, ayamasmākaṃ ruci. **Āgamatṭhakathāyaṃ** pana “**abhivādetvā**ti ‘sukhī arogo hotū’ti vadāpetvā, vandanto hi atthato evaṃ vadāpeti nāmā”ti hetukattuvaseva **abhivādanasaddattho** vutto, amhehi pana **vandanasaddaṃ** saddasatthanayamaggahetvā suddhakattuvaseva attho kathito. Abhivādanañhi vandanaṃyeva, na vadāpanaṃ **abhisaddena** sambandhitatā “abhivādanasīlissā”ti ettha viya. Idañhi “abhivādāpanasīlissā”ti na vuttaṃ. Yadi ca saddasatthe vadāpanamadhippetā siyā, “vadī vadāpanathutīsū”ti nissandehavacanaṃ vattabbaṃ siyā, evañca na vuttaṃ, evaṃ pana vuttaṃ “vadī abhivādanathutīsū”ti, tena vadāpanamanadhippetanti ñāyati.

Athāpi siyā “kassaci vuddhena viṣiṭṭhaṃ vadāpanaṃ abhivādana”nti, evampi nupapajjati kāritavasena dhātuatthassa akathetabbato. Tathā hi “paca pāke, chidi dvidhākaṇṇe”tiādīni bhāvavasena atthappakāsanamatteyeva “pacati, paccati, pāceti. Chindati, chijjati, chedāpeti”tiādīni sakammakāni ceva akammakāni ca sakāritāni ca rūpāni nipphajjanti, na ca tadatthāya viṣuṃ viṣuṃ

dhātuniddeso kariyati. Tasmā “vadī abhivādanathutīsū”ti ettha kāritavasena dhātuattho kathitotipi vattum na sakkā kriyāsabhāvattā dhātūnaṃ. Yathā pana “takketi, vitakketi. Takko, vitakko”tiādīni samānatthāni, tathā “vādeti, abhivādetī”tiādīni samānatthāni. Ato saddasatthepi saddasatthavidūhi “takka vitakke, vadī abhivādanathutīsū”tiādīnaṃ dhātūnaṃ “takkayati, vādayatī”tiādīni anupasaggāniyeva rūpāni dassitāni, tāni ca kho suddhakattupadāniyeva, na hetukattupadāni, tasmā “abhivādanathutīsū”ti etassa “vadāpanathutīsū”ti attho nupapajjati.

Kiñca bhiyyo – “abhivādeti, abhivādayati. Abhivādetvā, abhivādayitvā”tiādīni samānatthāni, **neṇayamattena** hi savisesāni. Yadi “abhivādetvā”ti imassa padassa “sukhī arogo hotū”ti vadāpetvā”ti attho siyā, “sirasā abhivādayi”nti ettha “sirasā”ti padaṃ na vattabbaṃ siyā vadāpanena asambandhattā. Yasmā vuttam taṃ padaṃ, tena ñāyati “abhivādetvā”tiādīsu vadāpanattho na icchitabbo, vandanattho icchitabbo thomanattho ca. Yasmā **bhūvādi**gaṇe “vanda abhivādānathutīsū”ti imassa dhātussa “vandatī”ti padarūpassa “abhivandati, thometi cā”ti atthoyeva icchitabbo, na vadāpanattho. Tathā hi “vande sugataṃ gatvimutta”nti padānamattham vadantena **ṭīkācariyenapi** “**vandeti** vandāmi, thomemi cā”ti vandanathomanatthoyeva dassito, na **abhivādanasaddattham** paṭicca vadāpanattho, tasmā “abhivādetvā”ti etthāpi vandanathomanatthāyeva icchitabbā, na vadāpanattho.

Athāpi siyā “vande”ti pade kāritapaccayo natthi, ‘abhivādetvā’ti imasmim̄ pana atthi, tasmā tattha vadāpanattho na labbhati, idha pana labbhatī”ti. Tanna, “karotī”tisuddhakattupadassapi “nippādetī”ti hetukattupadavasena vivaraṇassa viya “vande”ti padassapi “sukhī arogo hotū”ti vadāpetvā”ti vivaraṇassa vattabbattā. “Abhivādetvā”ti idañca “vande”ti padamiva kāritapaccayantaṃ na hoti. Kasmāti ce? Yasmā “cinteti, cintayati. Manteti, mantayati”tiādīnaṃ **curādi**gaṇikānaṃ suddhakattupadānaṃ “cintāpeti, cintāpayatī”tiādīniyeva hetukattupadāni dissanti, tasmā yadi hetukattupadaṃ adhippetam̄ siyā, “abhivādetvā”ti vā “abhivādāpayitvā”ti vā vattabbaṃ siyā, yasmā panevaṃ na vuttam̄, tasmā taṃ kāritapaccayantaṃ na hotīti siddham̄.

Imassatthassa āvibhāvattham̄ imasmim̄ ṭhāne sātthakatham̄ **vidhurajātakappadesam̄** vadāma.

“Katham̄ no abhivādeyya, abhivādāpayetha ve;
Yaṃ naro hantumiccheyya, taṃ kammaṃ nupapajjati”ti

Ayaṃ tāva jātakapāḷi. Ayaṃ pana **aṭṭhakathāpāṭho** “yañhi naro hantumiccheyya, so taṃ katham̄ nu abhivādeyya, katham̄ vā tena attānaṃ abhivādāpayetha ve. Tassa hi taṃ kammaṃ na upapajjati”ti. Tattha pāḷiyam̄ **abhivādeyyati** suddhakattupadaṃ tabbācakattā. **Abhivādāpayetha veti** hetukattupadaṃ tabbācakattā. Evaṃ vibhāgam̄ pana ñatvā pāḷiyā aṭṭhakathāya ca adhippāyo gahetabbo “naro yaṃ puggalam̄ hantum̄ iccheyya, so hantā taṃ vajjham̄ puggalam̄ katham̄ nu abhivādeyya, so vā hantā, tena vajjhena maṃ vandāhīti attānaṃ katham̄ vandāpeyyā”ti. Ettha pana “rājāno coram̄ sunakhehipi khādāpentī”tiādīsu viya karaṇavasena “tena vajjhenā”ti padaṃ yojitam̄, attho pana “taṃ vajjha”nti upayogavacanavasena datṭhabbo dvikammakattā sakāritapaccayassa sakammakadhātuyāti. Nanu evaṃ sante “aṭṭhakathācariyā passitabbaṃ na passanti, atitthe pakkhandantī”ti tesam̄ doso hotīti? Na hoti, suñātha asmākaṃ sodhanaṃ, tathā hi aṭṭhakathācariyehi “abhivādetvā”ti ettha “vadī abhivādanathutīsū”ti dhātuyā atthamaggahetvā vohāravīsāye kosallasamannāgatattā saṅhasukhumamattham̄ sotūnaṃ bodhetum̄ “vada viyattiyam̄ vācāya”nti dhātuyevattham̄ gahetvā kāritapaccayaparikkappanena kāritatthamādāya “abhivādetvāti ‘sukhī arogo hotū’ti vadāpetvā, vandanto hi atthato evaṃ vadāpeti nāmā”ti hetukattuvāsena **abhivādanasaddattho** vuttoti na koci tesam̄ doso. Pūjārahā hi te āyasmanto, namoyeva tesam̄ karoma, idampi ṭhānaṃ sukhumaṃ sādhuṃ manasi kātābbaṃ. Evañhi karoto paññā vaḍḍhatīti.

Dakārantadhāturūpāni.

Dhakārantadhātu

Randha pāke. Sūdo bhattam̄ randheti, randhayati. Kākaṃ sokāya randhehi. Randhako. Sūdena odano randhiyati. Randhito. Randhanaṃ. Puriso sūdam̄ sūdena vā odanaṃ randhāpeti, randhāpayati.

Randhetuṃ, randhayituṃ. Randhitvā, randhayitvā, randhiya iccādīni.

Dhū kampane. Dhāveti, dhāvayati.

Gandha sūcane addane ca. Sūcanam. Pakāsanam. **Addanam** pariplutā. Gandheti, gandhayati, gandho.

Ettha **gandhoti** gandheti attano vatthuṃ sūcayati pakāsetīti gandho. Paṭicchannam vā pupphaphalādiṃ “idamettha atthī”ti pesuññam upasaṃharanto viya pakāsetīti gandho. **Gamudharadhātudvayavasena** **gandhasaddattho** vattabbo “gacchanto dhariyatīti gandho” iti, āha ca “gacchanto dhariyatīti gandho, sūcanatopi vā”ti. **Gandhasaddo** ca “uppalagandhatheno”ti ettha chedane vattatīti daṭṭhabbo.

Vadha samyame. Vadheti, vadhayati.

Budhi hiṃsāyam. Bundheti, bundhayati. Palibundheti, palibundhayati. Palibodho, **parisaddo** upasaggo, so vikāravasena aññathā jāto. Tattha **palibodhoti** āvāsapalibodhādi. Apica **palibodhoti** taṇhāmānadiṭṭhittayañca.

Vaddha chedanapūraṇesu. Vaddheti, vaddhayati. Vaddhakī. **Vaddhakīti** gahakārako.

Gaddha abhikaṅkhāyam. Gaddheti, gaddhayati. Gaddho. **Gaddhoti** gijjho. “Gaddhabādhipubbo”ti idamettha nidassanam.

Sadhu pahamsane. Sadheti, sadhayati.

Vaddha bhāsāyam. Vaddheti, vaddhayati.

Andha diṭṭhūpasamhāre. Diṭṭhūpasamhāro nāma cakkhusaññitāya diṭṭhiyā upasaṃhāro apanayanam vināso vā. Cakkhu hi passanti etāyāti diṭṭhīti vuccati. Yam sandhāya **aṭṭhakathāsu** “sasambhāracakkhuno setamaṇḍalaparikkhittassa kaṇhamaṇḍalassa majjhe abhimukham ṭhitānam sarīrasaṅṭhānuppattidesabhūte diṭṭhimaṇḍale”ti vuttam. **Ṭikāyampi** ca “diṭṭhimaṇḍaleti abhimukhaṭṭhitānam sarīrasaṅṭhānuppattidesabhūte cakkhusaññitāya diṭṭhiyā maṇḍale”ti vuttam. Evaṃbhūtāya diṭṭhiyā upasaṃhāre **andhadhātu** vattati. Andheti, andhayati. Cakkhūni andhayiṃsu, andho. **Andhoti** andhetīti andho. Dvinnam cakkhūnam ekassa vā vasena naṭṭhanayano, evamidha **andhadhātu** vutto. Kaccāyane pana “khādāmagamānam khandhandhagandhā”ti vacanena **amadhātussa andhā**desakaraṇavasena rūpanipphatti dassitā.

Badha bandhane. Migaṃ bādheti, bādhayati. Baddho migo, baddhosi mārapāsena.

Tattha **bādhetīti** bandhatīti suddhakattivasena attho gahetabbo. Evaṃ **bādhatīti** etthāpi. Tathā hi “vātam jālena bādhesi, yo anicchantimicchasi”ti ettha **bādhesīti** bandhasīti suddhakattivasena attho. **Bhūvādigaṇe** pana “**bādha** baddhāya”nti **bādhadhātussa** vasena “bādhatī”ti kattupadam “bādheti, bādhayatī”ti hetukattupadam bhavati. **Baddhoti** bādhiyate bandhiyate soti baddho.

Dhakārantadhaturūpāni.

Nakārantadhātu

Māna pūjāyam pemane vīmaṃsāyam. Māneti, mānayati. Mātā. Vimāneti, vimānayati, paṭimāneti, paṭimānayati. Mānanā, sammānanā, vimānanā, vimānam, vimānanam, mānito.

Amānanā yattha santo, santānam vā vimānanā;

Hīnasammānanā vāpi, na tattha vasatiṃ vase.

Vīmaṃsati, vīmaṃsā, vīmaṃsiyatīti vīmaṃsiyamāno. Vīmaṃsanto.

Tattha **mānetīti** pūjeti, **aṭṭhakathāsu** pana “mānentī”ti etasmim̐ ṭhāne ayamatto dassito “**mānentīti** manena piyāyanti. **Pūjentīti** paccayehi **pūjentī**”ti. So vevacanatthappakāsanavasena vuttoti gahetabbo. **Mānanapūjanasaddā** hi pariyāyasaddattā vevacanasaddā eva. **Vimānetīti** avamaññati. **Vimānanti** sobhāvisesayogato viṣiṭṭhamāniyatāya vimānaṃ, viśesato mānetabbanti hi **vimānaṃ**, devānaṃ vasanaṭṭhānabhūtaṃ byamaṃ.

Mana thambhe. Thambho cittassa thaddhatā. Māneti, mānayati. Māno.

Thana devasaddhe. Devasaddo meghasaddo, thaneti, thanayati.

Yathāpi meggho thanayaṃ, vijjumālī satakkaku.

Thalaṃ ninnañca pūreti, abhivassaṃ vasundharaṃ.

Yathā pāvusako meggho, thanayanto savijjuko.

Ūna parihāniyaṃ. Ūneti, ūnayati. Ūno loko.

Dhana sadde. Dhaneti, dhanayati, dhaniyyati. Dhani, dhanam̐.

Tattha **dhanīti** saddo. **Dhananti** santakaṃ, tañhi mama idanti dhanāyitabbaṃ saddāyitabbanti dhananti. Ayaṃ pana dhātu icchāyampi vattati. “Mātā hi tava irandhati, vidhūrassa hadayaṃ dhaniyyatī”ti pāli nidassanaṃ. Tattha **dhaniyyatīti** pattheti icchati.

Thena coriye. Corassa bhāvo **coriyaṃ.** Yathā sūriyaṃ, yathā ca dakkhiyaṃ. Theneti, thenayati. Theno, thenetvā.

Tanu saddopatāpesu. Tāneti, tānayati. Idhāyaṃ savuddhikā. **Tanādigane** vitthāratthavasena “tanoti, tanute”ti avuddhikā.

Tavaggantadhāturūpāni.

Pakārantadhātu

Ñapa tosananiśānesu. Ñāpeti, ñāpayati, paññāpeti, paññāpayati, paññatti.

Ettha ca niddese “paññāpetī”ti padaṃ nidassanaṃ. Tattha **paññāpetīti** katanibbacanehi vākyāvayavehi vitthāravasena niravasesato desitehi veneyyānaṃ cittaparitosanaṃ buddhiniśānañca karotīti attho. **Papubbo** nikkhipane. Āsanaṃ paññāpeti, paññāpayati. “Āsanaṃ paññāpetī”ti rassattampi dissati. Amatassa dvāraṃ paññāpeti, paññā. Kārite “puriso purisena āsanaṃ paññāpāpetī”ti ekameva padaṃ. Tāni “paññāpeti, paññāpayatī”ti rūpāni yadā “ñā avabodhane”ti imissā rūpāni siyuṃ, tadā hetukatturūpāni bhavanti. Ettha pana suddhakatturūpāni tabbācakattā.

Lapa viyattiyaṃ vācāyaṃ. Lapeti, lapayati. Lāpo, lapanam̐, ālāpo, sallāpo, kathāsallāpo, lapitaṃ.

Byapa dāhe. Jhāpeti, jhāpayati. Jhatto, jhānaṃ.

Tattha **jhattoti** khuddāpareto pācanagginā jhāpitoti jhatto, “jhattā assu kilantā”ti ca pāli. **Jhānanti** nīvaraṇadhamme jhāpetīti jhānaṃ, savuddhikaṃ. Kārite pana – jhāpāpeti, jhāpāpayati.

Rūpa rūpakriyāyaṃ. Rūpakriyā nāma pakāsanakriyā. Rūpeti, rūpayati. Rūpaṃ.

Tattha **rūpanti** rūpayatīti rūpaṃ. Vaṇṇavikāraṃ āpajjamānaṃ hadayaṅgatabhāvaṃ pakāsetīti attho. **Divādigane** panāyaṃ “**rūpaṃ ruppāne**”ti bhijjanādiatthaṃ gahetvā ʘhitā.

Kappa vidhimhi. Vidhi kriyā. Sīhaseyyaṃ kappeti. Kappayati. Moro vāsamakappayi. Sīhaseyyaṃ pakappentaṃ, buddhaṃ vandāmi gotamaṃ.

Kappa vitakke vidhimhi chedane ca. Kappeti, kappayati, moro vāsamakappayi. Kappitamassu. Pakappeti, pakappayati. Saṅkappeti, saṅkappayati. Kappo, saṅkappo, vikappo. Kappasamaṇo iccādīni.

Tattha **kappoti** paricchavedasena kappiyatīti kappo. **Saṅkappoti** saṅkappanaṃ. **Vikappoti** vividhā kappanaṃ, atthassa anekantikabhāvo. Idha **kappasaddassa** atthuddhāro bhavati.

Kappasaddo abhisaddahanavohārakālapaññattichedanavikappalesasamantabhāvādiyekattho. Tathā hissa “okappanīyametaṃ bhoto gotamassa, yathā taṃ arahato sammāsambuddhassā”ti evamādīsu abhisaddahanamattho. “Anujānāmi bhikkhave pañcahi samaṇakappehi phalaṃ paribhuñjitu”nti evamādīsu vohāro. “Yena sudaṃ niccakappaṃ viharāmī”ti evamādīsu kālo. “Iccāyasmā kappo”ti evamādīsu paññatti. “Alaṅkato kappitakesamassū”ti evamādīsu chedanaṃ. “Kappati dvaṅgulakappo”ti evamādīsu vikappo. “Atthi kappo nipajjitu”nti evamādīsu leso. “Kevalakappaṃ veḷuvanaṃ obhāsetvā”ti evamādīsu samantabhāvo.

Atha vā **kappasaddo** saupasaggo anupasaggo ca vitakkavidhānapaṭibhāgapaññattikālaparamāyuvohārasamantabhāvābhissaddahana chedana viniyoga vinaya kriyā lesantara kappatanhādīṭṭhisaṅkhyeyyakappamahākappādīsu dissati. Tathā hesa “nekkhammasaṅkappo abyāpādasāṅkappo”tiādīsu vitakke āgato. “Cīvare vikappaṃ āpajjeyyā”tiādīsu vidhāne, adhikavidhānaṃ āpajjeyyāti hi attho. “Satthukappena vata bho sāvakena saddhiṃ mantayamānā na jānimhā”tiādīsu paṭibhāge, satthusadisenāti ayañhi tattha attho. “Iccāyasmā kappo”tiādīsu paññattiyāṃ. “Yena sudaṃ niccakappaṃ viharāmī”tiādīsu kāle. “Ākaṅkhamāno ānanda tathāgato kappaṃ vātiṭṭheyya kappāvasesaṃ vā”tiādīsu paramāyumihi. Āyukappo hi idha “kappo”ti adhippeto. “Anujānāmi bhikkhave pañcahi samaṇakappehi phalaṃ paribhuñjitu”ntiādīsu samaṇavohāre. “Kevalakappaṃ veḷuvanaṃ obhāsetvā”tiādīsu samantabhāve. “Saddhāsaddahanā okappanā abhippasādo”tiādīsu abhisaddahane, saddhāyanti attho. “Alaṅkato kappitakesamassū”tiādīsu chedane. “Evameva ito dīnaṃ, petānaṃ upakappatī”tiādīsu viniyoge. “Kappakatena akappakataṃ saṃsibbitaṃ hotī”tiādīsu vinayakriyāyaṃ. “Atthi kappo nipajjituṃ, handāhaṃ nipajjāmī”tiādīsu lese. “Āpāyiko nerayiko, kappatṭho saṅghabhedako, kappaṃ nirayamhi paccatī”ti ca ādīsu antarakappe.

“Na kappayanti na purakkharonti,
Dhammāpi tesāṃ na paṭicchitāse;
Na brāhmaṇo sīlavatena neyyo,
Pāraṅgato na ca pacceti tādī”ti

Ādīsu taṇhādīṭṭhīsu. Tathā hi vuttaṃ **niddese** “kappoti uddānato dve kappā taṇhākappo dīṭṭhikappo”ti. “Anekepi saṃvaṭṭakappe anekepi vivaṭṭakappe”tiādīsu asaṅkhyeyyakappe. “Cattārimāni bhikkhave kappassa asaṅkhyeyyānī”tiādīsu mahākappe. Icevaṃ –

Vitakke ca vidhāne ca, paṭibhāge tattheva ca;
Paññattiyāṃ tathā kāle, paramāyumihi ca chedane.

Samantabhāve vohāre, abhisaddahanepi ca;
Viniyoge ca vinaya-kriyāyaṃ lesakepi ca.

Vikappantarakappesu, taṇhādiṭṭhisvasaṅkhaye;
Kappe ca evamādīsu, **kappasaddo** pavattati.

Kapi gatiyaṃ. Kampeti, kampayati, gacchatīti attho. Imāni calanatthe pavattahetukatturūpasadisāni bhavanti. Calanatthe hi “**kampa kampane**”ti dhātuyā “kapatī”ti akammakasuddhakatturūpaṃ. “Kampeti”tiādīni sakammakāni hetukatturūpāni “idampi dutiyaṃ sallaṃ, kampeti hadayaṃ mamā”ti akammakāya dhātuyā sakammakarūpadassanato.

Khapi khantiyaṃ. Khampeti, khampayati.

Thūpa samussaye. Samussayo āroho ubbedho. Thūpeti, thūpayati. Thūpo, thūpikā.

Tapa khaye. Tapeti, tapayati.

Upa pajjane. Upeti, upayati.

Capa kakkane. Capeti, capayati.

Suppa māne. Suppeti, suppayati.

Ḍapa ḍipa saṅghāte. Ḍāpeti. Ḍāpayati. Ḍepeti, ḍepayati.

Kapa avakampane. Kapeti, kapayati. Kapaṇo. **Kapaṇoti** karuṇāyitabbo. Aññattha pana “kapatī”ti rūpaṃ vadanti.

Gupa kupa dhūpa bhāsāyaṃ. Gopeti, gopayati. Kopeti, kopayati. Dhūpeti, dhūpayati.

Kipa dubballe. Kipeti, kipayati.

Khepa perañe. Perañam cuṅṅikaraṇaṃ, khepeti, khepayati.

Tapa pīṇane. Tapeti, tapayati.

Āpu lambane. Āpeti, āpayati. Āpo.

Tapa dāhe. Tapeti, tapayati. Tapo, tāpo. Ātāpo, santāpo. Kārite – tāpeti, tāpayati. Tattha **tapoti** akusalānaṃ tāpanaṭṭhena tapo, sīlaṃ.

Opathapa thapane. Opeti, opayati. Na tesam koṭṭhe openti. Thapeti, thapayati. Thapito. Thapayitvā paṭicchadaṃ vavaṭṭhapeti. Voṭṭhabbanam.

Ettha ca “vi ava thapeti, vi ava thapana”nti chedo. Ettha purime saralopo **thassa ṭhattaṃ** visadisabhāvena dvittaṅga. Pacchime pana saralopo, **avassa okāratam, thassa ṭhattaṃ, passa vattam, vassa dvittam, vakāradvayassa ca bakāradvayam** bhavati. **Voṭṭhabbananti** ca byavatthāpakacittassa nāmaṃ. **Nakāralope** “voṭṭhabba”nti aparaṃpī rūpaṃ bhavati.

Māpa māpane. Paṇṇasālaṃ māpeti, māpayati. Yo pāṇamatimāpeti, paṇṇasālā sumāpitā.

Yapa yāpane. Yāpanam pavattanaṃ. Tena so tattha yāpeti. Yāpayati. Yāpanā.

Tattha **yāpeti**ti idaṃ **yādhātussa** payogatte sati kāritapadaṃ bhavati. Tathā hi “uyyāpentī nāmā”ti pāḷi dissati.

Pakārantadhāturūpāni.

Phakārantādhāturūpāni appasiddhāni.

Bakārantadhātu

Samba sambandhe. Sambandho daḥabandhanaṃ. Sambeti, sambayati. Sambalaṃ.

Sabi maṇḍale. Maṇḍalaṃ parimaṇḍalatā. Rūpaṃ tādīsameva.

Kubi acchādane. Kumbeti, kumbayati.

Lubi dubi addane. Addanaṃ hiṃsā. Lumbeti, lumbayati. Dumbeti, dumbayati.

Pubba nīketane. Nīketanaṃ nivāso. Pubbeti, pubbayati.

Gabba māne. Māno ahaṃkāro. Gabbeti, gabbayati. Gabbaṃ, gabbito. Tattha **gabbatī** na saṅkucati.

Bakārantadhāturūpāni.

Bhakārantadhātu

Bhū pattiyaṃ. Patti pāpanaṃ. Sakammikā dhātu. Bhāveti, bhāvayati. Pabhāveti, pabhāvayati. Itthambhūto. Cakkhubhūto, ñāṇabhūto, dhammabhūto, brahmabhūto.

Tattha **bhāvetī** puriso gacchantaṃ purisamanugacchanta pāpuṇātīti attho. Esa nayo sesakriyāpadesupi. Ettha ca “bhāvetī”tiādīni yattha sace “**bhū sattāya**”nti dhātuyā rūpāni honti, tattha hetukatturūpāni nāma honti. “Bhāveti kusalaṃ dhamma”ntiādīnettha nidassanapadāni. **Bhāvetī** hi vaḍḍhetīti attho. Idha pana suddhakatturūpattā pāpuṇātīti attho. **Itthambhūto**ti imaṃ pakāraṃ bhūto patto. “Cakkhubhūto”tiādīni pana “**bhū sattāyaṃ, bhū pattiya**”nti dvigaṇikānaṃ dvinnāṃ dhātūnaṃ vasena aṭṭhakathāṭīkānayanissitaṃ atthaṃ pakāsayissāma āgamikānaṃ kosallatthāya. Tattha **cakkhubhūto**ti yathā cakkhu sattānaṃ dassanattaṃ pariṇeti, evaṃ lokassa yāthāvadassanasādhanaṃ dassanakiccapariṇāyakaṭṭhena cakkhubhūto. Atha vā cakkhu viya bhūtotipi **cakkhubhūto**. Paññācakkhumayattā vā sayambhūñāṇena paññācakkhuṃ bhūto pattoti **cakkhubhūto**. Viditakaraṇaṭṭhena **ñāṇabhūto**, asādhāraṇaṃ vā ñāṇaṃ bhūto pattoti **ñāṇabhūto**, aviparītasabhāvaṭṭhena, pariyaṭṭidhammapavattanato vā hadayena cintevā vācāya nicchāritadhammamayoti **dhammabhūto**. Bodhipakkhiyadhammehi vā uppannattā lokassa ca taduppādanato anaññasādhāraṇaṃ vā dhammaṃ bhūto pattoti **dhammabhūto**. Seṭṭhaṭṭhena **brahmabhūto**. Atha vā brahmaṃ vuccati maggo tena uppannattā lokassa ca taduppādanattā, tañca sayambhūñāṇena bhūto pattoti **brahmabhūto**. Evaṃ dvinnāṃ dhātūnaṃ vasena vutto attho veditabbo.

Aparāni cettha nidassanapadāni veditabbāni. “Tātā mayaṃ mahallakā suddhodanamahārājaputtaṃ buddhabhūtaṃ sambhāveyyāma vā no vā, tumhe tassa sāsane pabbajeyyāthā”ti ca “atha kho therā bhikkhū āyasmantaṃ revataṃ sahaṇḍiyaṃ sambhāviṃsū”ti cāti. Aññānīpi panettha “manussabhūto, devabhūto”tiādīni yojetabbāni. Tathā hi **saṃsāramocakapetavattu aṭṭhakathāyaṃ** “**manussabhūtā**timanusseṣu jātā, manussabhāvaṃ vā pattā”ti attho saṃvaṇṇito.

Bhū avakampane. Ayampi sakammako. Bhāveti, bhāvayati. Manobhāvanīyā bhikkhū.

Ettha ca **bhāvetī**ti anukampati puttaṃ vā bhātaraṃ vā yaṃkiñci. **Manobhāvanīyā**ti “dīghāyukā hontu bhadantā arogā abyāpajjā”ti evamādinā bhāvetabbā anukampitabbāti

manobhāvanīyā. Aññattha pana **manobhāvanīyā**ti manovaḍḍhanakāti attho. Yesu hi diṭṭhesu mano vaḍḍhati, “te manobhāvanīyā”ti vuccanti.

Labha ābhaṇḍane. Labheti, labhayati.

Jabhi nāsane. Jambheti, jambhayati.

Lābha pesane. Lābheti, lābhayati. “**Labha lābheti** dhātussa rūpāni ce, kāritarūpāni bhavanti.

Dabhī bhaye. Īkārantāyaṃ dhātu, tena saniggahītāgamāni rūpāni na bhavanti. Dabheti, dabhayati.

Dūbha santhambhe. Dūbheti, dūbhayati.

Vambha viddhaṃsane. Vambheti, vambhayati. Vambhanā. Chabbaggiyā bhikkhū bhikkhuṃ vambhenti.

Bhakārantadhāturūpāni.

Makārantadhātu

Ātena **camu dhovane.** Āpubbo **camudhātu** dhovane vattati. Ācameti, ācamayati. Ācamanakumbhī.

Ettha pana “tato hi so ācamayitvā licchavī, therassa datvā yugāni aṭṭhā”ti **appasakkārapetavattupālī**ppadeso nidassanaṃ. Tattha **ācamayitvā**ti hatthapādadhovanapubbakaṃ mukhaṃ vikkhāletvā. Ayaṃ pana dhātu bhūvādigaṇikatte “camatī”ti bhakkhanatthaṃ gahetvā tiṭṭhati.

Kamu icchākantīsu. Kāmeti, kāmayati. Kāmo, kanti, nikanti, kāmanā, kāmayamāno, kāmento, abhikkantaṃ. Abhikkantavaṇṇā.

Ettha ca **kāmoti** rūpādivisayaṃ kāmetīti kāmo. Kāmiyatīti vā **kāmo**, kilesakāmavattukāmavasenaṃ daṭṭhabbaṃ. Kīleso hi tebhūmakavaṭṭasaṅkhātāñca vatthu “kāmo”ti vuccati. Māropi vā devaputto “kāmo”ti vuccati. So hi accantakaṇhadhammasamaṅgitāya papañcasamatikkantepe buddhapacceka buddhabuddhasāvake attano vase ṭhapetuṃ kāmetīti “kāmo”ti vuccati.

Vuttañcetaṃ porāṇakaviracanāyaṃ –

“Vande vandehamassatthaṃ, yattha santajjito jīto;
Kāmo kāmoghatiṇṇena, buddhena vasatā satā”ti;

Imāni panassa nāmāni –

Kāmo namuci kaṇho ca, vasavattī pajāpati;
Pamattabandhu madano, pāpimā dammakopi ca;
Kandappo ca ratīpati, māro ca kusumāyudho;

Aññe aññānīpi vadanti. Tāni sāsānānulomāni na hontīti idha na dassitāni. **Aṭṭhakathāsu** pana “māro, namuci, kaṇho, pamattabandhū”ti cattāriyeva nāmāni āgatāni.

Idāni **abhikkanta**saddassa **bhūvādigaṇe** “**kamu padavikkhepe**”ti vohārasīsenā vuttassa **kamudhātussa** vasena idha ca “**kamu icchākantīsū**”ti vuttassa **kamudhātussa** vasena atthuddhāraṃ

kathayāma. **Abhikkanta**saddo khayasundarābhirūpaabbhanumodanesu dissati. “Abhikkantā bhante ratti, nikkhanto paṭhamo yāmo, cīranisinno bhikkhusaṅgho”tiādīsu khaye dissati. “Ayaṃ imesaṃ catunnaṃ puggalānaṃ abhikkantataro ca paṇītataro cā”tiādīsu sundare.

“Ko me vandati pādāni, iddhiyā yasasā jalaṃ;
Abhikkantena vaṇṇena, sabbā obhāsayaṃ disā”ti

Ādīsu abhirūpe. “Abhikkantaṃ bhante”tiādīsu abbhanumodane. Icevaṃ –

Khayasmiṃ sundare ceva, atho abbhanumodane;
Abhirūpe **abhikkanta**-saddo dissati sāsane.

Thoma silāghāyaṃ. Silāghā pasamsā. Thometi, thomayati. Thomito, thomanā.

Yama aparivesane. Yameti, yamayati. Yamo.

Sama vitakke. Sāmeti, sāmāyati. Samā. Nisāmeti, nisāmāyati. Nisāmanaṃ. Paṭisāmeti, paṭisāmāyati. Paṭisāmanaṃ.

Tattha **samā**ti saṃvaccharo, so “samā”ti itthiliṅgavasena vuccati. “Yo yajetha satam sama”nti ettha hi **samā**saddo itthiliṅgo, upayogavasena pana “sama”nti vutto.

Imāni saṃvaccharassa nāmāni “saṃvaccharo, vaccharo, samā, hāyano, sarado, vasso”tiādīni bhavanti. **Nisāmetī**ti vitakketi upadhāreti. Ettha hi “iṅgha maddi nisāmehi, nigghoso yādiso vane”ti pāḷi nidassanaṃ. Tattha **nisāmehī**ti vitakkehi upadhārehīti attho. **Paṭisāmetī**ti bhaṇḍaṃ guttaṭṭhāne nikkhipati.

Sama ālocane. Ālocanaṃ pekkhanaṃ. Sāmeti, sāmāyati. Nisāmanaṃ.

Ettha pana **nisāmetī**ti pekkhati oloketi. Tathā hi “iṅgha maddi nisāmehi, cittaṃ rūpaṃva dissatī”ti pāḷi dissati. Tattha hi **nisāmehī**ti olokehīti attho. Dhātūnamatthātisayena yogotī vacanato pana upasaggayogato vā savanepi ayaṃ vattati. Tathā hi “tato kaṇhājīnāyāpi, nisāmehi rathesabhā”tiādīkā pāḷiyo dissanti. Tattha **nisāmehī**ti suṇohīti attho.

Ama roge. Ameti, amayati. Andho. Bilāṅkapādo andhanakho.

Tattha **andhoti** naṭṭhanayano vuccati. **Andhanakhoti** pūtinakho. Ubhayathāpi sarogattaṃ sūcītaṃ.

Bhāma kodhe. Bhāmeti, bhāmayati.

Goma upalepane. Gometi, gomayati.

Sāma svāntane āmantane. Svāntanaṃ sāmappayogo. **Āmantanaṃ** avhāyanaṃ pakkosanaṃ. Sāmeti, sāmāyati.

Saṅgāma yuddhe. Saṅgāmeti, saṅgāmayati. Dve rājāno saṅgāmesuṃ. Saṅgāmo. Āto **gamu** īsamadhivāsane. Āgameti, āgamayati, kāmāvacaradhamme nissāya rūpārūpadhammo samudāgameti, samudāgamayati. Upāsako dhammasavanantarāyaṃ anicchanto “āgametha āgamethā”ti āha. Samudāgamaṃ, āgamaṃ. Āgamento, āgamayamāno.

Tatra **āgametī**ti īsakaṃ adhvāseti. **Samudāgametī**ti sampavattati. **Bhūvādigāṇe** “gamayatī”ti hetukattavasena vuttaṃ, idha pana upasagganipātapubbakāni katvā “āgametī”tiādīni suddhakattavasena vuttānīti daṭṭhabbaṃ.

Makārantadhāturūpāni.Iti **cu rādigaṇe pavaggantadhāturūpāni**

Samattāni.

Yakārantadhātu**Yu jigucchāyaṃ.** Yāveti, yāvayati. Yavo.**Byaya khaye.** Byayeti, byayayati. Abyayībhāvo.**Byaya cittasamussagge.** Tādisaṃyeva rūpaṃ.

Yakārantadhāturūpāni.

Rakārantadhātu**Para gatiyaṃ.** Pareti, parayati. Ettha ca ‘‘iti kho ānanda kusalāni sīlāni anupubbena aggāya parentī’’ti pāḷi nidassanaṃ. Tattha **aggāya parentī**ti arahattatthāya gacchanti.**Gara ugame.** Gareti, garayati. Garu.**Cara asaṃsaye.** Careti, carayati.**Pūri appāyane.** Pūreti, pūrayati.**Vara icchāyaṃ.** Vareti, varayati. Varo, varaṃ, varanto. Ete varānaṃ caturo varemi. Etaṃ sakka varaṃ vare.Tattha **varoti** variyate varitabboti varo. **Varanti** varetīti varaṃ, icchanto patthentoti attho.‘‘Mahāmahārahaṃ sakyamuni nīvaraṇā raṇā;
Muttāṃ muttāṃ sudassanaṃ, vande bodhivaraṃ vara’’ntiPurāṇakaviracānāyaṃ ‘‘vara’’nti padassa viya. Evaṃ varetīti **varanto**. **Vareti** varemi icchāmi yācāmi. Kārite ‘‘pavāretī’’ti rūpaṃ, icchāpetīti attho. Nisedhanatthe panidaṃ kārītaṃ na hoti.**Sara akkhepe.** Sareti, sarayati. Saro. **Saroti** saddo.**Sāra dubbāye.** Sāreti, sārayati. Dubbalo bhavatīti attho.**Kumāra kīḷāyaṃ.** Kumāreti, kumārayati. Kumāro, kumārako. Kumārī, kumārīkā.Ettha kumārayati tattha tattha kīḷatīti **kumāro**. So eva atidharattā **kumārako**. Esa nayo itaratrāpi.**Sūra vīra vikkantiyaṃ.** **Vikkanti** vikkamaṃ. Sūreti, sūrayati. Vīreti, vīrayati. Sūro, vīro. Sāsanikehi pana saddhammavidūhi evaṃ dhātusabhāvānampi **sūravīrasaddānaṃ** nibbācanaṃ na dassitaṃ, kevalaṃ pana tattha tattha ‘‘sūroti viṣṭhauro’’ti ca ‘‘mahāvīroti mahāvikkanto’’ti ca ‘‘vīroti vīriyavā’’ti ca atthavivaraṇamattameva dassitaṃ.**Pāra tīra kammaṃsampattiyaṃ.** **Kammaṃsatti** nāma kammaṃsa parisamāpanaṃ

niṭṭhāpanaṃ. Pāreti, pārayati. Tīreti, tīrayati. Pāraṃ. Tīraṃ. Vikkamāmi na pāremi, bhūmiṃ sumbhāmi vegasā. Taṃ kiccaṃ tīretvā gato. Santīraṇaṃ, tīraṇapariññāti ca ādīni ettha dassetabbāni.

Tattha **na pāremīti** chindituṃ na sakkomīti attho.

Īra khepane. Īreti, īrayati.

Jara vayohānimhi. Jareti, jarayati. Jarā. **Pāliyaṃ** pana “jīratī”ti pāṭho.

Vara āvaraṇe. Vāreti, vārayati. Nivāreti, nivārayati. Nivāretā. Parivāreti, parivārayati. Parivāro. Pavāreti, pavārayati. Pavāraṇaṃ. **Pavāraṇanti** nisedhanaṃ vā kāmyadānaṃ vā.

Dhara dhāraṇe. Dhāreti, dhārayati. Ādhāro, ādhārako, dhammo iccādīni.

Tattha **dhammoti** anekavidhesu dhammesu lokuttaro uppādito sacchikato ca catūsu apāyesu saṃsāre vā satte apatamāne dhāretīti dhammo. Atha vā sotāpannādīhi ariyehi dhāriyati, nu puthujjanehītipi **dhammo**. Catubhūmiko pana sakalakkhaṇaṃ dhāretīti **dhammo**. Kakkhaḷattādīnā phusanādīnā santiādīnā sakasakabhāvena paṇḍitehi dhāriyati sallakkhiyatītipi **dhammo**. Tepiṭako pana pāḷidhammo sakatthaparattādhātibhee atthe dhāretīti **dhammo**. Keci tu vidū “pāpake akusale dhamme dhunāti kampeti viddhamsetīti **dhammo**”ti dhūdhātuvasenapi nibbacaṇaṃ vadanti, taṃ maggadhamme atīva yujjati, phalanibbānapariyattidhammesu pana pariyāyena yujjati.

Dhammasaddo pariyattihetugūṇanissattanijjīvatādīsu dissati. Ayañhi “dhammaṃ pariyāpuṇāti suttaṃ geyya”ntiādīsu pariyattiyaṃ dissati. “Hetumhi ñāṇaṃ dhammapaṭisambhidā”tiādīsu hetumhi.

“Na hi dhammo adhammo ca, ubho samavipākino;
Adhammo nirayaṃ neti, dhammo pāpeti suggati”nti

Ādīsu guṇe. “Tasmiṃ kho pana samaye dhammā honti. Dhammesu dhammānupassī viharatī”tiādīsu nissattanijjīvatāyaṃ.

Atha vā **dhammasaddo** sabhāvapaññāpuññapaññattipariyattinissattanijjīvatāvikāragūṇapacca- yapaccayuppannādīsu dissati. Ayañhi “kusalā dhammā akusalā dhammā abyākatā dhammā”tiādīsu sabhāve dissati.

Yassete caturo dhammā, saddhassa ghamesino;
Saccaṃ dhammo dhiti cāgo, sa ve pecca na socatī”ti

Ādīsu paññāyaṃ.

“Na hi dhammo adhammo ca, ubho samavipākino;
Adhammo nirayaṃ neti, dhammo pāpeti suggati”ntiādīsu

Puññe. “Paññattidhammā, niruttidhammā, adhivacanādhammā”tiādīsu paññattiyaṃ. “Pārājikā dhammā, saṅghādisesā dhammā”tiādīsu āpattiyaṃ. “Idha bhikkhu dhammaṃ jānāti suttaṃ geyyaṃ veyyākaraṇa”ntiādīsu pariyattiyaṃ. “Tasmiṃ kho pana samaye dhammā honti. Dhammesu dhammānupassī viharatī”tiādīsu nissattanijjīvatāyaṃ. “Jātidhammā jarādhammā maraṇadhammā”tiādīsu vikāre. “Channaṃ buddhadhammāna”ntiādīsu guṇe. “Hetumhi ñāṇaṃ dhammapaṭisambhidā”tiādīsu paccaye. “Ṭhitāvasā dhātu dhammaṭṭhitatā dhammaniyāmatā”tiādīsu paccayuppanne.

Atha vā **dhammasaddo** pariyattisaccasamādhīpaññāpakatipuññāpattiñeyyādīsu bahūsu atthesu diṭṭhappayogo. Tathā hi “idha bhikkhu dhammaṃ pariyāpuṇāti”tiādīsu pariyattiyaṃ dissati.

“Diṭṭhadhammo pattadhammo” tiādīsu sacce. “Evamḍhammā te bhagavanto ahesu” ntiādīsu samādhimhi. “Saccam dhammo dhiti cāgo” ti evamādīsu paññāyaṃ. “Jātidhammānaṃ bhikkhave sattāna” nti evamādīsu pakatiyaṃ. “Dhammo have rakkhati dhammacāri” nti evamādīsu puññe. “Cattāro pārājikā dhammā” tiādīsu āpattiyaṃ. “Kusalā dhammā” tiādīsu ñeyye. Evaṃ dhammasaddappavattivisayā vividhā aṭṭhakathācariyehi dassitā, tattha tattha pana ādisaddena yuttivisayādayo ca atthā gahetabbā. Tathā hi **dhammasaddo** –

“Nesa dhammo mahārāja, yaṃ tvaṃ gaccheyya ekako;
Ahampi tena gacchāmi, yena gacchasi khattiyā” ti

Ādīsu yuttiyaṃ vattati. “Manañca paṭicca dhamme ca uppajjati manoviññāṇa” ntiādīsu visaye. “Satañca dhammo na jaraṃ upeti” ti ettha nibbāne vattati. Tatra yā nissattatā, sā eva nijjivatā. Yo ca hetu, so eva paccayo.

Icevaṃ –

Pariyattipaccayesu, guṇe nissattatāya ca;
Sabhāve ceva paññāyaṃ, puññe paññattiyampi ca.

Āpattiyaṃ vikāre ca, paccayuppanakepi ca;
Saccasamādhīpakati-ñeyyesu yuttiyampi ca;
Visaye ceva nibbāne, **dhammasaddo** pavattati.

Keci pana dhammasaddassa pavattivisayānaṃ dasadhāva paricchedaṃ vadanti.

Ñeyyamagge ca nibbāne, sabhāve atha jātiyaṃ;
Mane visayapuññesu, bhāve pāvācanepi ca;
Imesu dasasvatthesu, **dhammasaddo** pavattati.

Tatra **atthuddhāro**ti samānasaddavacanīyānaṃ atthānaṃ uddharaṇaṃ atthuddhāro.

Rakārantadhāturūpāni.

Lakārantadhātu

Pāla rakkhaṇe. “Rakkhaṇaṃ, tāṇaṃ, gopanaṃ, avanaṃ, pālanaṃ, rakkhā, rakkhaṇā, gutti” iccete pariyāyā. Pāleti, pālayati. Pālako, buddhapālo. Ambapālī gaṇikā. Samo bhavatu pālīnā. Pālito, pālanaṃ, pālī.

Ettha **pālī**ti atthaṃ pāletīti pālī, **lassa** **lattaṃ**. Atha vā antodakaṃ rakkhaṇaṭṭhena mahato taḷākassa thirā mahatīti pālī viyāti **pālī**, pariyaṭṭidhammo. Aparo nayo pakaṭṭhānaṃ ukkaṭṭhānaṃ sīlādiatthānaṃ bodhanato sabhāvaniruttibhāvato buddhādīhi bhāsītattā ca pakaṭṭhānaṃ vacanappabandhānaṃ ālīti **pālī**.

Pālīsaddo pālīdhamme, taḷākapaḷiyampi ca;
Dissate pantiyañceva, iti ñeyyaṃ vijānatā.

Ayañhi “pālīyā atthamupaparikkhantī” tiādīsu pariyaṭṭidhammasaṅkhāte pālīdhamme dissati. “Mahato taḷākassa pālī” tiādīsu taḷākapaḷiyaṃ. “Pālīyā nisīdīmsū” tiādīsu pantiyaṃ, paṭipāṭiyā nisīdīmsūti attho. Imasmim panatthe dhātuyā kiccaṃ natthi. Pāṭipadiko hi pantivācako **pālīsaddo**.

Tila sinehane. Teleti, telayati. Telaṃ, tilo, tilaṃ.

Tattha **tiloti** tilagaccho. **Tilanti** tapphalaṃ. Tato pana nikkhanto sineho **telaṃ**. So hi “tilānaṃ

idanti tela’’nti vuccati. Yadi evaṃ ‘‘sāsapatela’’ntiādivacanāṃ na yujjeyyāti? No na yujjati, ‘‘**tilasinehane**’’ti evaṃ vuttāya **tiladhātuyā** sāmaññato yassa kassaci sinehassa vacanato. Tena ‘‘sāsapatelaṃ, madhukatela’’ntiādayo sāsane payogā dissanti. Mayaṃ pana **tiladhātuvasena** nipphannānaṃ tilagacchatapphalavācakānaṃ ‘‘tilo, tila’’nti saddarūpānaṃ pakāsanamukhena ‘‘tilānaṃ idanti tela’’nti vadāma, na pana tena vacanena sāsapādīnaṃ sinehassa atelattaṃ vadāma. Atha kiñcarahīti ce? Taddhitavidhāne viññunaṃ kosallatthaṃ **tilasaddaṃ** paṭicca ‘‘tilānaṃ idanti tela’’nti vadāma. Sinehasaṅkhātassa sāsapādīnaṃ telassa vacanaṃ na jahāma, tasmā udāharaṇappakāsane ‘‘tilo, tilaṃ, tela’’nti avatvā ‘‘telaṃ, tilo, tila’’nti amhehi vuttaṃ. Idañhi vacanaṃ telassa sāmaññato sinehe pavattiṃ dīpeti. Teneva ca sāsane ‘‘tilatelaṃ, sāsapatela’’ntiādinā visesavacanampi dissatīti niṭṭhametthāvagantabbaṃ. Apica **telasaddo** yebhuyyena tilatele vattati, yathā **migasaddo** hariṇamigetipi daṭṭhabbaṃ.

Jala apavāraṇe. Jāleti, jālayati. Jālaṃ, jālā. **Jālanti** macchajālaṃ. **Jālāti** aggijālā.

Khala soceyye. Soceyyaṃ sucibhāvo. Khāleti, khālayati. Pakkhāleti, pakkhālayati.

Tala patiṭṭhāyaṃ. Tāleti, tālayati. Tālo, talaṃ.

Ettha **tāloti** tiṇarājarukkho. **Talanti** pāṇitalabhūmitalādi. Tañhi tālayati patiṭṭhāti ettha vatthujātanti **talaṃ**.

Tula ummāne. Toleti, tolayati.

Dula ukkhepe. Ukkhepo uddhaṃ khipanaṃ. Doleti, dolayati. Dolā.

Ettha ca doliyati ukkhipiyati yattha nipanno dārako, yathānipannako vāti **dolā**.

Vula nimmajane. Voleti, voyalati.

Mīla nimīlane. Mīleti, mīlayati. Mīlanaṃ, ummīlanaṃ, nimīlanaṃ.

Mūla rohane. Mūleti, mūlayati. Mūlaṃ. Esā hi yadā patiṭṭhāyaṃ vattati, tadā **bhūvādiḡaṇikā**, ‘‘mūlatī’’ti cassā rūpaṃ.

Tattha **mūlanti** mūlayati rūhati rukkḡhādi etenāti mūlaṃ. Atha vā mūlayati chinnopi koci etena acchinnena punadeva rūhatīti **mūlaṃ**. Vuttañhi –

‘‘Yathāpi mūle anupaddave dalḡhe,
Chinnopi rukkho punadeva rūhati;
Evampi taṇḡhānusaye anūhate,
Nibbattati dukkhamidaṃ punappuna’’nti;

Mūlasaddassa atthuddhāro heṭṭhā **bhūvādiḡaṇe** vutto.

Kala pila khepe. Kāleti, kālayati. Kālo. Pileti, pilayati.

Ettha **kāloti** samayopi maccupi. Tatra samayo tesāṃ tesāṃ sattānaṃ āyuṃ kālayati khepeti divase divase appaṃ appaṃ karotīti kāloti vuccati. Vuttampi cetāṃ –

‘‘Kālo ghasati bhūtāni, sabbāneva sahattānā;
Yo ca kālaghaso bhūto, sabhūtapacaniṃpacī’’ti.

Maccu pana kālayati tesāṃ tesāṃ sattānaṃ jīvitaṃ khepeti samucchavedavasena nāsetīti kāloti vuccati. Tenāhu **aṭṭhakathācariyā** ‘‘**kāloti** maccu. Kālayati sattānaṃ jīvitaṃ nāsetīti kālo. Kālena

maccunā kato nāsītōti **kālakato**’’ti. ‘‘Maraṇaṃ hindaṃ maccu maṭṭu cuti kālo antako nikkhepo’’ti maraṇassābhīdhānāni.

Sulla sajjane. Sulleti, sullayati.

Ila perañe. Ileti, ilayati.

Vala bharaṇe. Vāleti, vālayati. Vālo.

Lala icchāyaṃ. Laleti, lalayati.

Dala vidāraṇe. Dāleti, dālayati, padāleti, padālayati. Kudālo.

Kala gatisaṅkhyānesu. Kāleti, kālayati. Kālo, kalā. **Kalā**ti avayavo. Sā hi kālayitabbā saṅkhāyitabbāti **kalā**.

Sīla upadhāraṇe. Upadhāraṇaṃ bhuso dhāraṇaṃ, paṭiṭṭhāvasena ādhārabhāvo. Sīleti, sīlayati. Sīlaṃ, sīlaṇaṃ.

Ettha **sīlanti** sīleti upadhāreti taṃsamaṅgīpuggalaṃ apāyesu uppattinivāraṇavasena bhuso dhāretīti sīlaṃ. Atha vāsīliyati upacāriyati sappurisehi hadayamaṃsantaraṃ upanetvā dhāriyatīti **sīlaṃ. Sīlananti bhūvādi**gaṇe avippakiṇṇatāsaṅkhātāṃ samādhānaṃ vuccati. Tattha ‘‘sīlatī’’ti rūpaṃ, idha pana ādhārabhāvasaṅkhātāṃ upadhāraṇaṃ vuccati. Ettha ca ‘‘sīleti, sīlayatī’’ti rūpāni. **Aṭṭhakathāsu** hi ‘‘kusalānaṃ dhammānaṃ paṭiṭṭhāvasena ādhārabhāvo upadhāraṇa’’nti vutto.

Vela kālopadese. Veleṭi, velayati. Velā. Keci ‘‘**vela** iti dhātusaddo na hotī’’ti vadanti, taṃ na gahetabbaṃ, porāṇehi saddasatthavidūhi ‘‘velayatī’’ti rūpassa dassitattā.

Pala mūla lavanapavanesu. Lavanaṃ chedanaṃ, **pavanaṃ** sodhanaṃ. Pāleti, pālayati. Palaṃ. **Palaṃ** nāma mānaviseso. Lokassa vimatiṃ pāleti lunāti sodheti cāti **palaṃ**. Mūleti, mūlayati. Saddasatthavidū pana ‘‘mūlayati kedāraṃ, mūlayati dhañña’’nti payogaṃ vadanti.

Thūla paribrūhane. Paribrūhanaṃ vaḍḍhanaṃ. Thūleti, thūlayati. Thūlo puriso. Thūlā javena hāyanti.

Pala gatiyaṃ. Paleti, palayati. Atthaṃ paleti na upeti saṅkhaṃ. Paleti rasamādāya. Yathā suttaguḷaṃ yattakehi suttehi veṭṭitaṃ, tattakehi eva palayati.

Ciṅgula paribbhamane. Ciṅguleṭi, ciṅgulayati. Ciṅgulayitvā. Atrāyaṃ pāli ‘‘yāvatikā abhisāṅkhārassa gati, tāvatikaṃ gantvā ciṅgulayitvā bhūmiyaṃ papatī’’ti. Tattha **ciṅgulayitvā**ti paribbhamitvā.

Lakārantadhāturūpāni.

Vakārantadhātu

Divu parikūjane. Parikūjanaṃ gajjanaṃ. Deveti, devayati. Devo ca paridevitvā. **Devoti** megho.

Divu addane. Addanaṃ gandhapisananti vadanti. Deveti, devayati.

Civa bhāsāyaṃ. Civeti, civayati.

Vakārantadhāturūpāni.

Sakārantadhātu

Pusa posane. Poseti, posayati. Imāni rūpāni kiñcāpi **bhūvādi**gaṇikaṃ “posetī”ti rūpaṃ paṭicca hetukatturūpāni viya dissanti, tathāpi “aññepi devo posetī”tiādikassa **curādi**gaṇikarūpassa dassanato suddhakattuvāsena vuttānīti daṭṭhabbaṃ. Ubhinnaṃ pana kāritatṭhāne “posāpeti, posāpayatī”ti hetukatturūpāni icchitabbāni.

Pesa paṭiharāṇe. Peseti, pesayati.

Pisa balapāṇanesu. Piseti, pisayati.

Pasi nāsane. Paṃseti, paṃsayati.

Jasi rakkhaṇe. Jaṃseti, jaṃsayati.

Silesa silesane. Sileseti, silesayati. Silesa.

Lūsa hiṃsāyaṃ. Lūseti, lūsayati.

Punsa abhimaddane. Nakāro niggahītattaṃ. Puṃseti, puṃsayati. Napuṃsako. Dhātunakārassa lope “poso” iccapi rūpaṃ.

Tattha **na puṃsakoti** itthibhāvapumbhāvarahito puggalo. So hi puriso viya sātisayaṃ paccāmitte na puṃseti abhimaddanaṃ kātuṃ na sakkotīti **napuṃsakoti** vuccati. Keci pana “na pumā, na itthī”ti napuṃsakoti vacanatthaṃ vadanti. Tathā hi saddasatthavidū taṃ puggalaṃ napuṃsakaliṅgavasena napuṃsakanti vadanti.

Dhūsa kantikarāṇe. Dhūseti, dhūsayati.

Rusa rosane. Rosanaṃ kopakaraṇaṃ. Roseti, rosayati. Roso. **Rosoti** kodho.

Byusa ussagge. Byoseti, byosayati.

Jasa hiṃsāyaṃ. Jāseti, jāsayati.

Daṃsa daṃsane. Daṃseti, daṃsayati. Daṃsano. **Daṃsanoti** danto. Daṃsanti khādanīyaṃ vā bhojanīyaṃ vā etenāti **daṃsano**.

Dasi dassane ca. Cakāro daṃsanaṃ apekkhati. Daṃseti, daṃsayati. Vidamseti, vidamseti sūriyo ālokaṃ.

Tassa santajjane. Tasseti, tassayati puriso core.

Vassu sattibandhane. Sattibandhanaṃ samatthatākaraṇaṃ. Vasseti, vassayati.

Jasa tāḷane. Tāḷanaṃ paharaṇaṃ. Jāseti, jāsayati.

Pasa bandhane. Pāseti, pāsayati. Pāso. Pāsanti bandhanti satte etenāti **pāso**, sakuṇapāsādi.

Ghusi visaddane. Visaddanaṃ ugghosanaṃ. Ghoseti, ghosayati. Ghoso.

Lasa silyayoge. Silyayogo lāsīyaṃ nāṭakanāṭanaṃ recakadānaṃ. Lāseti, lāsayati. Lāsento, lāsenti. Atrāyaṃ pāli “vādentiyāpi lāsenti, naccantiyāpi lāsenti, lāsentiyaṃ naccanti”ti. Tattha

lāsentiti yā uplavamānā viya utṭhahitvā lāsiyanāṭakam nāṭenti, recakam denti.

Bhūsa alaṅkāre. Bhūseti, bhūsayati. Vibhūseti, vibhūsayati. Bhūsanam, vibhūsanam.

Vasa sinehanachedāvaharaṇesu. Avaharaṇam corikāya gahaṇam. Vāseti, vāsayati. Vasā.

Tāsa vāraṇe. Vāraṇam nivāraṇam. Tāseti, tāsayati.

Dhasa uñche. Dhāseti, dhāsayati.

Bhasa gahaṇe. Bhāseti, bhāsayati.

Pusa dhāraṇe. Poseti, posayati, ābharaṇam dhāretīti attho.

Tusi pisi kusi dasi bhāsāyam. Tuṃseti, tuṃsayati. Piṃseti, piṃsayati. Kuṃseti, kuṃsayati. Daṃseti, daṃsayati.

Khusi akkosane. Khuṃseti, khuṃsayati. Khuṃsanā.

Gavesa maggane. Gaveseti, gavesayati. Gavesako, gavesito, gavesanā, gaveṭṭhi.

Vāsa upasevāyam. Vāseti, vāsayati. Vāso, āvāso.

Hisi hiṃsāyam. Hiṃseti, hiṃsayati.

Nivāsa acchādane. Vattham nivāseti, nivāsayati. Pubbaṇhasamayam nivāsetvā.

Aṃsa saṅghāte. Aṃseti, aṃsayati. Aṃso, aṃsā.

Ettha ca **aṃsoti** koṭṭhāsopi khandhopi vuccati. **Aṃsāti** arisarogo.

Misa sajjane. Meseti, mesayati.

Rasa assādane. Raseti, rasayati. Raso. Rasiyate assādiyate janehīti **raso**.

Rasa sinehane. Raseti, rasayati. Raso.

Tattha **rasetīti** sinehati. **Rasoti** sineho, sinehasambandho sāmaggirasoti vuccati, yaṃ sandhāya brāhmaṇā bhagavantaṃ “arasarūpo samaṇo gotamo”ti avocum.

Siya asabbappayoge. Seseti, sesayati. Seso. **Vipubbo** atisaye, **vipubbo** atisaye, **vipubbo** **sisadhātu** atisaye vattati, viseseti, visesayati. Viseso, visiṭṭho, visesanam.

Missa sammisse. Misseti, missayati. Sammisseti, sammissayati. Misso, misso, missito, sammissito, sammisso iccādīni. **Alambusājātake missāti** itthīnam vattabbanāmaṃ, purisehi saddhiṃ sammissanatāya.

Jusa paritakkane. Joseti, josayati.

Masa pahāsane. Maseti, masayati.

Marisa titikkhāyam. Mariseti. Marisayati.

Pisa pesane. Peseti, pesayati. Pesako, pesito.

Ghusa sadde. Ghoseti, ghosayati. Ugghosayum bodhimaṇḍe pamoditā. Ghoso.

Disī uccāraṇe. Deseti, desayati. Desako, desetā, desito, desanā.

Vasa acchādane. Vāseti, vāsayati. Nivāseti, nivāsayati. Vatthaṃ.

Sakārantadhāturūpāni.

Hakārantadhātu

Araha pūjāyaṃ. Araheti, arahayati. Arahā, araham. “Arahā, khīṇāsavo, asekkho”ti arahato nāmāni.

Sineha sinehane. Sineheti, sinehayati.

Varaha hiṃsāyaṃ. Varaheti, varahayati. Varāho.

Varāhoti sūkaropi hatthīpi vuccati. “Eṇeyyā ca varāhā cā”ti ettha hi sūkaro “varāho”ti vutto, “mahāvarāhassa...pe... nadīsu jaggato”ti ettha pana hatthī “varāho”ti.

Raha cāge. Raheti, rahayati.

Caha parikatthane. Caheti, cahayati.

Maha pūjāyaṃ. Maheti, mahayati. Mahito rājā mahārājā. Vihāramaho, cetiyamaho.

Piha icchāyaṃ. Piheti, pihayati. Pihā, pihālu, apiho, pihanīyā vibhūtiyo.

Kuha vimhāpane. Kuheti, kuhayati. Kuhako. Kuhayati lokavimhāpanaṃ karotīti **kuhako.** Kuhanā.

Saha parisahane. Parisahanam khanti. Saheti, sahayati. Sahanam. **Bhūvādi**gaṇikassa panassa “sahatī”ti rūpaṃ.

Garaha vinindane. Garaheti, garahayati. Garahā. **Bhūvādi**gaṇikassa panassa “garahatī”ti rūpaṃ.

Hakārantadhāturūpāni.

Ḷakārantadhātu

Taḷa tāḷane. Tāḷeti, tāḷayati. Patāḷeti, patāḷayati. Tāḷam. **Tāḷanti** kaṃsatāḷādi.

Taḷa āghāte. Pubbe viya rūpāni.

Khaḷa bhede. Khaḷeti, khaḷayati.

Ḷa thavane. Ḷeti, ḷayati.

Juḷa perañe. Joḷeti, joḷayati.

Pīḷa avagāhane. Pīḷeti, pīḷayati. Nippīḷeti, nippīḷayati. Pīḷanako, pīḷito, pīḷā, pīḷanaṃ, nippīḷanako.

Lāḷa upasevāyaṃ. Lāḷeti, lāḷayati. Upalāḷeti, upalāḷayati. **Bhūvādi**gaṇaṭṭhāya pana vilāsanatthe vattamānāya etissā “lāḷatī”ti rūpaṃ.

Siḷa seḷane. Seḷeti, seḷayati. Seḷento. Ettha **seḷetī**ti seḷitasaddaṃ karoti.

Avaggantadhāturūpāni.

Curādī ettakā diṭṭhā, dhātavo me yathābalaṃ;
Suttasvaññepi pekkhitvā, gaṇhavho atthayuttito.

Curapamukhagaṇo me sāsanaṭṭhaṃ pavutto,
Supacurahitakāmo tampi sikkheyya dhīro;
Supacuranayaṇapāṭhe satthuno tañhi sikkhaṃ,
Piyusamiva manuññaṃ atthasāraṃ labhetha.

Iti navāṅge sātṭhakathe piṭakattaye byappathagatīsu viññūnaṃ

Kosallatthāya kate saddanītipparāṇe

Curādigaṇaparidīpano aṭṭhārasamo paricchedo.

19. Sabbagaṇavinicchaya

Ito paraṃ pavakkhāmi, sabbagaṇavinicchayaṃ;
Sotūnaṃ paṭubhāvattamaṃ, parame piṭakattaye.

Paccayādivibhāgehi, nayehi vividhehi taṃ;
Sukhaggāhāya sotūnaṃ, suṇātha mama bhāsato.

Tattha paṭhamo **bhūvādi**gaṇo, dutiyo **rudhādi**gaṇo, tatiyo **divādi**gaṇo, catuttho **svādi**gaṇo, pañcama **kiyādi**gaṇo, chaṭṭho **gahādi**gaṇo, sattama **tanādi**gaṇo, aṭṭhama **curādi**gaṇo, imasmim bhagavato pāvacaṇe aṭṭhavidhā dhātugaṇā bhavanti. Etesu vikaraṇapaccayavasena –

Bhūvādito akāro ca, sānusāro **rudhādito**;
Akāro cevivaṇṇo ca, **ekāro**kārameva ca.

Yapaccayo **divādīm**hā, **ṇu ṇā uṇā** **suvādito**;
Kyādito pana **nā**yeva, **ppaṇhā** pana **gahādito**.

Oyirā tu **tanādīm**hā, **ṇe ṇayā** ca **curādito**;
Aggahitaggahaṇena, paccayā **dasa pañca** ca.

Hiyyattanī **sattamī** ca, vattamānā ca pañcamī;
Catassetā pavuccanti, sabbadhātukanāmikā.

Etesu visayesveva, **akāro** suddhakattari;
Aññaṭṭha **kha cha** **sādīhi**, sahāpi cupalabbhati.

“Bhavati hoti sambhoti, jeti jayati kīyati;
Deṭṭi yāti iti eti, avati koti saṅkati.

Bhikkhati pivati pāti, vadeti vadati” iti;
Bhūvādīdhāturūpāni, bhavantīti pakāsaye.

Rūpaṃ “rundhati rundhīti, rundheti puna rundhiti;
 Sumbhoti” ccādīrūpāni, **rudhādī**nti dīpaye.

“Dibbati sibbati ceva, yujjati vijjati tathā;
 Ghāyati hāyati” ccādi, rūpamāhu **divā**dinaṃ.

“Suṇoti ca suṇāti ca, vuṇoti ca vuṇāti ca;
 Pāpuṇāti hinotī”ti, ādirūpaṃ **suvā**dinaṃ.

“Kināti ca jināti ca, dhunāti ca munāti ca;
 Asnāti” ccādirūpañca, **kyādī**nti vibhāvaye.

“Gheppati paṭiggaṇhāti, saṇhañca saṇhakoti ca;
 Kaṇhaṃ taṇhā ca tiṇhuṇha”-miccādi ca **gahā**dinaṃ.

“Tanoti ca karoti ca, kayirati sanoti ca;
 Sakkota’ ppoti pappoti”-ccādirūpaṃ **tanā**dinaṃ.

“Coreti corayante ca, cinteti cintayanti ca;
 Manteti” ccādikañcāpi, rūpamāhu **curā**dinaṃ.

Vikaraṇavasenevaṃ, rūpabhedo pakāsito;
 Dhātūnaṃ dhātubhedādi-kusalassa matānugo.

Kiriyyāya dhāraṇato, dhātavo ekadhā matā;
 Dvidhāpi ca pavuccanti, sakammākammato pana.

Tattha **sakammakā** nāma, **gamibhakkhā**dayā siyuṃ;
Ṭhāsādayo **akammā** ca, upasaggaṃ vinā vade;

Sakammakakammabhūto, **divu** iccādayo puna;
 Gahetvāna tidhā honti, evañcāpi vibhāvaye.

Sakammake dvidhā bhivvā, ekakammadvikammato;
 Akammakehi saddhiṃ te, tividhāpi bhavanti hi.

Akammakā **rutā**yeva, ekakammā **gamā**dayo;
 Honti dvikammakā nāma, **duhikaravahā**dayo.

Sakammākammakattamhi, dhātūnamupasaggato;
 Niyamo natthi so tasmā, na mayā ettha vuccati.

Ekaṭṭhānā **gamiccā**dī, dviṭṭhānā **bhūpacā**dayo;
 Tiṭṭhānā **svā**dayo evaṃ, ṭhānatopi tidhā matā.

Gupādayo niyogena, ākhyātatte savuddhikā;
Vaca turādayo na hi, vuddhikā kārītaṃ vinā;

Khi ji iccādayo dhātū, savuddhāvuddhikā matā;
 Iti vuddhivasenāpi, tividho dhātusaṅgaho.

Aluttavikaraṇā ca, luttavikaraṇā tathā;
Luttāluttavikaraṇā, evampi tividdhā siyuṃ.

Tatrāluttavikaraṇā, **gami rudhi divā**dayo;
Pā bhādayo **jiniccādī**, kamato itare siyuṃ.

Suddhassarā ekassarā, tathānekassarāti ca;
Tidhā bhavanti **yuyātā-pābhālādī karā**dayo.

Catudhādinayo cāpi, labbhamānavasena ca;
Gahetabbo nayaññūhi, yathāvuttānusārato.

Puna suddhassarā dhātū, ekassarā ca sattadhā;
Āivaṇṇauvaṇṇanta-eontavasā matā.

Avanṇivaṇṇuvaṇṇante-kārantānaṃ vasena ve;
Anekassaradhātū ca, sattadhāva pakittitā.

Evam pannarasadhāpi, dhātūnamidha saṅgaho;
Tappabhedam pakāseyyūṃ, **iuiccādinā** vidū.

Tatra “igatiyaṃ, **i** ajjhayane, **u** sadde” iccete suddhassarā dhātavo. **Yā rā lā** iccādayo ekassarā **ākā**rantā. **Khijini**iccādayo ekassarā **ikā**rantā. **Pi**iccādayo ekassarā **ikā**rantā. **Khu du ku** iccādayo ekassarā **ukā**rantā, **bhū hū** iccādayo ekassarā **ūkā**rantā. **Khe je se** iccādayo ekassarā **ekā**rantā. **So** iccādayo ekassarā **okā**rantā.

Kara paca saṅgāma iccādayo anekassarā **akā**rantā, **omā**iccādayo anekassarā **ākā**rantā, **saki** iccādayo anekassarā **ikā**rantā. **Cakkhī** iccādayo anekassarā **ikā**rantā. **Andhu**iccādayo anekassarā **ukā**rantā. **Kakkhū** iccādayo anekassarā **ūkā**rantā. **Gile mile** iccādayo anekassarā **ekā**rantāti evam **pannarasavidhena** dhātusaṅgaho.

Atha tettiṃsavidhenapi dhātusaṅgaho bhavati. Kathaṃ?

Dhātū **suddhassarā** ceva, puna **cekassarāpi** ca;
Kakārantā **khakā**rantā, **gantā ghan**tā ca dhātavo.

Cakārantā **chakā**rantā, **jantā jhan**tā ca **ñantakā**;
Ṭakārantā **ṭhakā**rantā, **ḍantā ḍhan**tā ca **ṇantakā**.

Tantā ceva tathā **thantā**, **dantā dhan**tā ca **nantakā**;
Pantā phantā **bakā**rantā, **bhantā mantā** ca **yantakā**.

Rantā lantā **vakā**rantā, **santā hantā** ca **lantakā**;
Iti **tettiṃsadhā** ñeyyo, dhātūnamidha saṅgaho.

Mate satthussa **dhaṇaḷā**, padādimhi na dissare;
Tenekassaradhātūsu, **dhaṇaḷā** na kathiyare.

Ikārantatikā^{nta}-vasena tu yathārahaṃ;
Nāmaṃ sambhoti dhātūnaṃ, **itippaccayayogato**.

Pacibhikkhichidikhādi, **karoti bhavati gami**;
Gatigacchatihotī, ādivohāramuddhare.

Evam tettiṃsabhedeḥi gahitesu nikhilesu dhātūsu –

Sahahiṃsāhavasā, **sī**hasaddagatiṃ vade;
Sahanato hananato, sīhoti hi garū vaduṃ.

Tathā hi sīho vātātapādiparissayampi sahati, “kiṃ me bahūhi ghāṭitehī”ti attano gocarathāya khuddake pāṇe aḡaṇhanto, “māhaṃ khuddake pāṇe viṣamagate saṅghātaṃ āpādesī”ti anuddayavasena sahitabbe khuddakasattepi sahati. Hiṃsitabbe pana kāyūpāpanne sūkaramahiṃsādayo satte hiṃsati, tasmāpi “sīho”ti vuccati. Yathā pana kantanaṭṭhena ādiantavipallāsato takkaṃ vuccati, evaṃ hiṃsanatṭhena sīhoti veditabbo. Atha vā sabbiriyāpathesu dalhavīriyatā suṭṭhu iḥatīti **sīho**. Vuttañhi –

“Yathā sīho migarājā, nisajjaṭṭhānacāṅkame;
Alīnavīriyo hoti, paggaḥitamano sadā”ti.

Aparo nayo –

Sahanā ca hiṃsanā ca, tathā sīghajavattato;
Sīho iccapi bhāseyya, sakyasīhassa sāsane.

Vuttañhi **suttanipātaṭṭhakathāyaṃ** “saharā ca hananā ca sīghajavattā ca sīho”ti.

Idāni tadatthuddhāro vuccate, **sī**hasaddo “sīho bhikkhave migarājā”tiādīsu migarāje āgato. “Atha kho sīho senāpati yena bhagavā tenupasaṅkamī”tiādīsu paññattiyaṃ. “Sīhoti kho bhikkhave tathāgatassetāṃ adhivacanaṃ arahato sammāsambuddhassā”tiādīsu tathāgate. Tattha tathāgate sadisakappanāya āgato.

Etthetaṃ vuccati –

Sīhe paññattiyañcāpi, buddhe appaṭipuggale;
Imesu tīsu atthesu, **sī**hasaddo pavattati.

Rūpiruppatidhātūhi, **rū**pasaddagatiṃ vade;
“Rūpayati ruppātī”ti, vatvā nibbācanadvayaṃ.

Vuttañhetāṃ garūhi “rūpayatīti rūpaṃ, vaṇṇavikāraṃ āpajjamānaṃ hadayaṅgatabhāvaṃ pakāsetīti attho”ti. Vuttampi cetāṃ “**rū**panti kenaṭṭhena rūpaṃ? Ruppānaṭṭhena”ti. Bhagavatā panetaṃ vuttaṃ “kiñca bhikkhave rūpaṃ vadetha, ruppātīti kho bhikkhave tasmā rūpanti vuccati. Kena ruppātīti, sītenapi ruppātī”ti vitthāro. Atthuddhāro panassa heṭṭhā vuttova.

Pasavatemanatthena, dhātunā **udinā** pana;
Samuddasaddanipphattiṃ, vadeyya matimā nara.

Ettha hi **samuddoti** aṭṭhahi acchariyabbhutadhammehi samannāgatattā samuddati attasannissitānaṃ macchamakārādīnaṃ pītisomanassaṃ pasavati janetīti samuddo. Ayamasmākaṃ khanti. **Aṭṭhakathācariyā** pana “samuddanaṭṭhena samuddo, kiledanaṭṭhena tenamanaṭṭhenaṭṭhena vuttaṃ hotī”ti vadanti. **Milindapañhe** pana āyasmā nāgaseno “bhante nāgasena samuddo samuddoti vuccati, kena kāraṇena āpaṃ udakaṃ samuddoti vuccati”ti milindena raññā puṭṭho āha “yattakaṃ mahārāja udakaṃ, tattakaṃ loṇaṃ, yattakaṃ loṇaṃ, tattakaṃ udakaṃ, udakasamattā samuddoti vuccati”ti. Tadā raññā milindena “kallosi bhante nāgasenā”ti vuttaṃ. Ettha hi samaṃ udakena loṇaṃ etthāti samuddoti nibbācanaṃ veditabbaṃ “nīloda”ntiādīsu viya. Tattha **bhadantaṅgasena** matañca amhākaṃ matañca pakatisamuddaṃ sandhāya vuttattā na virujjhati, **aṭṭhakathācariyānaṃ** matampi “taṇhāsamuddo”ti ca “samuddopeso”ti ca āgatāni samuddasarikkhakāni ca taṇhācakkhusotādīni sandhāya vuttattā na virujjhatīti daṭṭhabbaṃ.

Khādhādhātuvasā cāpi, khandhātuvasena vā;
Khanito vāpi dhātumhā, dhāto khampubbatopi vā;
Khandhasaddassa nipphattiṃ, saddakkhandhavidū vade.

Tattha “saṃkhittena pañcupādānakkhandhāpi dukkhā”ti vacanato sayampi dukkhadhammoyeva samāno jātijarābyādhimaraṇadukkhādīhi anekehi dukkhehi khajjati khādiyattī **khandho**, teheva dukkhehi khaññati avadāriyatītipi **khandho**, khaniyati parikhaññatītipi **khandho**, attena vā attaniyena vā tucchattā kham suññākāraṃ dhāretītipi **khandho**, rūpakkhandhādi. Atthuddhārato pana –

Khandhasaddo rāsiguṇa-paññattīsu ca rūlhiyaṃ;
Koṭṭhāse ceva aṃse ca, vattatīti vibhāvaye.

Vuttañhettaṃ **sammohavinodaniyaṃ** vibhaṅgaṭṭhakathāyaṃ – **khandhasaddo** sambahulesu ṭhānesu nipatati rāsīmhi guṇe paññattiyaṃ rūlhiyanti. “Seyyathāpi bhikkhave mahāsamudde na sukaraṃ udakassa pamāṇaṃ gahetuṃ “‘ettakāni udakāḷhakāni’ ti vā ‘ettakāni udakāḷhakasatāni’ ti vā ‘ettakāni udakāḷhakasahasāni’ ti vā ‘ettakāni udakāḷhakasatasahasāni’ ti vā, atha kho asaṅkhyeyyo appameyyo mahāudakakkhandhotveva saṅkham gacchatī”tiādīsu hi rāsito khandho nāma. Na hi parittakaṃ udakaṃ udakakkhandhoti vuccati, bahukameva vuccati, tathā na parittakaṃ rajo rajakkhandho, na appamattakā gāvo gavakkhandho, na appamattakaṃ balaṃ balakkhandho, na appamattakaṃ puññaṃ puññakkhandhoti vuccati. Bahukameva hi rajo rajakkhandho, bahukā ca gavādayo gavakkhandho, balakkhandho, puññakkhandhoti vuccanti. “Sīlakkhandho samādhikkhandho”tiādīsu pana guṇato khandho nāma. “Addasā khā bhagavā mahantaṃ dārukkhandhaṃ gaṅgāya nadiyā sotena vuyhamāna”nti ettha paññattito khandho nāma. “Yaṃ cittaṃ mano mānaṃ...pe... viññāṇaṃ viññāṇakkhandho”tiādīsu rūlhitō khandho nāma. Svāyamidha rāsito adhippeto. Ayañhi khandhattho nāma piṇḍattho pūgaṭṭho ghaṭṭho rāsattho, tasmā rāsīlakkhaṇā khandhāti veditabbā. Koṭṭhāsaṭṭhātipi vattuṃ vaṭṭati. Lokasmiñhi iṇaṃ gahetvā codiyamānā “dvīhi khandhehi dassāma, tīhi khandhehi dassāmā”ti vadanti. Iti koṭṭhāsalakkhaṇā khandhātipi vattuṃ vaṭṭati. Evamettha “**rūpakkhandhoti** rūparāsi rūpakoṭṭhāso, **vedanākkhandhoti** vedanārāsi vedanākoṭṭhāso”ti iminā nayena attho veditabbo. “Khandhe bhāraṃ. Khandhato otāreti, mahāhanusabhakkhandho”tiādīsu pana aṃso “khandho”ti vuccati.

Āpubbayatato cāpi, āyūpapadato puna;
Tanuto tanito vāpi, āyatanaravo gato.

Vuttampi cettaṃ – āyatanato, āyānaṃ vā tananato, āyatassa ca nayanato āyatananti veditabbāṃ. Cakkhu rūpādīsu hi taṃtaṃdvārārammaṇā cittacetāsikā dhammā sena sena anubhavanādīkiccena āyatanti uṭṭhahanti ghaṭanti vāyamanatīti vā vuttaṃ hoti. Te ca pana āyabhūte dhamme etāni tananti vitthārentīti vuttaṃ hoti. Idañca anamatagge saṃsāre pavattaṃ atīva āyataṃ saṃsāradukkhāṃ yāva na nivattati, tāva nayanti, pavattayanatīti vuttaṃ hoti. Iti sabbepime dhammā āyatanato, āyānaṃ vā tananato, āyatassa ca nayanato āyatananti vuccanti.

Apica nivāsaṭṭhānaṭṭhena ākaraṭṭhena samosaraṇaṭṭhānaṭṭhena sañjātidesaṭṭhena kāraṇaṭṭhena āyatanāṃ veditabbāṃ. Tathā hi “loke issarāyatanāṃ vāsudevāyatana”ntiādīsu nivāsaṭṭhānaṃ āyatananti vuccati. “Suvaṇṇāyatanāṃ rajatāyatana”ntiādīsu ākaro, sāsane pana “manorame āyatane, sevanti naṃ vihaṅgamā”tiādīsu samosaraṇaṭṭhānaṃ. “Dakkhiṇāpatho gunnaṃ āyatana”ntiādīsu sañjātideso. “Tatra tatveva sakkhībhābataṃ pāpuṇāti satī satīāyatane”tiādīsu kāraṇaṃ.

Cakkhuādīsu cāpi cittacetāsikā dhammā nivasanti tadāyattavuttitāyāti cakkhādayo ca nesaṃ nivāsaṭṭhānaṃ. Cakkhādīsu te ākiṇṇā tannissitattā tadārammaṇattā cāti cakkhādayo ca nesaṃ ākaro. Cakkhādayo ca nesaṃ samosaraṇaṭṭhānaṃ tattha tattha dvārārammaṇavasena samosaraṇato. Cakkhādayo ca nesaṃ sañjātideso tannissayārammaṇabhāvena tattheva uppattito, cakkhādayo ca nesaṃ kāraṇaṃ tesāṃ abhāve abhāvato. Iti nivāsaṭṭhānaṭṭhena ākaraṭṭhena samosaraṇaṭṭhānaṭṭhena sañjātidesaṭṭhena kāraṇaṭṭhena imehi kāraṇehi ete dhammā āyatananti vuccanti, tasmā yathāvuttenatthena cakkhu ca taṃ āyatanañcāti **cakkhāyatanaṃ**...pe... dhammā ca te āyatanañcāti

āsavasamudayamayena akkhena vijjhivā vibhavarathe samāyojitaṃ anādikālapavattaṃ saṃsāracakkaṃ, tassa so bodhimaṇḍe vīriyapādehi sīlapathavīyaṃ paṭiṭṭhāya saddhāhatthena kammakkhayakaraṃ ñāṇaparasaṃ gahetvā sabbe are hanītipi **arahaṃ**. Vuttañca –

“Arā saṃsāracakkassa, hatā ñāṇāsinā yato;
Lokanāthena tenesa, **arahanti** pavuccatī”ti.

Tathā attahitaṃ parahitañca paripūretuṃ sammā paṭipajjantehi sādhuhi dūrato rahitabbā pariccajitaṃ parihātabbāti rahā, rāgādayo pāpadhammā, na santi etassa rahāti **arahaṃ**. “Araho”ti vattabbe okārassa sānusāraṃ akārādesaṃ katvā “arahaṃ”nti vuttaṃ. Āha ca –

“Pāpadhammā rahā nāma, sādhuhi rahitabbato;
Tesaṃ suṭṭhu pahīnattā, bhagavā **arahaṃ** mato”ti.

Atha vā khīṇāsavehi sekkhehi kalyāṇaputhujjanehi ca na rahitabbo na pariccajitaṃ, te ca bhagavāti **arahaṃ**. Āha ca –

“Ye ca sacchikatadhammā,
Ariyā suddhagocārā;
Na tehi rahito hoti,
Nātho tenā’rahaṃ mato”ti.

Rahoti ca gamanaṃ vuccati, natthi etassa raho gamanaṃ gatīsu paccājātīti **arahaṃ**. Āha ca –

“Raho vā gamanaṃ yassa, saṃsāre natthi sabbaso;
Pahīnajātīmarāṇo, **arahaṃ** sugato mato”ti.

Pāsaṃsattā vā bhagavā **arahaṃ**. Akkharacintakā hi paṃsaṃsāyaṃ **arahasadaṃ** vaṇṇenti. Pāsaṃsabhāvo ca bhagavato anaññasādhāraṇo yathābhuccaguṇādhigato sadevake loke suppaṭiṭṭhito. Iti pāsaṃsattāpi bhagavā **arahaṃ**. Āha ca –

“Guṇehi sadiso natthi, yasmā loke sadevake;
Tasmā pāsaṃsiyattāpi, **arahaṃ** dvipaduttamo”ti.

Imāni nibbacaṇāni “**araha pūjāyaṃ, hana hiṃsāyaṃ, raha cāge, rahi gatiya**”nti imesaṃ dhātūnaṃ vasena idha vuttāni kilesehi ārakattā “araha”nti ca pāpakaraṇe rahābhāvā “araha”nti ca asappurisānaṃ ārakā dūreti “araha”nti ca sappurisānaṃ ārakā āsanneti “araha”nti ca. Nibbacaṇāni pana dhātusaddanissitāni na hontīti idha na gahitāni. Paṃsaṃsā pana atthato pūjā evāti “**araha pūjāya**”nti dhātussa attho bhavituṃ yuttoti idha amhehi gahitā, aṭṭhakathācariyehi tu **arahasaddassa** labbhamānavasena sabbepi atthā gahitā dhātunissitā ca adhātunissitā ca. Kathaṃ? –

Ārakattā hatattā ca, kilesārīna so muni;
Hatasāsaṃsāracakkāro, paccayādīna cāraho;
Na raho karoti pāpāni, **arahaṃ** tena vuccatīti.

Ṭikācariyehipi tatheva gahitā. Kathaṃ? –

Ārakā mandabuddhīnaṃ, ārakā ca vijānataṃ;
Rahānaṃ suppahīnattā, vidūnamaraheyyato;
Bhavesu ca rahābhāvā, pāsaṃsā **arahaṃ** jinoti.

Yathā pana **arahaṃ**saddassa, evaṃ **arahāsaddassāpi** nibbacaṇāni vedītabbāni.

Suppubbagamīto ceva, suppubbagadītopi ca;

Dhīro **sugatasaddassa**, nipphattiṃ samudīraye.

Ettha hi **sugatoti** sobhanaṃ gataṃ etassāti sugato, sundaraṃ ṭhānaṃ gatoti sugato, sammā gatoti sugato, sammā ca gadatīti sugatoti dhātunissitaṃ atthaṃ gahetvā saddanipphatti kātābbā. Vuttañhi **aṭṭhakathāsu** –

“Sobhanagamanattā, sundaraṃ ṭhānaṃ gatattā, sammā gatattā, sammā ca gadattā sugato. Gamanampi hi gatanti vuccati, tañca bhagavato sobhanaṃ parisuddhamanavajjāṃ. Kiṃ pana tanti? Ariyamaggo, tenesa gamanena khemaṃ disaṃ asajjamāno gatoti sobhanagamanattā sugato” tiādi.

Bhagasaddūpapadato, **vanuto vamutopi** ca;
Bhagavāsaddanipphattiṃ, pavade aññathāpi vā.

Atrimāni nibbacañāni – bhagasañkhātā lokiyalokuttarasampattiyo vani bhaji sevīti **bhagavā**. Somanassakumārattabhāvādīsu carimattabhāve ca bhagasañkhātaṃ sirim issariyaṃ yasañca vami uggiri kheḷapiṇḍaṃ viya anapekkho chaḍḍayīti **bhagavā**. Atha vā nakkhattehi samaṃ pavattattā bhagasañkhāte sineruyugandharauddharakuruhimavantādibhājanaloke vami, tannivāsittāvāsasamatikkamanato tappaṭibaddhachandarāgappahānena pajahīti **bhagavāti**.

Paradhātuvasā vāpi, **parūpapadatopi** vā;
Muto tathā **majato** ca, **mayato munato mito**.

Puna **mitoti** etehi, dhātūhi khalu sattahi;
Vade **paramasaddassa**, nipphattiṃ jinasāsane.

Uttamavācī**parama**-saddena saha aṭṭhahi;
Padehi **pāramīsaddaṃ**, vade taddhitapaccayim.

Pārasaddūpapadato, **majatopi mutotha** vā;
Mayato vā **munato** vā, **mito** vā punapi **mito**.

Etehi chahi dhātūhi, mahāpurisavācakaṃ;
Pāramīsaddamīrenti, tato **pāramitā**ravaṃ.

Ettha tāva uttamathavācakap**paramasadda**vasena **pāramī**nibbacaṃ kathessāma. Tato **paradhātuvasena**, tato **parasaddūpapadamudhātādivasena** tato **pārasaddūpapadamajadhātādivasena**.

Dānasīlādiguṇavisesayogena sattuttamatāya paramā. Mahābodhisattā bodhisattā, tesam bhāvo, kammaṃ vā **pāramī**, dānādīkriyā. Atha vā parati pāleti pūreti cāti paramo, dānādīnaṃ guṇānaṃ pālako pūrako ca bodhisatto, paramassa ayaṃ, paramassa vā bhāvo, kammaṃ vā **pāramī**, dānādīkriyā. Atha vā paraṃ sattaṃ attani mavati bandhati guṇavisesayogenāti paramo, paraṃ vā adhikataṃ majjati sujhati kilesamalototi paramo, paraṃ vā seṭṭhaṃ nibbānaṃ mayati gacchatīti paramo, paraṃ vā lokaṃ pamāṇabhūtena ñāṇavisesena idhalokaṃ viya munāti paricchindatīti paramo, paraṃ vā ativiya sīlādiguṇagaṇaṃ attano santāne minoti pakkhipatīti paramo, paraṃ vā attabhūtato dhammakāyato aññaṃ paṭipakkhaṃ vā tadanatthakaraṃ kilesacoragaṇaṃ mināti hiṃsatīti paramo, mahāsatto, paramassa ayaṃ, paramassa vā bhāvo, kammaṃ vā **pāramī**, dānādīkriyā.

Aparo nayo – pāre nibbāne majjati sujhati, satte ca majjeti sodhetīti pāramī, mahāpuriso, tassa bhāvo, kammaṃ vā **pāramitā**. Pāre nibbāne satte mavati bandhati yojeṭīti pāramī, paraṃ vā nibbānaṃ mayati gacchati, satte ca māyeti gametīti pāramī, munāti vā paraṃ nibbānaṃ yāthāvato, tattha vā satte minoti pakkhipatīti pāramī, kilesāriṃ vā sattānaṃ pāre nibbāne mināti hiṃsatīti pāramī, mahāpuriso, tassa bhāvo, kammaṃ vā **pāramitā**, dānādīkriyāva. Iminā nayena pāramīnaṃ

saddattho veditabbo.

Karadhātuvasā vāpi, **kiradhātuvasena** vā;
Kaṃsaddūpapadarudhi-dhātuto vāpi dīpaye;
Karuṇāsaddanipphattiṃ, mahākaruṇasāsane.

Tattha **karuṇāti** paradukkhe sati sādhuṇaṃ hadayakampanaṃ karotīti karuṇā. Kirati paradukkaṃ vikkhīpaṭīti **karuṇā**. Kaṃ vuccati sukhaṃ, taṃ rundhati vibādhati kāruṇikaṃ na sukhāpetīti **karuṇā**.

Vidividhavidadhātu-vasena paridīpaye;
Vijjāsaddassa nipphattiṃ, saddanipphattikovido.

Tattha **vijjāti** vindiyaṃ kāyasucaritādiṃ vindati yāthāvato upalabhatīti vijjā. Tamokhandhādīpadālanatṭhena vā attano paṭipakkaṃ vijjhatīti **vijjā**. Tato eva attano visayaṃ viditaṃ karotīti **vijjā**.

Medhadhātuvasā ceva, **medhādhātūhi** ca dvidhā;
Medhāsaddassa nipphattiṃ, medhāvī samudīraye.

Tattha **medhāti** sammohaṃ medhati hiṃsatīti medhā. Pāpake vā akusale dhamme medhati hiṃsatīti **medhā**. Atha vā –

“Paññā hi seṭṭhā kusalā vadanti,
 Nakkhattarājāriva tārakānaṃ;
 Sīlaṃ siriñcāpi satañca dhammo,
 Anvāyikā paññavato bhavanti”’ti

Vacanato pana medhati sīlena siriya satañca dhammehi saha gacchati, na ekikā hutvā tiṭṭhatīti **medhā**. Aparo nayo – sukhumampi atthaṃ dhammañca khippameva meti ca dhāreti cāti **medhā**, ettha **metīti** gaṇhātīti attho. Tathā hi **aṭṭhasāliniyaṃ** vuttaṃ “asani viya siluccaye kilese medhati hiṃsatīti medhā, khippaṃ gahaṇadhāraṇatṭhena vā medhā”’ti.

Ranjadhātuvasā ceva, rāpubbatiratopi ca;
Rattisaddassa nipphattiṃ, saddatthaññū vibhāvaye.

Ranjanti sattā etthāti **ratti**, rā saddo tiyyati chijjati etthāti **ratti**, sattānaṃ saddassa vūpasamakāloti attho.

Mā māne iti **soanta**, kammanīti cubhohi tu;
 Dhātūhi **māsasaddassa**, nipphattiṃ samudīraye.

Tathā hi sattānaṃ āyuṃ mānanto viya siyati antaṃ karotīti **māso**, cittaṃmāsādayo dvādasa māsa. Seyyathidaṃ? Citto visākho jeṭṭho āsālho sāvaṇo bhaddo assayujo kattiko māgasiro phusso māgho phagguṇoti. Tatra citto māso “rammako”’ti vuccati. “Yathāpi rammake māse, bahū pupphanti vārijā”’ti pāli dissati. Bhaddo pana “poṭṭhapādo”’ti vuccati.

Atha vā **māsoti** aparāṇnavisesassapi suvaṇṇamāsassapi nāmaṃ. Tattha aparāṇnaviseso yathāparimite kāle asiyati bhakkhiyatīti **māso**, itaro pana “mama ida”’nti masiyati āmasiyati gaṇhiyatīti **māsoti** vuccati.

Saṃpubbavadacarehi, **saṃvaccharavassa** tu;
 Nipphattiṃ samudīreyya, sakyasīhassa sāsane.

Tathā hi taṃ taṃ sattaṃ dhammapavattiñca saṅgama vadanto viya carati pavattatīti **saṃvaccharo**.

Bhidibhikkhidhātuvasā, atha vā bhayavācakaṃ;
Bhīsaddaṃ purimaṃ katvā, **ikkhadhātuvasena** ca;
Bhikkhusaddassa nipphattiṃ, kathayeyya vicakkhaṇo.

Tathā hi kilese bhindatīti **bhikkhu**. Chinnabhinnapaṭadharotipi **bhikkhu**. Bhikkhanasīlotipi **bhikkhu**. Saṃsāre bhayaṃ ikkhati, ikkhanasīloti vā **bhikkhu**.

Sadabhidīhi dhātūhi, **sabbhis**addagatiṃ vade;
 Sappurise ca nibbāne, esa saddo pavattati.

Atrimāni nibbacanāni – sīdanasabhāve kilese bhindatīti **sabbhi**, sappuriso, yo “ariyo”tipi “paṇḍito”tipi vuccati. Apica sīdanasabhāvā kilesā bhijjanti etthāti **sabbhi**, nibbānaṃ, yaṃ “rāgakkhayo”tiādināmaṃ labhati. Tathā hi **saṃyuttaṭṭhakathāyaṃ** vuttaṃ “yasmā nibbānaṃ āgama sīdanasabhāvā kilesā bhijjanti, tasmā taṃ sabbhīti vuccatī”ti.

Etthetaṃ vadāma –

“Yasmā nibbānamāgama, saṃsīdanasabhāvino;
 Klesā bhijjanti taṃ tasmā, sabbhīti amataṃ’bravu’nti.

Brūdhātusadadhātūhi, **bhis**isaddassa sambhavaṃ;
 Guṇehi brūhitā dhīrā, porāṇācariyā’bravuṃ.

Tathā hi bravantā ettha sīdantīti **bhisīti** **bhis**isaddassa sambhavaṃ porāṇā kathayiṃsu.

Sukhadhātuvasā cāpi, **supubbakhādatopi** vā;
Supubbakhanuto vāpi, **sukhas**addagatiṃ vade.

Sukhanti hi sukhayatīti sukhaṃ. Yassuppajjati, taṃ sukhitam karotīti attho. Suṭṭhu dukkhaṃ khādatītipi **sukhaṃ**. Suṭṭhu dukkhaṃ khaṇatītipi **sukhaṃ**.

Dukkhadhātuvasā cāpi, **dupubbakhādatopi** vā;
Dupubbakhanuto vāpi, **dukkhas**addagatiṃ vade.

Dukkanti hi dukkhayatīti dukkhaṃ. Yassuppajjati, taṃ dukkhitam karotīti attho. Duṭṭhu sukhaṃ khādatītipi **dukkhaṃ**. Duṭṭhu sukhaṃ khaṇatītipi **dukkhaṃ**. Atha vā dvidhā sukhaṃ khaṇatītipi **dukkhaṃ**.

Gandhadhātuvasā cāpi, **gamudhātuvasena** vā;
Gamudhādhātuto vāpi, **gandhas**addagatiṃ vade.

Tathā hi gandhayatīti **gandho**, attano vatthum sūcayati “idaṃ sugandhaṃ, idaṃ duggandha”nti pakāseti, paṭicchannaṃ, vā pupphaphalādiṃ “idamettha atthi”ti pesuññaṃ karonto viya ahosīti attho. Atha vā gandhayati chindati manāpagandho sugandhabhāvena duggandhaṃ, amanāpagandho ca duggandhabhāvena sugandhanti **gandho**. Ettha pana **gandhas**addassa chedanavācakatte –

“Atijātaṃ anujātaṃ, puttamicchanti paṇḍitā;
 Avajātaṃ na icchantī, yo hoti kulagandhano”ti

Ayaṃ pāḷi nidassanaṃ. Vāyunā vā nīyamāno gacchatīti **gandho**. **Kaccāyanasmiñhi** “khādāmagamaṇaṃ khandhandhagandhā”ti **khāda**magamiicetesam dhātūnaṃ yathākkamaṃ

khandha andhagandhādesā vuttā. Atha vā gacchanto dhariyate soti **gandho**. Vuttañhetam bhadantena **buddhadattācariyena** veyyākaraṇena niruttinayadassinā “dhariyatīti gacchanto, gandho sūcanatopi vā”ti.

Rasadhātuvasā ceva, **ramāsadhātutopi** ca;
Rasasaddassa nipphattim, āhu dhammarasañño.

Rasoti hi rasanti tam assādentīti **raso**, ramantā tam asantītipi **raso**. Vuttampi cetam “ramamānā na’santīti rasoti paridīpito”ti. Tatrāyamatto – devamanussādayo sattā yasmā ramamānā nam dhammajātam asanti bhakkhanti, tasmā tam dhammajātam raso nāmāti niruttaññūhi paridīpitoti. Padacchedo pana evam veditabbo –

Nam asanti na santīti, padacchedo siyā tahim;
Kammakārahāvena, attho hi tattha icchito.

Iti vuttānusārena, avuttesu padesupi;
Yathārahaṃ nayaññūhi, nayo neyyo susobhano.

Dhātucintāya ye muttā, anipphannāti te matā;
Te cāpi bahavo santi, **pītalohitakā**dayo;

Nipphanne api dhātūhi, sadde **dhagā**tiādayo;
Anipphanamva pekkhanti, **gavā**dividhibhedato.

Tathā hi “gacchatīti go”, iti vuttapadam puna;
Anipphanam karitvāna, “gāvo” iccādikambravum.

Ekantena anipphanā, saddā **viḍūḍabhā**dayo;
Dhātūrūpakasaddā ca, “pabbatāyati”ādayo.

Seyyathidaṃ? “Viḍūḍabho, tisso, yevāpano, pītam, lohitaṃ” iccevamādīni nāmikapadāni anipphanāni bhavanti. “Nīlam, pītam, yevāpanako” iccādīni pana nīlavaṇṇe pītavaṇṇe. **Ke re ge saddeti** dhātuvasena āgatattā nīlatīti **nīlam**, pītatīti **pītam**, ye vā pana itivacanena bhagavatā kiyate kathiyateti **yevāpanakoti** nibbacanamarahantīti nipphannānīti vattabbāni. Keci panettha vadeyyum “nanu nīlati pītatītiādīni kriyāpadāni tepītake buddhavacane na dissantī”ti? Kiñcāpi na dissanti, tathāpi etarahi avijjāmānā purāṇabhāsā esāti gahetabbāni. Yathā hi “nāthātīti nātho”ti ettha kiñcāpi “nāthātī”ti kriyāpadam buddhavacane na dissati, tathāpi **nātha yācanopatāpissariyāsīsanesūti** dhātuno diṭṭhattā aṭṭhakathācariyā gaṇhimsuyeva, evam sampadamidaṃ daṭṭhabbam. Na hi kriyāpadaparihīno dhātu vucceyya.

Kiñca bhīyyo – yathā “yāva byāti nimīsati, tatrāpi rasatibbayo”ti **jātakapāliyam** imasmim buddhuppāde devamanussānam vohārapathe asaṅcarantaṃ purāṇabhāsābhūtam “byāti”ti kriyāpadampi dissati, tathā “nīlati, pītatī”tiādīhipi purāṇabhāsābhūtehi kriyāpadehi bhavitabbam. Tattha **yāva byātīti** yāva ummīsati. Ayañhi tasmiṃ kāle vohāro, yasmim kāle bodhisatto cūḷabodhi nāma paribbājako ahoṣi. Yathā pana **viḍūḍabhasaddā**dayo dhātuvasena anipphannā nāma vuccanti, tathā “pabbatāyati, samuddāyati, ciccīṭayati, dhūmayati, duddubhāyati, mettāyati, karuṇāyati, mamāyati” iccevamādayo ca “chattīyati, vatthīyati, parikkhāriyati, dhanīyati, paṭṭiyati” iccevamādayo ca “atihathayati, upaviṇayati, daḷhayati, pamāṇayati, kusalayati, visuddhayati” iccevamādayo ca dhātuvasena anipphannāyeva nāma vuccanti.

Tattha “pabbatāyati”tiādīsu saṅgho pabbatamiva attānamācarati **pabbatāyati**, evam **samuddāyati**. Saddo ciccīṭamiva attānamācarati **ciccīṭayati**. Vatthu dhūmamiva attānamācarati **dhūmayati**. Saddo duddubhaiti ācarati **duddubhāyati**, bhikkhu mettāyati, tathā karuṇāyati. “Mama ida”nti gaṇhati **mamāyati**. Achattaṃ chattamiva ācarati **chattīyati**. Aputtam puttamiva ācarati

puttīyati, sissam ācariyo, attano pattamicchati **pattīyati**. Evaṃ vatthīyati, parikkhārīyati, cīvarīyati, dhanīyati, paṭīyati. Hatthinā atikkamati **atihattayati**. Vīṇāya upagāyati **upavīṇayati**. Daḷhaṃ karoti vīriyaṃ **daḷhayati**. Pamāṇaṃ karoti **pamāṇayati**. Kusalaṃ pucchati **kusalayati**. Visuddhā hoti ratti **visuddhāyati**.

Tatrāyaṃ padamālā – “pabbatāyati, pabbatāyanti. Pabbatāyasi, pabbatāyatha. Pabbatāyāmi, pabbatāyāmā”ti iminā nayena aṭṭhannaṃ vibhattīnaṃ vasena sesaṃ sabbam yojetabbaṃ, evaṃ “samuddāyati, chattīyati”tiādīsu. Tatra kārītavasenapi “pabbatāyantaṃ payojayati pabbatāyati, puttīyantaṃ payojayati puttīyati” iccādi padasiddhi bhavati. Ayaṃ pana padamālā – pabbatāyati, pabbatāyanti. Pabbatāyasi. Sesaṃ yojetabbaṃ. Icevaṃ dhātuvasena nipphannānipphannapadāni vibhāvītāni.

Idāni dhātugaṇalakkhaṇaṃ, adhātulakkhaṇaṃ, kārītapaccayayogaṃ, sakārītekakammadvikammatickammapadaṃ, ūhanīyarūpagaṇaṃ, dhātūnaṃ ekagaṇīkadvigaṇīkategaṇīkapadaṃ, suddhakattuhetukattupadarūpaṃ, kammabhāvapadarūpaṃ, ekakārītadvikārītapadaṃ, akārītadvikammakapadaṇca sabbametaṃ yathārahaṃ kathayāma.

Tatra sabbadhātukanissite suddhakattuppayoge suddhassaradhātuto vā ekassarato vā anekassarato vā apaccayassa parabhāvo **bhūvādigaṇalakkhaṇaṃ** sāmāññalakkhaṇavasena, visesalakkhaṇavasena pana ākhyātatte **ikārantānekassaradhātuto** saha apaccayena niccaṃ niggahītāgamaṇaṇca nāmīkatte niggahītāgamanamattaṇca **bhūvādigaṇalakkhaṇaṃ**. Ākyātatte kattari dhātūhi apaccayena saddhiṃniyatavasena niggahītāgamaṇaṃ **rudhādigaṇalakkhaṇaṃ** sāmāññalakkhaṇavasena, visesalakkhaṇavasena pana ākhyātatte kattari dhātūhi **ivaṇṇekārokārapaccayehi** saddhiṃ niyatavasena niggahītāgamaṇaṇca nāmīkatte aniyatavasena niggahītāgamanamattaṇca **rudhādigaṇalakkhaṇaṃ**. Kattari dhātūhi ādesalābhālābhino yapaccayassa parabhāvo **divādigaṇalakkhaṇaṃ**. Kattari dhātūhi yathārahaṃ **ṇu ṇā** **uṇāpaccayānaṃ** parabhāvo **svādigaṇalakkhaṇaṃ**. Kattari dhātūhi **nāpaccayassa** parabhāvo **kiyādigaṇalakkhaṇaṃ**. Kattari dhātūhi ākhyātatte appakatarappayogavasena nāmīkatte pacurappayogavasena **ppaṇhāpaccayānaṃ** parabhāvo **gahādigaṇalakkhaṇaṃ**. Kattari dhātūhi yathāsambhavaṃ **oyirappaccayānaṃ** parabhāvo **tanādigaṇalakkhaṇaṃ**. Ākhyātatte kattari dhātūhi sabbathā **ṇeṇayappaccayānaṃ** parabhāvo **curādigaṇalakkhaṇaṃ** sāmāññalakkhaṇavasena, visesalakkhaṇavasena pana ākhyātatte **ikārantadhātuto** saha **ṇe ṇayapaccayehi** niccaṃ niggahītāgamaṇaṇca nāmīkatte niggahītāgamanamattaṇca **curādigaṇalakkhaṇaṃ**. Gaṇasūcakānaṃ paccayānamaparattaṃ **adhātulakkhaṇaṃ**. Iti dhātugaṇalakkhaṇamadhātulakkhaṇaṃ vibhāvitaṃ.

Kārītapaccayassa yoge “ṇe ṇayo ṇāpe ṇāpayo cā”ti ime cattāro kārītapaccayā.

Ne ṇayāsuṃ uvaṇṇantā,
 Ādantā pacchimā duve;
 Sesato caturōdve vā,
Ṇayoyeva adhātuto.

Tatra sāveti, sāvayati. Bhāveti, bhāvayati, obhāseti, obhāsayati. Imāni kārīte uvaṇṇantadhāturūpāni.

Dāpeti, dāpayati. Hāpeti, hāpayati. Nhāpeti, nhāpayati. Nahāpeti, nahāpayati. Ākārantadhāturūpāni.

Soseti, sosayati. Sosāpeti, sosāpayati. Ghosāpeti, ghosāpayati. Akārantadhāturūpāni.

Maggo saṃsārato lokaṃ ṇāpeti, ṇāpayati. Idhāturūpāni niggacchāpetīti etesamattho. Imāni hi **nīpubbāya** idhātuyā vasena sambhūtāni hetukatturūpāni. Tathā hi suddhakattubhāvena maggo sayam ṇāyati, saṃsārato niggacchatīti ṇāyoti vuccati.

Pāveti, pāvayati, **udhātūrūpāni**. Vadāpetīti etesamattho. Imāni hi papubbāya **udhātuyā** vasena sambhūtāni hetukatturūpāni. Tathā hi “yo ātumānaṃ sayameva pāvā”ti suddhakattupadaṃ āhaccabhāsitaṃ dissati.

Khepeti, khepayati. Kaṅkheti, kaṅkhayati, kaṅkhāpeti, kaṅkhāpayati. Ācikkhāpeti, ācikkhāpayati. **Ivaṇṇantadhātūrūpāni**.

Khiyeti, khiyayati. Milāyeti, milāyayati. Ekārantadhātūrūpāni.

Siyeti, siyayati. **Okārantadhātūrūpāni**.

Pabbatāyāyati, puttiyāyati. Adhātunissitāni rūpāni. Iminā nayena sesāni avuttānīpi rūpāni sakkā viññātuṃ viññunā pāḷinayaññunāti vitthāro na dassito. Iti kārītapaccayayogo saṅkhepena vibhāvito.

Idāni **sakāritekakammādīni** brūma –

Akammakā ekakammā, dvikammā vāpi honti hi;
Kārītapaccaye laddhe, sakammā ca dvikammakā.

Sayaṃ sodheti so bhūmiṃ, sodhāpeti paremaḥiṃ;
Naraṃ kammaṃ kārayati, viññeyyaṃ kamato idaṃ.

Dvikammikā sambhavanti, tikammā ettha dīpaye;
“Issaro sevakam gāmaṃ, ajaṃ nāyeti” iccapi.

“Naro narena vā gāmaṃ, ajaṃ nāyeti” iccapi;
Kammaṭṭhadīpakamyeva, karaṇaṃ ettha icchitaṃ.

Iti sakāritekakammādīni vibhāvītāni.

Idāni **ūhanīyarūpagaṇaṃ** brūma – hoti, bhoti, sambhoti, idaṃ **bhūvādirūpaṃ**. Sumbhoti, parisumbhoti, idaṃ **rudhādirūpaṃ**. Nindati, vinindati, bandhati, idaṃ **bhūvādirūpaṃ**. Chindati, bhindati, rundhati, idaṃ **rudhādirūpaṃ**. Deti, neti, vadeti, anveti, idaṃ **bhūvādirūpaṃ**. Rundheti, paṭirundheti, idaṃ **rudhādirūpaṃ**. Buddheti, palibuddheti, idaṃ **curādirūpaṃ**. Jayati, sayati, palāyati, milāyati, gāyati, idaṃ **bhūvādirūpaṃ**. Hāyati, sāyati, nhāyati, idaṃ **divādirūpaṃ**. Kathayati, cintayati, bhājayati, idaṃ **curādirūpaṃ**. Gabbati, pagabbati, idaṃ **bhūvādirūpaṃ**. Kubbatī, krubbati, idaṃ **tanādirūpaṃ**. Hinoti, cinoti, idaṃ **svādirūpaṃ**. Tanoti, sanoti, karoti, idaṃ **tanādirūpaṃ**. Cinteti, cintayati, idaṃ katturūpañceva hetukatturūpañca. Kanteti, kantayati, idaṃ hetukatturūpameva. Bhakkheti, bhakkhayati, vādeti, vādayati, idaṃ suddhakatturūpañceva hetukatturūpañca. **Miyyatīti** kattupadañceva kamma-padañca. **Bhāvēthāti** bahuvacanañceva ekavacanañca. **Samyamissanti** anāgatavacanañceva atītavacanañca. **Anusāsati** ākhyātañceva nāmikañca. **Gacchaṃ vidhamam nikkhaṇanti** nāmikañceva ākhyātañca. Ettha ākhyātatte **gacchanti** anāgatavacanaṃ, **vidhamanti** atītavacanaṃ, **nikkhaṇanti** parikappavacanaṃ, sabbaṃ vā etaṃ padaṃ anāgatādhivacanantīpi vattum vaṭṭateva. Iminā nayena aññānīpi ūhanīyapadāni nānappakārato yojetabbāni. Imāni padāni dubbhiññeyyavisesāni mandabuddhīnaṃ sammohakarāni ācariyapācariye payirupāsītva vedanīyānīti ūhanīyarūpagaṇo vibhāvito.

Idāni **ekagaṇikādīni** vadāma – **dhā dhāraṇe**, **bhūvādi**gaṇikavaseṇāyaṃ ekagaṇikā sakammikā dhātu. Bhagavā sakalalokassa hitaṃ dadhāti vidadhāti, puriso atthaṃ saṃvidheti, nidhiṃ nidheti, imāni suddhakattari bhavanti. “Saṃvidhāpeti, vidhāpeti”ti imāni hetukattari bhavanti. Kamme pana bhāve ca “anuvidhīyatī”tiādīni bhavanti. Tathā hi kamme “nidhi nāma nidhīyatī”ti ca “dhīyati dhapiyatī dheyya”nti ca rūpāni dissanti. Tatha kamme “kammaṃ sattehi anuvidhiyyati, kammāni sattehi anuvidhiyyanti. Bho kamma tvaṃ sattehi anuvidhiyyasi, ahaṃ kammaṃ sattehi anuvidhiyyāmi”tiādīnā yojetabbam. Bhāve pana “satto dukkhaṃ anuvidhiyyati, sattā dukkhaṃ

kathetuṃ labbhati. “Marati, miyatī”ti imāni suddhakattupadāni, “satto sattaṃ māreti, mārayati, mārapeti, mārapayatī”ti imāni kārītapadasaṅkhātāni hetukattupadāni. Ettha ca yo amatam sattaṃ maraṇam pāpeti, so vadhako māreti mārayati mārapeti mārapayatīti ca vuccati. Satto sattehi māriyati mārapiyatīti imāni kammaṃpadāni. Bhāvapadamappasiddham. Evamaññatrāpi pasiddhatā ca appasiddhatā ca upaparikkhitabbā.

Khāda bhakkhaṇe. Ayam pana **bhūvādigaṇikavasena** ekagaṇiko sakammako dhātu. Khādati, saṅkhādati, imāni suddhakattupadāni. Puriso purisena purisaṃ vā pūvaṃ khādeti khādayati khādāpeti khādāpayati, imāni hetukattupadāni. Ettha ca yo akhādantaṃ khādantaṃ vā khādāhīti payojeti, so khādāpako khādeti khādayati khādāpeti khādāpayatīti ca vuccati. Khajjati, saṃkhajjati, saṅkhādiyati. Imāni kammaṃpadāni. Atrapanāyam pāḷi “atītam pāham addhānam rūpena khajjīṃ, seyyathāpāham etarahi paccuppanna rūpena khajjāmi. Ahañceva kho pana anāgataṃ rūpaṃ abhinandeyyam, anāgatenapāham rūpena khajjeyyam, seyyathāpetarahi khajjāmī”ti. Bhāvapadam na labbhati sakammakattā imassa dhātussa. **Bhūvādigaṇo.** Ayam nāmadhātu ekantarudhādigaṇikoti appasiddho.

Divādigaṇe tā pālāne. Lokam tāyati santāyati. Imāni sakammakāni suddhakattupadāni. Hetukattupadam pana kammaṃpadañca bhāvapadañca appasiddhāni.

Sudha saṃsuddhiyam. Cittaṃ sujhati visujhati. Imāni akammakāni suddhakattupadāni. Sodheti, sodhayati, sodhāpeti, sodhāpayati, imāni hetukatturūpāni. Ettha ca yo asuddham ṭhānam suddham karoti, so sodhako sodheti, sodhayatīti vuccati, esa nayo aññatrāpi īdisesu ṭhānesu. Yo pana asuddhatṭhānam sayam asodhetvā “tvaṃ sodhehi”ti aññam payojeti, so sodhāpako sodhāpeti sodhāpayatīti vuccati. Esa nayo aññatrāpi īdisesu ṭhānesu. Tathā hi “kāreti, kārayati, kārapeti, kārapayatī”tiādīsu ayam nayo na labbhati, evaṃ labbhamānanayo ca alabbhamānanayo ca sabbattha upaparikkhitabbo. Imā panettha pāḷiyo –

“Paccantadesavisaye, nimantetvā tathāgataṃ;
Tassa āgamaṃ maggaṃ, sodhenti tuṭṭhamānasā”ti ca

“Maggaṃ sodhemahaṃ tadā”ti ca. Imā hi pāḷiyo sahatthā sodhanaṃ sandhāya vuttā. “Āyasmā pilindavaccho rājagahe pabbhāraṃ sodhāpeti leṇam kattukāmo”ti pana pāḷi, “kiṃ bhante thero kārapeti”ti, “pabbhāraṃ mahārāja sodhāpemi leṇam kattakāmo”ti ca pāḷi. Imā parehi sodhāpanam sandhāya vuttā. “Kassa sodhiyati maggo”ti idaṃ kammaṃpadam, bhāvapadam pana appasiddham. Iminā nayena yāva **curādigaṇā** yojetabbam.

Dvigaṇikatte subha sobhe. Sobhati vatāyam puriso. **Subha pahāre.** Yo no gāvova sumbhati sumbhoti iccapi dīssati. “Sumbhotī”ti ca **kaccāyanamate** rūpaṃ, imāni kattupadāni. Nagaram sobheti, sobhayati. Puriso purise coram sumbheti, sumbhayati, sumbhāpeti, sumbhāpayati. Imāni hetukattupadāni. Kammabhāvapadāni labbhamānālabbhamānavasena yathāsambhavaṃ yojetabbāni. **Bhūvādirudhādigaṇikarūpāni.**

Paca pāke. Puriso bhattam pacati. Nerayiko niraye pacati. Kammaṃ pacati. Bhattam pacati. Pāramiyo paripaccanti. Phalāni paripaccanti, pakkāni hontīti attho. Garavo pana –

Ñāyuttavaram tattha, datvā sandhiṃ tihetukam;
Pacchā pacati pākānam, pavatte aṭṭhake duveti ca –

“Asaṅkhāraṃ sasaṅkhāra-vipākāni na paccatī”ti ca evaṃ **pacatipadassa** dvigaṇikarūpassa sakammakattam icchanti. Evaṃ pana sātṭhakathe teṭṭhake buddhavacane kuto labbhā. Teṭṭhake hi buddhavacane “kappaṃ nirayamhi pacati. Yāva pāpaṃ na pacati. Nirayamhi apacci so”ti evaṃ akammakattamyeva dīssati. Ettha vadeyyum “nanu **paca pāke**”ti ayam dhātu sakammako, tena ‘paccatī’ti padassa **divādigaṇikarūpassapi** sato sakammakattam yujjati, tasmāyeva ‘paccati pākānam pavatte aṭṭhake duve’tiādīsu vutta”nti. Ettha vuccate – yathā “**chidi dvidhākaṇe, bhidi vidāṇe**”ti dhātūnam **rudhādigaṇe** pavattānam “rukkham chindati, bhittim bhindati”ti

rūpapadānaṃ sakammakattepi sati **divādiḡaṇaṃ** pattānaṃ tesam dhātūnaṃ “udakaṃ chijjati, ghaṭo bhijjati”ti rūpapadāni akammakāniyeva bhavanti, yathā **bhūvādiḡaṇe** pavattassa **pacadhātussa** “bhattaṃ pacatī”ti rūpapadassa sakammakattepi sati **divādiḡaṇaṃ** pattassa “niraye paccati, kammāni vipaccantī”ti rūpapadāni akammakāniyeva bhavanti.

Athāpi vadeyyuṃ “nanu ca bho yathā ‘āsavehi cittāni vimuccimṣū’ti ettha “āsavato cittāni vimuccimṣū’ti ca ‘āsavehi kattubhūtehi cittāni vimuccimṣū’ti ca evaṃ **divādiḡaṇikassa** dhātussa ‘vimuccimṣū’ti rūpapadassa akammakattaṇca sakammakattaṇca bhavati, tathā ‘niraye paccati, kammāni vipaccantī’ti ca akammakattenapi bhavitabbaṃ. ‘Paccati pākānaṃ pavatte aṭṭhake duve, asaṅkhāraṃ sasaṅkhāravipākāni na paccatī’ti sakammakattenapi bhavitabba’nti. Akammakatteneva bhavitabbaṃ, na sakammakattena, “paccati pākāna’ntiādinā vuttappayogānaṃ “āsavehi cittāni vimuccimṣū’”ti payogena asamānattā. Tathā hettha “vimuccimṣū’”ti padaṃ kammarahitakattuvācakayaṃpaccayantampi bhavati kattusahitakammavācakayaṃpaccayantampi. “Vimuccimṣū’”ti imassa hi padassa kammarahitayaṃpaccayavantattā “āsavehī”ti karaṇavacanaṃ apādānakāravācakaṃ bhavati. ‘Cittāni’”ti paccattavacanaṃ pana kattukāravācakaṃ bhavati. Tathā “vimuccimṣū’”ti padassa kattusahitakammavācakattā “āsavehī’”ti karaṇavacanaṃ kattukāravācakaṃ bhavati. “Cittāni’”ti paccattavacanaṃ pana kammakāravācakaṃ bhavati. Ayaṃ nayo “paccati pākāna’ntiādinā vuttappayogesu na labbhati. Tathā hi tattha paccattavacanaṃ kattāraṃ vadati, upayogavacanaṃ kammaṃ vadatīti daṭṭhabbaṃ. Kārite “puriso purisena purisaṃ vā bhattaṃ pāceti pācayati pācāpeti pācāpayatī”ti ca, “anante bodhisambhāre, paripāceti nāyako’”ti dassanato pana “paripāceti, paripācayatī”ti ca rūpāni bhavanti. Imāni hetukattupadāni. Kamme – yaññadattena odano paccate, bhāvapadaṃ appasiddhaṃ. Imāni **bhūvādivādiḡaṇikarūpāni**. Iminā nayena aññānipi dvigāṇikarūpāni yojetabbāni.

Tegaṇikatte su pasave. Hetuphalaṃ savati, pasavati. **Su savane.** Saddho dhammaṃ suṇoti, suṇāti. **Su himsāyaṃ.** Yodho paccāmittaṃ sunāti. Imāni yathākkamaṃ **bhūvādivādiḡaṇikāni** kattupadāni. Tathā hetunā phalaṃ saviyyati, unnādasaddo pathavīundriyasaddo viya suyyati. Yodhena paccamitto suniyyati. Imāni kammaṃpadāni. Bhāvapadaṃ na labbhati sakammakattā imesaṃ dhātūnaṃ. Iminā nayena aññānipi tegaṇikarūpāni upaparikkhitvā yojetabbāni. Atra paṇāyaṃ nayavibhāvanā –

Bhvādirudhādikā dhātū, **svādivādikā** tathā;
Rudhādikadivādiṭṭhā, bhūvādikacurādikā.

Bhūvādikagahādiṭṭhā, bhvādivādiḡaṇikā;
Evamādiḡapabhedehi, vitthārentu vicakkhaṇā.

Icevaṃ saṅkhepato yathārahaṃ ekagaṇikadvigāṇikategaṇikavasena suddhakattuhetukattukammabhāvapadāni ca sakāritekakammāni ca sakāritadvikammāni ca sakāritatikammāni ca dassitāni.

Idāni **ekakāritadvikāritapadānaṃ** vacanokāso anupatto, tasmā taṃ vadāma. **So antakammaṃ.** Arahattamaggo mānaṃ siyati, kammaṃ pariyoṣiyati. Imāni tāva suddhakattupadāni. Ettha **mānaṃ siyatīti** mānaṃ samucchindati. **Kammaṃ pariyoṣiyatīti** kammaṃ nipphajjati. **Pari ava** iccupasaggavasena hi idaṃ padaṃ akammakaṃ bhavati, attho pana “pariyoṣānaṃ gacchatī”ti sakammakavasena gahetabbo. Attanā vippakataṃ attanā pariyoṣāpeti. **Idamekaṃ kāritaṃ** hetukattupadaṃ. Ettha pana **pariava** iccupasaggavasena akammakabhūtaṃ **sodhātussa** laddhakāritapaccayattā ekakammameva sakāritapadaṃ bhavati. Attanā vippakataṃ parehi pariyoṣāpeti. **Idaṃ dvikāritaṃ** hetukattupadaṃ. Ettha ca pana **pari ava** iccupasaggavasena akammakabhūtaṃ **sodhātussa** laddhakāritapaccayadvayattā dvikammakaṃ sakāritapadaṃ bhavati. “Pariyoṣāpeti”ti idampi **pari ava** pubbasmaṃ **sodhātumhā nāpe nāpe** iti paccayadvayaṃ katvā **avasaddassokāraṇca** katvā tato **yakāragamaṇca** anubandhaṇakāralopaṇca paṭhamapaccaye **pakāraṇca** dvīsu ca ṭhānesu pubbasaralopaṃ katvā nipphajjatīti daṭṭhabbaṃ.

Idāni tā pāliyo atthantaraviññāpanatthaṃ āhaccadesitākārena ekato kathayāma – “attanā

vippakataṃ attanā pariyosāpeti, āpatti saṅghādisesassa. Attanā vippakataṃ parehi pariyosāvāpeti, āpatti saṅghādisesassā’ ti ettha “bhikkhū” ti hetukattupadaṃ ānetabbaṃ. **Attanā vippakatanti** ettha ca **attanā**ti vippakaraṇakriyāya kattukārakavācakaṃ karaṇavacanāṃ. **Vippakatanti** kammakārakavācakaṃ upayogavacanāṃ. **Attanā pariyosāpeti**ti ettha pana **attanā**ti abyayapadabhūtena **sayams**saddena samānatthaṃ vibhatyantapatirūpakaṃ abyayapadaṃ, **sayams**saddasadisam vā tatiyāvibhatyantam abyayapadaṃ. Tathā hi “attanā pariyosāpeti” ti vuttavacanassa “sayam pariyosāpeti” ti attho bhavati “attanā ca pāṇātipātī” tiādīsu viya. **Parehi pariyosāvāpeti**ti ettha pana **parehī**ti kammakārakavācakaṃ karaṇavacananti gahetabbaṃ, “sunakhehipi khādāpentī” ti ettha “sunakhehī” ti padaṃ viya. Ettha hi yathā “rājāno coraṃ sunakhe khādāpentī” ti upayogavasena attho bhavati, tathā “bhikkhu attanā vippakataṃ pare jane pariyosāvāpeti” ti upayogavasena attho bhavati. Evaṃ imasmiṃ acchariyabbhutanayavicitte bhagavato pāvācane dvikāritapaccayavantampi padamatthīti sārato paccetabbaṃ. Ayaṃ nayo sukhumo sāsane ādaraṃ katvā āyasmantehi sādhuakaṃ manasi kātabbo. Yassa hi atthāya idaṃ pakaraṇaṃ karimha, na ayaṃ attano mati, atha kho pubbācariyānaṃ santikā laddhattā tesaññeva matīti daṭṭhabbaṃ.

Idāni **akāritadvikammikapadānaṃ** vacanokāso anuppatto, tasmā tāni kathayāma, tāni ca kho dhātuvāsena evaṃ veditabbāni savinicchayāni. Seyyathidaṃ?

Duhikaravahipucchi, yāci bhikkhi ca nibrūti;
Bhaṇivadivacibhāsi, sāsidadhināthadhātu.

Rudhi ji cipabhutīti, ye te dvikammakā dhīrā;
Pavadumapi viyuttā, kāritappaccayehi ca.

Apādānādike pubba-vidhimhā sahime’bravuṃ;
Upayogavacanassa, nimittanti sanantanā.

Ete **duhā**dayo dhātū, tikammāpi bhavanti tu;
Kāritappaccaye laddhe, iti ācariyā’bravuṃ.

Tatrimāni udāharaṇāni – gavaṃ payo duhati gopālako. Gāviṃ khīraṃ duhati gopāladārako. Tattha **payoti** upayogavacanāṃ, “yaso laddhā na majjeyyā” ti ettha “yaso” ti padamiva. Manogaṇikassa hi īdisampi upayogavacanāṃ hoti aññādisampi. Issaro gopālaṃ gavaṃ payo duhāpeti. Gopālena gāvo khīraṃ duhitā. Gohi payo duhatīti ettha apādānavisayattā dvikammakabhāvo natthi. “Visāṇato gavaṃ duhaṃ, yattha khīraṃ na vindatī” ti ettha pana apādānavisayattepi gavāvayavabhūtassa visāṇassa viṣuṃ gahitattā “gavaṃ khīraṃ duhanto” ti dvikammikabhāvo labbhatīti daṭṭhabbaṃ. **Duhino** payogoyaṃ.

Karotissa payoge kaṭṭhamaṅgāraṃ karoti, suvaṇṇaṃ kaṭakaṃ karoti, sace je saccaṃ bhaṇasi, adāsiṃ taṃ karomi. Ettha ca **aṅgāraṃ karotī**ti pariccattakāraṇavasena vuttaṃ. Kaṭṭhañhi aṅgārabhāvassa kāraṇaṃ, aṅgāre kate kāraṇabhūtassa kaṭṭhassa kaṭṭhabhāvo vigacchati. **Kaṭakaṃ karotī**ti idaṃ apariccattakāraṇavasena vuttaṃ. Suvaṇṇañhi kaṭakabhāvassa kāraṇaṃ, kaṭake katepi kārakabhūtassa suvaṇṇassa suvaṇṇabhāvo na vigacchati, atha kho visesantaruppattibhāvena sampajjati. **Adāsiṃ taṃ karomī**ti idaṃ pana ṭhānantaradānavasena vuttaṃ “uparājaṃ mahārājaṃ karomī” ti ettha viya. Tattha “issaro purisena purisaṃ vā kaṭṭhamaṅgāraṃ kāreti. Tathā suvaṇṇaṃ kaṭakaṃ kāretī” ti tikammikappayogopi daṭṭhabbo. Tathā “brahmadatto rajjaṃ kāretī” ti, “brahmadatte rajjaṃ kārente” ti dvikammakappayogo.

Ettheke vadeyyuṃ “nanu ca bho ettha ekameva kammaṃ dissati, kenāyaṃ payogo dvikammikappayogo hotī” ti. Kiñcāpi ekameva dissati, tathāpi atthato dveveva kammāni dissantīti gahetabbaṃ. Tathā hi **brahmadatto rajjaṃ kāretī**ti ettha brahmadatto attano rājabhāvaṃ mahājanena kārayatīti attho. Evaṃ pana atthe gahite “rajjaṃ kārehi bhaddante, kiṃ araññe karissasī” tiādīsipi tvaṃ attano rājabhāvaṃ amhehi kārāpehi, attānaṃ rajje abhisiñcāpehi, mayaṃ taṃ rajje abhisiñcitukāmāti attho samatthito bhavati.

Brahmadatte rajjam kārenteti etthāpi brahmadatte attano rājabhāvaṃ mahājanena kārayanteti attho bhavati. Sāsanasmīhi kāritavisaye karaṇavacanaṃ upayogattahaññeva dīpeti, tasmā atthato dveyeva kammani dissantīti vadāma. Ayamatto **abhidhammaṭṭikāyaṃ** cakkhundriyādinibbacaṇatthavibhāvanāya dīpetabbo. Tathā hi **abhidhammaṭṭikāyaṃ** idaṃ vuttaṃ “**cakkhudvāre indattaṃ kāretīti** cakkhudvārabhāve taṃdvārikehi attano indabhāvaṃ paramissarabhāvaṃ kārayatīti attho. Tañhi te rūpaggahaṇe attānaṃ anuvatteti, te ca taṃ anuvattantī”’ti. Yadi pana **karadhātu** dvikammako, evaṃ sante “brahmadatto rajjam kāretī”’tiādīsu laddhakāritapaccayattā “kāretī”’tiādīhi padehi tikammakehiyeva bhavitabbanti? Na, niyamābhāvato, tādisassa ca payogassa vohārapathe anāgatattā.

Kaṭṭhaṃ purisena aṅgāraṃ kataṃ. Suvaṇṇaṃ kammārena kaṭakaṃ kataṃ, dāsī sāmikena adāsīm katā, evampettha dvikammakappayogā veditabbā. **Suvaṇṇena kaṭakaṃ karotīti** ettha hi viśesanatthe pavattakaraṇavisayattā dvikammikabhāvo na labbhatīti daṭṭhabbaṃ. Ayaṃ nayo aññatrāpi upaparikkhitvā yathāsambhavaṃ netabbo. **Karotissa** payogoyaṃ.

Vahiādīnaṃ payoge rājapurisā rathaṃ gāmaṃ vahanti. Ayaṃ rājā maṃ nāmaṃ pucchati. Parābhavantaṃ purisaṃ, mayaṃ pucchāma gotamaṃ. Āyasmā upāli āyasmatā mahākassapena vinayaṃ puṭṭho. Devadatto rājānaṃ kambalaṃ yācati. Te maṃ asse ayācisuṃ. Dhanaṃ taṃ tāta yācati. Brāhmaṇo nāgaṃ maṇiṃ yācati. Nāgo maṇiṃ yācito brāhmaṇena brahmunā āyācito dhammadesanaṃ bhagavā. Tāpaso kulaṃ bhojanaṃ bhikkhati. Ajaṃ gāmaṃ neti. Ajo gāmaṃ nīto. Mutto campeyyako nāgo, rājānaṃ etadabravi.

Ettha **rājānanti** mukhyato kammaṃ vuttaṃ. **Etanti** guṇato. Tathā **rājānanti** akathitakammaṃ vuttaṃ. **Etanti** kathitakammaṃ. Esa nayo aññatrāpi upaparikkhitvā yathārahaṃ yojetabbo. Evameva “brūhi bhagavā”’tiādīsu sampadānavisayattā dvikammakabhāvo na labbhati. Bhikkhu mahārājānaṃ dhammaṃ bhaṇati. Yaṃ maṃ bhaṇasi sārathi. Yaṃ maṃ vadati. Bhagavantaṃ etadavoca. Pitā puttaṃ bhāsati. Yaṃ maṃ tvaṃ anusāsasi. Sakyā kho pana ambaṭṭha rājānaṃ okkākaṃ pitāmahaṃ dahanti. Bhagavā bhikkhū taṃ taṃ hitapaṭipattim nāthati. Gāvo vajaṃ rundhati gopālako. Dhutto dhuttajanaṃ dhanaṃ jināti. Ettha ca “kamanuttaraṃ ratnavaraṃ jināmā”’ti **punnakajātakapāli** nidassanaṃ. Tatthāyamattho “mayā janindā kataṃ rājānaṃ anuttaraṃ ratnavaraṃ jināmā”’ti. Itthakāyo pākāraṃ cinoti vaḍḍhakī. Aññānīpi yojetabbāni.

Ettha keci puccheyyuṃ “gandhakuṭim padakkhiṇaṃ karoti, buddhaṃ saraṇaṃ gacchāmi. Upāsakaṃ maṃ bhavaṃ gotamo dhāretū”’ti payogesū kiṃ dvikammakabhāvo labbhatī”’ti? Ettha vuccate – “gandhakuṭim padakkhiṇaṃ karotī”’ti ettha na labbhati guṇaguṇīnaṃ vasena gahitattā. “Buddhaṃ saraṇaṃ gacchāmi”’ti etthāpi na labbhati “saraṇaṃ itī gacchāmi”’ti itisaddalopavasena vuttattā. Tathā hi **buddhanti** upayogavacanaṃ. **Saraṇanti** paccattavacanaṃ. “Buddhaṃ mama saraṇaṃ parāyaṇaṃ, aghassa tātā hitassa ca vidhātā”’ti iminā adhippāyena “bhajāmi sevāmi bujjhāmi”’ti attho. “Upāsakaṃ maṃ bhavaṃ gotamo dhāretū”’ti ettha pana dvikammakabhāvo labbhatīti vattabbo “maṃ ito paṭṭhāya upāsakaṃ dhāretū”’ti atthasambhavato “sakyā kho pana ambaṭṭha rājānaṃ okkākaṃ pitāmahaṃ dahanti”’ti **dahadhātuppayogena** samānattā ca, adhippāyatthato pana “maṃ ‘upāsako me aya’nti dhāretū”’ti attho sambhavatīti daṭṭhabbaṃ. Evaṃ akāritāni dvikammikadhāturūpāni vibhāvītāni.

Icevamaṃhehi ādito paṭṭhāya bhagavato sāsanatthaṃ yathāsatti yathābalaṃ dhātuyo ca taṃrūpāni ca tadanurūpehi nānāpadehi nānāatthehi nānānayehi ca yojetvā vibhāvītāni, evaṃ vibhāventehipi amhehi tāsāṃ sarūpaparicchedo atthaparicchedo vā na sakkā sabbaso vattuṃ. Tadubhayañhi ko sabbaso vattuṃ sakkhissati aññatra āgamādhigamasampannehi pabhinnapaṭisambhedehi mahākhīṇāsavehi.

Atthātisayayuttāpi, dhātū honti yato tato. Payogatonugantabbā, anekattā hi dhātavo.

Yenekatthadharā caranti vividhā nāthassa pāṭhe vare,
Tenekatthadharāva honti sahitā nānūpasaggehive;
Dhātūnaṃ pana tesamatthaparamaṃ khīṇāsava paṇḍite,

Vajjetvā paṭisambhidāmatiyute ko sabbaso bhaṇatīti.

Iti navāṅge sāṭṭhakathe piṭakattaye byappathagatīsu viññūnaṃ

Kosallatthāya kate saddanītipparāṇe

Sabbagaṇavinicchayo nāma ekūnavīsatiṃ paricchedo

Saha rūpavibhāvanāya dhātuvibhāvanā niṭṭhitā.

Dhātumālā niṭṭhitā.